

دكتور رعب ٣

الطبعة الأولى

١٤٤٤هـ - ٢٠٢٣م

اسم الكتاب:	دكتور رعب ٣
اسم المؤلف:	أحمد طارق التوني وفريق "عمّار البيت"
التدقيق اللغوي:	ملك محمد جلال
تصميم الغلاف:	محمد درباله
الإخراج الداخلي:	خالد محمود
رقم الإيداع:	٢٠٢٢ / ٢٥٦٩٩
الترقيم الدولي:	٩٧٨-٩٧٧-٨٦٠١٠-٦-٦



ش - حسن خطاب - قسم يوسف بيك - الزقازيق - الشرقية



01020439639



massar.pub1@gmail.com



مسار
للنشر والتوزيع
Massar Publishing & Distribution

جميع الحقوق محفوظة، ولا يسمح بإعادة إصدار هذا الكتاب، أو أي جزء منه، ورقياً أو إلكترونياً، سواء بشكل كامل أو جزئي أو عرضه مجاناً عبر أي وسيلة وبأي شكل من الأشكال من دون الحصول على تصريح خطي من دار مسار للنشر.

دكتور رعب ٣

وأسرار العوالم الغامضة

أحمد طارق التوني
وفريق "عُمار البيت"



إهداء

إلى أحلى وأجمل قلب في الدنيا.. كَانَ حبيبي وصديقي وسندي وقوتي، ولم
يحرمني شيء ورباني، وعلمي وأعطاني حبه وحنانه وعطفه، زرع في داخلي
القيم والمبادئ والأخلاق دون اكتفاء، علمني أَنَّ الكرامة قبل الخبز أحياناً،
علمني كيف أكون قوي بأخلاقي وطبعتي وإحساني، سيظل قدوتي في الحياة،
رحمة الله عليك يا أبي.

إلى أُمِّي الغالية، أطالَ الله عمرها ورزقها الصحة والبركة.

إلى أخوتي ..

إلى محمد، وليث، ومريم، وحسن، وإلى من أختارها قلبي، إلى جميع
أصدقائي.

إلى كل من دعمني ووقف بجانبني لإصل إلى هذه النسخة الأخيرة من سلسلة
كتب "دكتور رعب".

إلى شركاء النجاح في هذا الكتاب، المبدعون حقاً.. مينا بشرى، وسارة زويل،
ومحمد نبيل، وأمنية الجبالي، وزينب محمد، ومنة السيد، ونيرة إسلام، كانت
رحلة رائعة، وفقكم الله جميعاً وأنارَ طريقكم.

مقدمة

كان هناك طفلٌ جميل يُدعى "د.ر" في العقد الأول من عمره، استطاع في فترة قصيرة جداً أن يُخَصِّرَ عشيرة كاملة من الجان، وكان يستخدمهم في أعمال السحر والشعوذة، وحينما تمكّن من ذلك بحرفة؛ قام بمطالعة الكتب القديمة التي تحتوي على أسماء مخلوقات أخرى حقيقية، واستطاع أن يجلبهم من العالم الآخر، ولكن أثناء هذه الأحداث تتلاشى القيم والمبادئ الإنسانية لديه؛ حيث أصبح غذاءه الأساسي هو لحم البشر النقي، بينما كان يقوم بالتنقل عبر الأزمنة عن طريق البوابات النجمية القريبة منه، وانضم إلى عصابة خطيرة جداً تقوم بتعذيب وقتل الأطفال حديثي الولادة أمام كاميرات البث المباشر، وارتكب جرائم عديدة وغامضة.

كبر هذا الطفل واشتد عضدهُ وأصبح أسطورة من ضمن أساطير العالم؛ حيث كان يشبه "الطنطل" في قامته، وأيضاً يمتلك سرعة بديهية في التنقل بين البشر، مما أثار جدل الناس في أمره وقالوا إن هذه القامة كانت متواجدة في العصر الحجري القديم، كيف أتى مرة أخرى إلى عصرنا هذا؟

جسد كهذا وقوة كهذه يجب أن يكون في منظومة خاصة بالكائنات الخارقة للطبيعة، ولا يجب تواجده في المدن أبداً، فانقضض عليه الأناس فوراً وقيدوه بمقابض من حديد، ثم قاموا بتسليمه إلى الشرطة، ولكن السجن أدى إلى وفاته في الحال، حيث أنه لم يكن مُقيّداً بهذا الشكل من قبل.. فمات وارتاح البشر من أذاه، ولكن بعد فترة وجيزة انتشر خبر تواجده في المدن مرة أخرى، ولكن كيف؟ هل استطاع الهروب من المقابر؟

إنه لا يزال على قيد الحياة حتى وقتنا هذا..

لا تكابر يا صديقي فهذه ليست قصة خيالية، إنها هذه قصتك أنت، بعد قراءة هذا الكتاب ستصبح هكذا تماماً، ستتجول عبر كل هذه العوالم لتكتشف الحقيقة السوداء، اعتني بنفسك جيداً ولا تجعلني أتملك منك.

"دكتور رعب" ..

الفصل الأول

"دكتور رعب يمكنه القتل بحرفة دون ترك أثر؛ حيث أنه يتخلص من جثث ضحاياه بأكلهم، فهو عاشق لحوم البشر".

هذا الفصل للكاتب/

أحمد طارق التوني.

الشهير بـ "دكتور رعب"

قام بكتابة الجزء الأول من هذه السلسلة، والجزء الثاني أيضاً بمشاركة بعض المؤلفين معه.

"عالم أكل لحوم البشر"

إزيك؟

أنا جاي أقولك إني بحب أكل اللحم البشري، وبتلذذ بيه وبستطعمه، وعلى فكرة هو لا حرام ولا عيب ولا جريمة هيحاسبني عليها القانون، تحب تجرب؟!

عادي جرّب زي ما ناس كتير جرّبوا، أكثر من ربع سكان العالم جرّبوا طعم لحم البشر، ومش بعيد تكون أنت كمان جرّبت وأنت مش عارف، فيه قبيلة غريبة جدا موجودة على الكوكب الي إحنا عايشين فيه اسمها قبيلة "كورواي"، القبيلة دي يا معلم موجودة في جزيرة غينيا الجديدة الاندونيسية "بوبويه"، القبيلة دي كانت مشهورة بأنها تتغذى على لحم البشر بس، فتّح مخك في الي جاي عشان هتتصدم في الي هتقراه..



الحكاية بدأت في ١٩٦١ بعد ما ابن حاكم مدينة نيويورك اختفى، والعالم اتقلب عليه لأنه اختفى بطريقة غامضة ومحدث عرف مكانه فين، وبعدها بفترة بسيطة جه شوية ناس بيقولوا عليهم باحثين أثريين واكتشفوا القبيلة دي، وأثناء تواجدهم هناك والتحقيق مع عناصر القبيلة دي لقوا حاجة غريبة جداً، وسط الكهف اللي كانوا قاعدين فيه كان فيه كتلة مرمية على الأرض شكلها غامض، متغطية بورق الشجر وملوم عليها كمية دبان رهيبة، لما الباحثين قربوا من الكتلة دي وشالوا ورق الشجر الكبير من عليها اتصدمو من المنظر !!

لقوا رأس ابن الحاكم المفقود وهي متفرغة من المخ والأحشاء وفيهاش غير نص جمجمة وجلد على الوحش، وملاحه كانت باينة أنه هو، لما القبيلة غضبوا عليهم راحوا اتهمجوا على الباحثين بغرض الخطف للطبخ، لأن كان عندهم قاعدة إن أي مخلوق يخطفوه من البشر يطبخوه على طول، ولكن الباحثين قدروا يهربوا منهم بدون فقدان لأحد، الدراسات أثبتت بأن قبيلة "كورواي" تعيش على الجزيرة دي من ١٠٠ ألف سنة تقريباً، ومنغزلين عن العالم وميعرفوش إن فيه أرض تاني عليها بشر عايشين وتكنولوجيا وعالم تاني، كانوا فاكرين إن الفريسة اللي بيصطادوها دي بتكون تايمة في الجزيرة ومفیش منها تاني، عشان كدة بياكلوها، جزيرة غينيا دي كبيرة جداً للدرجة إنها تعتبر ثاني أكبر جزيرة في العالم، قبيلة "كورواي" بقى واخدين نص الجزيرة دي لحسابهم، متخيل عددهم ؟

وكان يُقال كمان إن نسبة الوفيات عندهم قليلة جداً جداً، ودة بسبب غذائهم المعتمد على لحم البشر وعلى النباتات الموجودة على الجزيرة.

الاه!! يعني لحم البشر مطلش مُقرف ومُضرّ، وطلع مُفيد ؟!

آه طبعاً يامعلم مُفيد، ومُفيد جداً كمان، طبعاً أنت فاكِر إنك لما تاكل لحم جنسك هتتسمم وتموت، طب خليك مصمم على الفكرة دي ولحمك أنت اللي

هيتاكل، فيه حيوانات كتير حوالينا بتتغذى على لحم جنسها، بدايةً من الصراصير الي بياكلوا أزواجهم، للفئران الي بياكلوا أطفالهم، ومعاهم الثدييات الكبيرة كمان بياكلوا لحم بعض، لدرجة إن العلماء شكوا بأن أكل لحم جنسك بيبقى وراه فوائد كثيرة، ودة طبعاً لانتشاره في الطبيعة وكدة كدة يا معلم إحنا كلنا على بعضنا كدة مجموعة من الثدييات، أنا مُتفهم رأيك جدًا وعارف إنك متفاجئ من الكلام دة ويمكن التفكير في الموضوع بس هيجيبلك صDAC وشعور بالعثيان والتقزز، وكمان هو موضوع يتحوم حواليه عوامل أخلاقية كثيرة، بس خرينا نسيب المعايير الأخلاقية والاجتماعية على جنب، ونبص للموضوع من ناحية الدين ومن ناحية بيولوجية بحتة، عارف إن الموضوع صعب عليك بس حاول تعرف حتى، على الأقل لإشباع فضولك في المعرفة..

العلماء اكتشفوا بعض الأدلة الي تفيد بأن أكل لحوم البشر فيه فوائد بالنسبة للبشر نفسهم، ومن ضمن الأدلة دي هي الحضارات القديمة الغابرة الي بتتبع ممارسة أكل لحم البشر، ودلائل كتير كانت تشير إلى أن أعماهم بتتجاوز الـ١٠٠ عام، والصحة وقوة البدن لسة موجودة، نفس الدراسات دي بقى يامعلم وضحوا نظرية الفوائد العديدة للحوم البشر، قالك أن القيمة الغذائية للبروتينات الي بيحتوي عليها لحم البشر تتجاوز القيمة الغذائية للحوم الحيوانات الأخرى الي بتساوينا حجمًا، دة كمان تقدر تستفاد بنفس عدد السعرات الحرارية الي موجودة في لحم الحيوان، ودة هيخليك تاخذ طاقة جبارة وبروتين عالي يعزز قوة العظام والبدن، وكمان بتقدر تتخلص من بواقي اللحم دة من جسمك زي أي عملية تخلص بواقي الأكل، والطاقة الي هتطلع بيها لما تاكل "إنسان"، هي نفس الطاقة الي هتحصل عليها لما تاكل "غزالة".

بس شوف الغزالة سعرها كام والإنسان سعره كام؟

اللحم البشري عنده ميزة خاصة بتتعلق بالبروتينات والدهون والمكونات الغذائية الأخرى الي بيحتوي عليها، وخلي بالك كل ما كانت وجبتك قريبة جينياً منك، كل ما تطابقت المزايا الغذائية الخاصة بيها مع احتياجاتك، ودة يشبتلك إن اللحم البشري أفضل أنواع اللحوم المغذية بالنسبة للبشر أنفسهم، يعني لو عايز تستفاد أكثر بفوايد لحم البشر، حاول تاكل من لحم أخوك مثلاً، أو ابنك أو ابوك أو ابن عمك أو ابن خالتك، المهم يكون من نفس دمك، ساعتها هيبقى اللحم لذيق أكثر من لما تاكل لحم واحد صاحبك مثلاً أو مديرك في الشغل أو المدرس بتاعك، بدمتك مفيش حد في بالك عايز تاكل من لحمه؟

الدراسة دي أثبتت لما الحيوانات أكلوا لحم بعضهم وصحتهم بقت أقوى وأعمارهم أطول، ودة الي حصل في قبيلة "كورواي" الي كانوا أفوياء البدن وطوال القامة، بس بالرغم من قوتهم العظيمة دي، إلا أنهم في الفترة الأخيرة كانوا ييموتوا بسرعة، وأجسامهم ضعفت، لأن وقتها انتشر مرض غريب وسطهم اسمه "كورو"، الي بيشتق من مصطلح محلي للدلالة على "الارتعاش" ودي رجفات ورعشات كانت من بين أعراض المرض دة، والقبيلة دي كان الي ييموت عندهم بياكلوه، والي كان ييمرض المرض دة بياكلوه وهو حي، بس معرفوش أن أكل لحم الإنسان المريض هيموتهم، وبدأ عددهم ينقص تدريجياً، المرض دة لما انتشر في القبيلة، أعراضه غيرت نمط المشي للمصابين وكم إن كلامهم أصبح غير مفهوم وعدم الاستقرار العاطفي، وكانوا بيضحكوا ضحكات غريبة ومُرعبة بدون سبب، وانتهى بيهم المطاف للوفيات اليومية، وبعد إجراء دراسات كتير على المرض دة، قالوا أنه يندرج ضمن "الأمراض البريونية"، والمرض البريوني كان تبع مرض "جنون البقر".

يعني الي عايز أوصلهولك لما تحب تاكل إنسان متاكلش إنسان عيان "مريض" لأن حتى لو عنده انفلاونزا خفيفة برضو هيتعبك ومش بعيد يقضي على حياتك،

لازم الجثة الي هتاكلها تكون خالية من الأمراض ولسة طازة وفريش.

عالم آكلي لحوم البشر موجود من ملايين السنين، البشر كانوا يقتلوا وياكلوا بعض عشان كانوا لسة معندهم مهارات صيد الحيوانات، والحوار كان موجود في كل بلاد العالم، واللي نشر الموضوع أكثر أنهم قالوا بسبب لحم البشر قوتهم زادت، لأنهم بياخدوا قوة بشرية من اللحم دة، وكان بيحصل بكثرة في الهند والصين وكوريا الشمالية وغيرها، معظم المؤرخين ربطوا ظاهرة آكلي لحوم البشر بالمجاعات الي انتشرت بسبب الحروب والتصحر وغيرها من الكوارث الطبيعية والبشرية، وفيه مؤرخين تاني ربطوها بالمعتقدات الدينية والثقافية والسلوكات البشرية، بس من خلال قرايتك للعالم دة هتكتشف حقائق غريبة جداً واللي هذكرهم ليك في الكلمتين الجاينين..

بُص .. خيلنا متفقين إن أكل لحم البشر من المحرمات على كافة الأصعدة واختلاف الثقافات في معظمها، لأن اللحم دة ممكن يسببلك أمراض عقلية زي مرض جنون البقر زي ما ذكرت فوق أو مرض الارتعاش والرجف حتى الموت.

لحم البشر مش مرغوب للحيوانات زي ما لحم أجناسهم مرغوب أكثر، الحيوانات مش بتحب تحلي لحم البشر مصدر رئيسي لغذائها، الحيوانات المفترسة ممكن تكون خايفة منك وبتعضك لحد ما تموت وبعد كدة تسيبك وتشوف حيوان تاكله، زي الحوت بالظبط مبيحبش لحم البشر، هو بيقته بس وبعد كدة يرميه للأسماك، ودة بسبب إنهم بيعحبوا لحم أجناسهم أكثر من اللحم الغريب.

كان بيقال إن فيه قبيلة قديمة من آكلي لحوم البشر في البرازيل عندهم طقوس غريبة جداً، وهي أنهم لما يجبوا ياكلوا إنسان كانوا بيعملوله حفلة ويغنوا معاه ويرقصوا ويناموا معاه لمدة شهر، عشان لما حالته النفسية تبقى مضبوطة بيبقى طعمه أحلى وألذ، أما لو كان زعلان أو مريض بيبقى طعمه وحش، وكانوا بيعملوا

كدة مع كل الضحايا.

المشكلة إن الحوار دة مش بس موجود في القبائل عديمة التطور، لأ دة في الولايات المتحدة الأمريكية سنة ٢٠١٣ اكتشفوا أعضاء بشرية كثير جداً متأكلة، وجماعم أطفال بدون مخ.

الجدير بالذكر إن أطباء أوروبا كانوا بيستعينوا باللحم البشري للعلاج من بعض الأمراض، كانوا بياخدوا الدهون البشرية كأدوية لعلاج العظام وكسرها والتواء المفاصل والتهابها، وكمان استخدموا مسحوق جمجمة ناعم لمشاكل الصرع.

أما في الحروب بقى فكان أكل لحوم البشر عادة موجودة في المقاتلين، مش بس عشان المجاعة ولعدم توافر الأكل الطبيعي، لأ دة قالك إن أكل لحم المقاتلين كان بيديهم قوة وشجاعة، يعني أنا لو شايف قدامي مقاتل من الأعداء جسمه قوي وصحته حلوة وقلبه شجاع، هقتله عشان آكل لحمه وآخذ القوة الي جواه وشجاعة القلب، اتعمل أفلام تمثيلية كثيرة جداً عن وحوش آكلي لحوم البشر ولكن دايماً بيظهروا بملامح وحشية وبيشبهوا العفاريت، لكن في الطبيعي الي بياكل لحم البشر بيكون عاقل أكثر وطبيعي زيه زي أي حد.

سنة ١٩٩٦ كان فيه متجر لبيع اللحوم في الولايات المتحدة بيبيع لحم الخنزير للشعب الأمريكي، المطعم دخل في أزمة مالية ومبقاش عارف يجيب لحمه عشان يبيعه، والزباين بتمشي، لحد ما حصلت مشكلة بين صاحب المتجر ومراته بسبب قلة الفلوس، ولما الخناقة كبرت راح قتلها، وخاف من الشرطة وأنهم يلاقوا جثتها، الباشا عمل خطة ذكية حبتين، أخذ جثة مراته للمتجر ودخلها في الجزيرة وقطع أعضائها وحطها في أطباق وبدأ يعرضها على أنها لحم خنزير، وباع كل الكمية للناس بدون ما حد يلاحظ، المفاجأة أن ثاني يوم نفس الزباين جت وطلبوا كمية أكبر من نفس اللحمه الي أخذوها المرة الفاتت، قاهم تمام موجودة، وباعلهم

لحم الخنزير الي كان اشتراه بفلوس بيع لحم مراته، وفي اليوم الي بعده جُم نفس الزباين وقالوله إن اللحمه دي طعمها وحش وعايزين نفس اللحمه الي أخذوها أول امبارح، الرجل فهم أنهم قاصدين لحم مراته، ووعدهم إنه اتعاقد مع شركة سويسرية للحوم وفي خلال أسبوع هيجيب منها تاني، وبالفعل خلال ٤ أيام كان بيعصطاد ضحاياها في المطعم ويقطعهم وينصف لحمهم كويس ويبيعهم على أساس أنهم لحم خنزير، حتى الشرطة المسؤولة عن المنطقة دي بقوا مدمنين طعم اللحمه الجديدة، وصاحب المتجر بقى غني جداً لأنه يبيع أضعاف الي كان يبيعه في الأيام العادية، وساعتها اكتشف إن يوم وفاة مراته كان يوم الهنا والسعد، بس الخايب مصيرُه يقع ..

في يوم من الأيام أهالي المنطقة كانوا يسمعون صوت صريخ جاي من متجر اللحمه، والصوت كل يوم بالليل بيزيد، ولما يروحوا المتجر بيلاقوه مقفول ومفيهوش حد، لدرجة أنهم بلغوا الشرطة عشان يشوفوا حل للموضوع دة، ولما الشرطة راحت لبيت صاحب المتجر قالهم أنه ميعرفش حاجة عن الموضوع دة، ساعتها أصرروا إنه لازم يجي معاهم ويفتحلهم المتجر، وبالفعل راح هناك وهو واثق أن مفيش حد عايش جوة وكل الضحايا هو مقطعهم وحاطتهم في أطباق في التلاجة، بس هو كمان أول ما وصل المتجر سمع صوت صريخ طالع من جوة، وماكنش صوت بشري، كان صوت ضخمة شوية شبيه بصوت الجن، الأهالي قالوا إن المتجر مسكون بالأرواح، بس الأرواح دي جت منين؟

الشرطة كسرت الباب ودخلوا جوة وراحوا المصدر الصوت الي كان طالع من المجزرة الي جوة، وساعتها شافوا قرينة عيون مرمية على الأرض، ولسان بشري ومجمعة وصوابع متقطعة، تم القبض عليه فوراً وأثناء التحقيق اعترف إنه عمل كدة عشان يجيب فلوس ويعرف يعيش.

تفتكر الجزار الي بتشتري منه لحمه دة بيعيلك لحمه مضمونة؟

عادي حتى لو طلع بيع لحم بشري فأنت ليس عليك حرج، أولاً مش هتمرض ولا هيحصلك حاجة، ثانياً مش هيبقى حرام لأنى هذكرلك دلوقتي إن اللحم البشري حلال..

بُص يا سيدي، طبعاً أنت متروحش تقتل إنسان وتاكل لحمه وتقول أصل قريت أن أكل لحم البشر حلال، لا اقرأ كلامي للأخر وافهم امتى يكون حلال وامتى يكون حرام!

ربنا حَرَّمَ أكل لحم الميت وقال : (إِنَّمَا حَرَّمَ عَلَيْكُمُ الْمَيْتَةَ)، لكن ربنا رفع الحرج عن المضطر لو أكل منها إذا لم يجد الطعام الحلال، وكمان بدون ما يتجاوز الحد، وما يكونش قاصد أنه ياكل منها متعمد، ودة تفصيله على النحو التالي ..

-الشَّافعية قالوا "حلال" .. بس لو الإنسان خاف على نفسه من جوع يهلكه بحيث ميقدرش يمشي فينقطع عن رفقته ويضيع، أو خاف أن مرضه يطول أو يصيبه مرض خطير.

-المالكية قالوا "حلال" .. أن يخاف هلاك نفسه يقيناً أو ظناً.

-الحنفية قالوا "حلال" .. إذا خاف على نفسه الهلاك أو تلف عضو.

-الحنابلة قالوا "حلال" .. إذا خاف التلف أو المرض أو الإنقطاع عن رفقته.

بس فيه ناس قالوا لا برضو حرام، ولو حصل إيه مش هاكل لحم بشري لأن فيه حديث عن النبي "صلى الله عليه وسلم" يقول: (كسر عظم الميت ككسره حياً).

يعني حرام مش كدة؟ أنا كنت متأكد إن أكل لحم البشر حرام جداً.

بُص يا معلم أنت مش عشان قرفان من أكل اللحم البشري فهتقول عليه

حرام، ومش معنى أنه حلال يعني لازم تاكله وتحبه، هو بالتأكيد حرام بس
للمضطر كلام تاني، المضطر الي على وشك الموت يجوز له أكل لحم الخنزير وأكل
لحم البشر سواء ميّت أو حيّ.

طب فين الدليل على كلامك دة يا عم أحمد ؟

تعالى أقولك الدليل ..

ركّز يا صديقي .. الشافعية استدّلوا على جواز أكل لحم الإنسان الميّت للمضطر
من الآية دي (فَمَنْ اضْطُرَّ غَيْرَ بَاغٍ وَلَا عَادٍ فَلَا إِثْمَ عَلَيْهِ إِنَّ اللَّهَ غَفُورٌ رَحِيمٌ)،
يعني الآية عامّة تشمل الأدمي وغيره، وكمان لقينا في كتاب "ابن قدامة" رحمه الله
أن استدلال الجمهور بقول النبي "صلى الله عليه وسلم" المذكور فوق، لا دلالة
فيه على حرمة أكل لحم الإنسان الميّت عند الضرورة، فالأكل من اللحم مش من
العظم، والحال هنا حال ضرورة، وعند الضرورة لا يُراعي ما ذكره الجمهور،
يعني حرمة الحيّ مقدمة على حرمة الميت، الشافعية راعوا حوار حرمة الميت على
قد ما قدروا، وقالوا أنك ممكن تاكل اللحم دة عند الضرورة بس وكمان مينفعش
تطبخه أو تشويه، تاكله نيّ وتاكل على قد شبعك وبس متكترش فيه.

يعني حلال يا عم أحمد؟

هقولك الله أعلم، لأن لحد الآن مفيش أقاويل وضّحت إذا كان حلال أكيد
ولا حرام، بس كل الي أقدر أقولهولك إن ربنا ينجينا ومتحطش في موقف زي
دة.

تعالى بقى احكيك عن أشهر آكلي لحوم البشر في الكوكب ..

وهو الكاتب / "إيسي ساجاوا" من طوكيو، مؤلف قصص رعب دموي

ويحكي القصص دي لأصحابه في الجامعة، كان بيدرس في جامعة في باريس، وكان فيه بنت اسمها "رينيه هارتيڤيلت" معاه في نفس القسم وكانت هولندية الجنسية، كان معجب بيها جداً وهيموت عليها، بس هي مكانتش بتحبه ولا كانت بتطيقه، "رينيه" ملاحظها جميلة جداً وبشرتها بيضة وجسمها رشيق وطولها ١,٧٨ سنتيمتر وعمرها ٢٥ سنة، صاحبنا كان طوله ١,٥٢ سنتيمتر وكان يقول على نفسه "القيح البشع" لأنه مكانش راضي بشكله ولا بمستواه، وكان بيخطط عشان يدوق لحم صاحبتة عشان يمكن الجمال دة والرشاقة ينتقلوا عنده لما ياخذ قطعة من جسمها.

الحوار دة حصل سنة ١٩٨١ لما اتجراً وراح للبننت دي وقالها الجامعة كلفتني بشرح أبيات شعر وقصائد، وأنا عايزك تساعدني، وبالمره أعزمك على العشاء في البيت، البننت عشان كانت طيبة وافقت وقالتله حاضر، في نفس اليوم بالليل باب شقة "إيسي ساجاوا" بيخبط .. قام فتح الباب لقاها صاحبتة "رينيه هارتيڤيلت"، رَحَب بيها جداً وقعدوا على الطاولة وخلوها تقرأ أبيات الشعر وقالها هقوم أحضر العشاء، كان عايش لوحده في البيت والبننت بتقرأ الأبيات، وفجأة جه من وراها بحركة خفيفة جداً ورفع البندقية وضربها بالرصاص في رقبتها، المفاجأة أنه أغمى عليه أول ما ضرب نار، وبعد ساعات فاق واستوعب اللي هو فيه وشاف جثة "رينيه" وهي غرقانة دم، وقرر أنه يكمل خطته، راح عندها ومسكها من الفخذ وقعد يعضها بشراسة، بس اللحم مش عايز يتقطع في بوقه، ونزل من بيته بسرعة اشترى سكينه من الجزارة وجه، مسك نفس المنطقة وقطع حتة صغيرة من فخذها وحطها في بوقه بسرعة وقعد يمضغها وهو قرفان ومش طايق نفسه وبوقه بينقط دم من قطعة اللحم دي، وبعد حوالي ربع ساعة قدر يمضغها ويبلعها، وبعدين قطع رجلها والأفخاذ قطع صغيرة وغسلهم كويس وولع البوتاجاز وحرهم، وشال باقي جسمها زي ما هو في التلاجة، ومسح الدم من الشقة وبقي عايش

طبيعي، طبعاً محدش قدر يوصل للبننت وهو فضل يومين ياكل في لحمها لحد ما زهق وقرر يتخلص من الجثة، وفي يوم نزل من بيته بعد ما قطع جثتها وشالهم في أكياس كبيرة وراح ناحية بحيرة في غابة قريبة منه، ورمى أول كيس في البحر ولسة بيرمي الثاني لقي الشرطة في ظهره وقبضوا عليه..

أبوه وأمه جابوله محامين كتير عشان يترافعوا عنه، بس بعد ما اتحبس سنتين في السجن بدون محاكمة، حكم عليه بعدها بأنه مجنون وغير مؤهل للمحاكمة، وأمر أن يوضع في مصحة عقلية لأجل غير مسمى، وخلال الفترة دي جاله زيارة من صديقه الكاتب "إينو هيكو" ولما عرف قصته راح كتبها ونشرها، والقصة وصلت للعالم كله، واكتسب "ساجاوا" شهرة كبيرة جداً، ودة ساهم في تغيير قرار السلطات الفرنسية الي أمرت بترحيله لليابان، وبمجرد ما وصل اليابان خطوه في مستشفى "ماتسوزاوا" للأمراض العقلية، ولما الدكاترة هناك فحصوه قالوا أنه عاقل جداً وطبيعي، والدافع الوحيد للجريمة الي عملها دي هو سبب انحرافه الجنسي، وعشان التهم الموجهة إليه سقطت، تم إغلاق وثائق قضيته في المحكمة الفرنسية ولم يتم إعطائها للسلطات اليابانية، وبالتالي مينفعش احتجاج "ساجاوا" قانونياً في اليابان، وخرج من المستشفى سنة ١٩٨٦ وبقي حُر طليق.

برامج تليفزيونية كتيرة دعت "ساجاوا" عشان يطلع ضيف متحدث يتكلم عن حياته وعن الي اتعرضله، وبالفعل طلع اتكلم عن نفسه لدرجة إن فيه شركات إنتاج كلمته وبقي ممثل كبير وعمل حوالي ٣ أفلام وألّف كتب عن جريمة القتل الي ارتكبتها، بس من جانب تاني كان بيترفض من أي مطعم للشغل، ومفيش وظيفة رضيت بيه، وفي مقابلة مع مجلة "فايس" سنة ٢٠١١ قال: "إنه لعقاب فظيع أن تجبر على كسب لقمة عيشك بينما أنت معروف بأنك قاتل وأكل للحوم البشر".

ياما نفسي آكل لحم حد فبالي كدة !..

وطبعاً زي ما ذكرت فوق إن آكلي لحوم البشر موجودين في كل مكان وكل بلد في العالم، فأنت هتبقى فاكراً أنهم بعيد عن مصر أو عن الأراضي القريبة مننا، بس لا يامعلم خليني أفكرك بأن أكبر أزمة مرت على مصر هي أزمة آكلي لحوم البشر ..



سنة ١٠٣٦ ميلادياً كان حاكم مصر "المستنصر بالله" في العصر الفاطمي، والحادثة دي بقى اسمها "الشدة المستنصرية" عشان حصلت في ظل حُكم الخليفة "المستنصر بالله" المهم في الفترة دي مصر انهارت وضعفت وحصل جفاف لنهر النيل، وبسبب العوامل دي انتشرت المجاعة وسط الناس وانتشر الفقر وغلاء الأسعار، كان سعر رغيف العيش ٥٠ دينار، وسعر الكلب ٣ دينار، بقت السرقة علني والخطف زاد ووصل الأمر بأن الخليفة "المستنصر بالله" باع كل ما يملك، باع ٨٠ ألف ثوب، و٢٠ ألف سيف وكمائن أحجار كريمة وجواهر، والناس اتحوّلت ساعتها من الطابع البسيط إلى مفترسين يدوروا على الأكل ومش لاقينه، وصل

ببهم الحال أنهم أكلوا قطط الشوارع والكلاب، والموضوع موقفش للحد دة بس
لأ، دول أكلوا لحم البشر كمان.

مصريين وأكلوا لحم البشر؟؟

آه يامعلم المجاعة متعرفش جنسك ولا جنسيتك، وصلت المأساة في الأول
إنهم نبشوا القبور وطلعوا الجثث وقطعوها وطبخوها وأكلوا لحمها، وكان يُقال
إن فيه جماعات يبقفوا فوق سقف البيوت ويصنعوا "الخطاطيف" لأصطياد المارة
بالشوارع من فوق الأسطح، ولما يبقفشوا حد بينزلوا يتهجموا عليه وياكلوه..

وفي يوم من الأيام كان وزير البلاد عنده حصان واحد، أمر شاب صغير أنه
يحرس الحصان، بس الشاب من شدة جوعه كان ضعيف ومقدرش على مقاومة
العصابات، وبالفعل الحصان اتسرق والشاب حاول يقاومهم بس مقدرش،
الوزير عرف بسرقة الحصان وغضب جداً وقبض على الحرامية وعدمهم على
شجرة مشنوقين، وفي اليوم الثاني مكنش موجود على الشجر غير العظام بس، لأن
الناس أكلوهم من شدة الجوع.

المؤرخين قالوا إن من شدة غلاء الأسعار كان فيه واحدة ست أكلت رغيف
عيش بألف دينار، لما باعت كل حاجة عندها الي بتساوي ١٠٠٠ دينار باعتهم
بـ ٣٠٠ دينار عشان تقدر تشتري شوال قمح، ولما رجعت للبيت اعترضها الناس
وهجموا عليها وأخذوا شوال القمح منها، وهي مقدرتش تاخذ غير كفة إيد
دقيق من الشوال بأيديها، وقدرت تحبز رغيف واحد من العيش، ويعتبر الرغيف
بـ ١٠٠٠ دينار، الموضوع كان صعب لدرجة إن كان فيه ست تانية خرجت من
بيتها ومعها جوهر من اللؤلؤ، وقفت في نص الشارع وقالت: "مين ياخذ مني
الجوهر دة ويديني قمح"، محدش رضي ياخذ منها، راحت قالت: "طيب أنت لو
مش هتتفني وقت الضيقة فأنا مش عايزاك" ورمته على الأرض ومشيت، اللؤلؤ

بقي على الأرض ٣ أيام محدش ألفت له.

وكان يُقال أن الزوجة لما زوجها يتوفى مكانتش بتدفن جثته، كانت بتطبخه وتاكله هي وعيالها، لأنها لو دفتته هيجي حد غيرها وياكله، يعني تاكله هي أحسن ما حد تاني ياكله، وقریب جداً الأيام دي هتعود من تاني بس بشكل أقطع! عالم آكلي لحوم البشر مُرعب من ساعة ما ظهر لحد وقتنا ده، لأنه ما زال موجود ولسة الظاهرة مخفّتش، كل حاجة سهلة ومباحة قدامك وتقدر تعمل اللي أنت عايزه، أنت عارف إن فيه موقع بيخليك تعرض أعضاء من جسمك للبيع، عن شرط .. إن اللي هيشترى عضو منك هياكله في فيديو بث مباشر قدامك، وفيه إقبال كبير على الموقع ده وفيه اللي بيع دراغه وفيه اللي بيع قطعة من فخذه وبيكونوا قاعدين بيتفرجوا على الشاري وهو بياكل القطعة دي قدامهم ويتلذذ بيها، كل ده عشان الحصول على مقابل مادي، أنت بقى لو دخلت الموقع ده هتبيع إيه من جسمك؟

في النهاية يا صديقي .. دكتور رعب بيقولك إنك لو مُضطر؟! .. هتحب تاكل اللحم البشري، وهتتلذذ بيه وتستطعمه، وعلى فكرة هو لا حرام ولا عيب ولا جريمة هيحاسبك عليها القانون، بس خليك فاكر إن ده في حالة الضرورة القصوى وبس.

"مَنْ"

"عالم الجريمة"

سمعت قبل كدة عن شخص صَنَعَ أثاث بيته من جلد أجساد ضحاياہ ؟

بُص يا صديقي .. سنة ١٩٥٧ في الولايات المتحدة، كان فيه واحدة ست اسمها "برنيس وردن" ، صاحبة متجر أجهزة في مدينة "بلينفيلد"، الست دي اختفت فجأة يوم ١٦ فبراير ومحدث عرفلها طريق، واحد من اللي كانوا واقفين عند المتجر بتاعها قال أن فيه عربية نقل كبيرة تابعة للمتجر خرجت من ورا المبنى حوالي الساعة ٩:٣٠ الصبح، والمتجر كان مقفول طول اليوم، والناس فاكرين أنه مقفول بسبب موسم صيد الغزلان، موضوع اختطاف الست دي كان غريب جداً بسبب إن محدش شافها وهي بتتخطف، طب عرفوا ازاى إنها اتخطفت؟

بُص يا معلم ابن الست "برنيس" ماسكتش، وقال أنه لازم يبلغ الشرطة عشان تيجي تشوف الحواردة، وعلى الساعة ٥ المغرب كدة كانت الشرطة وصلت وابنها فتح المتجر مع نائب قائد شرطة المنطقة، وأول ما فتحو المتجر لقوا المفاجأة!!..

المتجر كله بُقع دم في الأرض وعلى السقف وعلى الحيطان وفي كل مكان، اتصدمو من هول المنظر، ولما اتكلموا مع ابن الضحية عن تفاصيل اليوم الي قبله .. قالم إن فيه شخص جه امبارح اشترى شوية حاجات من والدتي، وقال إنه هيجي النهاردة الصبح يكمل شراء باقي الحاجات.

ولما الشرطة سألوہ عن مواصفات الشخص دة .. قالم أنا اعرف إن اسمه "جين"، ولو دورنا عليه ممكن نوصل لحاجة !

طيب مين بقى "جين" دة كان؟

بُص يا صديقي هو في البطاقة بتاعته اسمه "إد جين" .. في الستينيات من عمره وقت الجرائم اللي عملها، تقدر تقول عليه جزار أو غول أو أي لقب يدل على الوحشية اللي جواه، ودة قاتل متسلسل بيروح ينبش قبور الضحايا وياخد منهم لبيته ويسلخ جلد أجسادهم ويصنع منها أثاث لبيته، وكان يُقال أنه يطبخ اعضائهم وياكلها، وكان بيعمل أقنعة وملابس من جلد الضحايا..



نرجع لموضوعنا ..

في نفس يوم الواقعة بالليل وبشكل سرّي جداً، قبضت الشرطة على "جين" وتوجهوا لمزرعته وفتشوها، لقوا المفاجأة الكبيرة في انتظارهم هناك، جسد "برنيس وردن" من غير رأس !!

ومتقطع منه حنت صغيرة في إحدى الغرف، ومتعلقة بالمقلوب من رجليها، وإيديها متكفة، مش بس كدة .. دة أطلق عليها الرصاص ببندقية وقتلها، وبعد ما

قتلها شوّه جثتها.

ولما السُّلطات قامت بتفتيش البيت بتاعه، لقوا حاجات غريبة جداً..

عظام بشرية كاملة.

سلة مهملات مصنوعة من جلد الإنسان.

عدة كراسي مغطاة بجلد آدمي.

جهاجم على سريريه.

جهاجم أنثوية، تم نشر بعضها بالمنشار.

أوعية مصنوعة من جهاجم بشرية.

مشد مصنوع من جذع أنثوي من الكتفين إلى الخصر.

ملابس مصنوعة من جلود بشرية.

أقنعة مصنوعة من جلد رؤوس الإناث.

وجه تم سلخه في كيس ورقي.

جمجمة في صندوق.

رأس "برنيس وردن" بالكامل في كيس.

قلب برنيس وردن "في كيس بلاستيكي أمام الموقد".

أعضاء تناسلية أنثوية في صندوق حذاء.

حزام مصنوع من الحلقات البشرية الأنثوية.

أربع أنوف.

غطاء مصباح مصنوع من جلد وجه بشري.

أظافر أصابع.

تم تحريز وتصوير هذه الأدلة ثم تم تدميرها لاحقاً.

طبعاً لما حققوا معاه، جين قالهم أنه بين عامي ١٩٤٧ و ١٩٥٢، قام بما يصل إلى ٤٠ زيارة ليلية لثلاثة مقابر محلية لاستخراج الجثث المدفونة مؤخراً وكان تحت تأثير حالة "شبيهة بالدوار" زي ما هو قال، وفي حوالي ٣٠ مرة من الزيارات دي، قال إنه كان يستفيق من الحالة دي ويتصدم لما يلاقي نفسه في المقبرة !!

اعترف جين بنش وسرقة الجثث من القبور، كان جين يسرق الجثث من القبور بعد وقت قصير من الجنازات قبل أن يتم تغطيتها بالتراب.

تم حفر القبور الي حددها جين لأن السلطات مكانتش متأكدة من الي يقوله جين، وإذا كان قادر على حفر قبر بمفرده خلال ليلة واحدة؛ تم العثور على اثنين من القبور التي تم نبشها فارغة بعد الانتقال والمعاينة، باين اعترافات جين كانت حقيقية ولا إيه؟ واعترف كمان بشوية جرائم عملها، رئيس الشرطة أصيب بصدمة بسبب جرائم جين المرعبة وبعدها مات، وكمات تعمل من قصته أفلام تمثيلية بتوصف حياة وجرائم القاتل المدعو "إد جين".

كل شخص فينا جواه مجرم صغير، يطلع لما بتحصل مشكلة مع شخص تاني، ويراوذه شعور الانتقام، الانتقام من الخصم، بس خليني أقولك إنك عشان تبقي مجرم وتدخل عالم الجريمة ده مش بالسّاهل، وحتى لو كان بالسّاهل فأنت هتدفع عمرك كله مقابل الجريمة الي هترتكبها في خصمك، وقبل ما تعمل أي حاجة عايزك تقرأ عن العالم ده كويس جداً، لأنه عالم كبير وغامض شوية..

دايمًا الإنسان يتولد وهو على الفطرة السليمة التي متعرفش الأذى أو الإِجرام، وبسأهم البيئة المحيطة بيه في تشكيل شخصيته والتأثير فيه، وفيه ناس بتتعرض لتأثير سلبي من قبل البيئة المحيطة بيهم، ودة بيخليهم ينحرفوا للسلوك الغير طبيعي، وارتكاب الممارسات غير المقبولة بالنسبة لإنسان سوي، يبقى قدامهم اتجاه واحد بس يمشوا عليه، وهو الاتجاه إلى الإِجرام ..

طب معناه إيه الكلام الكبير دة ياعم أحمد ؟

بُص يا سيدي .. عالم الجريمة دة مشهور بأنه عالم الانحراف عن مسار المقاييس الجمعيّة، وهو عمل أو امتناع عن عمل شيء ينصّ القانون عليه، ويُجازي فاعله بعقوبة جنائيّة، يعني أنت بتعمل أي حاجة خارجة عن القانون يبقى اسمها "جريمة"، مبدئيًا الجريمة في "الشريعة الإسلامية" هو عمل محظور شرعي نهي الله عن فعله، أما الجريمة من "الناحية القانونيّة" فهي عمل غير مشروع ناتج عن إرادة جنائيّة، ويقرر القانون لها عقوبة أو تصرفًا احتياطيًا، أما بقى الجريمة من "الناحية الاجتماعيّة والنفسيّة" فهي عمل يخترق الأسس الأخلاقيّة ويدمرها ..

نروح للمُجرم بقى، المُجرم هو الإنسان البالغ الراشد اللي ارتكب فعل مؤذي نصّ عليه قانون مُعيّن، ودة بيترتّب عليه عقوبات جنائيّة مُحددة في القانون نفسه.

طيب إيه اللي بيخلي الإنسان يرتكب جريمة ويبقى مُجرم ؟

بُص يا معلم الحوار دة مبني على أسباب كتير جدًّا وأهمهم هو انعدام وضعف الدّين، وكم ان ضعف الأخلاق لأنه رُكن مهم جدًّا من أركان الإصلاح الاجتماعي، دة غير التأثير النفسي اللي بيخليه حاسس بشعور الانتقام على طول، البيئة الفاسدة كمان بتخلي الإنسان يتأثر بالي حوالية سواء كانوا فاسدين أو صالحين، نقدر نقول

كمان البطالة والظروف الاقتصادية الصعبة، لأن ناس كثير جداً بتتجه للجرائم من حيث القتل أو الخطف للحصول على الأموال بأسلوب غير مشروع ..

المُخدّرات .. أنت تعرف إن ٧٠٪ من جرائم القتل ترجع لتعاطي المخدرات!!
ودي دراسة عملتها الجمعية التونسية لعلوم الإجرام، وفيه كمان دراسة أمريكية قالت إن ٩٣٪ من المجرمين مرّوا بسوابق إدمان على المخدرات والكحول.

فيه شخص اسمه "إدوين لمرت" مُتخصّص في علم الاجتماع والأنثروبولوجيا، دة أبرز من يتبنّى نظرية "لقب المجرم"، وهي تفترض أنّ الأشخاص يقومون بفعل السلوكات الإجرامية كنتيجة لردود أفعال المجتمع المحيط بهم تجاههم، ويُقسّم إدوين لمرت مراحل تشكل حالة الانحراف كالآتي:

السلوك الأوّل الي يقوم بيه الشخص لاختبار رد فعل المجتمع عليه.
قيام المجتمع بأخذ رد فعل رسميّة، وبتتبعي غالباً الرّدود دي على شكل لقب الشخص المنحرف بلقب "المجرم".

قبول المنحرف باللقب الي وُصفوه بيه، ويحاول هنا المنحرف التأقلم مع وضعه الجديد كشخصٍ منبوذ.

فيه عالم أمريكي كمان اسمه "إدوين سذرلاند" .. بيقول إيه بقى صاحبنا "إدوين" .. قالك إن السلوك الإجرامي مش شرط يتناقل بالوراثة، ومش شرط أنه يكون سلوك خلقيّ أو نفسي، بل هو سلوك مكتسب بيتعلّمه الفرد كأّي سلوك تاني من خلال البيئة المحيطة والمؤثرة فيه، أو الحاجات الي بيتفرج عليها في التلفزيون، محور النظرية دي بيدور على أن الفرق بين ممارسات الأفراد يرتكز بشكل أساسي على نوعية مجتمعه، والأفراد الي بيُحيطوا بيه ويختلط بيهم.

الجرائم أنواع كثير جداً منها جرائم سياسيّة متعلقة بنظام الحكم ودي بتبقى

اعتداء على نظام الحكم، وفيه الجرائم الجنسية زي هتك الأعراض والإغتصاب والاستغلال الجنسي، فيه بقى جرائم اقتصادية خاصة بالنظام الاقتصادي ودي خطيرة جداً لأنها بتأثر على جيل كامل، زي ما حصل بالظبط في حادثة بورسعيد أثناء مباراة النادي الأهلي ونادي المصري اللي حصلت في ستاد بورسعيد يوم ١ فبراير ٢٠١٢، وراح ضحيتها ٧٤ قتيلاً ومئات المصابين بحسب ما أعلنت مديرية الشؤون الصحية في بورسعيد، ودي أكبر حادثة إجرامية حصلت في تاريخ الرياضة المصرية، بعدها حصلت حادثة في نفس الشهر ولكن في ٢٠١٥ في ستاد الدفاع الجوي اللي أسفر عن مقتل ٢٢ شخصاً من مشجعي نادي الزمالك.

أخطر أنواع الجرائم بقى اللي بتبقى عقوبتها الإعدام والمؤبد، ودي بتكون "جناية"، أما في المرتبة الثانية من الجرائم بتبقى اسمها "جنحة" ودي عقوبتها سجن ٣ سنوات ودفع غرامة، وأقلهم خطورة هي اللي اسمها "المخالفة" اللي بتبقى عقوبتها السجن من يوم إلى ١٠ أيام وغرامة مالية..

أما صورة الفعل للجريمة فهي بتتقسم لثلاث أقسام..

جريمة آنية: وهي الجريمة الوقتية، اللي بتحصل مباشرة وتتم بنفس الوقت على صورة جريمة كاملة؛ كالقتل اللي يُفرض لإرهاق الروح بنفس وقت الجريمة، أو كالحريق اللي بيولع بنفس اللحظة، كإلقاء نار على شيء قابل للاشتعال.

الجريمة المستمرة: هي فعل جرمي يتصف بالاستمرار والامتداد عبر الزمن، ويطول زمن ارتكابها؛ بحيث يخفي المجرم معالم جريمته، كسرقة الأشياء وإخفائها، وكجرائم القتل اللي مش بيظهر فاعلها في البداية، وزى شراء المخدرات وإخفاء الأسلحة، واختطاف الأشخاص وحبسهم.

الجريمة المتعاقبة: هي الجريمة اللي بيتجدد فعلها، ويستمر المجرم باقترافها؛ كقطع الطريق، وتعذيب الأشخاص وضربهم بشكل مستمر، وتكرار السرقات

لأماكن وأشياء متفرقة، والاعتداء على أشخاص كثيرين، والنصب والاحتيال عليهم بشكل متكرر.

ركّز معايها في الكلمتين الجالين دول هينفعوك..

أكيد جه في بالك عمليات اختراق الموبايل والأجهزة الإلكترونية بشكل إجرامي، بص يا معلم أي نشاط تتعرض له أجهزة الكمبيوتر أو أجهزة الشبكات ويوظفها أو يتلفها فده يعتبر عمل إجرامي، ولو حد أخذ معلوماتك أو صورك أو بياناتك بشكل غير قانوني فده كمان عمل إجرامي يُحاسب عليه المُجرم، وفي الغالب ده بيحصل لما بيعتلك فيروس لجهازك، ويتسبب في ضرره أو تعطيله، العمليات الإجرامية اللي من النوع ده بتبقى خطرة جداً لأنها لو استهدفت شخص معين ونشرت محتوى غير أخلاقي عنه زي فبركة الصور أو غيرها، فده هيؤدي لانتحار الضحية بشكل سريع بسبب خوفه من المجتمع، زي ما حصل بالطبط في اليومين اللي فاتوا وسمعنا عن عمليات إجرامية من النوع ده بسبب انتهاكات خصوصية بعض البنات، وهقولك في السطرين الجالين ازاى تقدر تنقذ نفسك لو اتخطيت في موقف زي ده، وكم الجرائم الإلكترونية خطر على الممتلكات لأنه لو استهدف اختراق بنك أو ضحية فردية زي سرقة بياناتك البنكية أو بطاقات الائتمان هيؤدي لكارثة كبيرة جداً وناس كتير فلوسها هتضيع، وفيه نوع معين من الاختراقات متخصص في اختراق سيادة الدول، والوصول لمعلومات سرية، ويمكن الموضوع يوصل للحرب وأعمال إرهابية.

طب ازاى تحمي نفسك من الجرائم الإلكترونية؟

تقدر تحمي أجهزة الكمبيوتر الخاصة بيبك من الوقوع ضحية للجرائم الإلكترونية باتباع الخطوات الآتية:

تحديث البرامج وأنظمة التشغيل باستمرار.

استخدام البرامج المضادة للفيروسات وتحديثها باستمرار.

استخدام كلمات مرور قويّة.

عدم النقر على الروابط أو المرفقات التي تصل مع رسائل البريد الإلكتروني العشوائية.

الحرص على عدم إعطاء أيّة معلومات شخصية ما لم يكن استخدامها آمناً.

التواصل مع الشركات مباشرةً في حال وصول طلبات مشبوهة.

المراقبة المستمرة لحركات الحساب المصرفي.

ولو تعرضت للإبتزاز من شخص، تقدر تتواصل مع مباحث الإنترنت المصرية عن طريق الاتصال بالرقم "١٠٨" أو تروح مقر الإدارة العامة في ديوان عام وزارة الداخلية بالتجمع الأول، في القاهرة الجديدة، أو تروح وحدة تلقي بلاغات المنطقة المركزية، ودي مكانها في ميدان العباسية في معهد التنمية البشرية بالقاهرة.

بمناسبة الجرائم الإلكترونية هحكيك عن أكبر وأخطر جرائم الإنترنت في العالم..

سنة ٢٠١٤ تم اختراق متاجر التجزئة الأمريكية واختُرقت أنظمة نقاط البيع، وسرق المهاجمون حوالي ٥٠ مليون بطاقة ائتمانية شخصية وحصلوا على تفاصيلها، وبعدها بستين تم اختراق أكبر المواقع الإلكترونية واستُخدم في هذا الهجوم أكثر من مليون جهاز كمبيوتر متصل على الإنترنت، أدّى الهجوم لإيقاف مجموعة كبيرة من أكبر المواقع على الإنترنت، وفي ٢٠١٧ تم الهجوم والقرصنة على مختلف مستخدمي الإنترنت وأغلقت خلال هذا الهجوم محتوى ٣٠٠,٠٠٠ جهاز كمبيوتر حول العالم، وطلب من المستخدمين دفع مبالغ مالية مقابل فكّ

التشفير وإتاحة وصولهم لبياناتهم مرة أخرى.

طب دة الواحد يروح يشتغل مهكراتي بقى...!

بس أقولك .. إحنا دايماً لما بنسمع كلمة جريمة بيجي في بالنا "القتل"، وكأن القتل هو الحاجة الوحيدة الي بنقول عليها جريمة، ودة بسبب إنها أكثر حاجة منتشرة في العالم، ويمكن من بداية خلق الكون وحوار القتل دة موجود، خليني أفكرك بأول جريمة قتل حصلت في التاريخ وأول مجرم في العالم ..

"قابيل" ابن سيدنا "آدم" عليه السلام هو أول قاتل في العالم، لما غدر بأخوه "هابيل" وقتله وهو نايم، سيدنا "آدم" عليه السلام هو أول البشر في الكون، والجريمة حصلت لما كان في الكون كله ٦ أشخاص فقط وهم سيدنا آدم عليه السلام وزوجته حواء وأولادهم قابيل وهابيل وتوأمتهما، من الوقت لحد الآن جرائم القتل بتحصل كل دقيقة على مستوى العالم، والقتل بقى عامل زي صباح الخير بالضبط، الجدير بالذكر جريمة الطالب "محمود علي البنا" الي اتقتل على يد زميله في أحد الشوارع المجاورة لمنزل القتل، وبرضو جريمة محافظة الاسماعيلية، لما حصل خلاف بين شخص والثاني وراح قتله في وسط الشارع في عز النهار وقطع راسه ومشى بيها وسط الناس، طبعا هي قصة مرعبة بس الرعب الحقيقي إنها حصلت فعلاً وفي العصر الي إحنا فيه دة، وبمجرد ما تم القبض على المتهم، وانهار بالبكاء أمام والدته، بقى معظم الناس متعاطفين معاه وأنه مظلوم رغم الي عمله، ورغم أن الجريمة مصورة فيديو إلا إن الناس اتهموا المقتول بعدة جرائم، ودة عشان القاتل ياخذ براءة لأنه مظلوم، وفضلت جرائم القتل تزيد يوم عن يوم لحد جريمة قتل الطالبة "نيرة أشرف" من زميلها "محمد عادل"، الجريمة الي تركت أثر في المجتمع العربي كله، وبالرغم من أن الجريمة مصورة فيديو وهو بيظعننها بالسكين في عز الظهر وسط الناس وأمام جامعة المنصورة وذبحها وكان


عايز يقطع راسها ويمشي بيها زي مجرم الاسماعيلية، إلا إن أغلب الناس تعاطفوا مع القاتل أيضاً، وأصبح المجرم مظلوم وضحية المجتمع، وبعدها بيومين بالظبط حصلت نفس الجريمة جوة جامعة في الأردن، طالب قتل زميلته الطالبة بمسدس ووقعت ميتة، وآخرهم جريمة قتل الطالبة "سلمى" من زميلها الطالب "اسلام" اللي حصلت بنفس سيناريو قتل الطالبة "نيرة اشرف"، والموضوع هيفضل مستمر لحد ما ينتشر انتشار رهيب وسط الناس، والمحافظة اللي بيحصل فيها جريمة قتل او اتنين بتبقى محافظة مشهورة بالجرائم والبلطجة، زي ما ذكرت نظرية "إدوين لمرت" مُتخصّص في علم الاجتماع والأنثروبولوجيا، صاحب نظرية "لقب المجرم"، وقال إن المجرم طالما اتقال عليه مجرم فهو أصبح مجرم مجرم بينه وبين نفسه وهيفضل عايش على الإجرام دة، لأنه مقتنع أنه مجرم بسبب كلام المجتمع عليه، نفس الكلام على المنطقة اللي حصل فيها جريمة قتل وأصبحت مشهورة بالقتل، ومعظم البلطجية اللي فيها أصبحوا مجرمين كبار بسبب الشهرة اللي حصلت عليها منطقتهم، وهي "بلد الإجرام"، مثال بسيط على كدة هو "ريا وسكينة"، لما قتلوا أول ضحية بغرض سرقة مجوهراتها والموضوع عدّى في صمت وبعدها قتلوا ضحية تانية، والتانية جابت الثالثة، ولحد ما قتلوا فوق العشرين ست مصرية، ماشيين بمبدأ اللي هو طالما أنا من بلد الإجرام يبقى لازم ابقى مجرم واعمل كل الحاجات الخارجة على القانون، طبعاً لو ذكرت كل جرائم القتل اللي حصلت في التاريخ مش هيكفيني ولا كتاب من مليون صفحة، بس خليني أقولك إنك عشان تبقى مجرم لازم تستغنى عن تربيتك وسمعتك ودينك وكل حاجة خاصة بالسلوكات الحسنة، وعشان تتعرف على أشهر القتلة والسفاحين والمجرمين لازم تزور موقع "الديب ويب"، ودة موقع سرّي لتجارة الاعضاء البشرية والسلاح والمخدرات والقتلة المستأجرين، ولو عايز تعرف أكثر عن العالم دة هتلاقيه هنا في الكتاب بعنوان "عالم الإنترنت المظلم".

بمناسبة بيع المخدرات في الموقع دة، عايز أفكرك بإن المخدرات سبب رئيسي وراء كل جريمة، لأن كل قاتل اتقبض عليه واثناء التحقيق معاه بيعترف إنه قبل ما يعمل الجريمة بياخد مُحَدَّر عشان ما يحسش بحاجة، ويبقى قلبه ميت..

طيب ليه الإجرام انتشر في العالم وبالأخص جرائم القتل ؟

القتل هو عملية إنهاء حياة كائن حيّ بفعل كائن تاني، سواء قتل عمد أو قتل خطأ، وعشان يقدر يتم عملية القتل لازم يستخدم أدوات حادة أو قوية أو ثقيلة، أو سلاح ناري أو مواد سامة، زي السفاحين اللي بنشوفهم في الأفلام كدة .. طب والي بنشوفهم في الحقيقة؟ إيه دة هو فيه سفاحين بجد في الحقيقة؟؟

آه أنت شكلك مسمعتش عن "أبو طبر"، بُص يا معلم حرفياً المجرم دة بمجرد ما تسمع اسمه بس بيجيلك دوخة وتحس إن نفْسك ضاق، لأنه كان أكبر قاتل متسلسل في بغداد في فترة من ١٩٧٠ لحد ١٩٧٥، وهو "حاتم كاظم هظم" الشهير بأبو طبر.



حاتم كاظم هظم (أبو طبر)

صاحب الأربعين عام، وسبب شهرته هو أنه كان يحمل فأس حديد، وكان

شديد جداً وصلب، ويدخل أي بيت يقتل اللي فيه بالفأس "الطُبر" ويسرق الفلوس أو المجوهرات اللي فيه ويخرج، بدون ما حد يقدر يمسه لأنه كان يعمل عمليات الإجرام كلها في وقت متأخر من الليل، واللي كان يساعد في الجرائم دي هما أسرته، والسبب في أنه كان بعيد عن الشبهة هو أنه كان شرطي في الحكومة العراقية، وكان بيدور مع الحكومة عن السفاح القاتل، ومحدث عارف إنه هو السفاح، وكان لما بيدخل بيت ويلاقي اللي فيه نايمين يروح لسرير أول واحد فيهم ويصحيه، وبمجرد ما الشخص يصحى يرد عليه "أبو طبر" يقوله "ششششش" ويضربه بالطبر على راسه وتنفجر راسه ويتناثر الدم، ويروح للسريير الثاني ويعمل نفس السيناريو لحد ما يقتلهم كلهم، كان مسبب رعب كبير في بغداد وناس كثير مكانتش بتنام الليل بسببه، وماكنش يفرق معاه الضحية راجل أو ست ولا كبير أو صغير، كان بيقتل أي حد لغرض السرقة، زيّه زيّ سفاحين كثير مشهورين على مستوى العالم، وموجودين في كل مكان وكل شارع، يعني ٨٠٪ من أسباب القتل يعتبر بسبب السرقة.

أما في مصر بقى وسفاحين مصر، يعتبروا أشهر من النار على العلم، هحكيلك عن أشهرهم بشاعة وإجرام وهو "رمضان عبد الرحيم منصور" الشهير بـ"التوربيني" من طنطا، ده بقى كان أصغر زعيم عصابة لاغتصاب أطفال الشوارع وقتلهم، قتل أكثر من ٣٢ طفل في ٨ محافظات وهو عنده ٢٦ سنة بس !!

حتى شركاؤه في الجرائم دي كانت أعمارهم ١٦ سنة و ١٧ سنة، كان متزوج عرفي من واحدة اسمها "بربش" وكانت بتستدرج له الأطفال وتحيبهم له وهو يسرقهم ويغتصبهم، وكان بيتخلص من الضحايا وهما عايشين، كان بيرميهم على قضبان القطار قبل وصوله بثواني، وممكن يرميهم في البلاعات، أو بيدفنهم أحياء، ويُقال أنه بيعمل الجرائم دي لغرض سرقة الفلوس منهم لأن "بربش" زوجته كانت بتستدرج له الأطفال اللي معاهم فلوس أو البنات اللي لابسين ذهب، لكن

لما انقبض عليه واعترف على كل الجرائم دي، قال أنه عمل كدة بسبب الاضطراب النفسي الي كان عنده، ودة بسبب إنه اتعرض للإعتداء من وهو طفل، يعني الاعتداء عليه كان هو العامل النفسي لكل جريمه دي، وهنا إحنا بنلغي نظرية العالم "إدوين سذرلاند" الي كانت بتقول إن السلوك الإجرامي مش شرط يتناقل بالوراثة، ومش شرط أنه يكون سلوك خُلقيّ أو نفسي..

البشاعة والإجرام الي كانت جواه تعدت بمراحل أي نوع الجرائم الأخرى، وفي الآخر تم القبض عليه واتحكم عليه بالإعدام، ولكن شركاء الجريمة اتحكم عليهم بالسّجن المؤبد.

المجرم بيعسس بأيّه وهو مُجرم؟

أول ما الناس تعرف أنه هو صاحب الجريمة يبدأ احساس الإنتقام من كل الناس يراودّه، ولو كان هربان فهو هيفكر أنه هيقتل أي حد يجي في سكتة، وبمجرد ما يحس إنه خلاص أصبح مُجرم في منظور المجتمع هيبداً يعمل عمليات إجرامية كثير بعد فترة، ومش بعيد ينضم لجماعة إرهابية أو مجموعة قتلة مستأجرين، لحد ما حياته تنتهي في عملية من العمليات الإجرامية الي بيعملها، أما لو عمل جريمة وتمّ القبض عليه فهيحس بالخذلان وأنه خلاص اتقتل وقت ما انقبض عليه ومفیش هروب من حبل المشنقة، هيبداً يدافع عن نفسه ويقول كلام يلّم بيه عواطف الناس لحد ما يتعاطفوا مع القاتل ويصدقوه والحكم يتخفف من عليه، وبدل الإعدام ممكن توصل للسجن المؤبد، ووقتها سهل أنه يتم تهريبه من السجن، وهيطلع يعمل جرائم ألّعن من الأول وهينتقم من المجتمع الي اتهمه بالإجرام لأنه خلاص حط في باله إنه بقى مُجرم وهيعمل أي حاجة هو عايزها وهيعرف يطلع منها.

عالم الجريمة مش بيتوقف على عمر معين أو شخص فريد من نوعه، لأ الإجرام منتشر من أول ١٠ سنوات للطفل إلى ما لا نهاية، سواء كان ذكر أو انثى، والإجرام وعمليات القتل والسرقة والخطف بتحصل بكثرة من الجنسين، الذكور والإناث، فيه ثقافة في عالم الجريمة اسمها "ثقافة علم الإجرام" ودي دراسة نظرية منهجية تدخلية للجريمة، تسعى لفهم الجريمة في سياقها الثقافي، فهي تنظر للجريمة ومؤسسات مكافحة الجريمة على أنها منتجات ثقافية، وتسعى ثقافة علم الجريمة لتسليط الضوء على كيفية تأثير النفوذ على بناء الجريمة، زي وضع القوانين وانتهاكها والتفاعل مع روح المبادرة الأخلاقية والابتكار والعدوان.

مش عايزك تتوه مني في الكلام الكبير دة بس هختصر لك حاجة مهمة جداً في المبادئ الرئيسية في ثقافة علم الإجرام، وهو الدور اللي بتلعبه العاطفة في الجريمة، زي ما ذكرت سابقاً في الجرائم اللي حصلت في الاسماعيلية والمنصورة، والعاطفة الإنسانية كان ليها دور كبير جداً في الجريمة..

في نهاية الكلام يا صديقي عايز أقولك إن طريق الإجرام بدايته سودة ونهايته سودة، يعني لو فكرت إنك تبقى مجرم خليك واثق إن نهايتك هتبقى هلاك، ومش شرط الإجرام في القتل، سواء في السرقة أو في الزنا أو في الخطف... إلخ.

لا دة مجرد التفكير في الموضوع بس، دة في حد ذاته إجرام، "دكتور رعب" بيقولك حاول تبعد عن أفلام الجريمة وعن أصحاب السوء، وأي حاجة ليها علاقة بالشر، لأن كل دة هيقع على دماغك أنت في الآخر، ومنصحكش بالإجرام أبداً.

"ممن"

الفصل الثاني

"أراد دكتور رعب أن يخبرك فقط بأن المعتقدات والممارسات المتعلقة بالسحر والشعوذة، أدت إلى انتهاكات جسيمة لحقوق الإنسان بما في ذلك الضرب والإقصاء وقطع أعضاء الجسم وبترا الأطراف والتعذيب والقتل، فلماذا يلجأ الناس إلى السحرة والدجالين؟".

هذا الفصل للكاتبة/ سارة زويل.

٢١ سنة من محافظة القاهرة.

شاركت بقصة قصيرة بعنوان "جزء من النص مفقود" في كتاب "دكتور رعب ٢"

في معرض القاهرة الدولي للكتاب ٢٠٢٢..

وقامت بكتابة الفصل الثاني في كتاب "دكتور رعب ٣".

الإهداء..

إلى نفسي ومنى زويل.

"عالم السحر والدجل"

لكل واحد منّا شخصية مختلفة عن غيره تماماً وإتجاه سلوك خاص بفكره ومجتمعه وهواه، بس وسط الزحمة دي كلها الدين بيعحكم تصرفاتنا وأحقادنا وسلوكياتنا، ويفصل بين الحق والباطل ويأمرنا إننا نسيطر على أنفسنا السيئة ولا نتبع شيطاننا، وإن لنا رب واحد يجب أن نستجيب لأوامره وننتهي عن نواهيه، ومن إنسانيتنا ألا نؤذي أي مخلوق، بس طبعاً معروف إن لكل قاعدة شواذ، وإن الدنيا دي مش جنة، والبشر اللي حواليك دول مش ملايكة، فيه منهم اللي بتحكمه الشياطين وتعميه أحقادهم ويعشق إيذاء الناس وتدميرهم، ودول بقى شياطين متشكلة في بني آدمين حوالينا، فيه منهم يظهر وشه الحقيقي .. وفيه اللي يبطعنك من ظهرك، بس يا ترى إيه الحل !!؟

دلوقتي هسألك سؤال وعازاك تجاوبني .. بس قبل ما تجاوب لازم تكون فاهم إن أركان الإيمان ستة أركان، من ضمنها الإيمان بقدر الله خيرهُ وشرهُ، بمعنى إنك تصبر على أقدار الله وترضى بيها وتلجأ له، ولإلزام تبقى عارف إن ربنا لو قدرلك ابتلاء مُعين أنت مش هتقدر تهرب منه، ف واجبك إنك ترضى، وإياك إنك تطلب من بشر مساعدة أو عقلك يوديك لأسود من كدة وتتخيل إنك هتغير قدرك بالسحر !!

لأن يا عزيزي لا بشر هينفعك ولا سحر هيعير قدر .. دلوقتي بقى قولّي، هو أنت مؤمن بالله ؟؟

قبل ما سيدنا محمد "صلى الله عليه وسلم" يُبعث، كانوا الشياطين يصعدون

للسماء ويسترقون السمع عن الأوامر التي تُلقى من الملائكة، وطبعاً كلها أمور تخص الغيب (وليكن في علمك إن هذا كله بأمر الله ليختبر إيمانك وهل ستجري وراء كلام الكهنة أم ستتقي الله)

وبينقلوها للكهنة ويزودوا عليها شوية حاجات كدة من خيالهم "مش حقيقية"، ووقت ما سيدنا سليمان عرف الكلام دة غضب وجمع كل كتب السحر بقى من الكهنة وحطها في صندوق ودفنها تحت عرشه، وكانت الشياطين لو قربوا من عرش سيدنا سليمان بيتحرقوا، ولما مات سيدنا سليمان، الشياطين عرفوا بوفاة، العلماء بقى اللي كانوا عارفين قصة سيدنا سليمان ومكان عرشه، تمثل لهم الشيطان في صورة إنسان وقال لهم أفلكم على كنز لا نظير له؟ قالوله طبعاً..!

فقالهم احفروا تحت عرش سليمان .. هتلاقوا كتب سحر، الكتب دي سليمان كان يضبط بيها الإنس والجن والرياح وغيرها بالسحرة. انتشرت بين الناس الكذبة دي لحد لما ربنا نزل الآية اللي تبرأ سيدنا سليمان على لسان سيدنا محمد "صلى الله عليه وسلم" ..

"وَاتَّبِعُوا مَا تَتْلُو الشَّيَاطِينُ عَلَىٰ مُلْكِ سُلَيْمَانَ ۖ وَمَا كَفَرَ سُلَيْمَانُ وَلَٰكِنَّ الشَّيَاطِينَ كَفَرُوا يُعَلِّمُونَ النَّاسَ السَّحَرَ وَمَا أُنْزِلَ عَلَى الْمَلَكَيْنِ بِبَابِلَ هَارُوتَ وَمَارُوتَ ۚ وَمَا يُعَلِّمَانِ مِنْ أَحَدٍ حَتَّى يَقُولَا إِنَّمَا نَحْنُ فِتْنَةٌ فَلَا تَكْفُرْ ۖ فَيَتَعَلَّمُونَ مِنْهُمَا مَا يُفَرِّقُونَ بِهِ بَيْنَ الْمَرْءِ وَزَوْجِهِ ۚ وَمَا هُمْ بِضَارِّينَ بِهِ مِنْ أَحَدٍ إِلَّا بِإِذْنِ اللَّهِ ۖ وَيَتَعَلَّمُونَ مَا يَضُرُّهُمْ وَلَا يَنْفَعُهُمْ ۖ وَلَقَدْ عَلَّمُوا لِمَنِ اشْتَرَاهُ مَا لَهُ فِي الْآخِرَةِ مِنْ خَلَقٍ ۚ وَلَبِئْسَ مَا شَرَوْا بِهِ أَنْفُسَهُمْ ۖ لَوْ كَانُوا يَعْلَمُونَ" (١٠٢) (سورة البقرة).

ولو بصينا على أول الآية هنلاقي اسم ملكان، هما "هاروت وماروت" وعلاقتهم

بالسحر .. في مدينة بابل كان السحر منتشر بصورة كبيرة وفتن السحرة مجموعة كبيرة من الناس، واستغل السحرة السحر كوسيلة لإغواء الناس واضلاهم عن الحق، وانحرف ناس كثير جداً عن الحق وعبدوا الأصنام والكواكب بسبب السحرة، وحدث فساد عظيم وعمّ الكفر وانتشر الباطل والضلال، وأوهم السحرة الناس إن الساحر يقدر يضرهم وينفعهم، وإنه يملك مقاليد كل شيء، وقتها بقي أنزل الله الملكين "هاروت وماروت" عشان يقولوا للناس إن السحر علم زي باقي العلوم يسهل تعلمه واكتسابه، وإن الساحر لا يضر حد ولا يينفعه إلا بأمر الله، ويعلموا الناس ألا عيب السحر وإن هناك فرق كبير بين السحر ومعجزات الأنبياء وكانوا ييحذروا الناس من السحر وإنه فتنة فبلاش حد منكم يكفر، لأن من يعمل بالسحر فقد كفر.

بُص هو الموضوع مش ديني بحث ولكن عشان نقدر نثبت صحة الكلام دة لازم نستعين بآيات قرآنية وقصص حقيقية ومعجزات حصلت بالفعل.

"السحر على مر العصور والحضارات"

السحر في العصر الحجري القديم، مارس فيه الإنسان الطقوس والتعاويذ السحرية والدليل على دة بناخده من الرسوم والرموز اللي نقشت على جدران الكهوف والمغارات والكتب والأساطير القديمة، دة فيه قبائل عاشت على الأرض ٨٠ ألف سنة، كانوا يبواجهوا شراسة الطبيعة وجهاً لوجه، وكانوا بيتعرضوا للهجوم من الحيوانات الضارية والأفاعي الشرسة والوحوش الكاسرة، وقتها استعانوا بالسحر حيث كان لكل قبيلة ساحر بيستعينوا بيه على مواجهة الحاجات الصعبة دي، فكان بيرسملهم صورة دُب مثلاً على الأرض، وبعدين يقوم بالدوران حواليتها كذا مرة وهو يترنم ببعض الكلمات الي ليها مدلول سحري مع تأدية بعض الرقصات، وبعدين يغرس بالعصاية بتاعته الحجرية في عنق الدب

المرسوم، وبعدها ينطلق الصيادون يتعقبون آثار الدبة ليعودوا بها صريعة.

أما عند المصريين القدماء فعند أقدام الأهرامات دفنت أسرار وألغاز وتُليّت
طلاسّم وتعاويز والنيل كان ينقل أصداءها وترانيمها، مش كدة وبس دة كمان
كان بيعتبر إحدى المرايا اللي بتنعكس على صفحته جزء من الأسرار والطلاسم
المعقدة دي، فارتبط الهرم بالنيل، وارتبطوا الاثنين بالإنسان المصري القديم، ومن
هنا ظهر عند الكل معتقد في منتهى الغموض، وكان أساس كل دة السحر، فهل
فعلاً حقيقي إن ما يشاع من إن كل اللي بتسول له نفسه إنه يقرب من مقابر الآلهة
عند الأهرامات هتصيبه لعنة الفراعنة؟

وهل فعلاً اللعنة دي أساسها السحر ولا دة لغز غامض؟؟

من وجهة نظري إنه سحر وهدفه إن مجموعة من الجن تحرس الكنوز دي،
واللي يقرب منها هتصيبه اللعنة، أما عن رأيك عزيزي القارئ فأعنى أن تخبرني به
يوماً ما..



نتنقل بقى من العصور إلى الحضارات، وبالأخص الحضارة البابلية بـ "بابل" .. واخذ بالك أنت .. على ضفاف نهر الفرات أزهرت مدينة بابل من حيث العلوم والفنون المختلفة، ومن أهم العلوم دي هو علم السحر، كانوا وقتها بيعبدوا الكواكب ويصدقوا إنها بتأثر على حياة البشر، ولو انتقلنا من الحضارة البابلية لدولة الهند اللي كلنا عارفين إنها مشهورة جداً بأنها بلد الغرائب والعجائب، بس مش هتشوف فيها حاجة أغرب من السحر اللي امتزج بالطقوس الدينية، ودة موجود في الديانة البوذية اللي نقدر نقول كدة إنها احتضنت السحر وبقى مُقدس عند الهندوس وحطوله كتاب اسمه "الفيدا"، ومختلفش حال الهند دلوقتي عن زمان لأن السحرة والكهنة والعرافون يوصل تعدادهم عدة ملايين .. وأما عن بلاد الإغريق، فكان للسحر مكانة عالية جداً عند اليونانيين، فكانوا على أثر الأمم السابقة في أمر الاعتقاد بالرقم والعزائم والطلاسم وتأثير الأرواح الشريرة، ولو بصينا لمعبودات اليونان هنلاقي أهمها "زيوس وهيرا" تدخل في عزائم وأقسام على الجن والشياطين في السحر العربي لحد دلوقتي.

"السحر في عصرنا الحالي"

السحر انتشر حوالينا في كل مكان، وأنت بتعيشه حالياً ومش محتاجة إني أثبتلك إنه بيُمارس الآن، وإن أقرب الأشخاص ليك بـروحوا للسحرة علشان يأذكوك، وعدد البشر السيئ بيزيد كل يوم، ولسة فيه ناس بيبحثوا عن الغيب وبجهلهم لسة بيروحوا للكهنة وكمات بيقتنعوا بكلامه وبيقروا الفنجان ويصدقوا شوية ورق رغم كل التقدم الفكري اللي وصلنا له واختلاط المجتمعات والوعي الديني...!!

وتعتبر دولة "المغرب" من أشهر الدول المتخصصة في السحر.

للسحر أنواع وأقسام بتختلف باختلاف الاستعانات اللي بيستعين بيها الساحر

في تحقيق هدفه، فمن السحرة الي بيستعين بالكواكب، وغيره بيستعين بالجن، وغيره بالنفخ في العقد وأقلّهم خفة اليد، دة من ناحية المجمل، أما عن التفصيل فهتلاقي إن السحر المستعان فيه بالكواكب زي سحر الكلدانيين وأهل بابل، كانوا أقوام بيعبدوا الكواكب السبعة، في إعتقادهم إنها المدبر للعالم وإن حوادث العالم كلها السبب فيها الكواكب، وخدهم الجهل دة لإعتقاد تاني وأكثر جهل، وهو إنهم لو لبسوا لبس معيّن ولعوا بخور معينة وقعدوا يتمتموا بكلمات وأفعال معينة بكدة يقفوا ييخاطبوا الكواكب وهتبقى الكواكب مطيعة لهم وهتتحقق لهم اللي هما عايزينه ويتمنوه، ومن ضمن الإستعانة بالكواكب هنلاقي نوع بيعتمد النظر في حركة الأفلاك ودورانها وطلوعها وغروبها وإقترانها وإفتراقها معتقدين إن لكل نجم منها تأثير وهو في حالة منفردة، وله تأثير تاني وهو في حالة اجتماعه مع غيره، وكل تأثير في الحالتين بيؤثر على الحوادث الأرضية من غلاء الأسعار ورخصها ووقوع الحوادث وهبوب الرياح والأمور السياسية وغيرها، ونوع تاني بيعتمد النظر في منازل القمر، معتقدين أن إقتران القمر أو إفتراقه عن أي منزل من المنازل دي بيأثر بالسعادة أو النحس، أو بالتأليف أو التفريق بين البشر، ونوع تاني خاص بأستخدام الأرقام والحروف الأبجدية، وكان يُقال على النوع دة علم الحروف، وهو عبارة عن إنه بيكتب عالم الفلك أو العالم الروحاني زي ما يبطلق عليه الحروف الأبجدية ويخلي لكل حرف رقم معين، ويبجعل لأسماء البشر أعداد معينة برضو وتواريخ الميلاد والأماكن، ويجمع الأرقام دي ويطرحها بطريقة خاصة ويستعين بعلم الأبراج وبعدين يحكم عليك بأنك سعيد أو منحوس أو يقولك عن أي حاجة تخص مستقبلك، وفي الآخر كل الكلام دة بيوحيه الشيطان له وكل دة كفر ولا خلاف طبعاً ..

أما عن النوع الآخر من السحر وهو الإستعانة بالأرواح الأرضية، والأرواح الأرضية هنا أقصد بيها شياطين الجن، والاتصال بالأرواح دي بيكون عن طريق

الرقى والدخان وتلبية مطالب الجن، وأهم حاجة يطلبها شيطان الجن هو الشرك بالله، فلما يتم الاتصال وتبقى شياطين الجن خدام تحقق لك أهدافك، ولكن النتيجة إيه؟

"الشعوذة"

فيه نوع داخل السحر يُسمّى "الشعوذة" .. ودة عبارة عن الخدع البصرية وهي أما أن تكون مبنية على خفة اليد، أو إعانة من الجن، ولكن بالنسبة لي موضوع خفة اليد مش مقنع تمامًا، فأنا اقتنع بأن الخدع دي بيتم الإستعانة فيها بالجن بس، وكلمة خفة إيد عبارة عن ساتر بيتخفى به الساحر.

إيه دة هو فيه فرق بين السحر والشعوذة؟

آه طبعاً .. الفرق بين السحر والشعوذة هو إن الشعوذة هدفها خداع العيون وإنها تظهر الأمور على غير حقيقتها، لكن السحر قائم على أذى المسحور وإلحاقه بالأمراض النفسية والبدنية ..

وأشهر المشعوذين على مستوى العالم هو الكاتب الشهير صاحب مقولة "الشخصيات الشيطانية والأفكار السرية اختفت من السحر الحديث" ..

الي كتب الجملة دي اسمه "ديفيد كويرفيلد" وتعتبر من أشهر أقواله، ودة يا سيدي يبقى ساحر ومشعوذ أمريكي وخير في فن الوهم، واتسعت شهرته مع الوقت وبقت عالمية، وأصبح مدرس للخدع السحرية في جامعة نيويورك، وقدم برامج كثير وكانت ناجحة جداً، ودة كله بيرجع لطفولته الي كان فيها خجول جداً فبدأ يعمل خدع سحرية عشان يكسب ثقته في نفسه ويتميز عن الي حواليه، لما بقى عنده ١٢ سنة طلبته جمعية السحرة الأمريكيين عشان ينضم ليهم، وأول نجاح

لـ "ديفيد كوبرفيلد" لما شارك في عرض موسيقي (The Magic Man).

بعد كدة ظهر على التلفزيون من خلال المنتج "جوزيف كيتس" في برنامج (The) Magic of ABC.

وبعد نجاح عرضه الأول من البرنامج دة، شركة (CBS) وقعت معاه عقد لبرنامج للعروض السحرية اسمه (The Magic of David Copperfield)

قدم في البرنامج دة خدع كثير وكانت دايمًا بتفوق توقعات الجماهير، ومن أفضل الخدع الي قدمها إنه اخفى طائرة نفاثة وقام بإخفاء تمثال الحرية، والعبور من خلال سور الصين العظيم وانشطارُه إلى اثنين بواسطة منشار كهربائي، وسنة ١٩٩٥ تعاون مع شوية كُتاب ومؤلفين عشان ينشر كتابه الخاص بأدب الرعب تحت عنوان..

(David Copperfield is Tales of The Impossible)

كان عبارة عن مجموعة قصصية مرتبطة بالسحر والخدع والكتاب حقق نجاح كبير، وألّف بعدها كُتب تانية كثيرة، وفي النهاية أحب أقولك إنه خد اسم شهرته من رواية للكاتب البريطاني "تشارلز ديكنز"، اسمحلي أسألك بقى كقارئ، أنت مقتنع إنها مجرد خدع وبیدرسوها؟ ولا الموضوع داخل فيه أطراف من العالم الآخر؟!!

"النَّفْث في العُقْد"

فيه نوع من السحر كمان غريب شوية، اسمه "النَّفْث في العُقْد" .. الاسم من آية في القرآن بتقول "وَمِنْ شَرِّ النَّفَّاثَاتِ فِي الْعُقَدِ" سورة الفلق .. إيه هو النَّفْث في العُقْد بقى؟

هو سحر عن طريق عقد الخيوط والنفث في كل عقده لحد ما يتم السحر

فيؤذي المسحور، ودة بيكون في حالة إذا كان المسحور غير حاضر، أما إذا كان حاضر فينفث عليه مباشرة.

"سحر التخيل"

في نوع ثاني من السحر اسمه "سحر التخيل" بمعنى إن المسحور في مخيلته إنه شاف وعمل حاجات مش حقيقية بس هو بيكون متأكد إنها حصلت، وكم إن يشوف الإنسان الثابت متحرك، والمتحرك ثابت، ويشوف الصغير كبير والكبير صغير، بمعنى أصبح يشوف عكس الحقيقة مثلاً رأى الناس الحبال والعصى ثعابين تتحرك، (قَالُوا يَا مُوسَى إِمَّا أَنْ تُلْقِيَ وَإِمَّا أَنْ نَكُونَ أَوَّلَ مَنْ أَلْقَى * قَالَ بَلْ أَلْقُوا فَإِذَا حِبَالُهُمْ وَعِصِيُّهُمْ يُخَيَّلُ إِلَيْهِ مِنْ سِحْرِهِمْ أَنَّهَا تَسْعَى) ٦٥ سورة طه.

والسحر دة بيتحط في أربع أماكن، إما أنه يكون مُعرض لتيار هواء، بحيث إن كل ما الهوا يزيد تأثير السحر يزيد، أو أنه يترمى في بحر أو نهر، أو أنه يتحط في فرن أو يتدفن في المقابر، أو البيوت المهجورة، وطبعاً كلنا بنسمع قصص كثير عن السحر المدفون في المقابر.

أما طريقة إبطال السحر دة فهي بتكون عن طريق (الأذان - آية الكرسي - الأذكار المشروعة في طرد الشياطين - البسملة).

"السحر السفلي"

يعتبر من أخطر وأشد أنواع السحر وتأثيره بيبقى قتل أو مرض أو تفريق أو جلب، ولو أنت واخذ بالك معايا هتلاقي إن كل أنواع السحر أهدافها واحدة، وهي التدمير والخراب، لأن الأكيد إن مفيش خير هيبجي من أعمال بيخدمها الجن بس بيبقى فيه اختلاف بسيط في شدة السحر وسرعته.

طب وليه اتسمى بالأسم ده؟

لأنه يثبت في الجزء الأسفل من جسم الضحية ولأن الشياطين اليي بتخدم الساحر من أقدر وأسفل وأكفر الشياطين، وكمان بيعتمد على أخلاق الساحر كل ما بتتحدّر بيقي شاطر جداً في السحر دة.

ومعلومة كمان، إن الساحر عشان يعمل السحر دة لازم يدنس القرآن الكريم وينجس أوراقه.

أكثر فئة بتلجأ للسحر دة الستات، عشان تخلي زوجها مطيع ليها في كل طلباتها. وأمراض المسحور في السحر السفلي بتشمل الجنون الي بيخلي الضحية تفقد عقلها وتدخل في حالة من الجنون تشبه الحالة الي بيتعرضلها الإنسان الطبيعي لما بيتعرض لصدمة قوية وميقدرش يستوعبها فيصاب بالجنون، وممكن سحر الأمراض يوصل للقتل !!

(فلازم تبقى عارف إن الأعمار بيد الله وإن السحر سبب غير نافذ إلا بقدر الله).

"أعراض السحر السفلي" ..

بيبدأ أي عضو في الجسم زي الإيد مثلاً بالمرض وحركته بتبدأ تتقل لحد ما يوصل للشلل، وبعد كدة يتشل الجسم كله، ويبسكن الجن الخبيث جسم المسحور ويبعدّه عن الطاعات زي الصلاة وقراءة القرآن لأنهم سلاح خطير على الجن، وكمان المسحور بيشم روايح كريهة طول الوقت وأي مكان، ويبس إنه محاط بمكان قدر، بالإضافة بقى للأفكار السلبية الي بتدور في دماغ المسحور عشان ميفكرش يلجأ للقرآن والرقية الشرعية.

"السحر الأسود"

طبعاً بتسمع عنه كتير جداً بس مجرد اسم بس، لكن جه الوقت الي يحكيلك

فيه عن نفسه..

من اسمه تعرف إن اللي جاي من وراه سواد، زي إنه بيأذيك أذية شديدة ويمكن يبقى سبب في موتك مثلاً، ومش بيعجي من وراه أي منفعة زي جلب الحبيب والرزق وغيره، ويقال كمان إنه سحر من أيام الفراعنة وإن اسمه منسوب لكتاب السحر الأسود اللي اتوجد في مقبرة فرعونية، ودة مجرد كلام من ساحر.

"أعراض السحر الأسود"..

فيه أعراض عامة ودي بتبقى أعراض نفسية زي توتر مزمن من غير سبب، وتدهور الحالة النفسية للمسحور لحد ما يلجأ للإنتحار، وأكد سمعت قصص كتير حواليك عن ناس كانت نفسياتها متدمرة وانتحروا، ممكن يكون فعلاً مرض عادي له أسبابه من مشاكل اتخط فيها الشخص، أو نقدر نقول سحر أسود !! الله اعلم.

فيه أعراض كمان على هيئة أمراض عضوية مفيش دكتور لاقى ليها تشخيص، تسمع عن "سحر المرض" اللي ممكن يؤدي بيك للموت، في السحرة الساحر بيأمر الجن إنه يتركز في خلايا المخ المسئولة عن إعطاء الإشارات لكل عضو، فإما أنه يمنع الإشارات من إنها توصل للعضو المحدد، أو يمنعها مرة ويسببها مرة، أو أنه يدي إشارات سريعة وورا بعض، فيتصلب العضو زي القدم أو اليد ويتصاب المسحور بالشلل !!

ومن الأعراض العامة كمان إنك بتشوف كوابيس بصورة متكررة واللي ممكن تشوف فيها حيوانات مفترسة..

وفيه أعراض وهمية بقى، زي إنك تسمع أصوات بتهمسلك أو بتأمرك بأفعال مش كويسة زي الزنا أو الانتحار أو القتل !!

أو إنك بتحس بحد واقف جنبك وأنت نايم أو بتشوف خيالات في كل مكان حواليك..

وفيه كمان أعراض المس الشيطاني، طيب دي أعرفها ازاى بقى ؟

بتلاقي عين المسحور فيها لمعان زيادة عن الحد الطبيعي وإقباله على شرب كثير من الماء ويزيد عنده الحاجة للتثاؤب، وكُره روائح العطور بسبب ترجمة العقل ليها إنها روائح سيئة، بالإضافة لريحة فم كريهة وجفاف الجلد.

طبعا وأنت بتقرأ الأسطر دي فجأة كدة حسيت إنك مسحور بسحر أسود ولازم يتقرأ عليك دلوقت، متقلقش دة العادي، هو مجرد توتر مش أكثر إنما أنت طبيعي لأن المسحور دة بيبقى بيتألم وتايه ويبقى واضح عليه السحر جدًا..

السحر الأسود ممكن يتشرب أو يرتبط بعالم الأموات ويتدفن في بيوتهم، ويبقى خطير لأن صعب توصله، إلى جانب خطورة جن المقابر اللي بيعتبروا من أخطر أنواع الجن وأكثرهم إيذاء للإنسان.

"السحر الأبيض"

ودة خاص بسحر الجلب، وفي الحالة دي يُسمّى "سحر أبيض"، طب وليه اسمه أبيض؟ هقولك لأنه بيعتقد إنه بيتعمل في الخير، زي حجاب الأم تحمي بيه عيالها أو عشان البنات تتجوز، أو اعمل بيه سحر عشان أفك سحر تاني، وطبعًا لا شك إن كل دي خرافات بتضحك بيها الفئة دي على نفسها عشان تحلل شيء مُحرم، السحر دة بيتدفن في المقابر.

"السحر الأحمر"

ومن السحر اللي بيتدفن في المقابر كمان هو سحر التفريق، ودة يُقال عليه "سحر أحمر" ويُنال عليه كدة لأنه متوسط شويه في خطورته، بمعنى إنه مش بيتسبب في

موت شخص، لكن تفريق الزوج عن زوجته، أو ترك وظيفة، أو عقم، أو مرض .
إيه بقى اللي ممكن يفرق السحر اللي اندفن في المقابر عن السحر اللي مدفون في
مكان تاني؟

هقولك إن المسحور يبشوف الأموات ويسمع صراخهم ويبشوف أراضي
زراعية وتراب معظم الوقت، وبيكره جداً أنه يقف على الرملة وبيبقى منطوي
بيحب البيت وبيكره الخروج، وبيحلم كثير أنه يسقط من مكان مرتفع، (خليني
أفكرك إن تشابه الأعراض دة مش معناه إن السبب واحد، متخافش أنت مش
مسحور).

وجايز كمان تحس بيهم كلهم ودة نفسياً طبعي لأنك بتقرأ وبيصيك توتر
بشكل لا إرادي لأن الموضوع حرفياً مخيف.

طيب مين ليه قلب جامد إنه يدخل المقابر وسط الأموات وكمان يدفن سحر؟
للأسف في الأغلب اللي بيدفن السحر في المقابر دة بيكون حارس المقابر
نفسه، ولكن فيه أبشع من الدفن في المقابر، وهو الدفن في كفن الميت عشان فرصة
الوصول له وفكه تبقى حاجة شبه مستحيلة، وغالباً بيدفنه المغسل.

طب أنت عارف بقى إن السحر الأسود اللي بيخص الموت أو المرض بيتعمل
أحياناً من كفن الميت نفسه !! أنت مُتخيل الإنسان وصل لمرحلة إيه من الكفر
والشرك؟

وتعرف كمان إن فيه سحر بيتعمل من أدوات غسل الميت بهدف التفريق وتأخير
الجواز والعقم، وفيه سحر أسود بعضام الميت، إما انه يتكتب على العظام الطلاسم
والتعاويذ ويتم دفن العظام تاني بالسحر، أو استخدام عظام الميت كبخور للسحر
معروف باسم "بخور عظم اليهودي".

في خرافة متعلقة بعظم الميت، وهي إن لو فيه واحدة مش بتخلف تروح المقابر وتطلب من التربي إنه يخرج لها عظام موتى، ويا سلام لو عظام عروسة ماتت يوم زفافها، وتعددي من فوق العظام دي عدة مرات معينة وبعد كدة تاخذها البيت وتحطها في مية وتستحمي بيها !!

ولو أنت فاكِر إن كل دة كلام على ورق ومفيش حاجة اسمها سحر فأنا بفكرِك بمقابر العلمين اللي راحت لها حملة تطهير المقابر من السحر، ومن أغرب الحاجات اللي لقوها كانت صورة بنت في العشرين اسمها "مي" معموها سحر أسود ملطخ جزء من صورتها بالدم وكلمات صريحة وواضحة كالموت والذل والمرض والفضيحة ومكتوب على الصورة اسمها واسم والدتها (مي بنت نجلاء) وكل ما الغل والحدق وقلة الدين يزيد كل ما السحر ييزيد.

"السحر الزئبقي"

دة بقى يا سيدي أخطر أنواع السحر، ولو جمعت قوة السحر الأسود مع السحر الأحمر هتلاقي قوتهم في الآخر نص السحر الزئبقي!

الدول اللي كانت بتستخدمه زمان كانت الهند وجنوب أفريقيا والمغرب والعراق، بس دلوقتي انتشر في الدول العربية أكثر، لكن نادر جدًا اللي بيستعمله لأنه صعب وسعره غالي جدًا، وكمان في السحر دة الإعتماد مش بيكون على الجن بس، لا في مرددة وعفاريت، ودول طلباتهم صعبة جدًا، ولو طلباتهم كلها ما اتنفذتش بيقنلوا الساحر أو يحرقوه، فدشان كدة تلاقي معظم السحره تتجنبه.

ازاي بقى ممكن يتعمل السحر دة؟

هنا الساحر بيعتمد على المردة والعفاريت وللسبب دة بيتصف بالقوة، بيعتمد على طريقة مركبة بتشمل الأنواع الأربعة للسحر الناري والمائي والهوائي والترابي.

الساحر يبقى معه حاجة تخص المسحور سواء صورة أو حاجة فيها ريحته، وينفث عليها وبعد كدة يقرأ طلسم وتعويدات، وبعد كدة بيحط تركيبة أعشاب والشمع الأسود، ودة بيدل على السحر الناري، وتراب المدافن ودة بيدل على السحر التراي، وماء نجس بيدل على السحر المائي، وريشة غراب أسود بيدل على السحر الهوائي، ويتم تركيب السحر ودة في آخر ساعات الليل، وبيتلوث بالدم لأستحضار المارد والعفاريت.

بعد كدة بيتقسم العمل لأربع أجزاء، جزء بيتحط في النار والثاني في الماء والثالث على جناح طير والرابع بيتدفن في التراب، كدة تمام خلصنا من جزء، ندخل بقى للجزء اللي بيشره المسحور، أو ياكله أو يتحط في مكان في بيته.

بيجب الساحر أحجار خاصة من أفريقيا، ورفاة بعض الحيوانات ومواد مخاطية، وبيحط ودة كله على النار لوقت معين، لا يزيد دقيقة أو يقل، واشمعنى النار؟ لأن السحر ودة بيعتمد بشكل أساسي على الحرارة، عكس السحر الأسود اللي بيتعمل بكذا طريقة، ويتم خلطه بالمأكولات وتقديمها للمسحور.

"أعراض السحر الزئبقى"

بيظهر أعراض مسّ شيطاني وآلام شديدة في الجسم وآخر الظهر خصوصًا، وبيظهر ريحة سيئة من جسم المسحور مش بتروح حتى لو استحمى كذا مرة، سوء الحالة النفسية وتدهورها، وبيظهر من المسحور تصرفات سيئة بشكل لا إرادي منه، بعد كدة بيظهر تقرحات وحروق كثير في جسم المسحور، ودة بيعبر عن نهاية المسحور.

طيب اشمعنى اسم الزئبق عن باقي العناصر؟

لأنه يشبه الزئبق، لا حد يقدر يمسك الزئبق المبعثر، ولا حد يقدر يجمع

السحر المبعثر.



"أدوات السحر"

"الحرز" .. دة بقى الساحر بيحبيب فيه شوية شعر للمسحور وورق يكتب عليه طلاس و حروف ورموز متقطعة وأرقام ودواير ومربعات ويلف الورق بشعر المسحور ودة كله بيحطه في حطة قماش ويدفنه في أي مقبرة.

"العروسة" .. الساحر هنا بيحبيب قماش ويعمل عروسة "دُمية" بتشبه المسحور وخامة العروسة بتبقى قماش محشية قش، ويبدأ الساحر إنه يدخل الدبابيس في العروسة وبعد كدة بيرميها في النار ويقرأ طلاس وتعاويد، بحيث إن أي حاجة تحس بيها العروسة يحس بيها المسحور.

"الشموع" .. دة بيستخدم في السحر الأسود، ودة بيتعمل لما بتروح للساحر وبتطلب منه الموت للشخص!

"المياه المرشوشة" .. دة بيبقى عبارة عن بودرة أو مياه بتترش في المكان اللي المسحور بيعدي عليه دايمًا وبمجرد ما بيعدي من عليه بيتأذي.

"المشروب" .. هدفه إنه يمشي في الدم ويوصل للمنطقة اللي مطلوب إنها تتأذي، وفي الرقية الشرعية بيتعرف إنه مسحور بالسحر المشروب لما وشه يسود.

"الحروف المقطعة" .. في الطريقة دي بيتكتب سور وآيات من القرآن وبين كل سورة وآية يقرأ الساحر طلاس عشان يتقرب من الأرواح الخبيثة اللي بتخدمه.

"النجاسة" .. بيكتب فيه الساحر سور وآيات من القرآن بالنجاسات، كدم الحيض وغيره، وبعد كدة بيدأ يعزم عليهم.

"التنكيس" .. في الطريقة دي بيكتب الساحر فيها آيات وسور من القرآن لكن بشكل معكوس وبعد كدة بيعزم عليها.

"الحيوانات" .. أيام الفراعنة كانوا بيحفظوا القطط ويدفونها مع الموتى عشان تحميهم من الأرواح الشريرة، والكلب بقى يُستخدم في السحر الأسود ويستخدمه السحرة للجلب، وعين الكلب الميت للانتقام، والماعز بقى يُستخدم للربط أو تفريق الأزواج، وشعر الماعز الأسود بيتعمل بيه وقف حال للبنات، وكمان في أفريقيا بيستخدموا السحر دة عشان يفوزوا في الملاعب، سحر الماعز مرتبط جدًا بالسحر الأحمر، وكمان أمعاء الخنزير ليها مفعول رهيب في السحر، وعظمة الكتف للخراف والأبقار.

"طلسم نجمة داود الخماسية" .. دي عبارة عن نجمة خماسية إما بتسمى نجمة داود أو خاتم سليمان أو نجمة خماسية، أعضائها الخمسة بيدلوا على الأرض والهواء والماء والنار والروح، وبستخدم في السحر الأسود و جلب الشيطان للساحر لخدمته.

"صب الرصاص" .. ودة بيتعمل عن طريق صب الرصاص في طبق من المعدن لحد ما يدوب وبيتقرأ عليه طلاسّم ولما بيخلص الساحر قراءة بيوجب الرصاص دة ويصبه في طبق تاني فيه مياه باردة أو يرميه على الأرض حسب بقى الغرض من السحر دة، وهدف السحر دة في الأغلب بيكون رد الحبيب العنيد أو رجوع الزوج بس ذليل.

"البيضة" .. دي لجلب الحبيب .. بيتعمل لرد الحبيب لما بيبقى مفارق أو على خصام أو عنيد أو مبيحبش اللي طالب السحر أصلاً، وتأثير السحر دة بيبقى كبير لدرجة إنه بيرجع المسحور بالغصب وبيكون مكسور لحظة رجوعه، وهنا الساحر بيوجب بيضة بشرط إنها تكون متباضة في نفس اليوم اللي هيعمل عليها السحر ويكتب عليها طلاسّم وييسبها بعد كدة على فحم الجمر المشتعل، وبيوجب صورة المسحور ويحطها فوق البيضة وفوقها بعد كدة صورة طالب السحر.

"الحجاب" .. الساحر هنا بيوجب حثة قماش أو ورقة بيلفها على شكل مثلث وبيكون كاتب جواها طلاسّم بأشكال دائرية والأشكال دي بتدل على إن السحر بيتفعل في أوقات معينة في السنة، لكن قوته بتزيد في يوم ١٤ و ١٥ من كل شهر هجري، والسحر دة بيحقق كل الأضرار المطلوبة .. أما عن أعراضه فبتكون على هيئة ثقل في الرأس، وبيحس المسحور بدوار وصداع وبيحلم كتير بالشعابين والحشرات والجن.

"الاسم، واسم الأم" .. كان زمان الناس بتخفي اسم أمهاتهم عن الأغراب عنهم عشان لو في منهم سحرة أو نفوس خبيثة، لأن الساحر لو عرف اسم الأم سهل جداً عليه ينفذ السحر دة عن طريق إنه يربط الشيطان بالمسحور عن طريق اسمه واسم الأم، طيب اشمعنى اسم الأم مش الأب؟

لأن الإنسان بتكون رابطة بالأم أقوى من الأب، بسبب إنه بيبقى في بطنها

تسعة شهور ويتغذى من جسدها، وبكدة يبقوا في حُكم الشخص الواحد.

"تاريخ الميلاد" .. موجود في كُتب السحر "علم الجملجولية والتنجم" و"علم الكواكب" .. ومن خلال تاريخ الميلاد يقدر يعرف برجك وإيه طبعك سواء كنت هوائي، مائي، ترابي، ناري .. ولما بيعرف طبعك بيستنى ساعة معينة في اليوم فتقابل فيها الكواكب عشان يعمل العمل للمسحور، ولو طبعك ترابي بيدفلك العمل في التراب، ولو هوائي بيعلقه في الهواء، ولو مائي يرميه في البحر، ولو ناري يبحرقه، وطبعاً قبل دة كله بيبقى قارئ عليه طلاسّم وتعويزات عشان يستعين بالأرواح الخبيثة، وبعد كدة بيعقدها بحاجة من أثر المسحور وفي النهاية بيقدم قربان للجن بيبقى عبارة عن حيوان مذبوح.

"الصوت" .. إما أنك تكون قاعد مع الساحر ويبدأ يقرأ طلاسّم وتعويزات فالسحر يصيبك، أو عن طريق مكالمة تليفون.

فيه اسماء بتسمّعها كثير حواليك، بس كل الي بيعجي على بالك أنهم شخص واحد، تعالى أوضحلك الفرق بين كلٍ من (الساحر، الكاهن، العراف، المنجم، الدجال).

"الساحر"

الساحر دة الشيطان الي على هيئة بشر، ويتعامل بالسحر الأبيض والأسود والأحمر وخلافه، وهدفه الأول والأخير الإيذاء بمقابل مادي.

طب هو أي حد كدة ييقى عنده الرغبة إنه ييقى ساحر ويتعلم السحر بينجح في دة؟

لأ ياسيدي .. لأنه لازم يكون مُطيع للجن وينفذهم أوامرهم من كفر وسجود،

وكمان يبقى عنده شجاعة كافية تخليه يتحمل اللي هيشوفه من جن وشياطين ومردة.

كان فيه قصة كدة مشهورة بين الناس عن واحدة كانت عايزه تتعلم السحر فكان المطلوب منها إنها تسجد للجن، وتشرك بالله، وبالفعل عملت كدة وخرجت عن ديارتها، وبعد كدة الجن طلبوا منها إنها تحجب رأس خروف ميت وتدفنها في المقابر، وكل يوم تروح عند المكان اللي مدفون فيه رأس الخروف وتسب أمها وأبوها والدين، وفي مرة أمروها تروح هناك وتحفر وتخرج رأس الخروف، وبالفعل عملت كدة ولكن وهي بتخرجها .. ماء الخروف، فهات من خوفها !!

أنت متخيل الست دي ماتت على إيه؟ وعقابها في الآخرة هيكون إيه؟

اللي قلّد صوت الخروف كان جني، ودة كان إختبار لشجاعة الست دي لأن طول ما هي مش شجاعة مش هتفيدهم لأنهم عايزين حد شجاع عشان يساعدهم في هدفهم وهو الإيذاء والإفساد في الأرض، والموت على الكفر، ودة هدف يسعى له الشيطان سعي رهيب، وهيفضل لآخر يوم في الأرض يسعى لدة، لأنه عايز أكبر عدد ممكن من البشر معاه في جهنم، اللي على أعتقاده إن البشر هما السبب في خلوده في جهنم.

طب يعني اللي بيعمل كدة الشيطان ولا الجن؟

بُص إرجع لـ "عالم الجن" في نفس الكتاب دة عشان تقدر تفرّق بين الشيطان والجن وباقي المخلوقات الغامضة.

"الكاهن"

دة بني آدم جاهل لأبعد الحدود بيدّعي إنه يعلم الغيب، ويبروحله بعض الناس وهم زيادة عنه في الجهل عشان يعرفهم مستقبلهم، يمكن معاه صحائفهم ولا حاجة !!

"العراف"

عارف بتوع قراءة الفنجان والزهر والودع وورق الشدة ويقولك بقى على حاجات حصلت في الماضي وأنت متعرفهاش، وكمان بيتنبأ المستقبل على حسب ما هو بيدّعي.

"المنجم"

دة اللي بيشوف حركة الكواكب والنجوم وعلى أساسها بيدّعي إن في أحداث معينة هتحصل في الأرض زي رياح أمطار، تغيير اقتصادي أو سياسي وغيره، ويستخدّم ورق التاروت، ودي لعبة عبارة عن ٧٨ ورقة كل ورقة منهم فيها صورة رمزية ورقم، الرقم بيبقى له معاني في علم الأرقام، والصور ليها معاني وتفسيرات في علم التنجيم، بيتقسم الورق دة لمجموعتين، واحدة اسمها السر الأصغر وفيها ٥٦ ورقة، والثانية اسمها السر الأعظم ودي فيها ٢٢ ورقة، والورق بيبقى له ترتيب معين وقت الإستخدام.

طبعا مهمته التنبؤ بالمستقبل، ولكن دة مش هينفع يظهر على شاشات التلفزيون ويقولوا إنهم يعرفوا المستقبل لا، استغفر الله، هما بيخبوا دة ورا ستارة بكلام وهمي، يعني مثلا في مرة فيه منجم ظهر في لقاء على التلفزيون بيتكلم عن ورق التاروت، وقال إن أنا ليا شخصية تانية مسافرة عبر الزمن وعاشة في المستقبل، وبعرف المستقبل عن طريقها وعن طريق الذبذبات اللي بتخرج الطاقة الروحية مني وبتظهر على الورق دة، وعن طريقها بعرف أحداث المستقبل بالتفصيل!!

طبعا مش محتاجة أقولك إن كل دة كذب، لأنه بيحاول يتنبأ بمساعدة الجن أحيانا، ومبيكونش تنبؤ دة بيكون تخمين وهمي.

وفي النهاية كذب المنجمون ولو صدقوا، ودة سحر الإستعانة بالكواكب اللي

كنت كلمتك عليه..

قال الله تعالى:

"قُلْ لَا يَعْلَمُ مَنْ فِي السَّمَوَاتِ وَالْأَرْضِ الْغَيْبَ إِلَّا اللَّهُ" (النمل: ٦٥)
"الدجال"

الدجال مختلف تماماً عن الساحر، لأنه لا عنده خدام ولا يعرف طلاسّم ولا طرق عمل سحر، هو هدفه شهرة كبيرة عشان يجمع فلوس وخلاص، وفيه جهلة كثير يمشوا وراه، بتلاقيه منتشر جداً في الريف والصعيد، اللي عايزة تخلف تروحله والي عايزه تتجوز وغيره، بيطلب منهم طلبات غريبة.

يعني مثلاً واحدة بتحكي تجربتها مع الدجال وتقول إن حماتها خدتها لدجال مشهور عندهم في البلد عشان مكانتش بتخلف، حماتها كانت بتقول عنه راجل "مبروك" ودة بيبقى الاسم المشهور عن الدجالين في الريف، وراحتله مع حماتها ومرات أخو جوزها، راح عملها حجاب كدة وقالها تحطه في البيت في الأوضة بتاعتها، وطلب منها كمان إنها تدخل تقعد جوة عين مقبرة بالليل عشان تتخض وتخلف، هي كانت رافضة ولكن حماتها فضلت تقنعها عشان جوزها ميسيبهاش أو يتجوز عليها، وسلفتها وحماتها خدوها بالليل على الساعة ٤ الفجر كدة، وفتحوا عين ودخلوها جواها وقفلوا!!!

وبعد نص ساعة راحوا فتحوا المقبرة وطلعوها، ولما سألوها عن اللي هي شافته جوة وإيه كان إحساسها؟ طبعاً كلنا متوقعين إنها شافت كفن بيتحرك مثلاً وأصوات بتصرخ وفيلم رعب جوة لكن ردّها كان غريب جداً، قالتلهم الجو كان بارد قوي، وكان فيه حد بينفخ في وشي، وفيه هدوء غريب!

وفي النهاية خلفتش برضو وفلوسهم ومجهودهم راح على الفاضي.

وحكايات زي كدة كتير وناس بتصدق النصب بسهولة، وكمان فيه دجالين "الفكر"، ودول اللي بيكذبوا ويضللوا الناس ويشربوهم فكرهم، خلي بالك منهم لأنهم مقنعين شوية.

طيب يا ترى هو الجن كله بيخدم في السحر ولا نوع وقبائل معينة؟
في الفقرة الجاية دي هذكرلك أسماء نادرة وحقيقية لبعض الجان والشياطين ووظائفهم، حاول متكررش نطق أسماءهم.

"الأسد الغضوب" .. من الجن اليهودي، ولقبه "أبو العهد" و"الليث الوثوب"،
وبيخدم الساحر في أعمال الكره والربط والطلاق والحناق بين الأزواج.

"طلمش" .. من الجن المسيحي وبيبقى السبب في الصرع عند الملبوسين.

"عزازير" .. إبن إبليس، ودة بيحضر في الحمام ولازم اللي يحضره يبقى نجس،
وبيحضر على هيئة فيل كبير وبيطلب من اللي حضره إنه يسجد له، ودة شرط
أساسي عشان ينفذله طلباته.

"زيتون" .. بيحضر في الحمام ولكن على هيئة قط أسود وبيتوشوش في ودنه
بطلبات الساحر.

"ساروخ" .. ودة أكبر أبناء إبليس ولازم اللي يحضره يكون عاري ويقرأ عزيمة
خاصة بساروخ وبيحضر ويبدأ ينفذ المطلوب.

"دنهش" .. دة بقى أقوى أبناء إبليس وبيحكمهم، وبيحضر على هيئة شخص
لابس عمامة وأسود وفي إيدته الشمال عصاة غليظة.

"ناصرور" .. وهو ثاني أقوى أبناء إبليس بعد "دنهش" وهو من أقذر الشياطين

وأقواهم، ومش أي ساحر يقدر يحضره لأن انتقامه شديد في حال إنك لو معرفتش تحقق طلباته.

"ميمون النكاح" .. في بعض الأقاويل إنه يهودي، ودة بيتسلط على الناس عشان يعذبهم.

"سنباب ابن البواب" .. بيحضر في الحمام وعنده كذا إيد، وكل إيد ليها اختصاص ولون مختلف عن غيرها، وهنا الساحر بيطلب منه نزيف أو طلاق أو ربط أو خلاف.

"زعزوع" .. دة مهمته الجلب والمحبة.

كل اللي فاتوا دول من الذكور في الجن، طيب هل فيه إناث شياطين وجن بيتم استخدامهم في السحر؟

طبعاً .. ومن أشهر خادمت الجن والشياطين هم بنات إبليس، ومن اسماءهم "ذات المحاسن" و "عائنة" و "بنات الخناس"، كلهم يجتمعوا على طلب أساسي، وهو إن اللي يحضرهم لازم يعاشرهم الأول.

طبعاً أكيد سمعت كتير عن اسم "الزئبق الأحمر" في أي مسلسل كان فيه تدوير عن كنوز، وأنه شرط أساسي لفتح أي مقبرة فيها كنوز أو يسرق فلوس!!

طب ليه الزئبق الأحمر بالأخص؟

لأن الجن بيتغذى عليه، فيبقى سبب في إطالة عمره ويفضل شاب وبيزيد كمان من قوته، والمفعول دة مش بيتم إلا لما الجن ياخذ الزئبق الأحمر من بني آدم، ومقابل دة الجن بيديه كنوز أو فلوس بيبكون سارقها من البنوك ومطابع العملات

من أي دولة، ولكن لما الساحر "داوود التائب" سأل الجن بيجيب الفلوس منين؟
قاله من مطابع العملات في "كندا"، ولكن الفلوس دي ييبقى ليها فترة وتختفي،
ودة حسب اتفاق الجن مع حارس الأموال، يعني مستغربش لما تلاقي فلوسك
بتخلص بسرعة!

طيب الطلاسّم والتعاويز دي بتيجي منين وإيه مصدرها؟ وهل يا ترى من
تأليف بشري ولا الجن هو بيعلمك دة عشان تعرف توصله؟

بُص، الطلاسّم عموماً كانت موجودة عند المشعوذين القدماء، اللي هما
المغاربة، وحضارات كثيرة في الشرق الأوسط، ومن بينها حضارات بلاد ما بين
النهرين ومن ضمنهم السومريون والبابليين القدماء، إضافة إلى الفراعنة والعرب
في الجاهلية، بس لو سألتني عن إن الفراعنة والحضارات القديمة جابوا الطلاسّم
ازاي؟ هقولك الله أعلم.



"أخطر كتب السحر"

كتاب "شمس المعارف ولطائف العوارف"

الكتاب عبارة عن ٥٧٧ صفحة متقسمة على أربعين فصل، منهم بقى فصول لتعليم السحر والتنجيم وعلم الفلك وغيره..

الكتاب فيه رموز صعب جدًا فكها وفهمها لدرجة إنك ممكن تقرأ فيهم لأكثر من مرة ومتفهمش حاجة، ده غير إن فيه رموز اتوجدت لأول مرة في الكتاب ده!!

الكتاب من تأليف "أحمد بن علي البوني"، وكان يُقال حسب اتفاق جزء كبير من المؤرخين إن ده منافي لطبيعته كإنسان عاش يتأمل ويتعبد، وكتب عدد كبير من الكتب الدينية، ده غير إنه تتلمذ عنده علماء كبار، المؤرخين اللي أكدوا إنه هو اللي كتبه حجتهم إنه كان يقعد لوحده كتير جدًا في الجبال وببميل طول الوقت للعزلة، فكتبه في الأوقات دي، لكن في نفس الوقت الكتاب فيه اسماء لملوك جن وازاي بيتم التواصل معاهم واسماء خدام والتواصل معاهم، والكتاب مرعب من كمية التعاويذ والطلاسم والرموز والأشكال الهندسية وربطها بأسماء ملايكة وشياطين وآيات من القرآن الكريم وأيام لكل ملاك وشيطان، صعب يكون ده كله نابع من تأليف بني آدم، فأنقسم الناس لفريقين، إما إن "البوني" بسبب العزلة اللي كان فيها تواصل مع الجن وهما اللي قالوا كل حرف اتكتب فيه، يا إما الكتاب اتكتب عن طريق الجن برضو وانتسب للبوني، ولكن هو على حسب كلامه قال إنه ولا اتواصل مع جن ولا كتب حاجة!!

النسخة الأصلية من الكتاب ده اختفت تمامًا، وأي نسخة موجودة في السوق دلوقتي مُحَرَّفة، ودور النشر بتوزعها عشان تكسب من وراه شهرة الكتاب اللي أتلّف عقول الناس.

طبعا لو عملت بحث على الإنترنت عن ناس اتأذت من ورا القراءة في كتاب

شمس المعارف، هتلاقي قصص لا تُعد ولا تحصى، ليك الحق إنك تصدقها أو لا، لكن أنا عن نفسي مبصدقش، لأن الكتاب مش موجود أصلاً، ودة كله تزوير وتمثيل بهدف الشهرة، يا إما العامل النفسي بس والوهم أثروا على القارئ مش أكثر.

كتاب "العزيف"

هو كتاب غامض ومحدث عارف إذا كان مجرد أسطورة ولا هو حقيقي..

الغلاف الخارجي للكتاب عبارة عن جلد موتى!!

أما عن معنى كلمه "العزيف"، فهي صوت الرّمال إذا هبّت بها الرياح، وأصوات الحشرات في الليل، اللي العرب القدماء كانوا بيعتقدوا إنها أصوات الجن والشياطين اللي بينشطوا بالليل.

الكتاب عبارة عن ٩٠٠ صفحة متقسمة على سبعة فصول، مؤلف الكتاب اسمه "عبد الله الحظرد"، ولكن دة مش أكيد لأن طلع المؤلف الأمريكي "لافكرافت" وقال إن قصة كتاب العزيف كلها من تأليفه، وإن اسم "حظرد" دة واخده من اسم عيلته!!

إيه دة أومال مين عبد الله الحظرد دة؟

"الحظرد" كان مُلقب بالعربي المجنون، راجل من اليمن كان بيعحب الترحال والإكتشاف وقعد عشر سنين في صحراء الربع الخالي، ورجع منها بكتاب العزيف وقال إنه قابل مخلوقات عملاقة مرعبة، وإن كمان الشياطين علمته استدعاء الموتى، فقام باستدعاء الموتى القدامى عشان يعرف منهم أسرار التاريخ الخفية فعرف منهم حاجة غريبة جداً، وهي إن في عدد صغير من ذكور الجن أعجبوا بإنثا الإنسان واتجوزوا منهم وعملوا نسل وحكموا الأرض فترة، بعد كدة اختفى كل دة.

الكتاب مختلف عن أي كتاب سحر ثاني لأن الطلاسّم والرموز الهندسية والتعاويز الي فيه، هدفها استحضار الموتى والتواصل مع الكيانات القديمة الي كانت عايشة على الأرض قبل الإنسان، وقال إنهم تجسدوا في شكل الإنسان وبدأوا يتجوزوا من البشر عشان نسلهم يزيد على الأرض وترجع ليهم لوحدهم ثاني !

الكتاب دة فيه اسماء كثيرة عربية وأعجمية وغربية وشرقية، ودي اسماء موتى من أول ما الخلق بدء، وكمّان فيه فصل من الكتاب فيه قوانين الموت ومرحلة ما بعد الموت، في الكتاب صور ورسوم لمخلوقات أسطورية غريبة ومخيفة، زي الكوثولو، ولكن "الخطر د" بياكد أنه قابلها ووصفها على هذا الأساس .

الكتاب تمت ترجمته لكذا لغة، ولكن سنة ١٠٥٠ قام "ميخائيل الأول" ملك رومانيا بحرق النسخة الي تمت ترجمتها باللغة الإغريقية بعد ما قرأها، وقال إنه حرقها بسبب الأذى الي اتسببته، وكمّان عند كل حد قرأها لدرجة إنها وصلّت بعض الناس للجنون!!

وبعد كدة تمت ترجمته للغة اللاتينية، بس النسخة دي نالت الحرق على يد "جريجوري التاسع" بابا روما، سنة ١٢٢٨ وحرق أي نسخ موجودة، ما عدا نسخة واحدة بس نجت من الحرق، وكانت موجودة في المكتبة القديمة للفاتيكان، والنسخة دي تمت ترجمتها للغة الإنجليزية، سنة ١٥٨٦ ولكن النسخة مفيش دار نشر طبعتها كاملة، وفضلت النسخة الأصلية في مكتبة "أكسفورد" في إنجلترا، والنسخة دي وقعت في إيّد الساحر "السترا كراولي" الي فضل محتفظ بيها لحد ما جه "لافكرافت" وعثر عليها، واستعان بالكتاب دة في تأليفاته وكتبه، بس بُصّ التواريخ الي ذكرتهالك فوق دي كلها وبُصّ لأقدميتها، والمفاجأة بقى إن "لافكرافت" اتولد في أغسطس ١٨٩٠، يبقى مين صاحب الكتاب الأصلي؟ "الخطر د" ولا "لافكرافت"؟؟

كل الفكرة إن "لافكرافت" احتفظ بالنسخة دي ورفض أنه يديها لحد، لدرجة أنه لما اتسأل عن مكان النسخ المترجمة، قال إنهم في جامعة "ميكاتوسيك"، ولكن في الواقع إن اسم الجامعة دة مجرد خيال من "لافكرافت"، ومفيش جامعة بالاسم دة. كتاب "مخطوطة جيجاس"

الي سمّوه بكتاب الشيطان، واللي يفرق الكتاب دة عن الكتابين الي فاتوا هو إنه موجود وبنسخته الأصلية في المكتبة الوطنية التشيكية، ما عدا خمس صفحات مقطوعة منه، الكتاب فيه غموض وغرابة من أول حجمه وطوله وصفحاته، وتعددت الأخبار والمخطوط الي مكتوبة بيها ومحدث يعرف مين الي كتبه. طيب ليه سمّوه كتاب الشيطان؟

كان في حكاية كدة قديمة، وهي إن كان في راهب نقض عهد ما مع الدير، فاتحكم عليه بأن جسمه يتعلق على الحيطه وهو حي، فطلب إلتماس عشان يهرب من العقوبة دي، والإلتماس كان أنه يوعدهم بكتابة كتاب في ليلة واحدة عشان يمجّد الدير للأبد، والكتاب دة هيكون فيه كل معارف الإنسان، لكن جه نص الليل على الراهب وهو مش عارف يكتبه لوحده فقرّر إنه يسجد للشيطان تقريباً منه عشان يساعده، وكمّان باع نفسه للشيطان، وقال إن فعلاً الشيطان ساعده في كتابة الكتاب دة، لكن في الأول والآخر دي مجرد أسطورة، يعني منعرفش إذا كانت حقيقية أو لا.

طب اشمعنى الكتاب اتنسب للشيطان مش للراهب؟

لأن من ضمن صفحات الكتاب فيه صورة مشهورة جداً بتمثل شكل الشيطان، ويقال برضو من ضمن كلام الأسطورة إن الراهب رسم صورة الشيطان الي ساعده ك نوع من أنواع الشكر للمعروف الي قدمه الشيطان، وفي

أقوال تانية إن الشيطان هو اللي رسم نفسه عشان يسبب أثر من خلاله يتعرف مين اللي كتب الكتاب، الصورة ظهر فيها الشيطان بمخالب في إيده ورجليه وأربع أصابع في كل إيد ورجل، ولابس فرو بيغطي أسفل جسمه بس.

الكتاب كمان فيه أحداث تاريخية وفيه نصوص غفران وتصوير لمدينة السماوات وأساليب مكافحة المسّ الشيطاني وطرده الأرواح الشريرة.

ولكن هتفضل كل دي أساطير ومحدث يعرف لحد دلوقتي مين كتب المخطوطة دي، لكن رأيي الشخصي هو إن أي كتاب سحر أو غامض الشيطان له يد فيه.

تسمع عن مقولة "انقلب السحر على الساحر"؟

دي حقيقة كل ساحر بتبقى نهايته بشعة، الجن مش بيصبر كثير على خدمته للبنى آدم، الطبيب الشرعي الدكتور "محمد الشيخ" بيقول أن أي جثة ساحر بتجيله في المشرحة بيبقى فيه ملامح رعب تدل إن الشخص دة عاش لحظات رعب غير طبيعية قبل موته، دة غير إن لون الوجه بيبقى أزرق تمامًا والعيون جاحظة واللسان خارج الفم، والجثث دي بتتحلل أسرع من غيرها، وأثناء تشريحها بيبقى فيه طاقة سلبية غريبة!!

طيب تسمع كمان عن الساحر المصري بتاع طلسم العزيمة البرهتية اللي قالها في فيلم "عاد ليتقم"؟

الفيلم دة مصري، وطلسم العزيمة البرهتية دة طلسم حقيقي واتقال في مشهد جوة الفيلم، والطلسم انتشر في البيوت المصرية وأصبحت لعنة الطلسم منتشرة في كل بيت.

السيد حسيني الفلكي اتعاهد مع إبليس وبقي أقوى روحاني، وكان كثير من

المشاهير بتلجأ له عشان شهرة وفلوس أو انتقام، وكان بيشتغل في أكثر من كتاب للسحر الأسود، زي الجوهره، وكمآن شمس المعارف وغيره، ومات موة بشعة، والدليل على دة ملامح وشه، بتحكي مراته إنها دخلت عليه الغرفة بتاعته لقيته مرمي في الأرض وعينه مفتوحة جامد وباصه ناحية السقف، وبوقه مفتوح جامد ووشه أزرق شاحب يكاد يكون متخشب، ولما بصت على السقف مكان ما هو باصص، لقت بقعة سودة غريبة!!

بالرغم من أنه كان متعود يتعامل مع الجن ويشوفهم، لكن يا ترى هو شاف إيه مات بسببه!!!

دة كمآن لقوا جوة شقته كميات كبيرة من اللبن، ومناديل عليها دم، وصور كثير لمشاهير، ومكتوب عليها طلاس، وورقة مكتوب فيها اسماء لمشاهير وممثلين، وورقة تانية مكتوب فيها اسماء غريبة تدل إنها اسماء جن، والورقة دي فيها خرم من النص وقفل، زي ما يكون عمل سحر للجن!

أنت متخيل الجبروت؟؟ إنك تعمل عمل للجن نفسه؟!!

الطب الشرعي موصلش لسبب الوفاة وفضل سبب الوفاة غريب، دة المفروض كان فلكي والناس بتروحله عشان المستقبل واللي هيحصل فيه، لو كان يعرف المستقبل كان الأولى إنه ساعد نفسه.

الساحر ربنا بيتقم منه في الدنيا قبل الآخرة، وداياً نهايتهم بشعة، دة غير عقابهم في الآخرة..

في النهاية لازم تعرف إن السحر بياذي ويقتل ويتفك بأمر من الله وبس، وإنك واجب عليك تحصن نفسك بالأذكار والرقية الشرعية والقرآن، وخاصة سورة

البقرة، بحيث إنك تحاوط نفسك بذكر الله، ولو قررت إنك تستغنى عن أي هذوم تخصك حاول تنقعها الأول في مياه وملح لمدة ٣ أيام، عشان تقطع أي صلة ليك بالهدوم دي، وتعرف كويس هتدخل مين بيتك، ومش أي مياه تعدي من فوقها، وآه السحر ممكن يتفك بالقراءة على المسحور، ويشرب أعشاب معينة، ولكن ممكن ميتعالجش لأن دة أمر الله، وممكن السحر يتفك لو عثر عليه في مقابر وغيره، زي حملات تنظيف القبور كدة، وساعتها بيبجي حد مختص يفكه، حفظني وحفظك الله من شر السحر والساحرين.

قال الله تعالى في كتابه الكريم في سورة طه:

(وَأَلْقَى مَا فِي يَمِينِكَ تَلَقَّفْ مَا صَنَعُوا ۖ إِنَّمَا صَنَعُوا كَيْدُ سَاحِرٍ ۖ وَلَا يُفْلِحُ السَّاحِرُ حَيْثُ أَتَى)

ف يا من أطعتم وسقيتم الناس سحراً .. أطعكم الله من شجر الزقوم، وسقاكم من ماء الحميم.

"مَنْ"

الفصل الثالث

"إذا أردت أن تُصبح قاتل متسلسل، فلا يجب عليك الانضمام إلى عناصر القتل
المستأجرين لدى الإنترنت المظلم؛ حيث أن هناك من يبحثون عن الضحية فقط
وليس عن محترفي القتل، لذلك دكتور رعب ينصح القاتل المتسلسل بعدم فرض
سيطرته على المستضعفين، وإلا سيصبح كائن مجهول الهوية تحت سيطرة أكبر
وأخطر منظومة سرية في العالم".

هذا الفصل للكاتب/ مينا بشرى.

روائي وسيناريست من محافظة أسيوط، ٢٣ عام.

قام بإصدار روايته الأولى في معرض الكتاب ٢٠٢٢ تحت عنوان "مدينة الجنة والنار".

وأصدر روايته الثانية هذا العام في معرض الكتاب ٢٠٢٣ تحت عنوان "إبداع شيطاني".

قام بكتابة الفصل الثالث في كتاب "دكتور رعب ٣".

"عالم الإنترنت المظلم"

(Dark web & Deep web)

تخيّل إنك في عالم تحت أمرك، عالم بيدّيك فرصة للانتقام من الي أذاك بأشع طريقة ممكن تخطر على بالك، عالم بيدّيك فرصة لكل شرّ فكرت فيه في يوم لكنك تراجعت في النهاية بسبب خوفك من العقاب والقانون، عالم تقدر تلاقي فيه كل طلباتك، وفي نفس الوقت فرصة لتلبية كل رغباتك وشهواتك المكبوتة سواء كانت رغبات طبيعية أو رغبات حيوانية ووحشية، وفرصة لأشباع وإرضاء أمراضك النفسية لو كنت مريض، عالم تقدر تجيب منه كل حاجة، كإنه مصباح علاء الدين، عايز سلاح؟! موجود، عايز تغير ماهيتك وتتحول من شخص لتاني، تحت أمرك! عايز مخدرات توصلك لغاية باب بيتك؟! موجود، عايز نووي؟ هتلاقي، عايز تنقذ حد عزيز عليك محتاج زراعة عضو معين في جسمه؟ موجود كمان أعضاء بشرية، لكن خلي بالك، عشان تنقذ حياة عزيزك فيه شخص تاني هيموت مكانه، بس متقلقش، الشخص اللي هيموت دة مفيش حد هيسأل عنه، أنت في أمان تام طالما أنت جوة العالم دة، كل الي محتاجه منك بس هي عملة غير ملموسة اسمها (بيتكوين)، لو معاك العملة دي فأنت مرحب بيبك دايماً جوة عالما المظلم، عالم لو دخلت فيه من الصعب إنك تطلع منه، فلازم تقبل بالأمر الواقع، وتقبل أنك مننا، شعارنا في الحياة هو شعار غريب شوية لكن لازم تفهمه (كن معنا ستحيا، ولكن إذا قررت أن تطرد شيطانك من داخل جسدك، فحياتك لا قيمة لها بالنسبة للجميع، والأهم أن روحك ستكون مباحة بالنسبة لنا) فسرها زي ما تفسرها.



ودلوقتي أعتقد إن هو دة الوقت المناسب لدعك المصباح، ادعك المصباح متخفش، الجنى الي هيطلعلك شكله مش مرعب، بدأت احس بلمسة إيدك للمصباح، أدعك أكثر، أدعك بقوة، ظهر الجنى! سامع بيقولك إيه؟! بيقولك "إنه موجود لتحقيق كل أمانيك، مش ٣ أمانيات بس، ولكن أهم شيء أنك تقبل بشرطه الوحيد، والشرط دة هو إنك تنسى إنك إنسان".

عرفت اسم الجنى إيه ؟

اسمه (Dark web)، (الإنترنت المظلم) .. خلىنى احكيك على الجنى شوية قبل ما اسيبك معاه، الحكاية بدأت على إيد البحرية الأمريكية بتأسيس نظام اسمه (Tor)، او بمعنى آخر (onion system)، ودة محرك بحث، لكنه غير أي محرك بحث تاني، لأنه يسمح بتبادل المعلومات بشكل سرى للغاية، ويضمن لأي شخص

إنه يتبادل المعلومات بصورة شخص مجهول غير معلوم الهوية، لكنه وقتها مكشش للعامة وكانت البحرية الأمريكية فقط هي التي بتستخدمه لحماية وحفظ معلوماتها بكامل الأمان والسرية، لغاية التي حصل في سنة ٢٠٠٢ لما طرحت وكالة مشاريع البحوث المتطورة الدفاعية التابعة لأمريكا متصفح (Tor) لعامة الناس عشان يستخدموه، وبقي متاح لأي إنسان ودة بسبب إيمانهم لتوفير حرية التصفح بأمان للمستخدمين، ومن هنا ظهر مصطلح (Deep web)، أو (الأنترنت العميق).

في البداية أحب أقولك إن الأنترنت التي بتستخدمه لا يمثل إلا ٥٪ من الأنترنت بشكل عام، والباقي متقدرش توصله بسهولة، والسبب هو إنك ببساطة متقدرش توصله بمحركات البحث العادية زي جوجل مثلاً، لأنهم عبارة عن مواقع مش متفهرسة، يعني ملهاش تعريف، وتعتبر مش موجودة غير للي معاه مفتاحها أو عنوانها، والمواقع دي موجودة بداخل الأنترنت العميق، زي مثلاً الشبكات الداخلية للشركات العملاقة، والشبكات الداخلية للحكومات لحماية بيانات مواطنيها على مستوى العالم، ومعلومات العلماء، والصحفيين التي عايشين في دول قمعية وعازين يقولوا آرائهم من غير ما يتم إغتيالهم، دة حتى البنوك بتحفظ بياناتها بداخل الأنترنت العميق لحماية بيانات عملائها بعيداً عن أي حد يفكر يخترقها، وهو دة بالظبط الأنترنت العميق، شيء اتعمل لصالح البشرية مش ضدها.

ولأن النفس أمارة بالسوء، ففيه ناس استغلت السرية والأمان على الأنترنت العميق وأظهرت أسوء ما بداخل النفس البشرية، أظهرت ظلام البشر، ومن هنا ظهر مصطلح (Dark web) وهو جزء صغير من الأنترنت العميق لا يتعدى ٥٪ من محتوى الأنترنت بالكامل، وهو دة الجني التي خرج من مصباحه ليحقق كل آمال النفس البشرية البشعة.

ودلوقتي أنا مضطر أسبيك مع الجنى، هو هيحكى ليك عن نفسه بنفسه.

شُبيك لُببيك (Dark web) بين إيديك، دلوقتي أنا هحكىك عني شوية، أنا المكان اللي الناس حذروك منه كثير، لكنك دعكت المصباح بأيدك، يقولوا إن اللي بيحضّر الجن لازم يكون بيعرف يصرفه، لكن خد بالك، أنا جن مبيتصرفش، لأنى هفضل مأثر عليك طول حياتك ولا عمرك هتقدر تنسى أي حاجة شوفتها معايا، خليك معايا هتكون ملك، لكن ملك من غير قلب، كل اللي محتاجه منك إنك ترمي قلبك على جنب وتفكر بعقلك، اتفقنا؟.

سمعت إن فيه حد بتكرهه، متقلقش، أنا مش عالم بالي في قلبك لكنك مستحيل تكون نقي للدرجة اللي تخليك مبتكرهش حد، كلامي صح؟! إيه رأيك نقتله؟! وبالطريقة والتوقيت اللي تختاره، لأن في عالمي فيه مواقع كثير للقتلة المأجورين اللي مستنيين بس الأمر منك لتنفيذ مهمتهم وشغفهم في الحياة بأكمل صورة ممكنة..

وأشهرهم موقع اسمه (Besa Mafia) كل اللي عليك بس هتدخل الموقع، وتأجر قاتل وتبعتله صورة الضحية ومعلومات عنها وأجرته اللي مش هتكون كثيرة، تقريباً ما يعادل ٥٠٠٠ دولار بالبيتكوين مقابل روح إنسان، مالك؟! مستغرب؟! مش متخيل إن الإنسان رخيص للدرجة دي؟! معاك حق، هو الإنسان رخيص في حالة لو كان إنسان عادي، لأن السعر هيكون أكثر لو كان الإنسان دة مهم وعليه حراسة مشددة، سواء كان ممثل مثلاً أو حد مشهور، أو حتى رئيس دولة، إيه رأيك كمان بعد ما نقتله نخليك تتصور مع جثته قبل الدفن، شايف أن الأمر مستحيل؟! في عالمي مفيش مستحيل، لأن في موقع كمان بيضمن صور الموتى في قبورهم، وكمان تقدر من عليه تحجز معاد وتتصور مع الأموات قبل دفنهم.

حاسك متوتر؟! صعب مش كدة؟! شايف إن مها كان كرهك ليه فهو مستحقش أنه يقتل، طيب إيه رأيك تبتزه؟ فكرة مش بطالة، كل اللي عليك

إنك هتأجر هاكلر وهيقدر يتحكم في اللاب توب أو الكمبيوتر والتليفون بتاعه، وكدة كل حاجة بيعملها وهيعملها هتكون معاك، صور شخصية مثلاً، أو تقدر تشغل كاميرا اللاب توب وهو في أوضة نومه، وحاجات كتير تقدر تكسر عينه بيها وبكدة هيفضل طول عمره راعع تحت رجلك، إيه رأيك؟ المهم إنك بعد ما تنهي على حياته سواء نفسياً أو تنهي على حياته فعلياً متحسش بتأنيب الضمير.

وحتى لو حسيت بتأنيب الضمير تقدر تجيله هدية بعدها، أو تحيب لأبنه مثلاً هدية لو كان عنده ابن، ثواني أفكر معاك في هدية، هي الأطفال بتحب إيه؟! الحيوانات تقريباً؟! القطط، الكلاب، والأرانب، فيه في الدارك ويب أرنب لو محتاج، لكنه (أرنب سيء)، هبقى احكيلك عليه بعدين.

المهم لو لسة تأنيب الضمير واجعك فالعلاج النهائي عندي، تعرف إن المخدرات بتخليك تنسى كل حاجة، وتدخلك في حالة رضا وسعادة ونشوة محسيتهاش قبل كدة، فغالباً هتنسى إن عندك ضمير بعد ما تكون إنسان مدمن، هتلاقي المخدرات بكل أنواعها معايا بأسعار متفاوتة.

يعني مثلاً فيه موقع اسمه (Alphabay market) عايز أقولك إنك في الموقع ده هتلاقي كل حاجة ممكن تتخيلها، كل أنواع المخدرات، وأعضاء بشرية، وأسلحة بكل أنواعها لو حببت تجرب إنك تقتل في يوم بإيدك، وكل أنواع السموم، وفيه كمان أسلحة بيولوجية، فلوس مزورة، جوازات سفر مزورة، حتى الهويات المزورة هتلاقيها موجودة، ببساطة أنت وقعت جوة كنز علي بابا، ولكن من نوع خاص.

شايف في عينك مجرد قلق، لكن مش رعب ودي حاجة غريبة، لأن اسمي بمجرد ما بيتقال الناس بيصيبها الفزع، تقريباً معرفتكش على نفسي بالشكل المناسب لسة، لكن هعوضك عن اللي فات وهحكيلك عن اللي كنت متوقع إنك تسمعه، تعرف! بيقولوا إن دايماً فيه أول مرة لكل حاجة، طيب نفسك تجرّب تاكل

لحم بشري لأول مرة في حياتك؟! جرّب، ليه لأ، الحياة تجارب زي ما اتعلمنا، ولو موافق فطلبك موجود عندي بردو، ومش كدة وبس، أنت كمان هتلاقى ناس تساعدك على دة، لأنّي هقولك على موقع دلوقتي اسمه (RIL Cannibal) ودة حاجة كدة زي الفيس بوك، لكن كل مستخدمينه بيربطهم عامل مشترك واحد، وهو حبهم لأكل لحوم البشر، هو دة شغفهم في الحياة، فأنت لما هتدخل هتلاقى كل الخدمات المتاحة لتوفير تجربة ممتازة، فمتستغريش لو لقيت حد بيعرضلك جزء من جسمه للبيع عشان تاكله، بالهنا والشفّا !!.

عارف إنك بدأت تحس بأشمئزاز، لكن هو دة الواقع، وهي دي الحقيقة القاسية، فيه ناس بتاكل لحم البشر موجودين وسط العالم السطحي اللي أنت عايش فيه وأنت مش حاسس، مش بعيد يكون جارك من آكلي لحوم البشر وأنت متعرفش، أنصحك لو طلع فعلاً فيه حد قريب منك من آكلي لحوم البشر اتصاحب عليه، لأن المستقبل الجاي لونه أسود ومظلم أكثر من العالم المظلم اللي أنت سارح فيه دلوقتي، ومش هينجى من المستقبل غير اللي هيقدر ياكل لحم أخوه الإنسان، فلو مش هتقدر تاكل لحم بشري بسبب إنك حاسس أن طعمه هيكون غريب عن اللي متعود عليه فـ الحل بسيط، حاول تشويه وضيّف عليه شوية بهارات والطعم هيكون مقبول، وبعدها اتعاطى أي مخدر وهتنسى إن اللي في معدتك دة لحم إنسان، هي دي الفكرة اللي بتدور داخل الإنترنت المظلم.

آه صحيح، متنساش تزور "عالم آكلي لحوم البشر" في نفس الكتاب هنا عشان تعرف أكثر عنهم.

أنا بدأت أشوف الخوف في عينك، جمّد قلبك كدة عشان اللي جاي أصعب، لأن فيه الأسوء من آكلي لحوم البشر في العالم، شايف اللافتة البعيدة اللي هناك دي؟! أيوة بالطبط، اللافتة المكتوبة بالدم وفيه تحتها باب خارج منه ضوء أحمر..

شايف مكتوب إيه على اللافتة؟! (Red room).

أنت لو أبستمت دلوقتي فغالبًا أنت مش فاهم يعني إيه الغرفة الحمراء، قولي كدة إيه اللي جه في بالك؟! ليالي حمراء مش كدة!! في الغالب ده اللي موجود فعلاً جوة، وإحنا هندخل الغرفة دلوقتي عشان أنا نفسي أبسطك بصراحة، لكن قبل ما ندخل عايز أسألك سؤال بسيط، هو أنت بتخاف من الموت؟! بس خلي الأجابة في مخك، مش عايز اعرفها دلوقتي.

والآن..

مدّ أيدك وافتح الباب، متستناش مني إني افتحه بنفسي، أنا بمهدلك الطريق بس، حطّ أيدك على الباب، أدفع الباب بأيدك بس بالراحة ليكون حد خالع راسه ولا حاجة، مالك مش مصدق ان ممكن يكون فيه حد خالع راسه؟ افتح الباب، إيه رأيك!!

قولتلك هيكوّن فيه حد خالع راسه، بص على الشاشة العملاقة اللي قدامك كويس، ومتخلّش أضواء الغرفة الحمراء تشتت انتباهك، شايف إيه اللي في نص الشاشة، فيه واحد راسه مخلوعة؟ مصدوم صح؟! ما أنا مكتشش أقصد اللي خطر على بالك خالص، كنت أقصد إنه هيكوّن خالع رأسه بالمعنى الحرفي للجملة بالظبط، كنت أقصد إن راسه هتكون متشالة من جسمه، مدبوح وراسه قدامه على الترابيزة.

غيرّ البث اللي شغال، عشان حاسك قرفان من منظر الدم الخارج من الرقبة المقطوعة، أتحرّك يمين شوية هتلاقي قدامك بث مباشر تاني، شايف إيه قدامك؟! واحدة لابسة قناع ومربوطة بطوق كلب حوالين رقبتها، قاعدة على الأرض وتبكي، ووراها راجل لابس قناع وفي إيده كُرباج، طيب شايف الترابيزة اللي جنب الراجل، ملاحظ عليها إيه؟! سكاكين، سواطير، كراييج، أدوات سلخ،

ومن دة كثير.

شايف البنت دي، رحمتها تحت إيدك، عارف هترحمها ازاى؟! أنك تأمر المقتنع اللي وراها أنه يقتلها، وهتكون أكثر رحمة لو اخترتلها طريقة قتل سهلة مش مؤلمة، زي إنها تَضْرِب بالنار في راسها، فإكر لما سألتك هو أنت بتخاف من الموت؟! في الغالب جَاوَبْت وقولت أيوة، تعرف إن البنت اللي قدامك دي نفسها تموت، هي عارفة إنها هتموت، لكن حلمها بسيط جداً، إن موتها يكون سريع، تعالى أقولك اللي دخلوا الغرفة دي قبلك طلبوا إيه من المقتنع عشان ينفذه، فيه اللي طلب منه إنه يغتصبها، وفيه اللي طلب منه إنه يعذبها بالكرباج وفيه اللي طلب منه إنه يقطع صوابع رجليها صابع صابع، ملاحظ إن عينك بدأت تروح على رجليها عشان تتأكد من كلامي، شوف صوابعها مقطوعة ازاى، وفيه اللي طلب منه إنه يشوّه وشها بالنار، عشان كدة هي لابسة قناع، وعلى فكرة، أنت تقدر تطلب منه أي طلب وهينفذه، تقدر تقوله يسلمخها وهي حية، جربت الأحساس دة قبل كدة؟! جربت إنك تشوف إنسان بيتسلىخ وهو حي، طيب قولي، جربت إحساس أن يكون في إيدك السلطة وعلى لسانك الأمر في إنك تنتهي حياة بني آدم أو تعذب جسده البائس على الأرض.

القرار في إيدك، بس قولي، لو كنت مكانها كنت هتخاف من الموت؟! غير لـ بثّ جديد، أتحرك يمين شوية، شايف قلبك انقبض لما سمعت صوت صراخ طفل مش كدة، وعلى الرغم إن الصورة لسة مظهرتش إلا إن وشك بقى لونه أصفر، قولتلك قوّي قلبك شوية أو ارميه على جنب..

قولي قبل ما الصورة تظهر، تتوقع الطفل دة بيصرخ ليه؟! طفل محتاج ياكل مثلاً ومش لاقى أمه؟! أكيد لا، طيب فكر شوية.

ظهرت الصورة أخيراً، إيه؟! اتفزعت!! مكنتش متوقع إنك تشوف طفل

رضيع قدامك يتعامل معاملة الدييحة صح؟ شايف الطفل متعلق من رجله ازاي؟! شايف السكاكين وهي بتعدي على جسمه؟! طيب شايف علامات الضرب الي على جسمه و وشه، في النهاية الطفل دة هيموت من الألم لكن أهم شيء هو الإحساس بالألم بالنسبة للوحش الي بيعذبه دة، تعرف مين الوحش دة؟ دة شخص واحد أشهر مجرم في عالم الدارك ويب قدوة ليه، عايز تعرف مين أشهر مجرم في الدارك ويب، هقولك..

اسمه (بيتر سكالي) .. تعرفه؟! طيب تعالى احكيلك عليه.



اتولد (بيتر سكالي) في استراليا يوم (١٩٦٣\١١\١٣) وكانت حياته طبيعية، اتجوز وخلف طفلين، وكان حنون على مراته وأطفاله، لغاية سنة ٢٠١١، وهي السنة الي أكتشفوا فيها إن بيتر عليه ٥٧ قضية نصب بقيمة تتعدى الأثنين مليون

دولار، فمكش قدمه حل ساعتها غير إنه يسبب استراليا ويهرب منها، وفعلًا عمل كدة وهرب من استراليا بدون أبنائه ومراته، وراح الفلبين وتحديدًا (جزيرة مينداناو).

تقريباً أول شيء لاحظته في الجزيرة دي هو انتشار الجريمة والعنف ضد الأطفال سواء من العائلات أو من أرباب العمل، وثاني شيء لاحظته هو الفقر الشديد لسكان الجزيرة، وثالث شيء هو انتشار الدعارة واهتمام أهل الجزيرة بالفيديوهات الإباحية.

وبعد فترة بيتر مبقاش عارف يلاقي الأكل ومش عارف يشتغل شغل كويس لأنه اتعود على الجرائم، تقريباً من هنا خطرت الخطة الشيطانية في عقل بيتر، ودة حصل بعد ما تعرف على واحدة شغالة في الدعارة اسمها (كارم أن الفاريز) وقدر يقتنعها بخطة، وهي إنها هتمثل إنها مراته، وهيروحوا لعائلات فقيرة ويقنعوهم بأنهم هيشترؤ منهم أطفالهم بحجة التبنى، مع وعد لحياة كريمة هتتوفر للأطفال عمرها ما هتتوفر لو كانت مع الأهالي.

وبالفعل استطاع بيتر وكارم إنهم يجلبوا أكبر عدد ممكن من الأطفال، وكان يمارس عليهم كل أنواع العذاب في بث مباشر على الغرفة الحمراء، زي السلخ وقطع الأطراف والكَي بالنار والاعتداء الجنسي والذبح، وكل حاجة، وكان بيكسب كثير جداً من المشاهدين للبث المباشر، لكنه في النهاية عبد المأمور وينفذ اللي بيطلبوه منه المشاهدين، وهنا هسألك سؤال، هو مين الشيطان في القصة لغاية دلوقتي، بيتر ولا المشاهد اللي طلب دة ؟!

نرجع لموضوعنا، فضل الموضوع على ما هو عليه ومفيش أي حاجة اتغيرت، لغاية ما كارم جابت لبيتر طفلتين أخوات، واحدة عمرها ٩ سنين والثانية ١٢ سنة، لكن تعذيب بيتر ليهم تعدى الحدود المرة دي، ودة بسبب إنهم مستسلموش للأمر

الواقع وحاولوا مرة يهربوا وغريزة البقاء لعبت دورها في قصتهم، ودة الي جنن بيتر وخلي معاملته معاهم تتعدى كل مراحل الأذى النفسي والجسدي، لدرجة إنه خلاهم يحفروا قبورهم بأيديهم عشان لما ييجي اليوم الي هيخلص عليهم يدفنهم في القبور، لكن لكل قصة نهاية، وفي الوقت دة كارم بدأت تحس بندم، فهربت الطفلتين، وبعدين الطفلتين قدروا يوصلوا لقسم الشرطة وقالوا على كل حاجة حصلت معاهم، ولما الشرطة وصلت بيت بيتر كان بيتر هرب، لكن كارم اتقبض عليها واعترفت بكل حاجة.

وانتهت قصة بيتر مع كارم، لكن ابتدت قصته مع الأسوء من كارم والأسوء من بيتر بنفسه، وهي المتشردة (ليزيل مارجالو) الي اتعرف عليها أثناء فترة هروبه وعرض عليها إنها تساعده في شغله ورحبت بالفكرة بشكل تام، وبالفعل اشتغلت معاه، وكانت دايماً بتصطادله أطفال رُضّع، ومكانتش بتساعده في جلب الأطفال بس، بل شاركت في الفيديوهات معاه بنفسها وأحياناً كان فيه فيديوهات من بطولتها هي لوحدها من كتر ما كانت مبدعة ومبتكرة في التعذيب والقتل، ومن أشهر فيديوهاتها، فيديو كان معاهما طفلتين، اعتدت عليهن جنسياً في بث مباشر، وبعدها قطعتهن أطرافهن، وبعد كدة مسكتهم من رؤوسهن وصدمت رؤوسهن ببعض لغاية ما جاجهن انفجرت، عرفت معنى الأبداع في التعذيب الي قولتلك عليه؟!

لكن دة مش أشهر فيديو ليها، لأن فيه فيديو تاني وهو الي اتسبب في نهاية بيتر وعصابته، واسم الفيديو دة (Daisy's Destruction)، وبالعربي معناها تدمير الطفلة ديزي، وضحية الفيديو دة طفلة عمرها ١٨ شهر اسمها ديزي، أما عن النص التعريفي للبت كان كالآتي (تعالى أيها المشاهد لتشهد دمار ديزي الذهني اثناء تعلمها كيفية إرضاء سيدتها)، أظن أنت عرفت مين هي سيدتها، بالظبط هي الي فكرت فيها (ليزيل مارجالو).

في البث دة ليزيل كانت لابسة قناع ومعلقة الطفلة ديزي من رجلها زي الدييحة بالظبط، وعملت فيها كل حاجة وحشة، اعتدت على جسمها وسلخت تحت من جلدها وقطعت تحت من جسمها، وحرقت أجزاء من جسمها بالنار، واستمر البث دة لمدة عشرين دقيقة تقريباً بعدين اتقفل.

بيتر أعجب بالفيديو جداً وبمهارات ليزيل، فأخذ الفيديو وعرضه في مزاد على موقع خاص بالفيديوهات البشعة والتعدي الجنسي على الاطفال في الدارك ويب اسمه (No Limits fun).

وبسبب حظ بيتر السيء اشترى الفيديو واحد اسمه (ماثيو ديفيد غراهم) وهو شخص متحرش بالأطفال ويدير موقع على الدارك ويب عليه فيديوهات من النوع دة بالتحديد، اشترى الفيديو لأنه شاف أنه أعظم فيديو ممكن يجيله مشاهدين لو عرضه على موقعه، وبالفعل من عنده الفيديو اتشهر لأن الشرطة قبضت على ماثيو وشافت الفيديو، وبعدها الشرطة قدرت توصل لبيتر من خلال الفيديو دة، وانتهت قصة بيتر يوم (٢٠١٥١١٢٠) وفي اليوم دة قدرت الشرطة تنقذ باقي الأطفال المحتجزة في بيت بيتر، واحتفظوا بالفيديوهات المسجلة لبيتر وعصابته وهما بيعذبوا الأطفال، وبالفعل بدأو يفحصوا الفيديوهات، ومعظم ضباط الشرطة أصابتهم أمراض نفسية كثيرة من بشاعة المشاهد اللي شافوها، وفيه منهم الي مكنش مصدق إن المجازر دي حقيقية لكنها حقيقي، ومرتكبها هو بيتر سكلي، وعلى فكرة .. هو لسة على قيد الحياة لغاية دلوقتي.

ودة يعتبر مش المجرم الوحيد في الدارك ويب الي تخصص في تعذيب الأطفال، لأ دة فيه كمان الشخص اللي وعدتك إني هحكلك عنه ..

وأظن إن دة الوقت المناسب الي أحكيلك فيه عن الأرنب السيء، فاكره؟! الي كنت ناوي تحبيه هدية لأبن صاحبك، تعالى أقولك على الهدية.



هو أمريكي الجنسية وعمره ٦٣ سنة، لكن معظم وجوده كان في البرازيل، اتعود الأرنب السيء أنه يخطف الأطفال، وخصوصاً الأطفال المشردة، أظن إنك فهمت أنا عايز أقولك كان يعمل إيه في الأطفال دي، وكله برغبة المشاهد، المشاهد هو اللي بيعحكم الأطفال دي تموت ازاي، يتعذبوا ازاي، ويتم انتهاك عرضهم ازاي وكل حاجة.

وبالظبط زي ما توقعت، الأرنب السيء شخصية مشهورة في الدارك ويب، خصوصاً في الغرفة الحمراء.

مختلفش عن غيره كتير لكنه مميز، لأنه متعود يظهر بملابس تبدو طفولية، كان دايمًا بيلبس ملابس أرنب لونه بُنيّ ولية أنياب طويلة وفيه فرو كتير.

لكن مش ملايسه بس اللي ميزته، بل دموية فيديوهات ميزته أكثر من أي شيء، هتصدقني لو قولتلك إنه بيقسم الأطفال لنصفين بمنشار في البث المباشر، أو إنه كان بييجبر الأطفال على شرب الدم وأكل اللحم البشري !! مقرف مش كدة ؟

أطن كفاية كلام عن الـ (Red Room) لأنني ملاحظ إنك بدأت تتعب مني وأنا ميرضنيش تعبك، لكن عايز أقولك حاجة مهمة، مش الغرفة الحمراء بس هي اللي بتقدم الخدمات دي على الدارك ويب، يمكن الغرفة الحمراء أشهرهم لأنها بتقدم محتوى التعذيب والعنف على مختلف الأعمار، تقدر تشوف طفل بيتعذب وبيتاكل وهو حي، وتقدر تشوف عجوز بردو، لكن فيه موقع تاني متخصص أكثر في الأطفال بس واسمه

(Your Own Pedo Site)

حببت أقولك عليه عشان لو حابب إنك تزوره في يوم من الأيام.

حاسك عايز تخرج من عالمي، بدأت أشوف القلب البشري بينبض داخل صدرك رغم إني قولتلك انسى إن عندك قلب، اسمحلي أقولك مش هينفع تخرج، لأن اللي بيدخل عالمي من الصعب إنه يخرج منه زي ما قولتلك، مش هسمحك إنك تعمل كدة حتى لو اضطريت إني أمد أيدي داخل صدرك وانتزع القلب اللي بينبض، وساعتها هتواجه الموت، عايز تعرف إيه إحساس الإنسان وهو قريب من الموت؟ معقولة لسة معرفتش بالرغم من كل اللي شوفته معايا !

بسيطة، هقولك على موقع في العالم بتاعي اسمه (plane crash info). الموقع دة هتلاقى فيه تسجيلات صوتية لبشر قبل موتهم بدقائق، قبل سقوط الطائرات اللي كانوا راكبينها، هتسمع صلوات، هتسمع صراخ، هتسمع أصوات ندم، هتحمس بخوفهم، عايز تموت ؟!

طالما خائف من الموت يبقى تسمع كلامي، أنا محتاجك أنت وأصحابك وكل اللي تعرفهم تكونوا جزء من عالمي، عشان كدة هقولك على الطريقة اللي تدخلوا بيها عالمي عشان تبقى معايا أنت وكل حبايبك.

أول خطوة همل متصفح (tor) عارف إن اسمه غريب، لكن المتصفح دة بيخفي (ip address) ودة يعتبر عنوان بيتك على الأنترنت، فأنت بالحالة دي جوة الدارك ويب مش معروف ولا مكشوف هويتك، ودة بيحصل عن طريق تحويل المستخدمين على سيرفرات بديلة متوزعة على أنحاء العالم.

وأنت كدة دخلت من باب البيت وناقص تدخل وتفتش في كل غرفة فيه لكن ازاى؟! ومعظم المواقع اللي قولتلك عليها مخفية!! للأسف المواقع اللي ذكرتها لك مش هتلاقيها بسهولة، لازم يكون معاك رابط كل موقع عشان تقدر تدخله، ودة هتلاقيه في موقع اسمه (The hidden wiki) في الموقع دة هتلاقي أي روابط تحتاجها، وانصحك يكون معاك فلوس كتيرة، لكنها مش فلوس حقيقية، أقصد (بيتكوين) لأن العملات الرقمية هي عملات مشفرة صعب تتبعها من الحكومات، وبالتالي لو حبيت تشتري أي حاجة ممنوعة، أو حبيت تأجر قاتل أو هاكلر، أيأ كان اللي هتعمله محدش هيعرف أنت مين، ولا حتى البائع أو مقدم الخدمة نفسه هيعرفك.

طبعاً أنت ميقن من البداية إني كنت بكذب عليك بخصوص إنك هتكون في أمان تام جوة عالمي، أنا بس حيت أهويك عشان تدخل وتجرب، في عالمي ضغطة زر غلط قادرة تدمر حياتك، لأن ببساطة لو عرفت معلومة مش من حقك تعرفها أو شوفت فيديو وخوفت بس، أو لو وقعت تحت إيد هاكلر هتلاقي جهازك اتهكر ومعلوماتك كلها اتعرفت، ونهايتك هتكون مقتول بأشع طريقة ممكنة، أو ضحية من ضحايا الغرفة الحمراء، والموضوع مش صعب أنه يتقبض عليك من خلال

عصابات الدارك ويب، لأسهل جداً لأنهم موجودين في كل حنة في العالم وكل شارع، ممكن صاحب السوبر ماركت الي تحت بيتك يكون قاتل مأجور للدارك ويب، أو تخيل تبقى نازل من بيتك عادي وراكب الميكروباص ورايح شغلك الصبح، وتكتشف إن الميكروباص دة الي هتكون فيه نهاية حياتك وإن السواق أصلاً قاتل من قتلة الدارك ويب، لأن كل سفاحين الدارك ويب عايشين وسطنا عادي، وهتحس دايماً إنهم أعقل ناس في الحياة كلها وعمرك ما هتشك فيهم أبداً.

للأسف عمرك ما هتكون في أمان بداخل الدارك ويب، لكنك دخلت خلاص ومش هينفع تخرج، أنت جزء مننا ومفيش هروب، لأنك لو حاولت تهرب فأنت ميت لا محالة، وساعتها أوعدك .. إني هخلي دكتور رعب بنفسه هو الي يشرح جثتك.

"مَت"

"عالم الكائنات الخارقة للطبيعة"

(SCP Foundation)

ذكر في كتاب العزيز للساحر عبد الله الحظرد، إن كان فيه كائنات بتحكم الأرض قبل البشر، وأنه قدر يتواصل مع الكائنات دي وإنهم أقوى من البشر أضعاف المرات، وإنهم كمان بيسعوا جاهدين لحكم الأرض مرة ثانية، ولما يمسكوا الحكم مرة ثانية هينها على البشرية بالكامل..

وكما قيل أيضاً، إن في جوف الأرض يسكن كائنات أخرى أذكى من البشر بمراحل وبتسعى أيضاً للحكم على الأرض بشكل كامل، ومن الكائنات دي الزواحف البشرية والرماديون، كائنات التواصل بينها يكون عن طريق التخاطر، بيقدروا يوصلوا رسائل لبعض من غير ما نحس بأي حاجة، ويُقال إن فيه كثير منهم حالياً عايشين وسطنا، وفيه منهم رؤساء الدول وأصحاب الشركات العملاقة اللي بتتحكم في اقتصاد العالم.

فيه أفلام كتير بتحكي عن مخلوقات غريبة ظهرت وسطنا على الأرض، مخلوقات عمرنا ما سمعنا عنها ولا عمرنا تخيلنا أنها ممكن في يوم تكون موجودة وسطنا، وكان دايمًا خيالنا بياخدنا لحتى أنها مجرد أفلام لامت للواقع بصلة، ومن أشهرهم سلسلة أفلام (الشّر المقيم)، لكن عمرك تخيلت لوهله إن ممكن تكون الكائنات دي موجودة وعاشة على أرضنا فعلاً، وبتسيطر عليها منظمة سرّية حقيقي زي ما بيكون موجود في الأفلام، لازم تتخيل كدة، لأنّي جاي احكيلك عن منظمة سرّية، موجودة في كل بقعة في العالم تحت الأرض، المنظمة دي أسمها

(SCP).

وأسم المنظمة هو اختصار لثلاثة كلمات وهما..

(Secure، Contain، Protect)، ومعناها باللغة العربية (التأمين، الاحتواء، الحماية).

هدف المنظمة هي احتواء وحماية الكائنات الخارقة للطبيعة ووضعهم بعيداً كل البعد عن البشرية، لحفظ البشرية من كل الكائنات دي، ولأجراء التجارب السريّة على الكائنات الغريبة لفهم سلوكها وازاي اتكوّنت، وبتحتوي المنظمة على حاجات كثير جداً، منهم كائنات حيّة، نباتات وحيوانات، جمادات وأحجار غريبة ليها خصائص مختلفة، وأدوية وفيروسات، ومواد خطر على البشرية وكمان الأماكن اللي بيحصل فيها ظواهر غريبة وبحاجة للدراسة، دة حتى تطبيقات للهاتف المحمول، فالمنظمة تضم كل شيء مختلف وشاذ ومُريب في عالمتا بداخلها في أماكن سريّة تحت الأرض.

مفيش حد كان يعرف حاجة عن المنظمة، لغاية ما تم نشر مقال من شخص مجهول الهوية على موقع اسمه (xchan) الخاص بالإنمي وبعض من الأشياء الأخرى، عن كائن غريب ومميزاته، وأسم الكائن دة هو (SCP-١٧٣).

أخذ المقال شهرة مش طبيعية، لحد ما بعدها بستة أشهر وخصوصاً يوم ١٩/٧/٢٠٠٨، تم انشاء موقع بأسم المنظمة على الإنترنت بإسم

(SCP Foundation)

وهو موقع لنشر كل الكائنات الغريبة الي مسيطرة عليها المنظمة، ومقالات مفسرة عنها، أما عن امتى تم تأسيس المنظمة نفسها، فالأمر غير معلوم.

موجود بداخل الموقع مقالات عن ٤٠٠٠ كائن، وكل كائن فيهم مصنف على

حسب خطورته، فيه تصنيفات كتيرة جداً لكن أهمهم ثلاثة تصنيفات وهما كالاتي:

(Safe)

ودة معناه إن الكائن دة لا يمثل أيّ تهديد على البشرية وآمن إلى حدٍ ما.

(Euclid)

ودة معناه إن الكائن بيمثل خطورة لكن المنظمة قادرة على احتوائه ودراسته.

(Keter)

ودة تصنيف الكائنات الأكثر خطورة لدرجة إنها قادرة على دمار العالم والبشرية بشكل كامل، وإن المنظمة بتحاول تتخلص منهم بأي شكل ومش قادرة من خطورتهم، وكمّان مش قادرة تدرسهم أو تجري أيّ تجارب عنهم، ودلوقتي تعالى أحكيلك عن بعض من الكائنات دي.



الكائن الأول معانا وهو (SCP ٦٨٢)، تصنيفه (Keter)، وودة معناه إنه بيمثل تهديد وخطر حقيقي على البشرية بالكامل، وخطره غير محدود أبداً، حجمه ضخّم

جداً يكاد يقارب لحجم الديناصورات، يشبه الزواحف لحد كبير، لكن جسمه مليون شعر شبه شعر الحصان، ووشه عامل زي وش التماسيح..

تصرفاته بالكامل تصرفات عدوانية، لكنه كائن عبقرى، يمتاز بقدرات خارقة للطبيعة، وسرعته عظيمة، وردة فعله سريعة وغير متوقعة، دة غير إنه قادر يتحكم في حجمه في إنه يصغر أو يكبر.

الكائن دة بيتغذى على أي حاجة، نباتات، خشب، حديد، أي حاجة قدامه بياكلها وأي حاجة بالنسبالة مصدر للطاقة اللي محتاجها، دة غير قدرته على التواصل مع كائنات كثيرة جداً بداخل المنظمة وكأنه الكبير بتاعهم.

حاولت المنظمة كثير جداً إنها تتخلص من الكائن دة لكنه مش بيموت بأي طريقة، ودة بسبب أنه قادر يعوض أي جزء افتقده من جسمه بسهولة، حتى لما المنظمة دمرت ٨٧٪ من جسمه عرف يرجع الأجزاء المفقودة بكل سهولة، لكن المنظمة مستسلمتش، وبعدها خطوه مع كائن غريب اسمه (SCP ٤٠٩)



وهو عبارة عن بلورة بمجرد ما بتلمسها بتتحول لبلور وبعدها بتنفجر، وبالفعل خطتهم نجحت و(SCP ٦٨٢) اتبلور وبعدها بكام ساعة ٦٢٪ من جسمه انفجر،

لكنه قدر بردونه يرجع الأجزاء المفقودة من جسمه بكل سهولة، وبسبب خطورة الكائن دة، المنظمة حطته في حاوية مغلقة ومليانة بحمض الهيدروكلوريك، عشان حركته تفضل مشلولة على طول.

دلوقتي أنا عايزك تتخيل لو الكائن دة موجود على أرضنا، أو إنه قدر يتكاثر بطريقة ما، أعتقد إنها هتكون نهاية العالم، مش كدة ؟!

طبيعي هتكون نهاية العالم، خصوصاً لو اتجمع مع الكائن (SCP ٢٨٦٣):

ودة كائن تصنيفه (Keter)، وللأسف موجود منه كثير والمنظمة مش قادرة تقبض على أي واحد منهم، وهو عبارة عن هيكل عظمي بشري لكنه عملاق، لدرجة إن طوله ٣٠ متر، والسنة الواحدة من أسنانه طولها يساوي طول الإنسان الطبيعي، ظهر أكثر من مرة في اليابان بالتحديد، وهو يُعتبر من أخطر الكائنات على وجه الأرض، أعدادهم كثير وضخمة والمنظمة مش عارفة تحدد هما كام بالظبط، لكن فريستهم المفضلة هي البشر أكيد، بحيث أنهم يمسكوا البني آدم وبيكسروا عظمه بواسطة أسنانهم، وبعد كدة يبدأوا يمتصوا الدم الي نازل من الضحية، والغريبة إن العظام بتاعة الكائن دة بتمتص الدم بشكل كلي كإن عظامه من الاسفنج.

كدة إحنا اتكلمنا على ثلاثة كائنات، حاول تعيد تركيزك لإن الكائن الرابع معانا مريب أكثر مما هو مرعب.

لأن الكائن الرابع هو تطبيق على الهاتف واسم التطبيق (٠, ٠, ١ Malo) وهو (SCP ١٤٧١):

تصنيفه (Euclid)، وهو تطبيق يظهر لك على التليفون بتاعك، وبعد ما تثبته مش هتلاقيه في موبايلك ولا هتلاقي أي مصدر ليه وكلإنك محملتش التطبيق من

الأساس، وبكدة أنت مش هتقدر تتخلص من التطبيق دة مهما حصل، والتطبيق دة بيشغل بعدة مراحل لتخوينك.

المرحلة الأولى : ودي غالباً بتكون ما بين ٣ إلى ٦ ساعات بعد تثبيتك للتطبيق، وفي الوقت دة هتلاقي رسائل بتبعتلك من رقم مجهول، ولما هتفتح الرسائل هتشوف حاجة واحدة بس وهي صور لكائن غريب، لابس ثوب أسود طويل وشعره أسود وطويل، وشه عبارة عن جمجمة كلب بإبتسامة ذئب، بنيتة شبيهه للبشر، ليه مخالب حادة وفرو أسود على جسمه، وعينه بيضاء بالكامل وفاضية تماماً.

المرحلة الثانية : وهي بعد ٢٤ ساعة من تثبيتك للتطبيق، وهنا هبدأ بتبعتلك رسائل من نفس الرقم المجهول، لكن لما تفتح الرسائل مش هتشوف أي حاجة غريبة، هتشوف صور لنفس الكائن الغريب، لكن المرعب في الأمر، إن صور الكائن دة بتكون في أماكن أنت متعود تروحها، زي الجامعة مثلاً أو كافيتريا متعود تروحها كل يوم، وكأنه مراقبك وعارف أنت بتروح فين بالضبط، وعازب يوصلك رسالة بكدة، بل وهييعت صور جوة الأماكن النادرة اللي أنت بتروحها، وكأنه بيبغك إنه يعرف عنك حتى أسرارك، والمرحلة دي بتستمر لمدة ٤٨ ساعة وفي خلال اليومين دول هتلاقي صور كثير جداً بتبعتلك بالطريقة دي.

المرحلة الثالثة : والمرحلة دي بتبدأ بعد ٧٢ ساعة من تثبيتك للتطبيق، وهنا الموضوع بيزيد غرابة وبيكون مرعب إلى أبعد الحدود، لأن الصور اللي هتبعتلك في المرحلة دي مش أي صور، بالعكس، هبدأ الكائن يلعب بنفسيتك ويبعتلك صور ليك وهو واقف وراك، يعني مثلاً لو أنت قاعد ماسك كتاب (دكتور رعب ٣) وبتقراه حالياً، هتلاقي في موبايلك رسالة بتحتوي على صورة، لما تفتح الصورة هتشوف نفسك وأنت قاعد بتقرأ الكتاب ووراك كائن بجمجمة كلب، لكن لو


بصيت وراك مش هتلاقيه، كإنه اختفى، او كإنه شبح.

المرحلة الرابعة : وهنا هيبدأ الشبح يظهر في الحقيقة، وهيبطل يلعب معاك ويبتلك رسايل، بتبدأ المرحلة دي بعد مرور ٩٠ ساعة بالتمام من بعد تثبيت التطبيق، وهنا بتبدأ تشوف الكائن دة في الحقيقة، لكن لعدة ثواني، تشوفه على غفلة كدة بعدين يختفي، زي مثلاً وأنت باصص في مرآة حمامك هتشوفه وراك، وأنت ماشي في الشارع ممكن تشوفه لو هله وبعدين يختفي، وأنت طالع على سلام بيتك بالليل هتلاقيه مستنيك جنب باب بيتك وبمجرد ما تخاف وعينك ترمش هتلاقيه اختفى، من الآخر هتشوفه في كل مكان تروحه وكإنه قرينك اللي مش هيسيبك وحيد أبداً، فهو في الغالب هيفضل معاك لحد ما يجننك وينهي على صحتك العقلية والنفسية.

وهنا أنا عايز اسألك سؤال؟! هو أنت مستعد تثبت تطبيق زي دة؟ لو كنت وحيد انصحك بتبتيته، لأنك بعدها عمرك ما هتحمس إنك لوحذك أبداً، الوحدة بتجنن، ونهايتك مع الكائن دة الجنان، في الحالتين مفرقتش، ليك حرية الاختيار.

الكائن الخامس معانا وهو البُعبُع، أو شيطان الظل (SCP ٠١٥): تصنيفه (Euclid)، وهو كائن معظم نشاطاته بتكون في الليل، يشبه البشر في بنية الجسم لكنه ضعيف البنية ورفيع جداً، طوله مترين، واذرعه طويلة لدرجة إنها واصله لرجله، صوابه تشبه المخالب دة غير إنها حادة وتقدر تخترق أي جسم بسهولة، لا يملك أي شعرة في جسده بالكامل، وبدون مناخير أو ودان، ولونه أسود داكن جداً لدرجة إنه يمتص حوالي ٩٨٪ من الضوء، ومعنى دة إنك عمرك ما هتقدر تشوفه في الضلمة أو في أي مكان بأضاءة بسيطة، لكن اللي بيخليك تقدر تلاحظ إن فيه حاجة غريبة في المكان هي عينه، لأن عينه بتحتوي على ألياف بتنتج الضوء نفسه، فهتلاقيه في الضلمة عينه منورة، فتخيل إنك ماشي في مكان وطلعلك، مش

هتشوف منه حاجة غير عينين منورين بنور قوي يكاد يصيب عينك بالزغللة.



الفكّ الخاص بالكائن ده فيه ٨ أسنان قوية جداً زي السكاكين في كل صف، وطول لسانه يكاد يصل إلى الـ ٢٨ سنتيمتر، ده غير إن لسانه مقسوم لنصفين زي التعاين، وكل جزء في لسانه موجود في نهايته إبرة حادة جداً.

الكائن ده ليه ميزة غريبة وهي إنه مش بيتصاب، مهما حاولت تأذيه او تجرحه جروح عميقة بيقدر يعالج نفسه في نفس الوقت، كإن خلاياه بتتجدد بشكل دائم، حتى أعضائه الداخلية إذا اتصابت فهي بتقدر تتعافى بسرعة مش منطقية بالمرّة، فريسته المفضلة هي البشر، لكن بعد ما بيصطاد البشر مش بيتغذى عليهم، بل

يبتغذى على هرمون الأدرينالين والنورادرينالين الي الجسم ويفرزهم في حالة الخوف والأحاساس بالخطر، وطريقة ألتهامه للفريسة هو إنه يراقبه لحد ما يكون لوحده، وبعد كدة ييقرب منه ببطء، ويعضه بأسنانه الحادة في مكان الغدة الكظرية الي بتفرز هرمون الأدرينالين، وبعدها جزئين لسانه المقسوم بيدخلوا في جسم الإنسان، جزء منهم ييمتصّ الدم المندمج مع الأدرينالين، والجزء الآخر يفرز مادة داخل الجسم زي المهدئ، بحيث إن الضحية تتخدر.

لكن أحب أقولك إن في حالة إن الفريسة قدرت تنجى منه فدة أصعب من الموت، لأن الفريسة هتبدأ تعيش في كابوس يومي من بعدها، وهتهاجمها الهلاوس كل يوم، وهيشوف البُعْبُع في كل مكان حواليه، دة غير الأكتئاب الي هيصيب الفريسة، وضعف البنية والجسد، في الغالب لو قدرت تهرب من البُعْبُع فهو هيفضل مسيطر على عقلك لغاية ما تموت.

ومن هنا ندخل في الكائن السادس وهو أشهرهم على الأطلاق، كائن لو شوفته هتتمنى إنك تكون سمكة، وهو (SCP-١٧٣) :

تصنيفه (Euclid)، وهو عبارة عن تمثال كبير لونه أصفر، برأس كبيرة حجمها مضاعف لرأس الإنسان الطبيعي، عينيه الأتنتين لونهم أخضر لكن مش نني عينه الي لونه أخضر، بل عينه بالكامل خضراء كإن محطوط مكان عينه قطعتين من الخيار، فمه صغير، وتحت عينيه دائرتين لونهم أسود محيرين لدرجة إنك ممكن تتلغبط وتفكر إنهم عينه، ما بين عينيه الأتنتين خطوط عريضة لونها أحمر زي لون الدم.

الكائن دة موجود بداخل حاوية معزولة في المنظمة، ودة لأنه خطر جداً، وعشان أي حد يدخل الحاوية الي معزول فيها لازم يطبق شروط عشان يقدر يطلع من الحاوية وهو على قيد الحياة.

ومن هنا لازم أقولك ازاى تفضل عايش لو شوفت الكائن دة، الشرط الوحيد هو إنك تفضل باصص في عينه وإياك ترمش بعينك ولو لمدة أقل من الثانية، لأن في الفترة القليلة جداً دي راسك هتتفضل عن جسمك، الموضوع صعب جداً إنك تفضل باصص في عينه وهو يقربلك من غير ما ترمش، وعشان كدة العُمال في المنظمة لقوا خطة في إنهم يحافظوا على هدوئه وهما قرييين منه، ودة لأن فيه مادة غريبة بينزلها الكائن من جسمه لونها أحمر زي الخيوط اللي في وشه، والمادة دي لازم تنتصف مرة كُل أسبوعين على الأقل.

ومن هنا جت الفكرة للعمال اللي شغالين في المنظمة، وهي إن ثلاثة أشخاص يدخلوا الحاوية اللي هو فيها، واحد ينصف، والأثنين التانيين يفضلوا يبصوا في عينه من غير ما يرمشوا، لأن لو الأثنين رمشوا في وقت واحد الأثنين هيموتوا، ولما أي حد بيرمش لازم قبلها يقول لصاحبه، لغاية ما يخلصوا تنضيف ويطلعوا من الحاوية المعزولة بسلام، قولتلك لو شوفته في مرة هتتمنى إنك تكون سمكة، لأن السمك مش بيرمش.

دلوقتي أنا هحكملك حاجة غريبة كدة، سمعت عن الطاعون؟! عارف اللبس اللي كانوا بيلبسوه أطباء الطاعون زمان في العصور الوسطى، العباية السوداء الطويلة اللي فيها زي ما يكون شال بيغطي الرأس، والقناع اللي يشبه الطيور بمنقار طويل جداً، دة غير القفازات السوداء، أهو دة بالظبط اللبس اللي كانوا بيلبسوه أطباء الطاعون، حكيتلك عنه عشان أنا جاي أقولك إن لغاية دلوقتي فيه طبيب طاعون لسة عايش وهو الكائن السابع معنا واسمه (Scp ٠٤٩) :

تصنيفه (Euclid) وهو كائن بشري طوله متر وتسعون سنتيمتر، ووزنه ٩٦ كيلو جرام، لو شوفته هتحس إنه لابس لبس أطباء الطاعون، لكنه في الحقيقة عريان، والهدوم دي جزء من جسمه بتنمو معاها، يعني من الآخر ملابس أطباء

الطاعون تعتبر جلده، حتى راسه والمنقار الكبير الي في وشه دة جزء من هجمته، هيكله العظمي هو هو الهيكل العظمي الخاص بالبشر، مشهور بأنه عدو للبشر، يعني لو لمسك هيقتلك، وبعدين هيشرح جثتك، وهيحط جوة جثتك مواد كيميائية غريبة أو أدوية غريبة، وبعد ما يعمل فيك كدة، هتصحى من الموت، لكنك هتكون ميت بيتحرك، زي الزومبي أو الموتى السائرون، هتصرف بغرابة لأن وظائف المخ عندك هتشتغل بشكل غريب، وهرمون الأدرينالين هيكون مرتفع بشكل مش طبيعي، من الآخر أنت ميت لكنك بتتحرك، ممكن تاكل بني آدم غيرك أو أقرب الناس ليك، ممكن تقتل نفسك لكن دة مش مهم لأنك في كل الأحوال هتموت، ودة بسبب إن أعضائك بعد العملية الجراحية الي أجراها عليك طبيب الطاعون هتبدأ تتأكل ببطء شديد وفي النهاية مصيرك واحد بس وهو الموت.



من أهم مميزات طبيب الطاعون هو الذكاء، تقريباً أذكى من أي بشري على الأرض، كمان بيتكلم بأكثر من لغة لكن أكثر لغتين بيتكلمهم هما الفرنسية

والإنجليزية، عنده ميزة غريبة جداً، هي حاجة غريبة كدة وهو إنه بيحب يسجل كل حاجة بتحصل حواليه في أجندة كأنه بيسجل مذكراته، وده اتعرف في يوم القبض عليه، ليلة القبض عليه حصلت في فرنسا، خصوصاً في بلدة مونتوبان، لما الشرطة تلقت بلاغات كثيرة باختفاء العديد من البشر، وقتها الشرطة عملت تحريات وأبحاثها وقدروا يوصلوا للمكان اللي فيه الناس المختفية وهو كان عبارة عن بيت مهجور، لكنهم لما راحوا اتفاجئوا إن الناس مش ميتة بل كانوا أشبه بالزومبي، وبالفعل البشر الزومبي بدأوا يهجموا على الشرطة عشان ياكلوهم، وفي نفس الوقت كان طبيب الطاعون بيص على اللي بيحصل من شباك من شبايك البيت وبيسجل كل حاجة في الأجندة الخاصة بيه وهو سعيد.

لكن الشرطة قدرت تتغلب على البشر الأموات، وقدرت تقبض على طبيب الطاعون، وقتها راحت منظمة SCP واحتجزت طبيب الطاعون واكتشفت إنه بيتكلم، وذكي جداً، وهادي جداً ومتعاون مع موظفين المنظمة، لكنه هادي بشرط واحد بس، إن يكون اللي بيكلمه خالي من الأمراض، لأنه بيصبح عدواني ومُرعب بمجرد ما بيعسس بأي نوع من المرض حواليه، وده اللي خلى المنظمة تحتجزه وتحطه تحت الحراسة المشددة من الدرجة الثالثة.

بعد كل اللي حكيت هولك عن طبيب الطاعون ده أحب أنصحك نصيحة جميلة يمكن تفيدك في المستقبل، وهو لو تعبت وملقيتش دكتور شاطر يعالجك ويريحك، فد عليك وعلى طبيب الطاعون، هيريحك الراحة الأبدية.

لكن خليني أسألك سؤال، هل من الممكن أن يكون طبيب الطاعون عايش من فترة الطاعون، وإنه عاش في فترة العصور الوسطى؟! كل شيء وارد.

دلوقتي أنا هعوز أكلمك على الخجل شوية، صفة سيئة مش كدة، غالباً الشخص الخجول يكون مش قادر يعيش وسط أي مجتمع معروف بالبجاجة.

تخيّل بقى إن فيه كائن ممكن يقتلك من شدة خجله، والكائن دة شهرته الرّجل الخجول وهو الكائن (SCP ٠٩٦) :

تصنيفه (Euclid)، بنيتة زي بنية البشر بأختلافات بسيطة، زي إنه طويل جداً زي سلندردمان لدرجة إن طوله بيوصل لمترين و٣٨ سنتيمتر، جسمه رفيع لدرجة غريبة، وإيده طويلة بشكل مُريب لدرجة إن طولها متر ونصف، بشرته شاحبة، وجسمه أملس، دة غير فكّ فمه الغريب واللي بيوصل لأربع أضعاف فكّ البني آدم الطبيعي، وعينيه بيضاء بالكامل، وصوابه طويلة لدرجة إنها تقريباً طول وشه.

ومن صفات الرّجل الخجول إنه غبي لا يمتلك أيّ نوع من أنواع الذكاء، ومنطوي جداً بحيث إنه دايماً قاعد في ركن في غرفته ومداري وشه من أي حد، مش بيعجب أيّ حد يشوفه، ولو حد حاول يشوفه بالعافية ساعتها الرّجل الخجول هيتجنن، لأنه تقريباً بيتكسف من شكله، فهيداً يصرخ ويهرتل بكلمات مش مفهومة، وبعدها هيجيب الشخص اللي شاف شكله وهيقته ويتقم منه شرّ إنتقام، ودة لأن الرّجل الخجول سريع جداً وسرعته تتخطى الـ٣٥ كيلو متر في الساعة.

بعد ما يقتل الضحية بتاعته بيخفي الجثة بطريقة سحرية لدرجة إن محدش عارف فين مكان ضحاياه، وبعدها بيرجع لمكانه تاني، ومش هو دة بس الخطر اللي بيمثله الرّجل الخجول، لا دي بتوصل لمرحلة إن لو حد شاف صورة ليه، ساعتها الحدة هيكون ميت، يعني من الآخر لو أنت شوفت صورته الحقيقية فأنت ميت ولا مجال للهروب من دة، لأنني زي ما قولتلك، الرّجل الخجول خجله قاتل، ودة هو سبب إن المنظمة مش قادرة تشر ولا صورة حقيقية ليه، لأن لو دة حصل، البشرية هتكون في خطر، والمكان اللي مسجون فيه مقفول بحكمة وخالي من أيّ

كاميرات وأي أدوات خاصة بالتسجيل.

أعتقد إنك بعد اللي سمعته دة بدأت تحسّ بخوف من الخجولين والمنطويين، خلاص، نصيحة منّي لو شوفت منطوي أو خجول مترخّش عليه، ممكن يكون خجله قاتل زي الرّجل الخجول مثلاً، ودة كان الكائن الثامن معانا..

نسيب الخجول شوية وندخل في الكائن التاسع معانا، ودة كائن غريب حبتين، وهو (SCP ٨٤٧)، تصنيفه (Euclid)، وهو عبارة عن مانيكان على هيئة إمراة، لكنها إمراة بوجه مشوّه ومتقطّع ومُرعّب، طولها متر و٥٦ سنتيمتر ووزنها ٢٧ كيلو جرام، من طبيعتها إنها بتفضل قاعدة في مكانها على كرسي ثابتة لعدة دقائق معدودة في حدود ٨ دقائق، ولكن بعد الوقت دة بتقوم من مكانها وبتهجم على أيّ حد قدامها بشراسة رهيبية، وبتفرسه بطريقة وحشية وهي أنها بتاكل أجزاء من وش ضحيتها عشان يبقى شبهها بالظبط وعنده نفس الندوب اللي عندها، من الآخر طالما لمست إنسان فلازم يموت، لكنه هيموت مشوّه.

المانيكان أو الكائن دة مسجون بداخل غرفة مصنوعة من الخرسانة ومتبطنة بالفولاذ، ومتسلسلة بسلاسل عشان تشلّ حركتها بشكل كامل ومنع أيّ خطورة من ناحيتها.

طبعاً أنت بدأت تعتقد إن المنظمة دي مفيهاش غير شرّ مُطلق، لكن لا، لأنّي دلوقتي هحكملك عن ألطف كائن ممكن تسمع عنه في حياتك، والكائن العاشر معانا وهي حورية الماء (SCP ٠٥٤) :

تصنيفه (Safe)، وهو عبارة عن كتلة من الماء، بتتحول لأكثر من شكل ولكن أكثر شكل متعود التنكر بيه هو إمراة جميلة وعشان كدة لقّب الكائن بحورية الماء، لو ظهرلك الكائن في يوم فأنت كسبت صديق حقيقي، هيسمّعك وهيططب عليك، وغالباً هيكون ألطف حاجة قابلتها في حياتك، بيظهر في أيّ مكان فيه مياه

عذبة أكثر من ٩ لتر، حتى لما المنظمة قدرت تحتويها، كانت متعاونة معاهم جداً ومبسوطة بسبب وجود بشر حواليتها، لكن المنظمة للإسف أجرت عليها تجارب قاسية لكن دة مغيرش من طبيعتها اللطيفة أبداً، أعتقد إن كل واحد فينا محتاج كائن زي حورية الماء تكون في حياته.

المنظومة دي على قد ما هي غريبة وعجيبة في كائناتها، إلا إننا مذكرناش الغرائب والعجائب المبالغ فيها، ودي حاجات مفيش عقل بشري يستوعبها بس المشكلة إنها حقيقية وموجودة بالفعل داخل المنظومة دي، فلو المنظمة دي حقيقية والكائنات دي حقيقية فـ العالم في خطر حقيقي، ملايين الناس مصدقة إن المنظمة والكائنات اللي بتحتويها حقيقية وإن القصص دي مش خيالية إلا ان العالم من مصلحته إنها تفضل خفية وغامضة، وملايين الناس بتقول إن المنظمة وموقعها على الإنترنت ما هي إلا كائنات من وحي وخيال مؤلفين رعب أو فانتازيا، أنا سايلك أنت الموضوع ولك أن تتخيل، لكن افكر في أول المقال قولتلك إن في كتاب العزيز ذكر إن كان فيه كائنات غريبة جداً بتحكم الأرض قبل البشر فهل تتخيل إن الكائنات دي هما كائنات منظمة SCP، ليه لا؟ صدقني لو شوفت وصف الكائنات اللي حكى عليها عبدالله الحظرد بعد ما قرأت اللي حكتهولك مش هتتفاجأ أبداً من الأوصاف البشعة الموجودة.

دلوقتي أنا هحكملك عن كائنات بشكل سريع كدة عشان تثير الشك جواك أكثر، حاجات مستحيل يتصورها عقل أو منطق، زي شجرة عندها قلب بشري وورق الغصن بتاعها على شكل كف الإيد وبتفترس أي حد يقرب منها، وفيه كمان حاجة مريبة أكثر وهو حمام سباحة بس على حجم صغير عامل زي البركة كدة واسمه "بركة الدم" أو "المسبح الأحمر" واسمه في المنظمة (SCP-٣٥٤)

وتصنيفه (Keter) ودة لأن جواه كائنات شفافة مفترسة بتلتهم أيّ جسم يدخل جوة المسبح دة، وفيه بقى الأغرب من كل دول وهو الكائن (SCP-٤٨٢) ودة تصنيفه (Euclid) وهو عبارة عن جاكيت، بالظبط زي ما قريت كدة، جاكيت بيتلبس ومقاسه (Medium)، وهو جاكيت طويل من الجلد الأسود، الغريب إنه لما الضحية تلبسه بتَمُرّ بفترتين، الفترة "ألفا" والفترة "بيتا"، وبالرغم من إنه (Medium) إلا إنه بيلبس كُل المقاسات وكل الناس عادي!!

في الفترة "ألفا" يبدأ الضحية يحسّ براحة نفسية غير طبيعية وكأن كل همومه اتشالت، لكن في الفترة "بيتا" يبدأ الجاكيت يبقى كأنه وحش، ويغيّر في طبيعة جسم الي لابسه بطريقة غريبة، على حسب أمراضه، وعلى حسب صحته العقلية، يعني في الآخر الجاكيت دة قادر يشوّه أيّ إنسان.

ومن هنا أحب أحكيك على آخر كائن معانا، وهو كائن لطيف على الرغم من إنه متصنف (Keter)، والكائن دة مشهور بأسم (SCP - DR. HORROR) رغم إنه كائن لطيف زي حورية الماء، مش مؤذي إطلاقاً، إلا إنه متصنف بأخطر تصنيف، ودة لسبب بسيط جداً، والسبب دة هو الكُتُب المُسمّاه بأسمه (دكتور رعب)، وهو دة سبب تصنيف دكتور رعب (Keter)، لأن كُتُبُه خطر على البشرية كلها.

"مَدّ"

الفصل الرابع

"إذا أردت أن تُحصّر دكتور رعب، فعليك أولاً معرفة كيفية صرفه، لا تخف! فهو ليس من الجن، فالشياطين والجان يعيشون عالّة على البشر، ويقومون بتضليلهم ونشر الفواحش والأمراض بينهم، فابتعد عنهم وعن الألعاب الشيطانية التي تجلبهم، ثم تؤدي إلى خسائر الأرواح البشرية".

هذا الفصل للكاتبة/ نيرة إسلام السيد.

كاتبة روائية مواليد ٢٠٠٧ من محافظة السويس، شاركت بأول قصة لها بعنوان
 "جن مع وقف التنفيذ" في كتاب "دكتور رعب ٢" عام ٢٠٢٢
 وقامت بكتابة الفصل الرابع في كتاب "دكتور رعب ٣".

إهداء

إلى الأنسة "نون" شكرًا لِرَحِيلِكَ وَكَسْرِكَ لِقَلْبِي وَتَحْطِيمِهِ بِدُونِ سَابِقِ إِنْذَارٍ وَلَا
 أَعْذَارٍ، لَقَدْ تَخَطَّيْتِكَ، وَأَصْبَحْتُ أَفْضَلُ الْآنَ .. أَفْضَلُ بِدُونِكَ ..
 أُمِّي: أَهْدِكِ عُمْرِي كُلَّهُ وَلَنْ يَكْفِيَ، شُكْرًا لِقَلْبِكَ الَّذِي أَهْدَيْتَنِي بِهِ بَدَلًا عَنِ الَّذِي
 كُسِرَ، شُكْرًا لِأَنَّكَ هُنَا، شُكْرًا لِأَنَّكَ أُمِّي.
 باشمهندس عبد الرحمن إسلام: طول ما أنت في الدنيا، أنا قد الدنيا.
 "أبي.. أمانى ومأمنى.. شكرًا لوجودك معي.. شكرًا لكل تلك المشاعر التي
 أهديتها لي.. شكرًا لحبك.. شكرًا لأنك أبي".

"عالم الجنّ والماورائيات"

ملحوظة:

هذا العالم قد يحتوي على حقائق واقعية عن عالم الجنّ، وعلى طلاسّم حقيقية، لا ينبغي بقراءتك لهذا الفصل إذا كنت لا ترغب بتجربة المخاوف والمغامرة مع العالم الآخر.

إيه اللي هيحصل لو كُنّا بنشوف الجنّ في حياتنا بشكل يومي؟
طب مين هو الجنّ؟ وموجودين في حياتنا ليه؟ وإيه أنواعهم وأشكالهم
وأفعالهم؟



الجنّ مخلوق مستتر متقدّرش تشوفه بعينك، زي الجنين في بطن الأم بالضبط، عايشين في نفس عالمتا لكن في بُعد مختلف، فمينفعش نشوفهم، ممكن يكون العالم

اللي هما عايشين فيه بالنسبة لينا من أكثر العوالم المجهولة والغامضة، رغم إنتشاره بيتنا بنسبة كبيرة وبالرغم من أننا بنسمع عنه كثير جداً، ودة سببه إن العالم دة عالم كامل زي عالما بالظبط، بحب أشبهه دايمًا بروايات الفانتازيا، ليه قوانينه الخاصة بيه وخواص وطقوس وعادات لوحده غيرنا تمامًا، حرفيًا اللي أحنا نعرفه عن العالم دة هو مجرد نقطة في بحر.

بتتردد على أسماعنا شوية كلمات زي (مارد، عفريت، جن، شيطان) وأغلبنّا فاكراهم حاجة واحدة، بس خليني أصدّمك وأقولك لأهما مش حاجة واحدة، تعالى نفصصهم مع بعض، لكن الأول خليني أفكرك إن كلهم حقيقيين ومذكورين في آيات من القرآن..

نبدأ "بالعفريت" .. ودة بيتحط في المرتبة الأولى من حيث القوة والسلطة، وهو كبير الجنّ، بيتّصف بأنه لثيم ومُخادع وسريع جدًا، مواصفاته وملامح شكله عند ظهوره تبقى شبه الإنسان اللي تعرّض لحادث حرق أو قطع في الوجه، وبيظهر بشكل بشع جدًا ولازم يكون مخيف، تم ذكره في سورة النمل لما سيدنا سليمان كان عايز عرش بلقيس ملكة سبأ (قَالَ عِفْرِيتٌ مِّنَ الْجِنِّ أَنَا آتِيكَ بِهِ قَبْلَ أَنْ تَقُومَ مِنْ مَقَامِكَ).

أمّا "المارد" فهو بيعي في المرتبة الثانية بعد العفريت، وهو كبير الشياطين وقوي جدًا، واسمه مارد لأنه تمرّد وكفّر وخرج عن أمر ربه، والنوع دة مفیهوش مسلم أبدًا، لو فيه جن مسلم فمينفعش يكون مارد، لأن المارد شيطان ونوعه كافر، شكله عند الظهور بيبكون شبه الحية والحيوانات الخبيثة، مثل الكلاب الشرسة أو الذئب أو التمساح، تم ذكره في سورة الصافات (وَحِفْظًا مِّنْ كُلِّ شَيْطَانٍ مَّارِدٍ).

رقم ٣ هو "الجنّ العادي" ودة أكثر حاجة بنسمع عنها تقريبًا، الجنّ بيتّصف بالعقل والإدراك وعنده القدرة أنه يفرّق بين الحق والباطل، والنوع دة رايق جدًا


ومتعاون مع الإنسان، وفيه منه مسلم ومسيحي ويهودي وبوذي وكافر وفيه منهم الملحد وكل الديانات، عاملين زي البشر بالظبط وليهم المدين بتاعتهم وببشتغلوا ويحببوا فلوس ويبعدوا ربنا زينا، ودول منتشرين في كل مكان زينا بالظبط، الكفرة منهم عندهم صفة مميزة وهي إنهم صريحين مع نفسهم جداً وعارفين قدرتهم وعارفين حجمهم قد إيه، والدليل على كدة إبليس لما كفر وأقسم، قال لربنا (وعزتكَ و جلالكَ لأغوينهم) يعني عارف أن ربنا حقّ وعارف قدرة ربنا، وتم ذكرهم في سورة الذاريات (وَمَا خَلَقْتُ الْجِنَّ وَالْإِنْسَ إِلَّا لِيَعْبُدُونِ) يعني أصلاً الجن مُكلف بالعبادة، ملاحمهم ملهاش عدد ولا وصف لأنهم بيظهروا هيئة أي شخص هما عايزينه، ممكن يظهرولك بشكل أخوك أو أبنتك أو واحد صاحبك عادي جداً، بس اللي محدش يعرفه هو أنهم لازم يظهرهوا بنسبة ٩٠٪ بس من الملامح الإنسيّة، طب والـ ١٠٪؟ دي بتبقى مرعبة بقى يعني زي مثلاً تلاقيه ظاهرلك هيئة أخوك وشكله وكل حاجة، بس لو بصيت على رجله هتلاقيها رجل "ماعز" أو رجل حيوان غريب، ومش شرط في الرجل بس ممكن تبقى رجله عادية زي البشر لكن ناحية واحدة من وشه بتبقى محروقة، المهم إن فيه ١٠٪ ملامح جني ولازم تكتشفها بنفسك لأنه معندوش القدرة على التحوّل لأنسيّ بنسبة ١٠٠٪.

نيجي لآخر حاجة .. "الشياطين" ودول أضعف نوع، الشياطين هما كفّار الجن، واتذكروا في سورة آل عمران (إِنَّمَا ذَلِكُمُ الشَّيْطَانُ يُخَوِّفُ أَوْلِيَاءَهُ فَلَا تَخَافُوهُمْ وَخَافُونِ)

وإبليس يُعتَبَر شيطان لأنه كفر (وَإِذْ قُلْنَا لِلْمَلَائِكَةِ اسْجُدُوا لِآدَمَ فَسَجَدُوا إِلَّا إِبْلِيسَ أَبَى وَاسْتَكْبَرَ وَكَانَ مِنَ الْكَافِرِينَ) وهو أكبر الشياطين قوة ودهاء.

"قد يتعمّد الجن أذية الشخص إذا كان بمفرده في المنزل، وذلك بسماع أصوات في المنزل وتحركات."

دي أنواع الكائنات الموجودة في العالم دة، وكل نوع فيهم جَوَّاه كمية كبيرة من الأصناف، بس أنا هحكليك عن أصناف الجنّ نفسه، لأن دة أكثر حاجة منتشرة حوالينا ..



"الجنّ - البينّ - الحنّ - المنّ - الجنّ - الدنّ - السنّ" .. كل دي أسماء مخلوقات استوطنوا الأرض قبل الإنسان، لكن اللي فضل عايش منهم هو الجنّ بس!!

أول نوع هو "الجنّ الضوئي": النوع دة من الجنّ مسلمين بس، مافيهمش ولا شيطان، ودول أولاد وأحفاد الجنّ النصيين اللي عاشوا في زمن الرسول (صلى الله عليه وسلم)، ويعتبر الجنّ الضوئي أقوى أنواع الجنّ ومش يموت بسهولة، وقليل جدًا لما يشارك في الحروب لأن عددهم قليل جدًا مقارنة بباقي الأنواع، يمتاز الجنّ الضوئي بالسرعة الكبيرة والذكاء والقوة والحكمة والإيمان الصادق،

معظم الناس فاكرين إنه عالم الغيب كمان، بس دي معلومة غلط لأن هو بيستخدم سرعته في معرفة الأخبار مَش أكثر، يعني ممكن يجي يقولك متزلش من بيتك بكرة عشان مدرستك هتتحرق، أنت طبعاً فاكِر أنه عارف المستقبل بشدّة، لكن في الحقيقة هو قدر يتنقّل وراح المدرسة وسمع كلام عن أنها هتتحرق بكرة، وراح قالك، ملاحظه بتشبه ملامح الإنسان بنسبة كبيرة بس شفاف، لونه أبيض خفيف عامل زي الطيف، بس طبعاً بقدرات وخواص تانية.

"الجن القمري": نسبة المسلمين للشياطين فيه ٨٠:٢٠، مسلمين الجن القمري مش بيتزوجوا غير من مسلمين الجن الضوئي بس، والنوع ده من الجن فيه تاني أكبر عدد مسلمين بعد الضوئي، شكلهم بيجمع بين الجن والبشر، مسلمينه من أتقياء الجن وشياطينه من كبار السحرة.

"الجن الناري": وده أهم أنواع الجن لسبيين، السبب الأول إن النوع ده بيمثّل أكبر عدد من الجن الموجود في العالم، بيوصل للنص تقريباً، تاني سبب بقى هو أنهم أصل الجن، ده أول نوع جن اتخلق، بعد كده تحوّلوا لباقي الأنواع بفعل طبيعة سكنهم والتكوين الفسيولوجي ليهم، النوع ده من الجن مش بيشبه البشر، وشكلهم مُرعب جدّاً، اللي تلاقيه عنده ٤٠ عين و ٦ أرجل وأيد واحدة، كده يعني، وأجسامهم طويلة جدّاً ومفיש فيهم حد قصير إطلاقاً، من صفات النوع ده من الجن إنه عنيد جدّاً ومتكبر وعنده قوة تحمل وسرعة عاليين جدّاً، وبيقدر يطير في كلّ الاتجاهات خصوصاً عمودي، كُفّار الجنّ الناري بيسكنوا في الأودية الحارة والكهوف وأفواه البراكين، أمّا مسلمينهم بيسكنوا في أعلى المساجد وأعلى التلال والجبال المعرضة للشمس.

"الجن المائي": مفيش فيهم مسلمين، بيعيشوا غالباً في أعماق البحار والمحيطات، فيه منهم الدكتور والعالم، أشكالهم قريبة من الجن الناري، ودول أقل نوع بيحتك

بالبشر.

"الجن التراي": دة النوع الوحيد اللي مش بيطيّر، بيسكن الأرض والجدران والأماكن المهجورة، ويعرف يتنقل في باطن الأرض بسرعة عجيبة، ويعتبر أقصر أنواع الجن وهُم أقزام، وشكلهم غريب جداً ومُريب، يغطي جسمهم الشعر الأسود، دة غير قصر إيديهم وأقدامهم، وعينهم لونها أحمر، وأكثر نوع بيحتك بالإنسان هو الجن التراي وبيسخره السحرة والدجالين في أعمال المسّ، وبما أنهم مش أقوىاء خالص وبيعتمدوا على السرعة بس، فيبدوروا دايمًا على أجساد بشر يسكنوها وغالبًا بيختاروا المصابين بالأمراض العقلية زي مرضى الانفصام.

آخر نوع هو "الجن الهوائي": ودة من أخفّ وأسرع أنواع الجن وأمهرهم في الطيران، في الغالب يمسّ الإنسان مسّ جزئي و نادرًا لما يبقى كلي، بييجي في المرتبة الثالثة للتعرض للإنسان بعد التراي والناري، غالبًا بيعيش حوالينا كدة عادي ملوش مكان محدد، يعني ممكن تلاقيه قاعدلك على سلم عمارتك المظلم، بس هيبقى في حاله يعني مفيش منه ضرر، الضرر الوحيد بتاعه هو أنه بيعحب يربكك بس ويشوفك خايف، زي ما بيعمل معاك وانت بتاخد الدش الجميل بتاعك ومغمّض عينك، دي بتبقى أنسب فرصة لظهور الجن الهوائي قدام عينك مباشرة.

أما أعمار الجن فهي واحدة في كل الأنواع، بس الغريب إن أعمارهم بتوصل فوق الألف سنة، لكن مش بتتعدى ١٢٠٠ سنة!!

من سن ٠ إلى ٩٠ مرحلة الطفولة.

من سن ٩٠ إلى ٢٥٠ المراهقة.

من سن ٢٥٠ إلى ٤٠٠ الشباب.

من سن ٤٠٠ إلى ٦٥٠ ما بعد الشباب.

من سن ٦٥٠ إلى آخره بتبقى مرحلة الشيخوخة.

"إِنَّ صَوْتِ صَغِيرِ الْأَبْوَابِ فِي الْمَنْزِلِ لَيْسَ دَلِيلَ عَلَى مُرُورِ الْهَوَاءِ، فَالشَّيَاطِينُ عِنْدَمَا تَشْعُرُ بِالْمَلَلِ تَصْدُرُ أَصْوَاتَ غَرِيبَةٍ."

هو إحنا ازاى ممكن نشوف الجنّ ومناخدش بالناس منه؟

تعالى أقولك دة ممكن يحصل ازاى، أغلبنا سمع عن قصة "المطربة نورة" المطربة اللي أعتزلت الغناء بعد آخر حفلة عملتها، هحكيلك قصتها باختصار عشان أجابك على سؤالك..

الطقطقة نورة دي مطربة شعبية كويتية بتحيي أفرح، جالها مكاملة من واحدة بتطلب منها تيجي علشان تغني في فرح بنتها هي والفرقة بتاعتها المكوّنة من ٦ أفراد، بس رفضت لأنه كان يوم أجازتها بس بعد إلحاح كثير من الست وافقت وحددت معاها المعاد وكان الساعة ١٠ بالليل، راحت نورة على العنوان اللي أخذته من الست في معادها برغم أنها مش مطمئة ولا عايزة تروح أصلاً، ولما وصلت المكان لقت بيت كبير جداً والزينة جايها من أوله لآخره، لما قدموا ليهم مشروب الاستقبال كانت إيديهم ساقعة جداً وناشفة كأنها من حجر، قلقوا شوية وبصوا لبعضهم بس قرروا يكملوا الزفة.

بعد ما الفقرة الأولى خلصت، نورة كانت مرهقة جداً ف طلعت للدور الثاني تدور على أوضة تراح فيها لحد ما فترة الاستراحة تخلص، ولما دخلت أوضة تراح فيها غفلت وراحت في النوم وحلمت أن ست لابسة فستان أسود بتجري وراها وبتحاول تقتلها وكان شكلها بشع جداً، ولما فاقت نورة من النوم

لقت الست نفسها بمنظرها البشع واقفة جنب سريرها ولما حاولت تجري علشان تطلع برة الأوضة مسكتها من رجلها وفضلت تشدها وتقولها "غني لي .. غني لي" وبعدها بفترة سابتها، جريت نورة على الدور الأول ولقت فرقتها برودو مرعويين من مناظر بشعة شافوها وقرروا أنهم يكملوا الحفلة وبعدين يمشوا تدريجياً واحدة واحدة من غير ما حد ياخذ باله علشان محدش فيهم يتأذي، وهما في الفقرة الثانية من الحفلة كانت الساعة ٣ بعد نص الليل وابتدت أعدادهم تزيد بشكل مش طبيعي أبداً ورقصهم يبقى أبشع، فرقة نورة لمحوا رجليهم من تحت فساتينهم اللي بتترفع من شدة رقصهم أن رجلهم على شكل حوافر حيوانات، وفجأة وبدون مقدمات الفجر أذن وبقت أشكالهم مرعبة جداً جداً وأبتدوا يخفوا، وبدأت نورة تغمز للفرقة اللي معاها بأنهم يخرجوا برا البيت واحدة ورا واحدة من غير ما حد ياخذ باله، ولما طلعا برا البيت لقوه عبارة عن قصر قديم محروق وشبه مهدود، من بعدها قررت نورة والفرقة بتاعتها الاعتزال تماماً، وبعدها بفترة ماتت الفرقة واحدة ورا الثانية باستثناء نورة بس اللي عاشت..!

"من حَوْلِكَ جَنَّ يَضْحَكُونَ وَيَتَكَلَّمُونَ وَيَأْكُلُونَ، والصخب يملأ المكان ولكِنَّكَ لَا تَشْعُرُ بِهِمْ، وَقَدْ يَنْقُضُ عَلَيْكَ أَحَدُهُمْ إِنْ أَعْجَبَ بِكَ".

طيب إيه اللي هيحصل لو كنا بنشوف الجن في حياتنا بشكل يومي؟



الحقيقة إننا نتعامل مع الجن في حياتنا بشكل يومي دة طبيعي، كل واحد فينا نتعامل مع جن بطريقة ما في يوم من الأيام وكمان هو موجود معنا ويتعامل معنا كل يوم بس بطريقة غير مباشرة، بطرق شفافة، طرق غامضة وتعبانية شوية، في مننا مثلاً الي أتعرض للجاثوم، إيه الجاثوم دة؟!

تعالى أقولك .. بُص يا عم أهو الجاثوم دة أختلفوا عليه الناس، جماعة قالوا دة نوع من أنواع الجن، وشوية وجم جماعة تاني وقالوا لأ دة مرض ومجموعة من الهلوسة وسّموه شلل النوم.

"الجاثوم" هو أسطورة ظهرت من زمان جداً، وسنة ١٧٨١ الرسّام السويسري (هنري فاسيلي) مثّلها بـ لوحة لبنت نايمة وقاعد فوقها كائن شكله شبع ومكتف أيدها وبوقها، ويُقال أن دي الملكة السويسرية وقتها.

الجاثوم بيتقى عبارة عن نوع من أنواع الجنّ بيتقى قاعد على صدر الشخص النائم، والشخص دة لا يقدر يتحرّك ولا يصرخ ولا حتى يتنفس بصورة طبيعية، وبيصاحبه عدم السيطرة على العضلات وحركة سريعة للعين!!

والناس قالت عليه أسطورة لأنه بالنسب لهم مجرد خرافة أو حاجة مش موجودة، طيب ازاى بقى وهو حصل معايا أنا شخصياً!!

أيام ما كُنت طفلة لا تتعدّى الخمس سنين ابتديت أروح في النوم و كُنت بحلم حلم غريب مش مفهوم، وكنت جوا الحلم مستوعبة إني بحلم و بحاول أصحى مش عارفة، بحاول أنه على ماما مفيش صوت أصلاً، وكنت عمالة أبرّق عيني على أمل أّني أصحى وبردو مفيش فايذة، لحد ما مرة واحدة صحيت وأتعدلت مفزوعة وكنت عمالة أتففس بسرعة وبنهج كأني كُنت بجري لمسافة كبيرة جداً، وفجأة لقيت حاجة سودة من غير ملامح واقفة على باب الأوضة، وقتها عرفت أصرخ بأعلى صوت عندي وأنه على ماما، والي كان واقف دة في لحظة ما بقاش

موجود، وأنا متأكدة تماماً أن كل الي حصل دة حقيقي وماكتش بحلم، ويجد دي كانت من أبشع اللحظات الي عيشتها في حياتي.

بعض الناس الي أتعرضت للجائوم قالوا إنهم ييحسوا بتقل وضغط على الصدر ويحسوا بكتمة للصوت وللنفس وساعات دة بيؤدي لنوبات صرع، شلل في حركة الجسم، وغالبًا لما بيصحى بيشفو خيال كبير في سقف الأوضة أو واقف قدامه، والحلم غالبًا بيتمثل في حد بيجري وراك أو التعرض للضرب.

تمام لحد كدة؟؟

جُم بتوع علم النفس بقى وقالوا لأ دي ظاهرة فيسيولوجية باحتة، بتحصل في مرحلة من مراحل النوم بتمزج بين النوم واليقظة، العقل بيكون مشت وبتحصل مجموعة من الهلاوس ..

"هلوسة النوم الدخيل": إحساس الشخص بالخطر وأنه مُطارَد وإن حد عايز يأذيه.

"هلوسة الضغط": وهنا بيحس الشخص بالأختناق وعدم القدرة على الحركة أو التنفس.

"هلوسة المحرك الدهليزي": وهي أنك بتكون فاقد القدرة على الحركة أو إنك بتصاب بالشلل.

وقالوا أن الهلوسات دي بتقعد من دقيقة لـ ٢٠ دقيقة، المتوسط بيكون ٧ أو ٨ دقائق، وأن ليه كذا سبب زي الخوف المسبق، التوتر، النوم على الظهر، تعاطي المخدرات أو بعض أدوية الأكتئاب، أو الأدوية الي بتأثر على العامل النفسي بشكل عام زي أدوية حساسية الصدر، بس تفتكر بنت عندها ٥ سنين كانت بتعمل إيه من دول يسبب الي حصل ليها دة؟؟

تاني طريقة ممكن تكون اتعرّضت فيها للجن هي "القرين"، وكلنا بلا استثناء عندنا قرين، القرين دة بيكون نوع من أنواع الجنّ مُصاحب للإنسان طول حياته، ويُقال أن بعد ما الإنسان يموت القرين بتاعه يفضل عند قبره، وظيفته إيه بقى في الحياة؟ وظيفته أنه يأمرُك بكل ما هو سيء وحرام في الدنيا، إنه يغويك بكل حاجة حرام بتحاول تتوب عنها ويحببك فيها، من الآخر هو نفسك السيئة اللي هتوديك النار راكب فيراري، بس خليك فاكر أن قرينك اللي أغواك دة هيجي يوم القيامة ويقول لربنا (رَبَّنَا مَا أَطْعَيْتُهُ وَلَكِنْ كَانَ فِي ضَلَالٍ بَعِيدٍ) سورة "ق"، ساعات بقى القرين بيقوم بأكثر من دوره المطلوب منه زي أنه يظهر في الأحلام وغالبًا يظهر بشكل عبد أسود أو تُعبان أو بقرة، أحيانًا ما يظهرش بأي شكل بس بيخلي الكام ساعة اللي هتنام فيهم عبارة عن جحيم وبس، أحلام بشعة ومرعبة، صحيان من النوم مع خفقان في القلب وخوف مجهول المصدر، ولما هيجب يتسلى هيتسلى على نفسية حضرتك، اكتئاب، ضغط نفسي، ضيق تنفس، إحساس بالفشل، وسواس قهري، خوف من اللاشيء، وكل اللي قلبك ما يجبوش هيعمله.

بيسبب مشاكل كتيرة في البيت بين الأهل، وبين الأصحاب، وفي أي مكان ممكن يكون شخص محبوب أو ناجح فيه بيسبب ليه مشاكل معاهم، في ناس اختارت أنها تندمج مع القرين وتروح العالم الثاني بس ما كانوش يعرفوا أن القرين هو أضعف أنواع الجن.

تتحصّن منه أزاى بقى؟ كل اللي عليك أنك تذكر ربنا طول اليوم، وتلتزم في الصلاة، وتحاول بقدر المستطاع أنك تقاوم أي حاجة حرام تكون عايز تعملها، الرسول "صلى الله عليه وسلم" قرينه أسلم (ما منكم من أحد إلا وقد وُكِّل به قرينه من الجن، قالوا وإياك يا رسول الله، قال وإيّاي إلا أن الله أعانني عليه فأسلم فلا يأمرني إلا بخير) صدق رسول الله "صلى الله عليه وسلم"، كلمة "أسلم" هنا مش معناها أنه نطق الشهادة وبقي مُسلم، لأ هو من كتر ما الرسول بيقاومه ومش بيتبع

أهوائه، القرين بتاعه يأس من أغوائه وبقي بيعينه على الخير مش الشر.

ثالث طريقة هي "عُمار البيت"، ودول مش مؤذنين خالص، هما بس بيعبوا يلعبوا ويشيلوا الحاجة من مكانها، أو يخفوها، وفيه بعض الناس قالت أن أختفى منهم مبالغ مالية وذهب بالرغم من أنهم عايشين لوحدهم، والي بيعمل كدة هما الطيبين منهم، أمّا بقى الي مش طيبين إطلاقاً ليهم علامات تانية زي الأنوار الي بتتفتح وتتقلل لوحدها، تكسير الأطباق والأواني، صوت خبط أو تصفيق أو دبذبة رجل من السقف، الجيران الي ما بيعيلهمش مزاج يغيروا مكان العفش غير بالليل، أحب أقولك أن الجيران بريئة، عُمار البيت هما "أصحاب البيت الأصيلين" أصحاب الأرض الي أنت بنيت عليها بيتك، ويعملوا كل دة عشان يطمّشوك من البيت ويأخذوا راحتهم فيه، لأنك بكل ببساطة اقتحمت حياتهم وبقيت عايش معاهم وهما مش طايقينك، يا إما هيطر دوك يا هتطردهم، كل واحد وقوّته، أحساسك إن حاجة عدت جنبك، أو أنك تلمح حاجة معدّية ولما تبص عليها ما تلاقيش حاجة، كثرة الحرايق بسبب أو بدون سبب، سماع صوت حد بينده عليك أو صوت بُكاء، أو تسمع صوت خناقة في الشارع ولما تبص ما تلاقيش حاجة، دي كلها علامات بتدل على وجودهم وأغلبنّا فآكرهم صُدف عادي لكن هي أبعد ما يكون عن الصُدف.

في الغالب بيظهروا للأطفال بكثرة، يعني مستغربش لما تلاقي طفل بيتكلم مع حد أنت مش شايفه أو بيحكيلك على صديق يلعب معاه في البيت أو بيزوره، دة ممكن تلاقيه جاييله هدية كمان ..!

سنة ١٩٩٨ في كندا كانت سيّدة بتحكي أنها كانت بتعتني بأبن أختها لعدّة أيام بسبب مرض والدته بعد ولادتها لمولود جديد، ومرة سألتها هي ماما هتحب أخويا الجديد أكثر مني؟ فاستغربت السيدة ونفّت وقالتله ليه بتقول كدة وصدّمها برّدّه أن

صديقه الي يقعد معاه كل يوم بالليل قاله كدة، وفي مرة تانية كانت السيدة بتلعب مع الولد ودي مش من عوايدها، فأتفاجئت بالولد يبص ناحية الحيطه ويقول "لأ مش هنلعب النهاردة أنا بلعب مع خالتو"، وفي ليلة من الليالي كانت السيدة دي بتظمن أن الولد نايم وراحت أوضته وهنا كانت الصدمة .. لقت الولد قاعد في الأرض وعامل كوبايتين عصير وبيتكلم مع شخص مش موجود بس كانت الصدمة الكبيرة فعلاً أنها شافت الألعاب حد يحركها فعلاً وكوبايتين العصير ناقصين، وهنا هي صدقت فعلاً أن فيه حد تالت في البيت معاهم وأستدعت الشرطة، ولما جت الشرطة قالتلهم أنهم مش أول حد يعيش في البيت دة ويشتكي فعلاً أن أطفاله بتقول حاجات زي كدة، وكل أسرة بتسكن في البيت ما بتكملش شهر وتسبيه، وما زال السبب مجهول!!

كان نفسي أقولهم أنه عمّار البيت بس مجاش فرصة أقابلهم، والفرصة جتلي هنا وقدرت أقولك عشان تبقى تاخذ بالك وتراقب الأطفال اللي في بيتك كويس.

كل الي عليك علشان تنفادى عمّار البيت، إنك تشغل سورة "البقرة" في البيت بصوت عالي وأنت تقول "بسم الله" قبل ما تخط أي حاجة مكانها، لأنهم أصحاب البيت وموجودين في كل مكان، ممكن تيجي تقعد على كرسي مثلاً ويبقى حد منهم قاعد وأنت مش شايفه، تبقى قعدت على حجره! بس الكارثة هنا أنه ممكن يموت بسهولة لأن معظم عمّار البيت بيكونوا أطفال صغيرين، مش هيستحملوا الهيئة الي هتقعد عليهم، وساعتها لو مات فعلاً فأنت مش هتسلم من شر أهله، ويخططوا عشان يقتلوك أو يقتلوا حد من أهل بيتك.

رابع طريقة هي جن "الرصد" : ما بنسمعش عنه كثير ومش بنقابله كثير بس ساعات بيجيلك لحد عندك، ودة في حالة لو حد عملك عمل او سلط عليك جن يكرهك في عيشتك، وكمان جن الرصد دة استخدموه الحضارات القديمة

زي الفراغنة زمان كتعويذة للحفاظ على كنوزهم وثوراتهم ولعنة للي يحاول يقرب منها، وفضلت التعاويذ موجودة وفضل جن الرصد ييحمي أملاك الفراغنة لحد دلوقتي حتى بعد موتهم، وعلشان تفك جن رصد بتحتاج قرايين مُعَيَّنة يطلبها منك عن طريق كاهن بتجيبه معاك وأنت رايح تستكشف أي مكان أثري عارف أنه فيه كنوز، لأنك لو رocht لوحدك حتى لو بغرض السياحة مش أكثر، مش هيسبوك في حالك باقي حياتك !..

خامساً، وهو "الجن العاشق" : من اسمه كدة عاشق، بيعشق الإنسان اللي بيعجبه لدرجة انه بيؤذيه، ودة بيكون ناتج عن حُب مش كُره، لكنه بيكون حُب امتلاك، في الحالة دي الجن أو الجنية بتمتلك الإنسان امتلاك تام مع قدرة السيطرة على العقل البشري بشكل كامل، في الغالب بيصيب البنات ودة ليه أسبابه.

ومن أسباب ظهور الجن العاشق هو الإكتئاب المزمن والشعور بالحزن الشديد لفترة طويلة، والبكاء في الحمام وقتها البنت بتصعب على الجن، لكن للأسف دي مش حاجة حلوة أبداً، لأنه هيحوّل حياتها لكابوس أكثر ما كانت كابوس.

ومن الأسباب بردو هو حب الذات المبالغ فيه، يعني البنت اللي بتحب نفسها وشكلها بطريقة مجنونة لدرجة إنها ممكن تقف قدام المراية بالساعات تتأمل جمالها وشكلها، وقتها وراها هيكون فيه جني بيعشق حبها لنفسها، ويتأمل جمالها وشكلها بردو، يشم رائحة شعرها ويلمسها من غير ما هي تحس، لكن الجن العاشق هيقدر أن البنت دي هتكون شيء خاص من مُمتلكاته، ودة بيفسر ليه البنات هما الأكثر عرضة للمَسّ.

في إبريل ٢٠١٢ ظهر حالة هزّت عرش مصر والوطن العربي، وهي الطفلة "دينا" الي ظهرت في لقاء مباشر مع الإعلامية "ريهام سعيد"، وأثناء الحوار معاها قالت إنها كانت بتقف قدام المراية كتير وكانت منعزلة عن أهلها، وكمان بتغني أو

تبكي بصوت عالي في الحمام، ودة جابلها كارثة كبيرة جداً، وقع في غرامها قبيلة مكوّنة من ألف جن، تخيل يحبك ألف شخص؟ هتتايش معاهم ازاى، وللأسف مقدرتش تسيطر عليهم وعلى حسب كلامها إنها كانت بتشوفهم في كل مكان، في سقف الغرفة بتاعتها أو جنبها في الحمام أو برا في الشارع، لدرجة إنها أثناء اللقاء في الحلقة قالت لريهام سعيد "أنا شايفة حد منهم قاعد جنبك!!"

والي خلى حالتها نادرة وغريبة وغامضة كمان هي إنها كانت بتبكي دم بشكل صريح، ودة ظهر في اللقاء وكم ان حالات إغماء مفاجأة، وفترة علاجها استمرت لسنين طويلة بس ما زالت عايشة في نفس المأساة..

من أهم أعراض وجود جن عاشق هي إن البنت المسوسة بتكون بتعشق العزلة بشكل مش طبيعي، ودة للأسف بيكون غصب عنها، دة قرار الجن مش قرارها لأنه بيغير عليها ومش عايزها تكون مع أي حد غير معاه، وطبعاً رفض فكرة الجواز أو الارتباط بشكل تام ودة بردو مش قرارها، ماهو مستحيل تكون بتحب حد وتسيبه يتجوز مش كدة؟ ، لكن دة في حالة لو كانت البنت مش متجوزة، إنما لو كانت متجوزة وصاحبها جن عاشق وقتها هتكره جوزها وهتحسه مقرف ومُمل، ويمكن توصل لدرجة أنه يقتل جوزها أو الي مرتبطة بيه عموماً!!

النوم الكثير هو أهم أسباب جلب الجن العاشق، خصوصاً النوم على البطن، ودة لسبب سهل جداً، إن فترة نوم البنت المسوسة، بيكون نايم جنبها الجن العاشق، أنفاسه بتحاوط جسمها بالكامل، دة غير إحساس البنت المسوسة ببرودة حواليتها، وإحساسها الدائم بأن فيه حد بيتحرك حوالين سريرها، ودة هو الجن العاشق، هو مش بيعمل حاجة وحشة هو بيعميها بس، ومن أهم إثباتات إنك شريك حياة عظيم هو إنك تثبت إنك قادر على حماية شريكك، وفي الحالة دي الجن العاشق يفوز بكل جدارة واستحقاق، هو بيعميها من كل حاجة إلا نفسه.

طيب تعرف إن ممكن من كتر عشق الجن العاشق لعشيقته الإنسيّة يخطفها من بيتها، ده حصل بالفعل، في سنة ٢٠٠٦ في السعودية، بالتحديد في منطقة الباحة، وساعتها حصلت كارثة في المنطقة وهي اختفاء "زهور الحارثي" من بيتها، والموضوع استمر لثلاثة أيام وهي مختفية رغم بحث أهل المنطقة عليها، لكن اتفاجئوا في اليوم الثالث لما لقوها قدام باب بيتها وحالتها متدهورة، وكانت مش فاكدة أي حاجة من اللي حصلت في الثلاثة أيام دول.

الغريب في الأمر إن قبل اختفاء زهور بفترة كانت بتحكي لأهلها على معظم الأعراض اللي قولتها لك بالتفصيل، وهي أعراض ظهور الجن العاشق، وبعد ظهورها اكرر الموضوع ده أكثر من مرة، كل مرة تنام وتصحى تلاقي نفسها في مكان غريب زي قمة جبل أو مقابر أو مكان مهجور، وبعدها بكام يوم ترجع بيتها في حالة سيئة جداً، ولما استعان ابو زهور بشيوخ قالوله، إن بنته عليها جن عاشق، ومش أي جن، ده من ملوك الجن.

الجن العاشق مش شرط يكون نفس ديانتك، ممكن يكون من ديانة مختلفة تماماً ومن دولة بعيدة عن القارة بتاعتك بس عشان سرعة تنقلهم في الأرض رهيبه، فيكون قادر يلف العالم كله في أقل من ربع ساعة، أثناء الحديث مع مُعالج روحي لما سأله قالوله كيفية علاج الأنسان من الجن العاشق، قالهم بقراءة آيات قرآنية على الحالة المسوسة، لحد ما الجن اللي عليه يتحرق تماماً، سأله عن أصعب حالة عاجلها في حياته وحكاهم حاجة غريبة جداً، قالهم إنه في مرة وهو بيعالج حالة مسوسة قرأ عليه القرآن وآيات الحرق، بس فجأة سمع صوت الجن وهو بيردد معاه نفس الآيات !! بل وبيكمل معاه الآيات التالية وبيصحله أخطاءه، ولما الشيخ توقّف عن قراءة القرآن، رد عليه الجن وقاله "لماذا توقّفت؟ هل تريدني أقرأ بدلاً منك؟" وبالفعل بدأ الجن يقرأ قرآن وكان جميع الحاضرين في حالة ذهول تام، والجن ساعتها كان مسلم وبيعبد ربنا لكنه أصر أنه يمسّ الشخص ده..

سادساً وأخيراً "المسّ الشيطاني" ودي أشهر حاجة بتحصل وبنسمع عنها..

طب هو يعني إيه مسّ؟

المسّ هو تحكّم الجن بعقل الإنسان تحكّم كامل، يعني مش بيدخل جوة جسده زي ما البعض فاكر كدة لأ، هو بيتحكم بعقل الشخص من بعيد لبعيد، ويمكن يمسك إيده يحركها بحركات لا إرادية، ودة اللي بيخلي الشخص المسوس قوي جداً ويمكن يشيل عربية أو يمشي على الحيطه أو يقتل شخص، عشان كدة بيتّم تكتيف الشخص المسوس أثناء علاجه.

وأعراض المسّ بتبقى واضحة في أغلب الحالات زي العزلة، التوتر، الرهاب الاجتماعي، والأعراض دي ممكن تبقى عادي عند أي حد من غير مسّ، بس الأعراض اللي بتأكد المسّ هي النفور من القرآن والأذكار، الإغماء والتشنج ونوبات الصرع والتقيؤ عند سماع القرآن، تكرار الأحلام المرعبة، وغالباً لو حصل محاولة علاج بالقرآن ممكن يظهر الجن و ينطق على لسان المسوس، المشي أثناء النوم.

أسباب المسّ كثير بس أهمهم رد الأذى، يعني ممكن تكون دلقت على حد فيهم ماء ساخن، أو وأنت بتنط نطيت عليهم، أو نمت على السرير من غير ما تستعيز وغالباً بيقوا موجودين على السرير، عشان كدة الرسول وصّى بنفض الفراش والإستعاذه بالله والأذكار قبل النوم.

السحر .. والسحر هنا مقصود بيه الأعمال، والحسد من أهم الأسباب بردو، دة غير النجاسة وعدم النضافة، ولو حابب تقرأ أكثر عن السحر، ممكن تتجه لـ "عالم السحر" في نفس الكتاب هنا.

المسّ علاجه بيكون بالقرآن، و بيكون مُتعب بالنسبة للمسوس لأنه زي ما

قولنا لما يسمع قُرآن يتعذب و يبتوجع، وبتعالج بردو بالرُقِية الشرعية، في حل ثاني وهو باستخدام السحر، ودة بيكون عن طريق أن الساحر ييسخر الجن دة لخدمته و يسيطر عليه، أو أنه يبقى معاه الخدم بتووعه من الجن و يكونوا أقوى من الجن الماس ف يبيدأ بتعذيبه لحد ما بيخرج من جسم الإنسان أو يستسلم و يخضع.

"الْمُكْتَبُونَ لَا يَخْلُونَ مِنْ تَسَلُّطِ الْجِنِّ عَلَيْهِمْ، فَالشَّيْطَانُ يَعَشَقُ أَنْ يَرَى مُؤْمِنًا حَزِينًا وَخَائِفًا، وَكَذَلِكَ الْأَطْفَالُ الْمُكْتَبُونَ وَالْخَائِفُونَ تَسَلُّطَ عَلَيْهِمُ الْجِنِّ، وَالْإِنَاثُ مِنْهُمْ بِالْأَخْصَصِ".

"العون المعين"

هو عبارة عن مارد سُفلي من الجن الأسود، مفيش حد يقدر يستدعيه إلا إذا كان ساحر متمكن، لأن علاقته مربوطة بسلالة إبليس، العون المعين بيتّم تسخيرهُ باستخدام طلاسَم في كتاب العهود السليمانية السبع، لكن الطلاسَم دي اتحدفت نهائياً من أي نسخة منه نظراً لخطورة العون المعين، بس دي حاجة متغيبش عن دكتور رعب، وجميع طلاسَم العون المعين موجودة هنا، ومفيش ساحر يقدر يسخره إلا إذا كان حافظ التعاويذ بتاعته، بيتّم تسخيرهُ في أعمال مُعينة وفي مهمات صعبة مفيش غيره يقدر ينفذها، ومن مميزاته إنه يقدر يتشكّل على هيئة أي شيء، جماد نبات حيوان .. إلخ، العون المعين هو المساعد الوحيد في فتح المقابر اللي متعين عليها حراس من أيام سيدنا سليمان لأنه الوحيد اللي عارف لغتهم وفك طلاسَم القوّة اللي بتضعف قوّة الحارس وتجبره على الرحيل، العون المعين عشان يحضر لازم تكون وصلت لأعلى درجات الشرك "والعياذ بالله"، وتكون على قدر كبير من النجاسة، يقدر يتحكم في أي جن لكن لو فكّر بأذي روح بشريّة يتحرق في وقتها، وقبل ما يتحرق هيقتل الساحر اللي سخره في أذية الروح، أما طريقة تحضيره بدون

طلاسّم فهي تكاد تكون نتيّجتها إيجابيّة على لسان بعض اليّ جربوا..
كان فيه طريقة منتشرة زمان لتحضير جنّ "العون المعين" .. والي كانت بتقول
الآتي.

أول حاجة لازم تذكر اسمه أكثر من ثلاث مرات، والشرط دة حصل وأنت
بتقرأ تعريفه فوق، ولازم تكمل باقي الخطوات لأنك يعتبر ندهت عليه ومستني
منك باقي الأوامر..

تاني حاجة لازم تبات في الحمام ليلة كاملة، وخلال الليلة دي متكونش واكل أي
حاجة كأنك صايم، وخلال فترة وجودك في الحمام تنادي عليه بصوت منخفض
بشكل بطيء عدة مرات ورا بعض، ولو النوم كبس عليك في الحمام عادي، هو
هيصحيك متقلّش، أما لو فضلت صاحي فهو هيطهرلك على شكل جماد الأول،
زي صابونة مثلاً أو ليفة في الحمام، وأنت هتلاحظ الحركة الغريبة الي حصلت
وساعتها هو بيكون مستني منك الإذن عشان يظهر بكامل هيئته، بس خليك فاكّر
إنك لازم تكون على قدر كبير من النجاسة، والشرك بالله..

وقت وجودك في الحمام حاول تولع بخور، البخور في الحمام بييجلب العون
المعين بسرعة كبيرة.

"لحظة ظهور العون المعين"

أول ما يظهرلك هيقولك "ما حاجتك؟" قوله الخدمة الي أنت عاوزها
وساعتها هيديك شروطه، لو وافقت عليها هينفذلك أوامرك، ومن أهم شروطه
إنك تقول الطلاسّم دة..

"القسم القسم .. اليوم اليوم .. العهد السريع والوعد المطيع .. الساعة قادمة ..
الساعة قادمة .. بشما بشما .. طلخ النهار وشرّ الجبار .. أقسمت عليك أيها العون

المعين أن تأتيني وتقضي حاجتي، بحق بربرش وطالوم وغالوم ، بحق ظهور
العون المعين وزامور وداقش، بارك الحق عليك وبورك العدل بين يديك".

دة أقوى وأسرع وأهم طلسم لنداء العون المعين، بس لو قلبك ضعيف
أنصحك بلاش تعمل كدة لأنك هتضر نفسك!!

أما لو أنت مش عايز تضر نفسك وعايز تحضر جن تلعب معاه كوتشينة فأنت
ممكن تحضر "زامور وداقش" ، دول أثنين أخوات من الجن السفلي ويحبوا يلعبوا
مع الإنسان جداً، بس للأسف طريقة لعبهم معاك هتبقى قاتل ومقتول!

لكن ممكن تستعين بنداء "واجد" ودة مُطيع جداً ويبجي بسهولة بس بطقوس
معينة، من مميزاته إن عمره ٤٠٠ سنة، يعني شاب بالنسبة لأعمار الجن وهييقي
فاهم دماغك كويس، وطريقة تحضيره هي المراية بس..

وكان فيه طريقة منتشرة زمان لتحضير جنّ "واجد".. والي كانت بتقول الآتي.
هتجيب مراية على مقاس وشك بالظبط، والساعة ١٢ بالليل خليك باصص
ناحية المراية، وتكون موّلع شمعة بس وقافل كل الإضاءة، وهتفضل باصص لمدة
دقيقة بدون ما ترمش وهتقول التعويذة دي ..

"قشوش .. صورا ح .. بورا ح .. صورا ح .. بورا ح .. بطشا واجد .. بطشا
واجد"

وخلال الدقيقة هيكون ظهر من وراك مباشرة وهتعرف إنه ظهر لما تحس
بسخونة في المكان وصوت نفّس قوي، ساعتها تقدر تكلمه بقى وتقوله يظهر لك
بهية إيه.

أما لو أنت وحيد بقى ومعدكش أصحاب، فأنت ممكن تستعين بشلة كبيرة
من الجن يكونوا أصحابك، بس لو زعلتهم هيتقموا منك أشد انتقام، هات ورقة

بيضاء ولازم تكون خالية من السطور أو أي نقش عليها، وأكتب فيها الرموز دي ..

(ص، وا، ص، ح، ح، ل، خ، ط)

وطبّق الورقة وحط عليها مياه سُخنة وسيبها في مكان رطب، تحت السرير مثلاً، وانتظر اليوم الي بعده.

"عندما تَشْعُر بحركة غريبة حَوْلِكَ لا تَلْتَفِت، فَإِنْ هُنَاكَ جَان يُرِيدُ أَنْ يَعْرِفَ مَدَى خَوْفِكَ لِيَقُومَ بِمُهَاجَمَتِكَ، كُنْ طَبِيعِيًّا وَأَنْتَ بِمُفَرَدِكَ".

وأخيراً ..

حابة أقولك أن الجن موجود في كل مكان وعاش معانا كمان ويمكن يكون جنبك دلوقتي وبيقرأ معاك القصة، خصوصاً بعد قراءتك للطلاسم دي، أو ممكن وأنت ماشي رايح لصاحبك يكون هو ماشي بطريق معاكس ليك وراجع من عند صاحبه، فمتعتقدش أن كل حاجة بتحصل معاك صدفة، صوت الدبدبة الي أنت سامعه في السقف مش صدفة، صاحبك الي بيعرف عنك حاجات محدش يعرفها في الدنيا غيرك مش صدفة، الخيال الي عدى جنبك من شوية وأنت بصيت وملقتش حاجة مش صدفة، الكلب الي عمال ينبج في الشارع مش صدفة، مفيش حاجة بتحصل صدفة، بس أنت تقدر تتحصّن منهم كويس جداً وما يقدروش يعملوا ليك أي حاجة طول ما أنت على وضوء ومداوم على الأذكار وبتصلي، وقتها فعلاً مفيش أي حاجة هتقدر تقرب منك إطلاقاً، خليك فاكر أنهم مخلوقات ليهم عالم زينا بالظبط، فيه منهم الكويس وفيه منهم الوحش، بس أنت فقط الي تقدر تمنع أي حاجة أنها تقربلك .. أنت بس.

"ممن"

"عالم الألعاب الشيطانية"

كثير منّا يثيره الفضول تجاه الغوامض، وزيّ ما يقولوا الممنوع مرغوب، دايماً أي حاجة غامضة أو جديدة بنبقى عايزين ندور وراها ونجربها ونعرف عنها كل حاجة، وهو دة بالضبط موضوعنا.

انتشرت على مرّ الأزمان شوية ألعاب مصدرها خفي، وغرضها كمان خفي ونهايتها مش معروفة، بس اللي معروف عنها إن اللي يلعبها حياته مش بتنتهي بالخير أبداً.

لكن قبل ما أقولك على شوية من الألعاب دي لازم أقولك أن مفيش حد جرب الألعاب دي وطلع منها سليم، وكلهم ماتوا بطرق بشعة، واللي عاش منهم حياته تحوّلت لجحيم حقيقي، فمتحاولش تجازف وتجرب حاجة فيهم، أنا نبهتك وقد أعذر من أنذر.

- لعبة "المصعد الكورية":

الموضوع بسيط، كل اللي عليك أنك تدور على مبنى مُكوّن من أكثر من عشر أدوار، ويكون فيه أسانسير، لقيته؟ تعالى أقولك هتعمل إيه ..!

هتستنى لبعد نص الليل ويكون مفيش حد في المكان أبداً لأن اللعبة دي فردية، بتلعب لوحداك يعني، بس مش لوحداك قوي ..!

هتطلع الأسانسير وتدوس على الأرقام بالترتيب دة بالضبط (٤، ٢، ٦، ١٠، ٥) والأرقام دي ما هي إلا طلاسمة علشان تفتحلك بوابة العالم الآخر، لما توصل

للدور الخامس باب الأسانسير يفتح ويتدخل عندك بنت جمالها رهيب لابسـة أسود، وفيه أقاويل أن شكلها مُرعب جدًّا، المهم أنك ما تبصلهاش، ما تكلمهاش، مالكش دعوة بيها أساسًا، علشان لو حصل هتكون بتعجّل في أجلك، بس بما أنك قررت تلعب اللعبة دي فهو كدة كدة هيكون أجلك قرّب.

بعد ما البنت تدخل والباب يقفل هتدوس على رقم ١ وفي حاجة من الاتنين هتحصل، الأسانسير هينزل للدور الأول فعلاً والباب هيفتح، ودة معناه أن تم رفضك في اللعبة، وقتها إحمد ربنا واخرج من الأسانسير وما تحاولش تبص وراك، والحالة الثانية هي أن الأسانسير هيطلع للدور العاشر ودة معناه إن تم قبولك في اللعبة.

لما تطلع الدور العاشر وأول ما باب الأسانسير يفتح هتشوف ظلام وسواد أنت عمرك ما شوفته في حياتك، حتى لو كنت جايب معاك كشّاف أو شمع مش هينوروا، وفي نفس الوقت الي أنت شايف فيه ظلام وسواد هتشوف الجحيم بعينك، ما تحاولش تبعد عن باب الأسانسير لأن دة هو الطريقة الوحيدة الي ممكن ترجع بيها للعالم بتاعك، ولو بعدت عنه ممكن يخنفي، أول ما تخرج من الأسانسير هتتحس برعشة في جسمك كله وحتحس أنك مترقب وفيه ملايين من العيون بتبص عليك برغم أنك ساعتها ممكن تكون مش شايف حاجة أصلاً، بس خليني أقولك فعلاً إن ممكن ما يكونوش ملايين بس الي بيصولك، أنت في عالمهم أصلاً مُتخيل...!

شوية وحتحس بضيق تنفس وهتبتدي تدوخ وتفقد توازنك، اوعى تسلّم نفسك للتعّب وتقع من طولك أو تفقد الوعي، لأنك لو فقدت الوعي هتصحى وهتلاقي نفسك سجين للظلام طول عمرك.

ومن هنا خليني أقولك إن أقصى فترة ممكن تقعدها في العالم الآخر هي ساعة

واحدة وإلا مش هتعرف ترجع، وعلى فكرة لو معاك ساعة مش هتشتغل هناك، يعني أنت وحظك بقى لو عرفت تلحق..

مفيش حد يعرف إيه اللي موجود هناك بالطبط ولا إيه اللي حصل مع الناس اللي راحت لأن نصهم مارجعش والنص اللي رجع كانوا فاقدين القُدرة على الكلام وكان فيه على جسمهم أثار تعذيب وحرق، دة غير تشنجات ونوبات الصرع، وفيه منهم اللي انتحر، وفيه منهم اللي عاش طول عمره ساكت وخايف، بس اللي كلهم أجمعوا عليه هو عدم قدرتهم على النطق بشيء.

فيه شروط علشان ترجع قبل الساعة ما تخلص، وأول الشروط هي إنك تدخل الأسانسير تاني وتكتب الأرقام بالعكس، وهنا بيكون فيه احتمالية نجاة أو احتمالية هلاك، واحتمالية النجاة هي أن الأسانسير هينزل بيك عادي للدور الأول، وقتها لازم تخرج بسرعة البرق من المبنى كله وما تحاولش تبص وراك ولا تكرر اللعبة تاني أبداً، والحاجة الثانية أن الأسانسير مش هينزل بيك للدور الأول هيفضل يطلع وينزل كثير من غير ما يُقف وقتها استغل أنت قُرب الأسانسير من أي دور من أول السادس لحد الأرضي ووقف الأسانسير وانزل باقي الأدوار على السلم، لأنه لو وصل بيك للدور العاشر تاني الأسانسير هيختفي من مكانه وهتلاقي نفسك واقف في العالم دة ومش لاقى مكان ترجع منه.

تاني شرط علشان ترجع وهو أنك تضحي بحاجة مُعيّنة هتطلب منك، زي إنك تقطع رجلك أو إيدك أو تخلع عينك بأيدك، وتالت شرط أنك هترجع من غير لسانك يا أما من غير صوتك، لأن اللي أنت هتشوفه هناك ماينفعش أي حد تاني في الدنيا كلها يعرفه..

اللعبة مالهش أي إيجابيات إطلاقاً، أنت بس هتقدّر قيمة حياتك هتعرف إنها مش لعبة يتلعب بيها..!



- لعبة "ويجا" / OUIJA :

لعبة ويجا اتلقبت أنها كلمة السر للدخول لعالم السحر الأسود، في ٧ أكتوبر ٢٠١٥ وصلت للمستشفى بنت من تشوزيكا بمقاطعة ليما البيروفية، وال بنت دي اسمها (باتريسا كويسبي) وعندها ١٨ سنة، كانت في حالة من الصربخ الغير مُسبب وبتقول كلام مش مفهوم ومجموعة من الأرقام المتتالية مفيش حد فاهم معناها، أصحابها الي كانوا معاها في نفس اليوم قالوا أنهم كانوا يلعبوا لعبة ويجا مع بعض، وفجأه بدون مُقدمات بدأ صوتها يتغير وأكتسبت قوة مش طبيعية، وبعدها بدأت تدخل في نوبة صرع وبدأت تطلع فقايق من بوقها وتصرخ بكلام مش مفهوم وتردد أرقام برودو محدش فاهم معناها، المستشفى حوّلت كويسبي لعيادة الطب النفسي لحد ما في يوم لقوها مشنوقة في أوضتها ووجهها شاحب جداً ويغلب عليه البياض، ولما شَرَحُوا جثتها ما لقوش في جسمها ولا نقطة دم واحدة ولحد دلوقتي محدش عارف تفسير للي حصل دة، لأن من المستحيل أن جثة ما يبقاش فيها أي دم نهائي حتى لو كانت متقطعة كلها لحتت صغيرة، ما بالك بالي ما كملتش ٢٤ ساعة ميتة وكمّان مشنوقة، يعني مافيهاش أي شيء يسبب نزيف أصلاً..

لما المُستشفى راجعت الكاميرات لقت أنها كانت نائمة عادي جداً ومرة واحدة صحيت وقعدت على السرير، وبعدها وقفت ومشيت بخطوات بطيئة جداً، وبعدها الكاميرات فصلت بدون سابق إنذار وعلى ما الأمن وصلوا عندها لقوها بالمنظر الصعب دة..

الي ما يعرفهوش أهل كويسبي والدكاترة إن الأرقام الي كانت بتقولها كويسبي

ما هي إلا رمز الشيطان الي كان موجود معاها.

طيب ظهرت امتى اللعبة دي وإيه سرّها الغامض؟

لعبة ويجا انتشرت سنة ١٨٩٠ بس ما كانتش لعبة، كان بيستخدمها كبار السحرة بس، وكانوا بيستخدموها للمسّ الشيطاني، وابتدت تتباع وتتعرف ك لعبة سنة ١٩١٤ بعد الحرب العالمية الأولى.

أما أصل اللعبة، فهي كان في منطقة جنوب شرق آسيا سنة ١٢٠٠ ق.م (الصين حاليًا) كانوا بيستخدموها للتواصل مع أرواح الموتى وتحضيرها في هيئة كيانات مؤذية، وبعد كده أنتشرت في حضارة الرومان والإغريق.

اللعبة عبارة عن لوح خشبي مستطيل، بتكتب عليه حروف وأرقام، الأرقام بتكون من صفر لحد ٩ والحروف بتبقى على حسب لغة اللاعب، بيكونوا مكتوبين في صفين تحت بعضهم بشكل مُقَوَّس، وفي الزاوية اليمنى مكتوب كلمة (نعم) والناحية الثانية مكتوب كلمة (لا)، وفوق لوحة اللعبة نفسها في مربع خشبي صغير مثقوب من النص بحيث يظهر منه حرف أو رقم واحد.



طريقة اللعب:

يقعد حول اللعبة شخصين أو أكثر، يلمسوا أطراف الخشبة الموجودة على اللوحة ويغمضوا عندهم ويكرروا جملة (Come OUIJA) عدة مرات لغاية ما المؤشر يتحرك عند كلمة نعم، وبكدة بتكون اللعبة بدأت والروح الي أنت استدعتها قبلت الحضور.

يتم التواصل مع الروح دي عن طريق الحروف والأرقام الموجودة على اللوحة والمؤشر الخشبي المثقوب.

أنت بتطلب طلبك، وهي بتشرط شرطها، يا تنفذ .. يا تتلبس ..!

مفيش أي فرصة للتراجع، لو ما نفذتش طلب الروح هتعمل زي كويسبي بالظبط، ويمكن أسوأ ..

نصيحة مني ما تجربش تلعبها مع أصحابك ولا تشتريها ولا حتى تنزلها من جوجل، الضرر الناتج منها مش هيكون ليك أنت لوحذك، هيكون ليك ولأصحابك وأصحاب المكان الي أنت كنت بتلعب فيه، لأن الروح بتستعمر المكان، ومش بتمشي غير لما تخلص على كل الي كانوا فيه وقت اللعب، وكان أصحاب المكان الي اتلعب فيه.

- لعبة "رَجُل مُتَنَصِّف الليل":

في ٢٠١٦ أعمل على أساسها فيلم (The midnight man) و حقق شهرة كبيرة وقتها.

أصل اللعبة دي بيرجع للحضارة الإغريقية والاسكندنافية بس مش ك لعبة

.. بل كعقاب!

اللعبة بتدور حول أنك بتستدعي كيان بس أنت وحظك بقى هيطلع إيه لأنك مش بتحدد نوعه، الكيان هيطاردك جوا بيتك، عرفت تنجو منه هيتحقق ليك ٩ أمنيات في نفس الشهر، ما عرفتش هتأذي أشد أذى ممكن تتأذيه في حياتك سواء نفسي أو جسدي.

بتلعب أزاى بقى؟

مبدأياً كدة لازم تكون في البيت لوحدهك.

هتجيب شمعة وملح وعلبة كبريت، قبل نص الليل هتجيب الورقة وهتكتب عليها اسمك كامل، وبعدين عوّر نفسك بأي آلة حادة وخط نقطة من دمك على الورقة وبعدين خذ الورقة حطها على باب البيت وخط عليها شمعة مُضيئة واقفل الباب.

بس بحذررك، ما تحاولش تهز معاه أو تخدعه وتحط أسم ودم لشخصين مختلفين، صدقني هيزعلك.

تاني حاجة أوعى أثناء اللعبة تفتح النور لأي سبب من الأسباب حتى لو كانت نيتك أنك تنهي اللعبة، وقتها أنت مش هتأذي .. أنت هتموت، وأهلك مش هيقولك جثة يدفنوها حتى ..!

المهم، بعد ما تحط الورقة وتقفل الباب هتخبط على الباب ٢٢ خبطة متناسقة مع دقات عقرب الثواني، وركز أن آخر خبطة هتعملها تكون الساعة بتدق ١٢ بالليل، بعدها أفتح الباب، خذ الورقة الي سبق وحطيتها قبل كدة، وأفل الباب، كدة بدأت اللعبة ..

خلي معاك شمعة وخذ بالك أنها لازم تبقى على طول قايدة، كدة أنت بتكون

في حماية منه، لو أنظفت لازم تقيدها في أقل من ١٠ ثواني، لو مالحقتش أعمال حواليك دايرة بالمح لحد ما تولعها ثاني.

أول ما تبتيدي تحسّ أن الجو برد هتسمع أصوات وتشوف خيالات، ما تحاولش تركّز معاها أكثر من ثانية، وماتوقفش في مكان واحد أكثر من ١٠ ثواني.

ومن هنا لازم انصحك نصيحة، وهي إنك لو لقيت جسم شبه بشري في أي ركن من أركان البيت اهرب فوراً من غير تردد، لأن كدة الكيان اللي جه من نصيبك هو أقوى وأبشع الكيانات في الدنيا، كيان مؤذي فوق ما تتخيل، فلازم وقتها تخرج من البيت بأي طريقة غير باب البيت اللي حطيت عنده الورقة، بس ما تحاولش ترجع البيت قبل الساعة ٣:٣٣ الفجر، لأن اللعبة بتنتهي في الوقت دة بالتحديد.

لو الساعة جت ٣:٣٣ وأنت لسة بخير وقتها أقدر أقولك أن تجربتك نجحت واستنى بقى مكافئتك خلال الشهر دة.

وفي حال لو أنت هتلعّب اللعبة فعلاً علشان المكافئة مش حب استطلاع، ف من الأحسن أنك تلعبها في شهر مارس أو يوليو أو سبتمبر أو ديسمبر، ومتسألنيش ليه.

لكن خيلني أفكرك أن الـ ٢٢ خبطة ليهم علاقة بالسحر فعلاً، وكل الأدوات اللي أنت أستخدمتها هي في الأصل أدوات سحر، ودي مش لعبة، دة بالفعل تخضير سحر، وخليك فاكر أن دة كدة شرك بالله، ولو كنت فرحان باله أمنيات اللي هيتحققوا في الشهر، ف خليك فاكر أن هيبقى منتظرك عذاب دايم في الآخرة، ربنا سبحانه وتعالى قال: (وَلَقَدْ عَلِمُوا لَمَنِ اشْتَرَاهُ مَا لَهُ فِي الْآخِرَةِ مِنْ خَلَقٍ).

- لعبة "تشارلي" :

ودي لعبة انتشرت في ٢٠١٥ ، تجيب قلمين رُصاص وتخطهم فوق بعض على ورقة على شكل زائد (+) وتقسم الورقة لأربع أرباع اتنين Yes واتنين No ونقول ..

(Charly Charly Are You Here)

(Charly Charly Are You Here)

لو القلم اتحرك ناحية Yes يبقى تشارلي جه وهيلعب معاك، أما لو اتحرك ناحية No يبقى مش هيلعب معاك ومش فاضي، ف أحنا لغينا قوانين الفيزيا والجاذبية وضيعنا مجهود نيوتن وقولنا أن تشارلي هو اللي بيحرك القلم ويقولنا هيلعب معنا ولا لا، بس فيه ناس قالت أنها فعلاً حقيقية، وقالوا أنهم بعد ما لعبوها بقى فيه حد فعلاً موجود معاهم ومش بيحب حد يقرب منهم أبداً ولا يصاحبهم، واللي بيحاول يصاحبهم بيأذيه، ويقولوا أن تشارلي دة أسطورة انتشرت في المكسيك أنه لاعب سيرك والناس كانت بتسخر منه، لحد ما جه يوم وانتحر، ومن هنا بدأ شبحه بالانتقام.

- لعبة "الحوث الأزرق" :

اللعبة دي أنتشرت بسرعة رهيبة وعلى نطاق واسع جداً في فترة قصيرة، اللعبة أصلاً بدأت في روسيا سنة ٢٠١٣ بس ما انتشرتش ولا حد عرف بيها، في ٢٠١٦ ابتدت تنتشر على نطاق أوسع وبسرعة رهيبة بين الدول، وحصلت أول حالة انتحار في ٢٠١٦ في روسيا بسبب اللعبة، وقتها تم القبض على مُصمم اللعبة واللي كان اسمه "فيليب بوديكين" بتهمة التحريض على الانتحار، ووقتها كان عنده ٢١

سنة .

اللعبة بتتكون من ٥٠ مهمة، وكل يوم يبقى فيه تحدي أغرب وأصعب من اللي قبله لحد ما بيوصل لآخر مهمة .. الإنتحار !



وبشكل غير مألوف اللعبة بتاخذ معلوماتك وأكونتاتك وكل حاجة تختصك، وبيبتدي يهددك بيها، لحد ما بالفعل بتنفذ المهمة، بعض المحللين قالوا أن مُخترع اللعبة استوحى أسمها من حياة الحوت الأزرق نفسه، لأنه بالفعل لما بيوصل لمرحلة معينة في حياته بيطلع على الشط وينتحر.

اللعبة بتستهدف أكثر المراهقين اللي بيعانوا من المشاكل الأسرية وبيأخذ منهم أكبر قدر من المعلومات علشان يبتزهم بيها في حالة إنه قرر ينسحب أو ما ينفذش التحدي، "بوديكن" مُصمم اللعبة هو في الأصل دارس لعلم النفس وفاهم كل حاجة ليها علاقة بالنفس البشرية.

وظهر قبل كدة في لقاء تليفزيوني وقال أن الانتحار كان نهاية طبيعية للتحديات، زي تحدي الحياة اللي بيتنتهي بردو بالموت، وأنه بيعتبر اللعبة إشراك منه في تنظيف

المُجتمع من أشخاص ضُعفاء كانوا هياذوا المجتمع بضعفهم، وقال أن المُستهدفين من اللعبة لما يوصلوا لآخر تحدي هيجسوا بسعادة من فكرة الإنتحار، وإنهم هيجنونوا راضيين بالموت، وإنهم المفروض يكرّموه مش يقبضوا عليه لأنه قدّم ليهم خدمة عظيمة .. مش بقولك مُتخلف!.

اللعبة دي تشبه في فكرتها لعبة مومو ولعبة مريم اللي انتشروا في نفس الفترة تقريباً، بردوا بيجمعوا معلومات ويهددوك بيها لو ما نفذتش مطالبهم.

بس تفتكر هل "فيليب بوديكن" كان معاه حق في وجهة نظره؟!

وإن فعلاً كان قصده إنه يتخلّص من أطفال التيك توك بتوع اليومين دول !!
الله أعلم.

- لعبة "داروما سان" :

داروما هي بنت يابانية وقعت في الحمام وانجذبت في دماغها من ناحية عينها اليمين وعينها راحت وفضلت تنزف لغاية ما ماتت.

وأكيد مش هحكيلك عليها من باب الفضفضة، بل لأن ليها لعبة مخصصة ومرعبة هي كمان، حيث إن اللعبة بتقول إنك ممكن تستحضر روح داروما وتلعب معاها لعبة القط والفار، ومُكافئة الفوز بتكون ثروة وحظ لبقية حياتك .. بس دة لو عشت يامعلم!

طيب نستحضرها ازاى بقى؟

تعالى أقولك على أهم الطقوس والطلاسم الي هتستدعي بيها روح الطفلة داروما، بس خلي بالك الموضوع جاد ومتحاولش تاخذه على محمل السخرية..

أول حاجة هستنى لنص الليل وتأكد أنك لو حذك تمامًا، هتطفي كل الأنوار، هتدخل تاخذ شاور بباية ساقعة، وبعدها هتملى البانيو ماية ساقعة وتفضل قاعد فيها وتغمض عينك وتردد (داروما سان سقطت .. داروما سان سقطت)، ولو قدرت تنطقها باللغة اليابانية هيكون أفضل، بس مهما يحصل أوعى تفتح عينك لأي سبب من الأسباب، المفروض بعد كدة لو أنت كنت ماشي بكل الخطوات بشكل صحيح هيجي في دماغك مشهد لبنت واقفة في مكان زي حمام وهتقع على وشها وتخط في عينها اليمين وهتشوف كمية دم مش طبيعية وبعدها البنت هتموت، ومن ثم هتحس بوجود حد وراك، ما تخافش وما تلتفتش ولا تفتح عينك بس أسألها بصوت عالي (لماذا سقطتي؟) هي مش هترد عليك .. على الأقل دلوقتي.

بعدها هتقوم بهدوء جدًا ومن غير ما تفتح عينك، هتخرج من الحمام وتنام، بس ماتفتحش نور الحمام لأي سبب من الأسباب، وماتتخلصش من الماية لحد ثاني يوم الصبح، وماتدخلش الحمام ثاني بعد ما خرجت منه واتأكد أنك قفلت الباب وراك كويس جدًا، أنت كدة خلصت الطقوس، كل اللي عليك أنك تنام والصبح هتبتدي اللعبة.

داروما هتلاحقك طول الوقت، ولو جربت تلتفت وراك بسرعة ممكن تلمحها بتتحرك، ولو بصيت لأي مكان بعيد فجأة هتلاقيها واقفة بتراقبك، تقدر تميزها من فستانها الأبيض الواسع وشعرها الأسود الطويل جدًا وعينها اليمين اللي مش موجودة، لو حاولت تنام في خلال النهار مش هتشوف غير البنت دي بصالك ومبرقة، ولو صحيت بردو في نص نومك هتلاقي نفس الكلام وبمجرد ما تغمض عينك وتفتحها ثاني مش هتلاقيها.

أما لو خوفت وقلبك خانك وعايز تنهي اللعبة فوراً، فأنا هقولك على طلاس

إلغاء اللعبة..

هتيجي بالليل بعد نص الليل وهتقول (تومادا عاك، تومادا آنذاك) وهتروح للحمام اللي سبق وعملت فيه الطقوس وتقول (جيتا جي جو جيتا) ، بس خد بالك ما ينفعش تنهي اللعبة غير لما يعدي ٢٤ ساعة من وقت لما خلصت الطقوس، لأنك لو عملت غير كدة مش هتسيبك في حالك لا وانت صاحي ولا وأنت نايم، ونهايتك هتبقى زي نهايتها.

الي لعبوها ماجالهمش حظ ولا حاجة بس جالهم حالات تشنج واختناق لحد ما ييموتوا أو بيتحروا.

- لعبة "بلودي ماري / Bloody Mary :

أصل اللعبة بيرجع للملكة ماري الأولى بنت الملك هنري الثامن في إنجلترا عام ١٥١٦، عهدها اشتهر بالمذابح والقسوة والحروب الداخلية بهدف إعادة إنجلترا على المذهب الكاثوليكي، ماري مكاتش بتخلف أو بمعنى أدق كل لما بتحمل الحمل ما بيكملش، وبعد المرة الـ ١١ لما الحمل بتاعها ما كملش أنتحرت عن طريق قطع إيدها، وبالمعنى الحرفي قطع إيدها لدرجة إنها فصلتها من مكانها، وفضلت تنزف لحد الموت وخبر وفاتها كان أسعد خبر سمعه الأنجليز وقتها، والأطفال خلدوا أسمها بماري الدموية أو بـ (Bloody Mary) وكانوا بيقفوا أمام المراية بالليل ويقولوا ماري الدموية ٣ مرات وبعدها يقولوا أنا قتلت أطفالك، كنوع من أنواع السخرية يعني.

وهي دي بالظبط خطوات اللعبة، هتقف أمام مراية بالليل وتردد ماري الدموية ٣ مرات وبعدها تقول أنا قتلت أطفالك، بس يكون معاك شمعة والنور

مطفي، المفروض إنك بعدها يظهر ليك في المراية عريس أو عروسة المستقبل، بس الي بيحصل ييبقى أبعد ما يكون عن المستقبل، هو ببساطة نهايتك بالبطيء، هتظهر ليك في المراية بنت شاحبة ماسكة في إيدها اليمين سكينه وإيدها الشمال مقطوعة وبتنزف، ولا بسة أبيض متلطخ بالدم وشعرها منكوش، بعدها محدش يعرف إيه الي بيحصل بس مفيش حد لعب اللعبة دي وفضل بعقله، أغلبهم بيتحولوا لحالات فصام وأكتئاب وبيجيلهم نوبات صرع، والي اجتمعوا عليه إنهم كلهم ييموتوا بنفس الطريقة، كلهم انتحروا عن طريق إنهم قطعوا أيدهم وفصلوها عن مكانها.

- لعبة "الشيطان الحزين":

اللعبة دي من أعماق الديب ويب / الإنترنت المظلم، اتشهرت اللعبة في سنة ٢٠١٥ لما جيمير اسمه "جيمي" قرر يعرضها على قناته لما اتبعته رابط اللعبة عن طريق إيميل مجهول، فضوله دفعه إنه يفتحه ويشوف إيه الي جواه، وبمجرد ما بتفتحتها بتلاقي نفسك جوة متاهة وبتمشي بلا هدف ومش في اتجاه مُحدد، ساعات بتلاقي ألوان اللعبة باهتة، وساعات ساطعة جدًا، وساعات بتكون غامقة، وأوقات بتكون في نقوش غريبة على جدران المتاهة، طول اللعبة أنت بتسمع صوت همهمات مش مفهومة وساعات صرير وأوقات عياط وأوقات تانية صوت خطوات ثابتة، وبتفضل أنت ماشي وبس من غير هدف، من وقت للثاني اللعبة بتقطع ويظهر ليك صورة غريبة، صور لحداث حقيقية وناس اتقتلت بجد، في مرة من المرات وجيمي بيلعب لقي صورة ولي عهد النمسا (فرانز فريرديناند) والمكان الي الصورة متاخدة فيه هو كوخ صيد، ودة هو آخر مكان اتواجد فيه فرانز قبل اغتياله على إيد ناشط صربي، وبعدها اتطورت الأحداث بسبب قتله

من مجرد حروب داخلية ونزاعات لقيام الحرب العالمية الأولى.

مرة ثانية ظهرت صورة الرئيس الأمريكي سابقاً (جون كيندي) في عربية مع زوجته قبل اغتياله بلحظات، ومرة تظهر صورة بافوميت، ودي صورة بترمز لعبدة الشيطان والماسونية، مرة ثانية ظهرت صورة لرئيسة وزراء بريطانيا سابقاً (مارغريت تاتشر) والمذيع (جيمي سافيل) وهما ماسكين لوحة مكتوب عليها (NSPCO) ودة اختصار لجمعية مكافحة القسوة ضد الأطفال ودة على سبيل السخرية، لأن المذيع (جيمي سافيل) هو بطل فضيحة انتشرت بعد موته، وهي أنه خلال سنوات شغله اعتدى على ما يُقارب ٥٠٠ طفل وطفلة، وواحد منهم كان ابن أخوه.

اللعبة حتى الآن غرضها مش مفهوم، كل واحد بيلعبها بيحس أنها عازية توجّه ليه رسالة مُعيّنة أو لغز وهو المفروض يحلّه، اللعبة مش مُتاحة على جوجل ومش بتتبع غير من خلال لينك بيتبع من على إيميل مجهول المصدر وبيخفي بمجرد ما بتفتح لينك اللعبة، وأول ما اللعبة بتنزل على الجهاز بتتحكم فيه وبتمسح أغلب التطبيقات والبيانات اللي عندك، وبتنزل تطبيقات ثانية مهما جربت تمسحها مش هتتمسح.

ودة نفس الي حصل مع اليوتيوب "جيمي" بالرغم من أنه خير سوفت وير.

آخر حاجة عازية أقولها لك أن الفضول نهايته وحشة، الرسول صلى الله عليه وسلم قال: (يا أيها الذين آمنوا لا تسألوا عن أشياء إن تُبدا لكم تَسْؤُكم).

متحاولش تعرف المستخبي لأنه لو صح أو مفيد مكانش هيقى مستخبي، تاني حاجة متحاولش تجرّب أي لعبة من الألعاب دي ولا حتى من باب الفضول

أو إنك تشوف إيه اللي هيحصل، خصوصاً الطلاسـم والطقوس اللي ذكرتها فوق لأنها خطيرة جداً جداً وصدقني اللي هيحصل مش هيـعجبك بكل المقاييس، خليك عارف أنك لو صدقت أن مجرد لعبة هتحقق لك أمنياتك أو هتجيبك الحظ أو أي حاجة من الكلام دة، فـ أنت كدة مُشرك بلا جدال، والشرك من الكبائر، يعني هتتأذي دُنيا وآخرة، أنا قولتلك ونبهتك وأنت في الأول والآخر حُر ..

"تمت"

الفصل الخامس

" حينما عادَ دكتور رعب من الموت ظن الناس أنه خارق، ولم يعلموا بأن هناك مئات الأشخاص يُدفنون يومياً وهم أحياء، معظمهم لا يعودون إلى الحياة مرةً أخرى، فماذا عن الذين يعيشون آلاف السنين دون فقدان الحياة؟ مثل سكان قارة "أنتاركتيكا" في جوف الأرض، أو الذين اختفوا تماماً ثم عادوا بعد آلاف السنين من مثلث الموت، أو مثلث برمودا مثلما يُطلق عليه المؤلفون".

هذا الفصل للكاتبة/ زينب محمد عبدالله.

مواليد ٢٠٠٢ من محافظة القاهرة، في كلية اللغات والترجمة.

شاركت ببعض القصص والمقالات على مواقع التواصل الاجتماعي، وشاركت في معرض القاهرة الدولي للكتاب ٢٠٢٢ برواية "قدر".

وقامت بكتابة الفصل الخامس في كتاب "دكتور رعب ٣".

الإهداء..

إهداء وبكل الحب لوالدي الذي لم يخذلني قط بحبه وسنده لي في جميع الأوقات، ولأمي التي دائماً أرى في عينيها الفخر والحب، وأختي وأخي شركائي في رحلة حياتي، ولكل أصدقائي الداعمين لي ولكتاباتي.

وإهداء كبير وخاص جداً.. لي ولظلي ولشتاء قلبي، لجعلي دائماً واثقة في كتاباتي وقرارات حياتي، أشركك.

"عالم الهونى"

ازيك يا صديقي القارئ؟

تخيّل بقى معايا إنك تصحى من النوم تلاقي نفسك في مكان أسود في أسود.

مش كدة وبس، تلاقي نفسك لابس قطعة واحدة من الملابس ومدعمة بكمية من القطن، طبعي هتصرخ بكل ما فيك من الرعب، أنت حالياً في مكان ضلّمة كُحل مصطحب الهدوء الكامن في الظلام معاك، مش شايف أي حاجة حواليك، تكاد تكون حاسس بأنفاس حواليك ممكن تكون أسبابها تسريب من مكانٍ ما حواليك لسر سوب هواء بسيط...!

لكن دماغك في موقف زي دة مش هتبقى مستوعبة وجود حاجة منطقية أساساً، خصوصاً لما تخطّ إيدك كمان جنبك وتلاقي هياكل عظمية!!!!

وأنا لو قولتلك دلوقتي إن الأنفاس الي أنت حاسسها وراك دي مش مجرد سر سوب هواء ولا حاجة وإن دة كائن من الكائنات الغير بشرية حواليك، هتحس نفسك سامعهم فعلاً، مع إنك عارف إنهُ سر سوب الهواء عادي بس دماغك هتقنعك بعكس كدة بسبب رُعبك من الموقف نفسه..

طب تخيّل بقى من الرُعب الي هتبقى فيه وصراخك المستمر لمدة يومين ومازال محدش سامعك، شعرك يشيب!

لكن للأسف دي مش مجرد تخيّلات، الأحداث دي بالتفصيل حصلت مع "حسين" ..

"حسين عبد العظيم"، شاب عنده ٣٥ سنة، يشتغل في ورشة خراطة، الموضوع كان طبيعي مع حسين لحد ما في يوم من الأيام رجع من الشغل واتعشى ونام زي أي يوم طبيعي، بس الي مش طبيعي في اليوم ده إنه "مصحش" زي كل يوم!!

لما أهله عرفوا أخذوه وعرضوه على دكتور، والدكتور شخّص حالته وقالهم إن حسين توفي بسبب التسمم، وبدأت العيلة تمشي في خطوات الدفن وغسلوه واتدفن بالفعل، واتخط حسين في القبر جنب والده في مدفن العيلة، ولكن الي مكانوش يعرفوه إن حسين وبكل أسف اتشخص غلط!! .. حسين كان في غيبوبة، وقعد في الغيبوبة دي في القبر لمدة ثلاث أيام لغاية ما فاق منها ..

قعد يصرخ ويزعق في القبر وسط ظلام داكن ومחדش سامع له حاجة، واستمر على كدة لخمس أيام، وأخيراً يشاء القدر إن التربي يسمعه، وبعد رعب وخوف كثير قرر إنه يفتح التربة بتاعة حسين ويشوف إيه صوت الصريخ ده، ولكنه كان يفتح التربة علشان يدي حياة جديدة لحسين، ومكانش يعرف إنه هينهي حياته بإيده، وبمجرد ما فتح القبر شاف حسين وهو بيتحرك بالعافية جوة القبر وطالع شكله مرعب ومريب جداً، أصابته أزمة قلبية من الصدمة واتوفي التربي من رعب وهول الموقف أول ما شاف حسين.

لإن حرقياً اتحوّلت ملامح حسين من شاب ٣٥ سنة، لملامح راجل كبير عجوز وشعره أبيض .. طبيعي "دخول القبر مش زي خروجه".

وأخيراً انتقل حسين للمستشفى بعد كل الخوف والرعب الي كان عايش فيه في القبر، تصوّر نفسك حد من عيلة حسين بترد على مكالمة جايلك من المستشفى ويقولولك فيها حسين في المستشفى وحيّ بعد ما وديته بنفسك للقبر بعد مجرد ١٢٠ ساعة !!

لما وصلت والددة حسين للمستشفى بسرعة بعد ما بلغوها الخبر علشان تزوره،

بمجرد ما شافته ابتسمت وطبت ساكتة .. طبعي مش هتستحمل إنها تشوف ابنها عايش قدامها بعد ما فارق الحياة بـ ٥ أيام ..

متخيل رعب الموقف؟

أنت حرفياً اتدفنت حي، أنت شوفت الموت بعينيك رغم إنك في مكان كله سواد، مكان بنخافه وبنشيل همّ إننا نتحط فيه بعد الموت فما بالك لو أنت حيّ ترزق!

حسين قعد فاقد النطق حوالي ٣ شهور لغاية ما حاول يتكلم، والصدمة عليه مكانتش مجرد صدمة ضلعة القبر بس لأ، دة شاف بعينه اتنين بيموتوا قدامه، أولهم التربي وثانيهم والدته، ومش كدة وبس، حسين كان متجوّز قبل ما يمرّ بأي حاجة، طبعاً فكرك إنها أكيد هتفرح وتقول إن ربنا كتب له عُمر جديد، للأسف حصل حاجة محددش كان يتوقعها تجاه زوجته، وهي إنها أول ما عرفت أنه حيّ طلبت الطلاق!! أصيلة والله ..

كان سببها الوحيد قالتلك إن دة مش حسين، وإن حتى شكله واضح إنه مش بشر، ومكانتش مستوعبة إنه حسين فعلاً هو اللي قدامها، وقالت إن دة "عفريت حسين".

طب والنبي هتلاقها منين ولا منين يا حسين يابني، بس كان فضل ربنا عليك كبير إنك قدرت تستحمل كل دة حقيقي.

دي قصة حقيقية من وسط قصص كثير جداً بتحصل كل يوم، بس يمكن قصة حسين اشتهرت في الإعلام ومصر كلها سمعت قصته، بس إيه اللي إحنا مسمعناهوش؟ حاجات أكبر من كدة بكثير ولو دخلنا أكثر في تفاصيل الموت والقبر ممكن نتجنن من اللي بيحصل، أنت عارف إن كل يوم بيتدفن ٣٥ شخص

حيّ بسبب اعتقاد الأطباء أو حتى الأهل بأنهم ماتوا فعلاً!!

والموضوع دة محصلش في موزمبيق أو السنغال مثلاً عشان نقول إن الطب هناك ضعيف وطبيعي يحصل كدة .. لا دة حصل في الولايات المتحدة اللي فيها أفضل الكوادر الطبية في العالم!

فأنت مستني إيه يا صديقي؟؟ إلحق روحلك كوكب تاني..

على حسب اللي قالته صحيفة "ذا أدفوكيت" في ولاية لويزيانا في ٢٧ مايو ٢٠٠٥ إن هناك شخص واحد من بين كل خمسين شخص بيتدفن حيّ على مستوى البلاد، والرقم دة استخرجته الصحيفة اعتماداً على معدل الأخطاء المشابهة «اللي تم اكتشافها في آخر لحظة» ضمن متوسط حالات الوفاة اليومية في كامل الولايات.

وسنة بعد سنة أصبحوا على قناعة بأن عدد أكبر من المرضى الموجودين اتدفنوا أحياء من غير ما يعرف أي حد بيهم ..

ويعود جزء كبير من المشكلة للتسرع في إعلان الوفاة بناءً على مظاهر مرتبطة بالموت، زي إن القلب يقف لفترة طويلة، أو التنفس يقف لفترة مش طبيعية .. ولكن حتى في الحالة دي الشخص يفضل في حالة «وفاة سريرية» بحيث تبقى أعضاؤه الثانية كلها حية، ولما بيرجع القلب يدق من تاني والرئة تشتغل، بيتجاوب معاهم بقية الأعضاء فيصحى الشخص الميت وسط ذهول ورعب الكل!!

مرحباً بيلك يا صديقي في كوكب الموت "الأرض" ..

في العصر الحديث أعلنت نقابة الحانوتية في لندن قبل سنتين أنها أنقذت من وقت تأسيسها حياة ٢١٧٥ شخص كانوا هيتدفنوا بالغلط ، وفي هامبورج أعلنت جمعية «المحاولة الأخيرة» إنها أنقذت حياة ١٠٧ شخص في الخمس سنين اللي فاتوا دول، زود عندك بقى المشاهير اللي اتلحقوا من إنهم يتدفنوا وهم أحياء، زي مثلاً

رئيس وزراء المملكة المتحدة "درزائيلي".

وعالم التشريح الشهير الدكتور "ونسلو"، ودة اللي يخلينا نسأل ونتساءل عن النسبة بقى بين الناس العادية، عامة الشعب زي ما بيتقال !

على كُل مهما اتقال عن ندرة الظاهرة دي وإن احتمالية إنها تحصل (حتى بنسبة واحد من الألف) موضوع يسبب الفزع ويستحق الرعب بمجرد التفكير فيه، ويستحق نخلي بالنا ونتأكد دايماً من احتمالية حياة موتانا ..

طيب زي ما فيه حوادث بتحصل للموتى وبيرجعوا للحياة تاني، أكيد فيه حوادث بتحصل للي بيموتوا وبيرجعوش ..

تفتكر يا صديقي الجثث ممكن تتكلم؟

يناير ٢٠٢١

مشرحة زينهم ..

وصل لمشرحة زينهم جثة سيدة وكان شكلها غريب، ولونها أزرق بشكل مبالغ فيه، ويظهر على ملامح وشها (اسفيكزيا الخنق) وكان مربوط حوالين رقبتها (ملاية) كأداة للخنق، لما بدأ الدكتور يركّز مع الجثة لاحظ أن إيد من إيديها برا الترابيزة بتاعة التشريح بشكل غريب، فقرر إنه يرجع الإيد لجانبها بحيث تبقى لازقة في الجسم من الجنب، لكن لما ألتفت عشان يجيب المشرط والأدوات سمع صوت ورا، ولما بص تاني للجثة لقي إن إيدها الثانية المرة دي هي اللي برا ترابيزة التشريح، حاول الدكتور يتوقع أن دة يكون غلط منه مكانش ظابط الجثة على الترابيزة كما يجب، ورجع مرة ثانية يكمل تجهيز الأدوات، ولما خلص ورجع علسان بيداً شغله المرة دي لقي شيء مُرعب أكثر ..

وقف الدكتور في حالة صدمة لثواني بسبب عدم تفسير اللي هو شايفه لا بالعلم ولا بالمنطق، ولا حتى بسبب غلطة ممكن يكون هو السبب فيها وهو مش واخذ باله..

لقى رجل الجثة الشمال برا الترابيزة تماماً!!

طيب هتقولي ما يمكن السرير اللي عليه الجثة هو السبب؟

هقولك استحالة .. لأن الرجلين بتوع الجثة متخشين تماماً على الترابيزة، دة غير إن ترابيزة التشريح ليها جوانب عالية وبتبقى متخصصة لكدة عشان تمنع أي حاجة تقع برا الترابيزة أثناء عملية التشريح دي .. طب أو مال ازاى دة حصل؟؟؟ في اللحظة دي أيقن الدكتور إن في شيء حواليه رافض تشريح الجثة بأي شكل!



كان يُقال إن اللي بيمروا بحاجات شبه كدة بيبقى من أفعال القرين، وفيه اللي بيقول روح المتوفي هي اللي بتحاول توضّح حاجة معينة .. طب أصلاً هو ينفع تفضل روح الشخص بعد الموت على الأرض؟؟ هقولك المعلومة دي بعدين خليك فاكرها، نكمل في الأقاويل اللي بتتقال..

فيه بقى اللي بينسبها للجن، وبيقولك إن الجن اللي كان في المكان شاف
الى حصل وحبيب يوصل لعالم البشر اللي هو شافه .. طب تفتكر إيه الإجابة
الصحيحة في كل دول؟؟

ولكن في النهاية .. "أيا كان إيه هو الكيان دة .. ليه بيرفض التشريح؟؟

طيب عارف إنه ممكن يحاول يبعذك بأكثر من طريقة؟

هنا هقولك إن كل الطرق دي عارفها كويس جداً أي حد اشتغل قبل كدة
في التشريح، لازم يكون مرّ بحاجة شبيهة، وهي إن في البداية الكيان دة يحاول
تخويفك بحركات بسيطة زي ما حصل كدة، يحرك الجثة مثلاً، بعدين يبدأ يخوفك
أكثر بأصوات أو يبدأ يوقعلك في الأدوات بتاعتك، يكسرها مثلاً؟

ولو كان الشخص اللي بيشرح الجثة دة فعلاً ضعيف فمش بعيد إنه ممكن يتأذي،
ودة معناه إن الحركات دي كانت الرسالة الأولى للدكتور ولحسن الحظ الدكتور
بتاعنا مكانش ضعيف بالمرة، وقرر يوصل هو كمان رسالته الأولى بالتحدي للكيان
دة "أيا كان إيه هو"...

بدأ الدكتور إنه يعدل رجل الجثة وعلشان يتأكد عدم تكرار دة مرة ثانية، ربط
رجل الجثة مع بعض بقماشة وقرر إنه يكمل شغله عادي جداً..

قلبه جريئ جداً الدكتور دة ..

لما بدأ في التشريح لقي إن الأعضاء الداخلية في بدايات التّعفن وريحتها ميمته
وبشعة، ولقي في رقبته آثار بتأكد إنها ماتت بسبب الخنق ولكن القوة اللي كانت
مستخدمة في الخنق كبيرة جداً، ممكن نقول حوالي ثلاث أشخاص لو مش أكثر،
مش مجرد واحد خنقها بملاية قماش، الأغرب بقى إنه لقي على جسمها بعض
الرموز والأوشام باللون الأخضر، وبعض الجمل اللي مش مفهومة تماماً، ورمز

غريب جداً لقاه وهو رمز أشبه بحرف الـ «S».

ودة من الحاجات المشهورة بين دكاترة التشريح إن دة أهم علامات وجود حاجة شيطانية مسببة لموت الشخص دة، وظاهرياً كدة اللي فهمه دكتورنا وهو بيشرح الجثة إن مرّ على موتها تقريباً ٢٤ ساعة، ولما كان بيكمل الدكتور الفحص اتفاجئ بتاني رسالة من الجثة .. الملاية البيضة اللي ربط رجل الجثة بيها، اختفت؟؟؟

ساعتها قرر الدكتور إنه يسبب الجثة وقرر يتكلم مع ضابط من المباحث المسئول عن جريمة قتل الست دي، عشان يفهم منه إيه اللي حصل بالظبط، وساعتها الضابط كان في حيرة أكثر منه بكثير في القضية، في حين إنه قاله فيه محل قدام بيت الست المقتولة دي، والكاميرا بتاعته وضحت أن الست دي دخلت البيت الساعة ٣ العصر، استغرب الدكتور وقاله ازاى من ١٠ ساعات بس وكل حاجة بتأكد إنها ماتت من ٢٤ ساعة أو أكثر!!

قفل الدكتور المكاملة ولما رجع مرة تانية لجثة الست لقي المرة دي الإيدن والرجلين برا الترابيزة، والأبسع .. إنه لقي الجمجمة منشورة رغم إنه معملش كدة!!

لكنه قرر يجمّد قلبه للمرة الثانية وبدأ يقربّ منها عشان يكمل شغله، بس فجأة جتله مكاملة تليفون من ضابط مباحث تاني غير اللي كلمه من شوية، أكيد علشان يسأله عن أي معلومة تفيدهم في القضية، لكن الغريب هنا إن الدكتور لما قاله أنه اتكلم مع فلان ضابط المباحث من دقائق .. الضابط التاني استغرب كلامه وقاله "ازاي كلمته وهو قاعد قدامي؟؟ وهو اللي قايلي إني أكلمك دلوقتي أصلاً؟"

ولما أصرّ الدكتور على كلامه راح قال للضابط خليني أكلمه، ولما اداهوله واتكلم معاه أكده أنه في التوقيت دة أصلاً كان بيصليّ ومكنش معاه التليفون!

ولما استسلم الدكتور وسألهم عن تفاصيل الجريمة، قالوله بالظبط نفس الكلام
الى اتقال في المكالمه اللي هو فاكرها بالظبط إنها حصلت؟؟

قفل معاهم المكالمه وقرر يتأكد من موبايله من قائمه المكالمات، لقي إن فعلاً
مفيش أي مكالمه متسجله إنه كلم الضابط ده .. وهنا بدأ يتأكد الدكتور إن دي
الرسالة الثالثة من الجثة الراضة للتشريح.

طيب ده جن؟ ولا ده ساحر أو دجال؟ طيب ممكن يكون قرين الست دي؟
طيب هل ممكن تكون الست كان ليها علاقة بتحضير الأرواح وده سبب اللي
بيحصل أصلاً؟ هتفضل الإجابة غامضة ومحدث يعرف السرّ..

ودلوقتي يا صديقي بعد كل اللي حكيتهولك ده تقدر تجاوبني على سؤالي ..
هل كده فعلاً الجثث بتكلم أو تعرف تتحرك بعد الموت من غير الروح؟
طيب هل ممكن الروح تفضل على أرض الدنيا بعد الموت أساساً؟؟
تعالى احكيلك قصة سريعة حصرية عن شخصية رجعت من الموت يمكن
تفيدنا وتقدر تجاوب على الاسئلة دي!!

أكتوبر ٢٠١٧

مستشفى "أمان" داخل غرفة العمليات في القاهرة - حلوان

الدنيا اتقلبت عن واحدة ست رجعت للحياة بعد الموت، والمرة دي ماتت
بجد مكانتش غيبوبة زي "حسين عبد العظيم"، طب مين الواحدة دي وإيه اللي
حصلها؟

"ناهد عطية" مواليد ١٩٦٩، أصيبت بذبحة صدرية وكان لازم تعمل عملية
فوراً، وخلال العملية وقفت نبضات القلب، وكان لازم الدكتور يبدأ يعمل

للجسم إنعاش بالكهرباء، واستمر بمحاولات الإنعاش لغاية ما الجسم وقع من على السرير من شدة تيار الكهرباء، وهنا قرر الدكتور بالإنسحاب وإنه يخرج من العملية ويعلن وفاتها لعدم تعذيبها..

ولأن إحدى الممرضات كانت زميلة "ناهد" فقررت إنها تبلغ العائلة، وبالفعل انتشر بين أخواتها خبر وفاة أختهم وكانوا بدأوا يستعدوا للبس الأسود على أختهم العزيزة "ناهد"، لغاية ما مساعد الدكتور قرر إنه يقنع الدكتور مرة ثانية بأنهم يحاولوا في الإنعاش مرة كمان مع محاولة دخول القسطرة للقلب عشان الشرايين تبدأ تتوسع ويشغل القلب من تاني، وبالفعل عملوا كدة ورجع قلب ناهد يدق من تاني وانتقلت لغرفة من غرف الرعاية المركزة وفاقت.

طيب فين الغريب بقي؟

يا صديقي الغريب في إن "ناهد" لما اتسألت كانت حاسة بإيه ساعتها كان ردها غريب جداً، قالت إن خلال الثواني الي الدكتور قرر ينسحب من أوضة العمليات كانت سمعاه وشايفاه وكأنها موجودة فعلاً، كانت سامعة وحاسة برضو بمحاولات مساعد الدكتور وهو ييقنعه بالمحاولة مرة ثانية، ومش كدة وبس، قالت ناهد إنها كانت شايفة "والدها" و"أختها" الي كانوا متوفيين من سنة ٢٠١١ بينادولها، وأكدت إنها كانت شايفاهم قدامها وكانوا كأنهم يمسكوها من أيديها ويسحبوها معاهم، قالت برضو إنها كانت حاسة بإنها بتقع من مكان عالي فجأة، لكنها مش حاسة بوجع .. في نفس الوقت الي وقعت فيه من شدة صدمة الكهرباء الي حصلت لها !!

كانت كل الي حاسة بيه إنها مخنوقة، وصفت "ناهد" الكام ثانية الي مرت بيهم دول بالحرف وقالت (كأني كنت جوة أنبوبة صغيرة ومحشورة فيها بتنفس بالعافية ومتأكدة إني مش في العالم بتاعنا دة) وأكدت الممرضة صاحبة "ناهد" معلومة إنها

شافت صاحبته بعينها ميتة وبتعيش من تاني، وقالت إن ربنا أدالها عمر جديد،
وكان تاريخ ميلادها مش في ١٩٦٩ بالعكس .. كأنها اتولدت من جديد سنة
٢٠١٧ ..

تخيل تُمّر بكل دة وأنت مش عارف أنت حي ولا ميت ؟

شايف الناس اللي حواليك وشايف الأموات الغالين عليك برضو وبيندهولك
، تفتكر دة معناه إن روح "ناهد" خرجت من جسمها ورجعت ؟ ولا يمكن كانت
بتحلم ودة العقل الباطن ؟ ولا دة معناه إيه ؟

كل اللي نقدر نقوله هو "الله اعلم" لكن المؤكد إن "ناهد" شافت الموت بعينها
حرفياً ..

هتسألني تاني على الروح .. هتقولي طيب لو مش هي اللي بتسكن الأماكن
ومش موجودة في أرض الدنيا، ليه بنخاف ندخل المقابر ؟ ما هي يعتبر من أكثر
الأماكن اللي فيها أرواح الموتى اللي مدفونين هناك ؟

تعالى نتكلم واحدة واحدة وكدة وهحاول أجابك على كل اسئلتك دي ..

أول حاجة بكل هدوء حابة أعرفك إن أنت روحك بتخرج كل يوم من
جسمك وبترجع تاني .. هتقولي ازاى، هقولك دي معلومة كلنا عارفينها بس
عمرنا ما اديناها وقتها في التفكير، أنت كُل يوم روحك بتخرج منك وقت النوم
ولو مش آن الأوان إن الموت ياخذك أنت استحالة تموت، كل واحد وليه أوانه
وطالما ربنا كاتبلك حياة جديدة في اليوم الجديد، فدة روحك بترجع لجسدك
تاني ودة معناه إنك لازم تراجع نفسك كل يوم .. هل أنت تستحق الفرصة اللي
بتجيبك كل يوم دي ولا لا يا صديقي ؟

أما عن وجود الروح وأنها بتسكن الأجساد أو الأماكن أوزي ما سألتني فوق

عن (المقابر) فأنا حابة أسألك عن حاجة ..

تعرف الجن؟ عاشرتهم؟ يبقى متعرفهمش!

الحقيقة بقي إنك معاشرهم كل يوم وموجودين في حياتنا كلنا بشكل يومي، الحجاب الحاجز الي على عنينا هو الحاجز الوحيد الي بيننا وبينهم ، ومتخافش كدة وأنت بتقرأ ومتحاولش تركز مع الأوضة حواليك أو تبص جنبك بشكل مفاجئ، علشان مش بعيد يكون حد منهم دلوقتي بيقرا معاك الكتاب أصلاً .. هتخضه!

صديقي القارئ حابة أقولك معلومة يكاد يكون معظمنا ميعرفهاش، وهي إن معشر الجن بيخاف من معشر الإنس زي ما إحنا بنخاف منهم بالطبط، ممكن يبجي في دماغك إن ليه هما بيخافوا منّا؟ ما لو شوفناهم حتى مش هنعرف نأذيمهم، غلط يا صديقي، لأن يُقال والله أعلم إن فيه قائد لما نزل على الأرض في وقت من الأوقات شاف إن فيه حرب بين معشر الجن والإنس .. دة معناه إنهم زي ما يعرفوا ياذوك تعرف أنت كمان تأذيمهم بالطبط ، دة داير بينهم حروب وفيه مصابين وموت .. أنت مستوعب؟؟ القائد دة بقى اسمه "مهلائيل" ويُقال إنه حفيد سيدنا آدم "عليه السلام" ..

ورغم كل دة خوفنا من بعض دة هو الي بيخلينا نتجنب حقيقة إنهم حوالينا وبيخليهم يتجنبوا وجودنا حوالهم، فتلاقيهم كدة واخدين منّا جنب .. ازاى؟ هتلاقيهم بيدوروا على أكثر الأماكن الخالية من البشر وواخدينها مسكن ليهم وزى ما إحنا بنسميها (ساكنيتها) عايشين فيها حياتهم في مأمن من البشر .

زي إيه مثلاً؟

البيوت المهجورة لسنين طويلة، الصحراء، الكهوف، البحار، والمقابر!

وهنا نرجع لموضوعنا بقي، نفتكر الي موجود في المقابر "المكان الغير متردد عليه بشر، المكان البعيد والمسال من شر أي إنسي" دة، بيكون فيه أرواح بشر اتوفوا؟ ولا عائلات للجن عايشة في سلام؟

رغم إنك أنت الي جاوبت بس مقتنعش صح؟ طيب إلجأ لـ "عالم الجن" الي في الكتاب هنا، هتلاقي معلومات تفيدك.

وتعالى معايا أعرفك معتقدات الحياة بعد الموت بالنسبة للروح على مرّ العصور يمكن نلاقي إجابة منطقية للأسئلة دي.

نبدأ بالحضارة الفرعونية..

بإختصار، الفراعنة يا صديقي كان اعتقادهم عن الي بيحصل للروح بعد الموت إنها بتمر برحلة طويلة، الرحلة كانت عبارة عن ١٢ بوابة لازم الروح تعديها، بتبدأ من مكان الدفن (القبر).. طب ازاى بقي؟

بمساعدة كتاب "الموتى" الي كان بيبقى مع الجثة المحنطة في القبر وخلال الـ ١٢ بوابة دول كانت الروح بتعدي على ٤٢ إله لغاية ما بتعدي وتوصل للمحاكمة الكبرى مع (الإله ازوريس) الي بياخد قلبك ويحطه في ميزان، ويحط في الكفة الثانية ريشة طائر، وعلى حسب الميزان بيدأ يتحدد مصير الروح، لو كان قلبك أخف من الريشة بتروح للجنة وتبدأ مرحلة البعث والخلود لأنك إنسان صالح، أما لو العكس ساعتها بتروح لـ (عمعموت) وتبدأ مرحلة أكل وتوهان روحك للأبد.

ومش بس المصريين القدماء الي كان عندهم عدد كبير من الامتحانات الي بتعدي عليها الروح قبل الحياة الأخرى..

من حوالي ٢٠٠٠ سنة يا صديقي ظهر المعتقد الطاوي في (الصين)، الي يقول

إن الروح بتعدي على ١٠ محاكم، ومن المحاكم دي بيتحدد الإنسان دة في حياته إذا كان صالح فيُسمح له بدخول الجنة، أما لو فاسد فتخضع روحه للعذاب الأبدي، طيب ما الكلام تقريباً منطقي أهو، فين المشكلة؟

هقولك .. الموتى دول كان عندهم اعتقاد إن عشان يقدرُوا يعدوا من الـ ١٠ محاكم دي لازم يحتاجوا مساعدة، إيه المساعدة بقى ؟

كانوا بياخدوا كل حاجة تخصهم في حياتهم معاهم القبر .. كل الممتلكات والذهب والمجوهرات والملابس، حتى الخدم !!

كل إنسان كان بيخدم الميت دة في حياته كان بيدخل معاه القبر حيّ لإعتقادهم إنهم هيشبوا حُسن حياتهم ونيتهم للمحاكم اللى هيمروا عليها، ولما يعيشوا في الحياة الأخرى يلاقوا معاهم ممتلكاتهم وطعامهم وخدامهم، مثال بسيط، قصة الإمبراطور "تشين شي هوانغ" اللى كان بيأمر ابنه قبل ما يموت إنه يتأكد من إن كل الخدم وخاصة النساء اللى خدموه في حياته يكونوا معاه في القبر.

أما في الهند بقى في الديانة الهندوسية فيه معتقد اسمه معتقد الكارما "التناسخ" .. فتفكر هيحصل إيه لو بعد ما مُت، اتولدت من جديد في حياة جديدة بس في جسد وهيئة مختلفين !!

بص يا سيدي معتقد الكارما بيقولك إن بعد الموت الروح بتتولد من تاني بس هيئتكَ في الحياة الجديدة اللى على الأرض دي ليها علاقة بحياتك اللى فاتت هل أنت شخص كويس ف تستحق حياة حظك فيها أحسن ولا متستاهلش فتتولد على هيئة كائن عمره صغير جداً وتموت بسرعة وتتولد تاني وهكذا .. موضوع مرهق صح؟

قالك فيه حلين ..

الأول وهو إنك خلال حياتك لازم تنزل تغتسل في نهر "الغانغ" كنوع من تطهير الروح لأنهم مؤمنين نوعاً ما بقدسية مياه النهر دة، وإنك توصي أهللك وأقاربك بإنك لما تموت يحرقوا جثتك..

طب والحل الثاني؟

يحرقوك برضو بعد ما تموت، بس المرة دي مش لوحذك، معاك مراتك أو أحد أبنائك وهو حي، وكان اعتقادهم إن لما تعمل كدة روحك هتبقى حرة وساعتها مش هتتولد تاني.

طيب دي المعتقدات زي ما اتفقنا قبل ظهور الأديان السماوية.

الي ظهر في الديانة المسيحية عن الروح يقول إنها بعد خروجها من الجسد بتدخل مرحلة "الهاوية" لغاية يوم القيامة، وهو يوم نزول المسيح للأرض، ولكن الناس مش هتبقى متساويين في الهاوية طبعاً لأن هنا في نوعين "الهاوية العليا" للأشخاص الي هيدخلوا النعيم (الجنة) أما "الهاوية السفلى" وهي الجحيم ..

أما عن المذكور في الدين الإسلامي كان عن "حياة البرزخ"، المعروف عنها هي الحياة بين حياة الدنيا ويوم الحساب "يوم القيامة"، الحياة دي بتبدأ بعد الموت مباشرة كل إنسان بيكون عارف مصيره، ومن تفسير الشيوخ لبعض الآيات القرآنية إن الإنسان بيكون شايف إيه هيحصله يوم القيامة، ولما الروح بتطلع لربنا محدش عارف إيه بيحصلها بالتحديد، هل بتفضل على الأرض؟ هل ليها مكان محدد بتطلع فيه السماء؟ محدش يعرف لأن زي ما قولتلك معلوماتنا عن الروح تكاد تكون معدومة ومش إحنا وبس بالعكس، حتى الرسول "صلى الله عليه وسلم" لما ربنا قال له في القرآن الكريم :

بسم الله الرحمن الرحيم

"وَيَسْأَلُونَكَ عَنِ الرُّوحِ قُلِ الرُّوحُ مِنْ أَمْرِ رَبِّي وَمَا أُوتِيتُمْ مِنَ الْعِلْمِ إِلَّا قَلِيلًا"
صدق الله العظيم .

المعنى إن لما سيدنا محمد (عليه أفضل الصلاة والسلام) اتسأل عن الروح والي بيحصلها نزل ربنا عليه الآية دي، بمعنى مختصر إن كل الي إحنا فاكرين إننا عارفينه قليل جداً أمام معرفة الله سبحانه وتعالى..

كل المعلومات الي ذكرناها دي حقيقية في حياتنا بنسبة ١٠٠٪ لا مفر منها إلا وستعود إليها بكل الأحوال، لما يحين ميعادك مفيتهاش هروب، الشيء الوحيد في الكون إلي هنمر بيه كلنا بلا أي استثناء، قدرنا كلنا في يوم من الأيام..

الموت كلمة كبيرة وبتخض أي حد بمجرد التفكير فيها، من أقوى كلمات الرعب بالنسبالتنا، الموت بياخد مننا أعباء كتير، كلنا في حياتنا ناس فارقونا بسببه (رحمة الله عليهم جميعاً)، بس زي ما يقولوا كدة "تتعدد الأسباب والموت واحد"، ف بما إن الموضوع شاعري ومُرب، حابة أقولك خد بالك من تصرفاتك في حياتك كويس، وخليك عارف إن الموت بيزورك كل يوم، ومش هتقدر تهرب منه، خليك واعى لـ دة، وخليك مُستعد.

"مَت"

"عالم المناطق الغامضة"

كل ما بنقول إن الكرة الأرضية مكان جميل ومزدهر وفيه حاجات حلوة، يطلع لنا أخبار بقى عن مناطق غامضة موجودة معانا على كوكب الأرض، ودي مش أي مناطق وخلاص لأ، دي مناطق ممكن تبتلع الإنسان ومناطق خاصة بالكائنات الفضائية ومناطق مسكونة بالجن والعفاريت، والأغرب بقى إن الحاجات دي موجودة بالفعل مش مجرد أساطير بتتحكي وخلاص..

أنا هنا عشان أوضحلك أكثر عن المناطق الي ممكن تروي شغفك تجاه الغموض وكل ما يخص المناطق السريّة.

"مثلث برمودا"

المعروف كمان بأسم "مثلث الشيطان"، وهو عبارة عن منطقة جغرافية على شكل مثلث في المحيط الأطلسي، تحديداً بين برمودا، وبورتوريكو، وفلوريدا، مساحته حوالي مليون كيلومتر، هي منطقة مشهورة بالمقالات والأبحاث الي نشرها مؤلفين في نص القرن العشرين، بتتكلم عن مخاطر مزعومة في المنطقة عن حوادث اختفاء طائرات وسفن في المثلث دة من المحيط الأطلسي، بس إحصاءات خفر السواحل للولايات المتحدة لا تشير إلى حدوث حالات اختفاء كبيرة لسفن وطائرات في المنطقة دي أكثر من مناطق تانية، وكمان فيه عدد كبير من الوثائقيات أكدت مؤخراً زيف المقالات دي، وبسبب كدة تراجع البعض من التقارير بحجة نشرها للأحداث بصورة خاطئة، وعدد كبير من الوكالات الرسمية اعترفوا بأن عدد وطبيعة حوادث الاختفاء في مثلث برمودا كانت مشابهة لغيرها من المناطق

في باقي المحيط.

وسمّوه مثلث برمودا عشان دي أكبر منطقة فيها عدد من الجزر، اللي بلغ عددهم حوالي ٣٠٠، ودول جزر برمودا.

طيب الموضوع بدأ ازاي؟

سنة ١٩٥٠ بدأت المجلات والصحف تتكلم عن لغز في المحيط الأطلسي، وهو مثلث برمودا وقالوا إن الطائرات والسفن بتختفي بكثرة في المكان ده، واللي خلائهم يكتبوا كمية المقالات الكبيرة عن المثلث ده هو سر اختفاء قاذفات الرحلة ١٩، طيب إيه الرحلة ١٩ دي؟

بُص ياسيدي سنة ١٩٤٥ كان فيه ٥ طيارات في الجو، تاهوا في السُحب والعواصف لحد ما اختفوا تماماً، محدش كان عارف سر اختفائهم ولا مكان وجودهم حتى، لكن لما نرجع لأصل الحكاية هنعرف إن الطيارين اللي كانوا راكبين الطيارات دي مبتدئين أصلاً، وكانوا في فترة تدريب، ما عدا واحد بس منهم كان هو الخبير في المناطق والطيران، بس لسوء حظهم إن القائد ده كان سكران في اليوم ده، وكان فاكِر إن الموضوع سهل خصوصاً بعد ما البوصلة بتاعته اتعطلت في الجو، لكنه اعتمد على ذكائه وعلى خبرته في التضاريس والخريطة اللي حواليه، وبالرغم من كل ده تاهوا برضو ومعرفوش يرجعوا بلادهم، بس قبل الحادثة بدقايق حصل اتصال بينه وبين الطلاب اللي طيارين وراه، والطلاب لاحظوا إنه خرج عن المسار المسموح بيه وقالوله إنت رايح فين إحنا بنبعد جداً، قالمهم متخافوش إحنا فوق خليج المكسيك، قالوله ياريس إحنا فوق جزر برمودا، صحصح كدة الله يباركلك هنموت، قالمهم متخافوش اعتمدوا علياً وأنا هتصل بالقاعدة أبلغهم الطريق عشان لو بعدنا أكثر، وبالفعل خلال ثواني وحصلت عاصفة شديدة جداً في الجو واضطر إنه يتواصل مع القاعدة عبر الموجات الصوتية

وقالهم إحنا تايمين في خليج المكسيك، قالوله هنبعتلك طيارين فوراً، وبعقوله طيارات على خليج المكسيك، لكن المأساة إنه مكنش في خليج المكسيك أصلاً، وآخر حاجة قالها للقاعدة قبل إختفائه كانت "نحن ندخل مياه بيضاء، لا شيء يبدو جيداً، نحن لا نعرف أين نحن، المياه أصبحت خضراء، لا بيضاء".

ومن بعدها اختفت الطائرات تماماً ولكن قدروا يحددوا موقعهم لما سمعوا مكالماته مع باقي الطلاب لما قالوله "إحنا فوق جُزر برمودا مش خليج المكسيك".

فيه ناس فسروا الحوادث دي على إنها زياها زي غيرها، بمعنى إنه في باقي المحيطات بيحصل نفس حوادث الإختفاء وإنها مش مرتبطة بمثلث برمودا بس، لكن اللي سَلط الضوء على مثلث برمودا هو اختفاء الطيارات والسُفن اللي كانت بتحتوي على بضائع ثمينة جداً، وكم إن شخصيات هامة، زي ابنة نائب رئيس الولايات المتحدة السابق!

تفكير الناس انقسم لفروع كثيرة جداً، فيه منهم اللي قال إن اختفاء السُفن كان بيتم بسبب تعرضهم لقراصنة البحر، حيث إن تم اختفاء حوالي ٥٠ سفينة من السُفن ثمينة وعملاقة جداً، وتم العثور على إحدى السُفن دي غرقانة ولقوا فيها إصابات للأشخاص اللي ماتوا وكم إن فيه أكل كان بيتعمل لليوم التالي، يعني الأمور كانت طبيعية لحد ما السفينة غرقت، طب يعني لو فيه قراصنة خطفوا السفينة هيعملولهم أكل الأول؟ مش شرط يكون كل حوادث اختفاء السُفن كان عن طريق القرصنة ممكن يكون استهداف بالعمد من الحروب، لأن معظم السُفن اختفت في الحرب العالمية الثانية، بس فيه بعض المصادر قالت إن السُفن دي مكانش ليها علاقة بحروب أصلاً لأنها كانت بتنقل بضائع عادية مش أسلحة، وإنها كانت تجارية مش عسكرية ولا غيره.

طيب سيبك من النقطة دي، أكثر من ٢٠ طائرة اختفت في المحيط الأطلسي،

برضو كان فيه قراصنة في الجو؟ قالك لأ، الطيارات الي اختفت دي كانت لأسباب تانية، منها الي كان بينفجر في الجو لسوء تخزين الوقود، ومنها الي كان بيختفي بسبب العواصف واضطرابات الجو وفقدان البوصلة، ومنها الي كان بيتوه بسبب عدم خبرة الطيارين، طيب اشمعنى كل الحوادث دي بتحصل في مثلث برمودا؟ هرجع وأقولك إن الحوادث دي بتحصل في أي مكان عادي جداً ولكن الضوء متسلط على مثلث برمودا بسبب الشخصيات الهامة الي اختفت في المكان ده، وكمان انتشار اللغز ده أثر في فكر مخرجين الأفلام والروائيين، والموضوع أخذ حجم أكبر من حجمه بسبب الأفلام الخيالية الي انتشرت عن مثلث برمودا.

طيب نصدق مين فيهم؟ وهل مثلث برمودا لغز حقيقي ولا أسطورة من الكتب أو أفلام هوليوود؟

بُص هو تفسيرات الناس بتدل على إنهم عايزين يثيروا الجدل، لأنهم أحياناً يقولوا تصريحات مضحكة، زي مثلاً إن الطيارات بيتم أختطافها من أطباق طائرة من الكائنات الفضائية، وفيه الي قالوا إن المثلث ده خطر إن حد يعدي من عليه أو يهوب ناحيته لأنه مسكن للمهدي المنتظر !!

لكن ده ميمنعش إن فيه أسباب مقنعة زي فقدان الوقود والبوصلة وعدم خبرة الطيارين، أو قرصنة بعض السفن والبعض الآخر تاه في العواصف الاستوائية، لكن لو سلطنا الضوء على أماكن تانية فيها حوادث اختفاء، هنلاقي إن فيه مناطق أشد صعوبة من حل لغز مثلث برمودا.

فمن رأيي الشخصي إن أسطورة مثلث برمودا هي من وحي خيال الأفلام لا أكثر، أنت رأيك إيه؟



"أطلانتس"

المدينة المفقودة، على عكس معظم القصص الخرافية التي منعرفش أصولها، بس إحنا نعرف امتي وفين انبثقت قصة مدينة أطلانتس المفقودة؛ لأنها ظهرت في اتنين من حوارات أفلاطون، وهما «طيهايوس» و«كريتياس» اللي تم كتابتهم حوالي عام ٣٣٠ قبل الميلاد.



أفلاطون أثار الجدل بصورة كبيرة لما أتكلم عن أطلانتس في كتبه بشكل جدي جداً، وعلى حسب كلامه قال إن أطلانتس تقع في مكان مجهول في المحيط الأطلسي، وكانت تعد قوة بحرية قوية غزت معظم بقاع العالم؛ وفي غمار معركة كبيرة، هزم الأثينيون الأطلسيين وأعادوهم أدراجهم، وقال أنه في اليوم التالي حصلت كارثة مهلكة تسببت في غرق المدينة بأكملها في المحيط واختفائها من على وجه الأرض.

ألهمت محاولة حل لغز أطلانتس دراسات كثيرة، والبحوث، والكتب، والقصص، والأفلام. بقيت كلمة «أطلانتس» كلمة متداولة بتتقال على جميع الحضارات المفقودة خلال عصور ما قبل التاريخ.

الباحثون اكتشفوا حاجات غريبة جداً، حاجات تدل على أن مدينة أطلانتس دي موجودة فعلاً مش مجرد أسطورة خيالية في كتب أفلاطون، وقالوا إنهم رصدوها بالفعل وفيه دلائل بتشير على وجودها في أعماق المحيط الأطلسي!!
إيه ده يعني فعلاً فيه مدينة كاملة بشوارعها بيوتها بسكانها بكل ممتلكاتها غرقت!!

الموضوع خيف لو فكرت فيه من ناحية مدينتك أو المحافظة بتاعتك، ولو اتعرضت للغرق المفاجئ وكل الشوارع والبيوت دي تبقى سكن للأسماء والقروش والحيتان، وتخفي تماماً من الأرض، ده لما شوية مطربينزلوا في اسكندرية بيسبوا هلع ورعب للناس، ما بالك بقي لو غرق كامل مش مطر!

المهم إن الدلائل اللي قالوا عليها الباحثين هي إن الخرائط اللي درسها البحار الشهير (كولومبس) قبل اكتشافه لأمريكا كانت بتحتوي على رسم لجزيرة كبيرة مش موجودة في الوقت الحالي، العلماء افتكروا أنها أطلانتس نفسها، ده غير إن الباحثين كمان لقوا سور يصل طوله إلى ١٢٠ كيلومتراً في أعماق المحيط الأطلسي، ومحدث عارف لحد الآن إن كان بقايا القارة المفقودة أو لا، ده قالك كمان إن تيار الماء المعروف باسم (تيار الخليج) النابع من القارة الأمريكية والمتجه لقارة أوروبا يتفرع لجزأين في نص المحيط الأطلسي وكأنه يلتف على الأرض! العلماء افتكروا أن التفرع ده سببه وجود قارة أطلانتس قديماً.

الغواصين بقي عملوا مغامرات عشان يدوروا عن المدينة المفقودة اللي تتمتع بجمال طبيعي وثروة كبيرة، وبالفعل لقوا مدينة كاملة في أعماق المحيط الأطلسي،

لكن هل دي أطلانتس المقصودة من أفلاطون؟ ولا دي منطقة من المناطق اللي تعرضت للغرق من حوالي ١١ ألف سنة؟

ودة لأن مكانش فيه أي إثبات يدل على إن المدينة دي أطلانتس، لكن هما بالفعل لقوا المدينة المفقودة، ولو كان أفلاطون عايش كان قاهم إذا كانت هي المقصودة ولا لا، لكن معظم العلماء اثبتوا إن سر المدينة الغارقة دي متعلق بأحداث مثلث برمودا، ودة لأن أرواح الناس اللي غرقت سيطروا على المحيط كله وعملوا كل حوادث فقدان الطيارات والسفن دي، لكن الموضوع في الأصل غامض بدرجة كبيرة لحد يومنا هذا، وسر المدينة المفقودة ما زال مفقود معها.

"قلعة هوسكا"

وهي القلعة الي بيقال إن تحتها بوابة للجحيم والعالم السفلي، موجودة في دولة التشيك، وهي شمال مدينة براج، موقعها على سطح هضبة، حيث إن من حولها لا يوجد أي شكل من أشكال الحياة، ويقول علماء الآثار أن القلعة غير مهيئة للعيش فيها أبداً، وإنها متبتش عشان كدة، كل القلاع في العالم بتكون وسائل دفاعها مصدرة للخارج، عشان تحمي الي عايشين في القلعة من أي غزو، إنما قلعة هوسكا وسائل دفاعها مصدرة للداخل، كأن الي بناها عارف إن الخطر بداخلها مش بنارجها.



بدأت الأساطير على بناء القلعة على إن تم بنائها في عهد الملك "أوتوكار الثاني" في الفترة ما بين عام ١٢٥٣ لعام ١٢٧٨، وتقول الأسطورة إن الملك أوتوكار شاف قدامه حفرة لا نهاية لها، ودة الي خلاه عايز يستكشف إيه الي موجود في الحفرة، ف جاب مجموعة من المساجين الي محكوم عليهم بالأعدام وقال إن الي هينزل ويشوف إيه الي في الحفرة دي وهيطلع حي هيعفي عنه، وبالفعل كان قد كلمته، لأن بعدها جنوده بدأوا بالتجربة، وربطوا أول مسجون بحبل طويل جداً، ونزلوه الحفرة، وبعدها سمعوا صوت صراخ مش طبيعي للمسجون ودة خلاهم يسحبوه بسرعة، ولما سحبوه وطلع اكتشفوا حاجة غريبة جداً، هو إن المسجون لما طلع من الحفرة كان شعره كله أبيض كأنه كبر في العمر ٣٠ سنة مثلاً أو أكثر، ومكنش بيتكلم خالص بل كان يبصرخ، وفضل على الحال دة يومين لغاية ما مات في ظروف غامضة.

لكن الملك مستسلمش، ونزل ثاني مسجون للحفرة وحصل معاه نفس الشيء، ودة الي خلى الملك يعرف إن الحفرة دي هي عبارة عن بوابة للعالم السفلي، في وقتها قرر إنه يبني قلعة هوسكا فوق الحفرة، وفي قبو القلعة بالطبط قام ببناء كنيسة على الحفرة للحماية من شر الي ممكن يصدر من المكان دة.

والغموض مش يقف في القلعة، بحيث إن قبل كدة الشاعر التشيكي "كاريل ماتشا" قرر في يوم إنه هيعيش يوم واحد في قلعة هوسكا ودة كان في عام ١٨٦٣، ودة كان تحدي منه بعد الي سمعه من قصص وحكايات بتتحكي عن القصة، وبالفعل دخل القلعة بالليل، ويادوبك حط رجله جوة القلعة سمع صوت لكلا ب بتنبح بطريقة هيسيرية في ساحة القلعة، خاف وقرر يطلع يشوف فيه إيه، لقي إن الكلاب دي بتنبح كأنها مرعوبة من شيء ما وراه، ولما بص وراه، شاف قدامه كيانات مرعبة بجناحات سودة وملامح شبه ممسوحة بتطوف حواليه، وطبعاً الكاتب مقدرش يستحمل وهرب من القلعة، ولما فاق من صدمته كتب عن الي

شافه، ومش بس دة اللي حصل، لأن في ٢٠٠٩، فريق من العلماء قرروا يكتشفوا القلعة ويعرفوا سرها، ولما راحوا أكدوا على كلام الشاعر بالظبط.

"كاف الجنون"

ودة باللهجة الليبية معناه "جبل الجن"، عبارة عن جبل ضخمة جداً جداً لونه بني غامق مقارب للون الأسود، كل اللي بيروح هناك بيكتب الأحداث بطريقته الخاصة، يقع الجبل في منطقة أكاكوس في الجنوب الغربي لليبيا قرب الحدود مع الجزائر، والجبل فيه فتحة تخرق أشعة الشمس وقت الغروب مش بيلاحظها إلا الخبراء، الأهالي يقولوا إنهم يسمعون أصوات مش مفهومة من الجبل دة، والأصوات دي بتستمر خلال اليوم كله، والمفسرين قالوا إن الأصوات دي عبارة عن إرشادات من ملك الجن المقيم أعلى الجبل لباقي سكان الجبل من الجن، وفيه شاب قال إنه راح للجبل دة بالفعل وقابل شخص واتكلم معاه لكنه اختفى فجأة بطريقة غير مباشرة!!

الباحث التاريخي قال إن أشهر حاجة حصلت للجبل دة هو لما شاب راح هناك عشان يستمتع بالهدوء والروقان ولكن فجأة سمع صوت مباراة كرة قدم بتلعب جوة الجبل، وكان فيه أصوات جماهير عالية جداً وأصوات لاعبين وكورة وصفارة حكم، ومن شدة الرعب اللي أصابه رجع لبيته جري وحكى الموقف لأسرته والقصة انتشرت بسرعة رهيبه.

وفيه قصة تانية بتقول إن كان فيه أسرة ماشيين بعربية ناحية الجبل، وعربيتهم تعطلت لساعات طويلة، واثناء انشغال الأب في تصليح العربية، انحرف الطفل ناحية الجبل ورجع لأبوه بقطعة خبز، ولما الأب سأله عن قطعة الخبز دي قاله فيه راجل نزل من عربيته واداني الخبز دة، لكن لما الأب بص في الاتجاه اللي شاوور عليه

الطفل ملقأش حد !!

وتقاسموا الخبز مع بعض وأكلوه، لكن لما رجعوا بيتهم أصابهم مرض خطير جداً في بطنهم استمر لـ ٦ أيام متواصل.

ورغم شهادة ناس كثير عن وجود جن داخل الجبل دة، إلا إن الباحثين قالوا إن الجبل دة خالي تماماً من أي خرافات..

طب والصوت اللي كل المنطقة سمعته دة ياعم الحاج؟

قالك الصوت دة نابع من داخل الجبل، ودة صوت الهواء أثناء دخوله وخروجه من فتحات الجبل، والدليل على كدة هو إن الصوت مبيسكتش، لأن الهواء مش بينقطع عن الجبال، أما حكايات الناس المربعة عن الجبل دة، فهو من تأليفهم ولأثارة الجدل مش أكثر !.

"جزيرة الدُمي"

وهي جزيرة مكسيكية، مكانها في وسط بحيرة بجنوب نيوميكسيكو، لكنها كانت في الأول جزيرة في غاية الجمال، مليانة بالمسطحات المائية والأشجار الخضراء، لكن اللي حصل إن الجزيرة دي اتحوّلت لأرعب جزيرة في العالم.

يا ترى هتشوف إيه لو دخلت الجزيرة؟!

كل اللي هتشوفه مجرد دُمي، ولكن مش زي أي دُمي لأن المناظر اللي هتشوفها مربعة فعلاً، هتشوف دُمي مشوهة مشنوقة على الأشجار، ودُمي محروقة ومنظرها عامل زي منظر الدُمي في الأفلام، ودُمي منفصلة أطرافها ومعلقة على أغصان الأشجار، ودُمي معلقة من رجليها على الأغصان في منظر مريب.

مفیش حد عارف إيه الي حوّل الجزيرة للمنظر دة، ولكن فيه أربع أساطير وروايات بيحكوا عن الي حصل في الجزيرة، وهنا خليني احكيلك عليهم.

الأسطورة الأولى بتقول إن فيه راجل جمع كل الدُمى وعلقها بالمنظر دة لطرده الأرواح الشريرة منها، ودة بعد ما شاف بعينه طفلة صغيرة ماتت غرقانة في إحدى القنوات المائية في الجزيرة.

الأسطورة الثانية بتقول إن الراجل جمع كل الدُمى في الجزيرة لتكريم روح الطفلة الي ماتت قدامه غرقانة، ومقدرش يساعدها، وإنه عمل كدة بعد ما شاف دميتها تطفو على سطح المياه في نفس المكان الي غرقت فيه، وعشان كدة خد الدُمى وعلقها لتكريم روح الطفلة.

الأسطورة الثالثة بتقول إن الطفلة الصغيرة دي بنت الراجل الي قام بجمع الدُمى، وإنه جمع كل الدُمى وعلقهم بالشكل الغامض دة لأسعاد روح بنته الي بتسكن الجزيرة، كما أنه يقال إن الراجل دة من كتر حزنه على بنته، مات غرقان في نفس المكان الي غرقت فيه الطفلة.

الأسطورة الرابعة وهي الأسطورة الأقرب للحقيقة، والتي بتبدأ سنة ١٩٥٠، والتي بتتكلّم عن راجل اسمه "جوليان سانتانا باريرا" والتي ساب زوجته وأطفاله، وساب المدينة الي عايش فيها، وراح عاش على الجزيرة المسماة حالياً (بجزيرة الدُمى).

وفي يوم وهو في الجزيرة شاف طيف لبنت صغيرة تحت المية، وكانت لابسة فستان أبيض طويل مُزين بشرايط مزركشة طويلة.

في البداية جوليان أعتقد إن الطفلة ميتة، ولكن لما قُرب أكثر وشاف وش البنّت الي بدأ يطفو على سطح الماء، ساعتها اكتشف إنها حية، ودة الي خلاه ميترددش

لحظة، ونزل المية وأنقذها، لكنه اتفاجئ في النهاية لأن الي أنقذها من الغرق كانت مجرد دمية شكلها غريب.

احتار جوليان من الي حصل، ودة الي خلاه يسأل سكان الجزيرة، الي قالوله إن الدمية دي خاصة بطفلة غرقت وماتت في الجزيرة بطريقة غامضة.

ولكن الغريب هو الي حصل في اليوم الثاني، لما شاف جوليان دمية جديدة في نفس المكان الي شاف فيه الدمية الي قبلها، وخدها وعلقها على شجرة، اعتقاداً منه إنه كدة بيكرم روحها، وبعدها اتصرف وعمل حاجات غريبة وهو إنه كرس حياته في جمع الدمي من القمامة، وتعليقها في الجزيرة.

بس هو ليه عمل كدة؟

يقال إن السبب في الي عمله إنه حاول بأي شكل إرضاء شبح الطفلة الصغيرة، وخصوصاً لأنه كان دايماً بيسمع صوت صراخها في ودنه وصوت خطوات رجليها بتقرب منه، فحاول إنه يرضيها بشتى الطرق خوفاً منها، أما عن موت جوليان فكان مريب بردو، بحيث إنه اتوفى في سنة ٢٠٠١ غرقاً، وفي نفس المكان الي شاف فيه طيف الطفلة الصغيرة.

"المنطقة ٥١"

أكثر منطقة تعددت فيها الأقاويل، فيه الي قال إنها منطقة محجوزة من عناصر الكائنات الفضائية، وفيه الي قال إنها منطقة خاصة بتحضير أرواح الموتى واسترجاعهم للحياة عشان يعرفوا منهم أسرار الموت، وفيه الي قالوا إنها منطقة غامضة من مناطق الدارك ويب، وكل الكائنات الي فيها هي كائنات أسطورية خارقة لا تشبه البشر نهائي!

بس لما نرجع لأصول المنطقة دي هنعرف إنها منطقة معروفة بأسم "مطار نيفادا" ودي عبارة عن منطقة عسكرية في الولايات المتحدة، إيه اللي بيتم فيها بقى؟ الحكومة الأمريكية أفصحت عن سر المنطقة دي بعد كمية التساؤلات اللي حصلت عليها، وأوباما نفسه طلع في تصريح وقال إنها قاعدة عسكرية خاصة بتدريب العساكر الأمريكية والطائرات والدبابات، وإنها منطقة تجارب للقوات الجوية، ومنوع منعاً باتاً إن حد يقرب من المنطقة دي مهما كان، وكانت منطقة سرية جداً ومحاطة بأسوار عالية مكهربة وفيها لافتات كبيرة بعدم الإقتراب منها، الموضوع كان سري جداً جداً لدرجة السرية الشديدة اللي تحيط بالقاعدة ووجودها على النحو اللي تعترف بيه حكومة الولايات المتحدة على نحو هزيل، ودة خلق مواضيع ثانية لقصص نظريات المؤامرة تتداول وتستمر كعنصر محوري لشيء طائر مجهول!



المشكلة إن الناس صوّرت الأطباق الي بتطير فوق القاعدة دي، والي كانت حقيقية جداً وتشبه الصحن الفضائي الطائر، لكن الحكومة انكرت وقالت إن دة شكل الطائرات الجديد الي هيكون نابع من القاعدة العسكرية!!
طيب والفضائيين الي شافوهم جوة القاعدة دول إيه؟

قالك الكلام دة إشاعات ومفيش حاجة اسمها كدة، وكل اللي جوة هما قادة جيش وعساكر وطيارين، لكن اللي أثبت وجود الفضائيين جوة هو راجل كان مسافر عبر الزمن، ولما دخل من بوابة نجمية طلع في وسط القاعدة من جوة، لدرجة إن كل العساكر استغربوا ازاي شخص عادي دخل جوة القاعدة رغم كل الحماية المكثفة الموجودة على البوابات، وبعد فترة الشخص دة اختفى فجأة من القاعدة زي ما ظهر فجأة، ولكنه قدر يصوّر الفضائيين اللي جوة القاعدة بس مقدرش يرجع بالكاميرا لأنها اتسحبت منه، وبالرغم إن ممنوع التصوير تماماً داخل أو خارج القاعدة، إلا إن القمر الصناعي جايب كل تفاصيل القاعدة وأي حد يقدر يشوفها من أي برنامج خرائط.

الشعب مسكتش لحد كدة، وطلع شاب أمريكي عنده ٢٠ سنة عمل ثورة على الفيسبوك وجمع الناس وقاهم إحنا أسرع من الرصاص، ولازم نتجمع كلنا ونعمل هجوم على المنطقة ٥١ عشان نكشف السر اللي بيحصل جواها، وقدر أنه يجمع أكثر من مليون شخص موافقينه الرأي، ولكن قبل انطلاقهم بيوم، الحكومة زودت كاميرات المراقبة وعناصر الأمن برا القاعدة، ونزلوا بيان وقالوا إن الثورة دي لو اتعملت على القاعدة هيتم استخدام الأسلحة الجديدة عليهم، والأسلحة الجديدة دي عبارة عن أسلحة فتاكة أقوى بألف مرة من أسلحة الرصاص، وقادرة إنها تدمر مجموعة مكونة من مليون شخص عن طريق ضغطة زر بس، وفوراً تم تراجع الشباب دول والثورة فشلت، وكل يوم المنطقة بتتردد غموض وسرية ولحد الآن الأقاويل منتشرة بشكل غريب وقصص غريبة بتتحكي محدش عارف إذا كانت حقيقية ولا من تأليف الناس، كل اللي أقدر أقوله إن الولايات المتحدة سهل جداً إنها تتواصل مع الفضائيين، دة إذا مكانوش اتواصلوا أصلاً، فموضوع إنها منطقة سرية وغامضة دة موضوع مشتت تفكير كل العالم، وأنا عن نفسي فضولي هيقولني واعرف إيه اللي بيدور جوة.

"أنتاركتيكا"

أقصى مكان في العالم، وهي القارة القطبية الجنوبية، مساحتها حوالي ١٤ مليون كيلو متر مربع، وهي تعتبر مكان خالي من السكان وخالي من الحياة تماماً، بسبب الطقس البارد والمتجمد فيها، فهي أكثر بقعة برودة على وجه الأرض وبسبب دة لم يتم اكتشاف سوى نسبة صغيرة جداً من أراضيها، لكن دة مينفיש إنها أكثر بقعة غموضاً على وجه الأرض.

يبدأ الغموض منذ مئات السنين، مع قصة تسمى بقصة الحب المحرمة، لما رحالة أمريكي وصل أسطنبول، وقتها وقع في حب أميرة من أميرات أسطنبول، والأميرة كمان بادتله نفس الحب، ولكن عائلة الأميرة رفضوا رفض قاطع إن العلاقة تكمل.

قرر الرحالة أنه يمشي من أسطنبول، ولكن حبيته رفضت إنه يرحل إلا لما تهداه بهدية يفتكرها طول العمر بيها، وعشان كدة أخذته لغرفة الكنوز وقالتله يختار أي حاجة تعجبه، طبعاً لو أي حد مكانه كان هيختار تاج من الذهب، أو قطعة كبيرة من الماس أو الأحجار الكريمة، لكن الرحالة الأمريكي اختار خريطة قديمة غامضة جوة صندوق مقفول، وبعدها ودع حبيته ورحل من أسطنبول، ومن هنا يبدأ الغموض.

لأن في عام ١٩٥٢ تم العثور على الخريطة مع أحد البحارة، وتم إرسال الخريطة لعدد كبير من المؤرخين للكشف عن تاريخها، واكتشفوا شيء مش متوقع أبداً.

تعود الخريطة إلى سنة ١٥١٣ وهي كانت خاصة للأميرال التركي (بيري رايس) وهي تابعة لمجموعة من الخرائط اليي عهدا يرجع لـ ٢٠٠٠ سنة، وتظهر

فيها الأمريكتين، وأفريقيا، وأنتاركتيكا !!.

ومش دة الغريب في الأمر، ولكن الغريب هو إن الخريطة مبيّنة أنتاركتيكا بكل جبالها وخلجانها بطريقة دقيقة جداً، مع العلم إن متمش تحديد التفاصيل دي من قبل علماء الخرائط إلا في العصور الحديثة في زمننا، والمثير أكثر في الموضوع أن الخريطة باينة كإنها مرسومة أو صورة تم إلقاطها عن طريق الفضاء، أو بمعنى أوضح عن طريق (قمر صناعي)، غريب مش كدة؟ طبعاً لازم نسأل ازاى وصل القدماء إلى التفاصيل الدقيقة دي لأنتاركتيكا، ودلوقتي هنكتشف أسرار وأساطير القارة الغامضة دي.

الأسطورة الأولى بتتكلم عن وجود وحش أسطوري مربع في تلك القارة، زي وحش الكراكن، ودة اتأكد بعد ما إلتقط برنامج خرائط جوجل صورة لوحش كبير جداً في القارة، خصوصاً إن تفاصيل جسمه تشبه وحش الكراكن إلى حد كبير، بل وفيه اللي أعتقد إن الصورة هي لمخلوق فضائي.

الأسطورة الثانية بتقول إن فيه كائنات غريبة منعرفهاش تعيش في القارة، ودة بعد اكتشاف العلماء في كهوف القارة حمض نووي غريب عن كل الأحماض النووية اللي عرفتها البشرية، ودة إن دل على شيء، فهو المفروض يدل على إن أرضنا فيه اللي بيشاركننا بيها.

الأسطورة الثالثة وهي أسطورة المدينة القديمة، بحيث إن الأسطورة بتقول إن الإنسان القديم عاش في القارة، ودة تم إثباته من خلال صور تم إلقاطها من وكالة ناسا، وتظهر الصور آثار مدينة كاملة تقع على عمق كيلو متر من الجليد، دة غير إن فيه صور لثلاثة أهرامات على سطح القارة نفسها، وأي حد يقدر يشوف هرم من الأهرامات دي بمجرد ما يقرب من ساحل القارة.

الأسطورة الرابعة بتتكلم عن وجود قواعد عسكرية نازية تحت الأرض، ودة لأن العلماء قدروا يصوروا مدخلين كبيرين قريبين من ساحل القارة، فيه اللي أعتقد إنهم من فعل الطبيعة، لكن الباقي أعتقد إنهم مدخل لقواعد عسكرية نازية أنشأتها الحكومة النازية في فترة الحرب العالمية الثانية، واللي يدل على الكلام دة أثناء الحرب العالمية الثانية فيه ٢٤ غواصة نازية اتجهوا ناحية أنتاركتيكا ومرجعوش، ويقال أيضاً إن هتلر مانتحش، لكنه عايش في قارة أنتاركتيكا، وقالوا كمان إن أنتاركتيكا هي قارة أطلانتس المفقودة.

ودلوقتي جه الكلام على أهم حاجة في موضوعنا وهو جوف الأرض وسكان جوف الأرض، وحضارة أغارثا..

وفي البداية خليني احكيلك عن اللي حصل في سنة ١٩٤٧ لما ظهر راجل غريب في فرنسا، وذكائه خارق للعادة، دة غير إنه بيتكلم ٤٠ لغة، كان عنده حصيلة معلومات مش طبيعية مكش فيه مخلوق على وجه الأرض يعرفها في وقتها، لدرجة إن ساعتها فيه قناة تليفزيونية عملت معاه لقاء عشان يعرفوا معلوماته دي صح ولا غلط، ولما استجوبوه اكتشفوا إن معلوماته كلها صح، ولما سألوه أنت مين؟ جاوبهم باستعجاب وقال:

{كيف لا تعرفوننا؟ هناك في كل مكان في هذا العالم بوابات نجمية تجعلكم على إطلاع وتواصل مع عالمنا، أنا من سكان جوف الأرض، إذا أردت الدقة! فأنا من "أغارثا"، هذه المنطقة التي تطل على القارة القطبية الجنوبية، وأنا هنا لأجل رجل دين يقيم في "فرنسا"، له معي رسالة من ملك أغارثا العظيم}.

وبعد اللقاء الراجل اختفى ومظهرش تاني أبداً.

كان لازم تعرف القصة دي، لأن اللي جاي ليه علاقة بالقصة بشكل أو بآخر، بحيث إن العالم اتقلب بعد الحرب العالمية الثانية، وخاصةً بعد رحلة استكشاف

أنتاركتيكا الي قام بيها عميد البحرية الأمريكية والطيار (ريتشارد إيفيلين بيرد)، والرحلة دي كانت بعد الحرب العالمية الثانية تماماً وكانت الرحلة الثانية ليه للقارة القطبية الجنوبية وسميت بعملية (High Jump)، والمفروض إن الرحلة الأستكشافية دي تستمر لمدة ٥ أشهر، ولكن لظروف غامضة تم إلغائها، ورجع ريتشارد وطاقمه لأمريكا بعد شهرين بس، ودة الي أكد للناس إنه أكيد شاف حاجة خطر في أنتاركتيكا، مكنش بيتكلم وقتها ولا كان بيصرح بأي حاجة من الي شافها إلا للسلطات، ولكن قبل موته بفترة صرح وقال جملة واحدة بس، قال إن الي شوفته في أنتاركتيكا أكدي إن لو أي دولة قررت تدخل في حرب ثاني حتى لو أمريكا، هتواجه قدامها جيش لا يُهزم، بأسلحة لا تُقهر.

وبعد الي حصل وبالتحديد في سنة ١٩٥٩ بعد وفاة ريتشارد بسنتين، قامت ٥٣ دولة من الدول العظمى بعمل معاهدة مثيرة للجدل اتسمت بمعاهدة (القارة القطبية الجنوبية) تدل على إن ريتشارد كان في أخطر مكان على الأرض، ومن بنود المعاهدة كانت كالتالي :

- ١- عدم المطالبة بامتلاك جزء من القارة لأي دولة.
 - ٢- عدم استخراج المعادن من القارة قبل خمسون عام.
 - ٣- حظر أي رحلة سواء كانت مدنية أو تجارية للذهاب إلى القارة القطبية.
 - ٤- ممنوع وجود أي جيش لأي دولة بداخل أنتاركتيكا.
 - ٥- ممنوع استخدام أي نوع من الأسلحة النارية أو القنابل في أنتاركتيكا.
- لكن بعد موت ريتشارد سره متدفنش معاه، بحيث إنه كتب كل حاجة شافها في الرحلتين لأنتاركتيكا في مذكراته، وبنته حكّت عن كل حاجة كتبها في مذكراته، وقال في المذكرات إنه في بداية الرحلة الأولى مكنش شايف أي حاجة

غير ثلج، ولكن بعدين شاف سور جليدي عملاق، لدرجة إنه عشان يقدر يحلق بطيارة الأستكشاف لمسافة أعلى من السور اضطر إنه يتخلص من معدات كثير في الطيارة، وبالفعل عمل كدة، والطيارة قدرت تطير لفوق السور، لكن اللي شافه مكنش طبيعي، قال إنه شاف أرض خضراء واسعة، وأشجار ومياه، ودرجة الحرارة كانت معتدلة على عكس باقي القارة، ودة اللي خلاه يتجنن حرفياً، لأن دة شيء مستحيل حد يتوقعه، لذلك قرر الرجوع وإبلاغ القيادات، ولما رجع بلدّه وقال الكلام دة للقيادات حققوا معاه، ولما اتأكدوا من كلامه قالوله ميقولش الكلام دة لأي حد خالص، وبالفعل دة اللي حصل.

أما عن الرحلة الأستكشافية الثانية، فكانت مهمته إنه يروح المكان اللي خلف السور دة ويشوف إذا كان فيه بشر عايشين هناك ولا لا، يقول إنه أول ما دخل المكان الإرسال اتقطع، وأول حاجة غريبة شافها هي (الماموث)..



ودة كائن حي المفروض إنه انقرض، دة غير إنه شاف حفرة كبيرة جداً في الأرض عاملة زي ما تكون بوابة، فقرر يدخل البوابة دي، ولما دخل منها شاف إن

فيه حياة كاملة تحت الأرض، نباتات، وحضارة كاملة، ومركبات فضائية.

لكن مرة واحدة الإرسال رجع، وسمع صوت جايله بيقوله، متخافش إحنا مش هناذك، وبعدين شاف قدامه مخلوقات شكلها غريب جداً، شبه البشر لكنهم مش بشر، عينيهم واسعة جداً وكلها أسود، راسهم كبيرة بشكل مش طبيعي، وفيه منهم اللي لونه رمادي وفيه منهم اللي لونه أصفر، خاف ريتشارد وسلم نفسه ليهم، لكنهم كانوا مسلمين، وأخذوه ودخلوه من بوابة كبيرة، وهي بوابة مدينة (أغارثا) عشان يقابل ملك أغارثا بنفسه.

يقول إنها أعظم مدينة شافها في حياته، عندهم تقنيات مهما حاولوا البشر إنهم يوصلوها مش هيقدروا، ده غير سكان المدينة، فيه منهم اللي شبه البشر جداً، وفيه منهم المخلوقات الغريبة اللي شافها قبل ما يدخل أغارثا.

بدأ ملك أغارثا الكلام معاه وقاله، "أنتَ حالياً في جوف الأرض، وأنا عايزك توصل رسالة للقيادات بتوعك، وتقولهم إنهم مش لوحدهم، وإن مفيش حد يرمي قنابل أو يعمل اختبارات في أنتاركتيكا لأن ده بيأذي سكان جوف الأرض، والحروب اللي بتدور على الأرض بتأذي سكان جوف الأرض". وبعدين قاله يحذر القيادات ويوصلهم الرسائل دي، وسابه يمشي من أنتاركتيكا وقاله ميهوبش ناحية أنتاركتيكا تاني.

أمر مرعب فعلاً؟!

تفتكر عشان كدة الدول العظمى عملت المعاهدة؟! ممكن تكون عملتها خوفاً من سكان أغارثا، مفيش حد عارف لسة !.

لكن المعروف إن أنتاركتيكا هي أخطر منطقة على وجه الأرض، مش بس بسبب حكاية أغارثا، بل بسبب إن العلماء اكتشفوا فيها فيروسات خاملة بداخل

الكتل الجليدية قادرة تمحي على البشرية بحالها، فيروسات غير معلوم مصدرها، ولا يمتلك الإنسان مناعة منها.

هتفضل أسرار المناطق دي مجهولة لوقت كبير جداً، وعشان فضول الإنسان ممكن يقتله، اضطر مخرجين الأفلام إنهم يعملوا أفلام ومسلسلات كتيرة جداً بتحكي عن المناطق دي والأسرار الغامضة اللي جواها، لكن إحنا عايزين نعرف الأسرار على أرض الواقع مش بمجرد أفلام خيالية، هنستنى اليوم دة لحد ما نعرف السر المجهول للمناطق المرعبة دي.

"تمت"

الفصل السادس

" يقولون إن لكل إنسان نسخة أخرى حية على كون موازي في العالم، فهل تعدد الأكوان يجعل دكتور رعب متعدد النسخ؟ بالفعل! فهناك نسختان سابقتان من هذه السلسلة، إحداهما تود السفر عبر الزمن، والأخرى ابتلعها ثقب أسود غامض، والثالثة بين يديك الآن."

هذا الفصل للكاتب / محمد نبيل السعيد .

كاتب روائي مواليد ٢٠٠٤، من محافظة القليوبية، قام بمشاركة قصة بعنوان "أنت القادم" في كتاب "دكتور رعب ٢" في معرض القاهرة الدولي للكتاب ٢٠٢٢.

وقام بكتابة الفصل السادس في كتاب "دكتور رعب ٣".

الإهداء

بكل حب اهدي هذا الكتاب إلى من يهوى ويشتاق القلب لها، وإلى منبع طموحاتي، وملهمتي "ميّار صالح".

إلى أصدقاء العمر ورفاق الدرب "بلال أسامة، سيف متولي، بلال محمود، عمر السيد" وإلى جميع أصدقائي.

وإلى كل من ساعدني في التقدم نحو الطريق الصحيح وإلى نفسي المستقبلية التي سوف تسعى بحظ سعيد، وأتمنى لها التوفيق والسعي الدائم في تحقيق النجاح.

"عالم أسرار الكون"

"الكون" ..

هو أجهل شيء ممكن ييجي في بالك بمجرد ما تتخيله، بمجرد ما ييجي في بالك صورة للمجرات والنجوم والكواكب والشمس بتبدأ تقول في نفسك سبحان الخالق، شيء عظيم فعلاً، لكن بالرغم من الجمال ده إلا إن الكون هو أكثر شيء غامض، ومن هنا عايز أسألك سؤال، تعرف إيه عن الكون؟

السؤال ده اتسأل من "عالمة فلك" لمذبة على التلفزيون.

قالت إن الفضاء مكان بيان من بعيد إنه هادي وجميل ومفيش فيه ضوضاء ولا مشاكل، لكن في الحقيقة الموضوع مختلف عن كده تماماً، الفضاء بالرغم من كونه مكان جميل فعلاً إلا إنه بيعتبر واحد من أكثر الأماكن رعباً على الإطلاق، وده يمكن بسبب حجمه المهول وإلي منعرفهوش لحد دلوقتي، الفضاء حرفياً عبارة عن فراغ ملهوش نهاية وبيحصل في بعض الكواكب اللي فيه بقى حاجات كتير مرعبة، زي الزلازل والبراكين وانفجارات، وكواكب بتمطر أحجار ونيران، ونجوم ومجرات كاملة بيتم ابتلاعها عن طريق ثقوب سوداء.

طيب سمعت قبل كده عن ساء بتمطر أحجار؟!

الوضع ممكن يكون غريب لأن إلي إحنا نعرفه إن الساء بتمطر مياه، ولما الموضوع بيبقى شديد شوية بتنزل تلح، لكن عايزك تتخيل معايا بقى الأمطار على بعض الكواكب ممكن تكون عاملة ازاي؟

تعالى آخذك في جولة داخل عالم الكواكب والفضاء والأسرار الغامضة التي
مستخية جواه.

"أغرب الكواكب"

الكوكب الأول وهو كوكب (كوروت-Vb).

اكتشفوه في ٢٠٠٩، وهو كوكب يبعد عن كوكب الأرض بحوالي ٤٨٩ سنة
ضوئية.

الكوكب دة طول الوقت السماء بتاعته بتمطر حجارة، بالإضافة إلى براكين اللي
بتثور على سطحه باستمرار، والكوكب دة من الكواكب إالي منغلقة مداريًا، يعني
مش بيدور حوالين نفسه زي الأرض، ودة بيخلي درجة حرارة سطح الكوكب
منقسمة لجزئين، النص الي باصص ناحية النجم إالي بيدور حوله الكوكب درجة
حرارة سطحه بتوصل لـ ٢٠٠٠ درجة مئوية، والجزء الثاني الي باصص بعيد عن
النجم درجة حرارة سطحه بتوصل لـ ٢٠٠ درجة مئوية تحت الصفر.
نروح لثاني كوكب معانا وهو (بيجاسي B٥١).

وهو واحد من الكواكب الي تم اكتشافها مؤخرًا، بيدور حوالين نجم مشابه
للشمس بتاعتنا، إلا أن الكوكب دة زي الجحيم، حيث إن درجة حرارة سطح
الكوكب بتوصل لحوالي ١٠٠٠ درجة مئوية وبسبب درجة الحرارة العالية دي
السماء بتاعته بتكوّن سحب بخار، لكن مش سحب بخار ماء زي عندنا، لأن الي
يتبخّر من الكوكب دة هو الحديد وهو الي بيكوّن سحب وغيوم من الحديد فلما
يتكتف بينزل مطر على سطح الكوكب، لكن المطر عبارة عن حديد منصهر.

لو رجعنا شوية ناحية أرضنا ودخلنا مجموعتنا الشمسية هنلاقي إن كوكب
الزهرة السماء بتاعته بتمطر أمحاض، وده لأن الغلاف الجوي لكوكب الزهرة

يحتوي على سحب مكونة من حمض الكبريتيك.

"التوهج الشمسي"

وعلى ذكر مجموعتنا الشمسية، فالشمس يحصل فيها عواصف شمسية شديدة والمعروفة باسم (التوهج الشمسي).

والتوهج الشمسي يهدد التكنولوجيا الحديثة الي موجودة على أرضنا، بل يهدد أرضنا كلها بسبب الأشعة السينية وأشعة جاما الي تنبعث من الشمس وتوصل للأرض بسرعة الضوء.

ودة بدوره ممكن يتسبب في انقطاع الراديو والكهرباء والإنترنت، وأخطاء في نظام الملاحة والأقمار الصناعية ممكن تنفجر أو تتلف، وطبعاً ده ينتج عنه حوادث وغرق سفن وممكن تحطم طائرات.

وفوق كل ده الأقمار الصناعية لو انفجرت، جزء كبير جداً ممكن يرجع للأرض على هيئة قطع معدنية مميتة، لو وقعت على أي حاجة هتدمرها.

وعلى غرار التوهج الشمسي فيه حادثة حصلت من مدة مش بعيدة في يوليو عام ٢٠١٢ أقوى عاصفة شمسية شافوها البشر من ١٥٠ سنة، لكن العاصفة دي مضرتش الأرض بفرق بسيط وضربت مكان تاني، وزى ما كانت تقدر تضرب الأرض وقتها فهي ممكن تقدر تضرب الأرض تاني في المستقبل.

نسب التوهج الشمسي ونتكلم عن رواد الفضاء شوية..

طول عمرنا بنشوف رواد الفضاء لابسين بدلة مخصوصة، لكن هل عمرك فكرت ليه بيلبسوها؟ أو إيه الي ممكن يحصلهم لو طلّعوا منها وهما في الفضاء ؟

درجة حرارة الجسم الطبيعية هي ٣٧ درجة مئوية، والضغط في الفضاء منخفض جداً، يعني درجة غليان السوائل هي كمان بتنخفض، ومع الإنخفاض دة، فالسوائل الموجودة في جسم الإنسان بتبدأ تكون فقاعات غازية، ودة ممكن يسبب إن جسم الإنسان يتنفخ لحد ما يوصل لضعف حجمه تقريباً، لكن بالرغم من الإنتفاخ دة مش هتنفجر ولا حاجة فمتقلقش، هو بس هتفقد وعيك لمدة ١٥ ثانية، وفي المدة دي هتكون خلصت كمية الأكسجين اللي معاك وهتموت، لكن لو عملت ناصح وحاولت تكتم نفسك، فالرئة هتنفجر بسبب الضغط.

والموضوع مش هيقف لحد كدة، لأن الإشعاع الفضائي أو الإشعاع الكوني واحد من أخطر الحاجات الموجودة في الكون كله، والفضاء الخارجي نسبة الإشعاع فيه كبيرة جداً.

يعني مبدئياً كدة الإنسان لو اتعرض لنسبة إشعاع كبيرة بيرتفع معدل الإصابة للسرطان وبحروق الجلد وأمراض القلب كمان، وإلي بيحميننا على سطح الأرض بفضل الله هو المجال المغناطيسي للأرض.

"الأكوان المتعددة"

طرح العالم الفيزيائي "هيو إيفرت" في إحدى المرات فرضية تعتبر واحدة من أغرب فرضيات الفيزياء على الإطلاق، وهي فرضية الأكوان المتعددة، وإن فيه عدد كبير من الأكوان الموازية كل واحد منهم شبه الكون بتاعنا، لكن شكل الحياة عليه مختلف نسبياً، والأحداث عليه هي كمان مختلفة.

يعني واحد من الأكوان دي ممكن تكون الحرب العالمية عليه ما زالت مستمرة، وممكن كون تاني يكون الحيوانات المنقرضة بالنسبانا هي لسة على قيد الحياة فيه،

أو هناك ممكن يكون في نُسخ منا لكن بأشكال مختلفة وفي ظروف مختلفة، وبالرغم من إن الفرضية غريبة جدًا إلا إن طرح الفرضية دة ممكنش من فراغ.

هتعمل إيه لو قولتلك إن عالمانا دة هو جزء من عوالم تانية منعرفش عنها حاجة، أنا بتكلم عن نظريات وَضَعها أكبر العلماء.

بس تفتكر إن هو دة الغموض الأكبر؟


إيه رأيك لو قولتلك إن الدراسات الحديثة اكتشفت أن الحضارات القديمة كانت هي السبب في إننا نكتشف العوالم الموازية دي، ومش بس كدة، لا دي الحضارات القديمة استخدمت البوابات النجمية برضو.

طب تطلع إيه البوابات النجمية دي كمان؟

بُص .. مبدئيًا كلامنا الأول ه يكون عن الثقوب السوداء، وبإختصار كدة هي عبارة عن فجوات في الفضاء بتكون بعد انتهاء دورة حياة أي نجم، وبتكون كثافتها عالية جدًا وبتتلع أي شيء يقرب منها، دة حتى الضوء مسلمش منها.

مش مستوعب صح؟ طيب هفهمك أكثر..

"الثقوب السوداء"



الثقوب السوداء دي ٣ أنواع، النوع الأول بيطلق عليه "الثقب الأسود النجمي"، ودة أصغر نوع من الثلاثة، وكثافته عالية، والباحثين قالوا إن مجرتنا

بتحتوي على عدد كبير من الثقوب السوداء الي من النوع دة.

النوع الثاني وهو أكبر نوع فيهم، يطلق عليه "الثقب الأسود الهائل" قطره يبقى أكبر من قطر الشمس بتاعتنا.

أما النوع الثالث يطلق عليه "الثقب الأسود متوسط الكتلة"، وهو بيتكوّن بسبب تصادمات بين النجوم، والباحثين مكانوش يعرفوا إن النوع دة موجود أصلاً لحد ما اكتشفوا واحد منه في ٢٠١٤.

طيب إيه علاقة دة بالبوابات النجمية؟

فيه فرق كبير بين البوابات النجمية والثقوب السوداء، الثقوب السواء بتبقى في الفضاء الخارجي، وأقرب ثقب بيعد عننا ٣٠٠٠ سنة ضوئية، أما البوابات النجمية هي موجودة في الأرض وليها أماكن معروفة لبعض الناس، وفيه أشخاص كتير عارفين ازاي يفتحو البوابات النجمية.

فيه حالة غريبة كدة وتقريباً أغلبنا اتعرضوا للحالة دي، وهي ليها علاقة بالبوابات النجمية وهنا أقصد "الجاثوم"، فيه علماء كتير قالوا أن الإنسان عبارة عن الجسد المادي والجسد الأثيري، والجسد الأثيري دة بيتقى عبارة عن طاقة أو شكل منها، فلما بيحصلك شلل النوم أو المعروف بالجاثوم، أنت بتبقى على وشك إنك تفتح بوابة نجمية في المكان الي نايم فيه، أو ممكن تكون فتحتها بالفعل بس لمدة ثواني، ودة بيتقى من خلال الخلل الي سببه الجسد الأثيري بتاعك، والدليل على دة إن أول ما بتتعرض لظاهرة الجاثوم أي حاجة في بيتك بتختفي وترجع تظهر في مكانها أو بتظهر في مكان قريب منها، دة غير إنك بتحس إنك في عالم لو حدك مفيهوش حد غيرك.

"البوابات النجمية"

تعالى أكلملك بقى عن البوابات النجمية، وهما نوعين، أول نوع وهو دائم، يعني طول الوقت البوابة مفتوحة، والنوع دة بيبقى صعب تحديد مكانها والعلماء بيحتاجوا سنين على ما يوصلوها.

أما النوع الثاني وهو النوع المؤقت، والنوع دة بيتفتح بإرادة شخص، والي غالباً بيبقى ساحر، بيستدعي جن من العالم الآخر عشان يعمل بيه السحر، والساحر يقدر يفتح بوابات نجمية مؤقتة عن طريق نُطق بعض الطلاسم بتشمل اسماء نجوم وكواكب، وكمان بتشمل بعض اسماء من العالم الآخر، ولما بتفتح بيقدر يستدعي منها اللي هو عايزه من العالم الآخر، ولما ينفذ طلبه بيبدأ يلقي ببعض الطلاسم عشان يقفل البوابة النجمية المؤقتة، ولو عايز تعرف أكثر عن السحر والسحرة، إقرأ "عالم السحر والدجل" في نفس الكتاب هنا.

البوابات النجمية مش موجودة من دلوقتي ولا من ١٠٠ سنة مثلاً، لأ دي موجودة من قديم الزمان ومن حضارات قديمة جداً، ودة كان موجود على بعض جدران المتاحف للحضارات.

يُقال إن اللي كان يفتح البوابات النجمية دي كان عشان يجيب أبحاث علمية من المستقبل يستفاد بيها في الوقت اللي مكنش فيه أي تطور علمي، ومن ضمن الحضارات اللي كان يُقال إنهم فتحوا البوابات النجمية، هي الحضارة الفرعونية، لأنهم وصلوا لتطور علمي رهيب ومن غير ما يكون فيه وسائل حديثة، ودة يثير الشك لأن كان موجود في بعض المنحوتات الفرعونية منقوشات سابقة لعصرها جداً.

ويقال إن الحاكم وقت وجود الحضارات كان بيقدر يفتح بوابات نجمية عشان يعرف أخبار البلاد.

حقيقة البوابات النجمية موجودة فيزيائياً وموثقة علمياً، وفيه ظواهر على

الأرض زي مثلث برمودا، بيعبر تمامًا عن فكرة وجود البوابات النجمية، بس يا ترى هل فعلاً الناس اللي اختفت دي كلها على مر العصور انتقلوا العالم آخر خلال البوابات النجمية؟

تفتكر البوابات النجمية دي موجودة فين؟ الأماكن اللي هقولها لك حالياً فيه احتمالية كبيرة يكون فيها بوابات نجمية.

البوابة الأولى معانا ومكانها في "مصر"، وتحديدًا من أهرامات أبو صير، بعض علماء الآثار قالوا إن المكان دة بالتحديد بيحتوي على أقدم بوابة نجمية في العالم، وفي المكان دة اكتشفوا العلماء حاجة غريبة، وهو شيء أشبه بالمنصة مصنوع من حجر المرمر، ويقال أن المنصة دي بتفتح حواس الإنسان إلى أقصى الحدود، وتمكنه للتواصل مع قوى كونية بشأن وقداصة كبيرة، ومن هنا ننتقل لمدينة "أبيدوس" في محافظة سوهاج، وخصوصاً في معبد سيتي، اللي العلماء لقوا فيه نقوش على جدرانه بتحتوي على صور لطيارات مروحية وغواصات!

أمر غريب مش كدة، ازاي الفراعنة عرفوا بوجود طائرات وغواصات وحاجات إحنا لسة مخترعينها من قريب، وهو دة اللي حصل بالظبط مع العلماء اللي قالوا إن دة دليل إن الفراعنة كانوا بيستخدموا البوابات النجمية اللي بتسمح لهم بالتنقل من عالم لآخر أو من زمن لآخر.

نسيب أرض الفراعنة ونروح أرض الفرات في العراق، وهقولك على دلائل من الحضارة السومرية، وهنا هنتكلم على مخطوطة كان مرسوم فيها صورة غريبة كدة شوية، وهي عبارة عن إله سومري بيعدي من بوابة من عالمه لعالمنا وكوكبنا الأرض، يا ترى البوابة دي إيه؟! خصوصاً لأن شكل البوابة كان غريب جداً زي ما بنشوفها في أفلام الخيال العلمي، ممكن تقول صدفة وإنها رسمة عادية، ومفيش دليل يثبت إن البوابة دي بوابة نجمية، معاك حق، لكن فيه مخطوطة تانية أسمها

مخطوطة "نينورتا"، فيها دلائل على وجود بوابات نجمية بردو، حيث إن المخطوطة فيها رسمة لشخص، والشخص دة كان لابس في إيدته حاجة تشبه إلى حد كبير ساعة اليد اللي بئلبسها إحنّا في وقتنا دة، مش غريب الموضوع دة!!.

طيب مش ممكن يكون الشخص اللي في الصورة دة من المستقبل ورجع للماضي لزمن الحضارة السومرية؟!

كلها مجرد تكهنات لغاية ما نوصل للحقيقة، ولكن من هنا إعتقد الكثير إن فيه بوابة نجمية في العراق.

طيب نروح "سيريلانكا"، وفي أشهر المعالم الأثرية وهي (راماسو اويانا)، والمكان دة عبارة عن حديقة عملاقة، مليانة بالحدائق الملكية القديمة، وبالتأكيد الموقع مليان بالآثار والمنحوتات القديمة اللي يرجع تاريخها للعصور قبل الميلاد، ولكن في وسط الآثار دي كلها فيه حاجة غريبة، وهي أحد المحفورات في الحديقة، وفي المحفورة دي كان موجود عليها شيء شبه الخريطة النجمية، وهي عبارة عن شوية رموز غريبة غير مفهومة، ومفيش تفسير بالظبط لـأزاي دة حصل، ودّة اللي خلى المهتمين بالأمر دة قالوا إن المحفورة دي ما هي إلا رموز وشفرات سرية لفتح بوابة نجمية كانت بتظهر في المنطقة دي في الماضي.

ودلوقتي هنروح بعيد شوية وحضارة أغلبنا منعرفهاش وهي حضارة (الإنكا)، والمكان اللي كان موجود فيه الحضارة دي في أمريكا الجنوبية، ولكننا هنتكلم على حاجة في دولة (بيرو)، لأن في مكان قريب من بحيرة (تيتيكاكا) المقدسة لدى شعب الإنكا قديماً، لقوا بوابة واعتقدوا إنها بوابة لعالم آخر، واللي مشهورة بأسم (الباب إلى الآلهة) تم اكتشاف البوابة دي بالصدفة عن طريق مرشد سياحي، والبوابة عبارة عن مجسم حجري محفور في جبال (هايو ماركا) وارتفاع البوابة ٧ أمتار، وعرضه ٧ أمتار ومحفور على البوابة باب صغير على قاعدته، محفور

بطريقة مماثلة للبوابة ككل وكأنه مجسم للبوابة بحجم أصغر.

والأساطير المشهورة للبوابة اللي كانت تُقال لدى شعب الإنكا، إن البوابة دي ما هي إلا معبر للأبطال من شعبهم، والمعبرة وظيفة هو نقلهم من الأرض لعالم ثاني مع الآلهة في العالم الآخر، بل ويقال كان إن الكثير من الأبطال رجعوا للأرض ثاني عن طريق البوابة دي مع الآلهة عشان يتطمئنا على أحوال العالم وشعب الإنكا.

وفيه كلام ثاني بيتقال على البوابة دي، وهو إن في القرن السادس عشر، حاول راهب من شعب الإنكا، واللي كان بيخدم في معبد (الأشعة السبع) الهروب من الموت على إيد المستكشفين الأسبان، وعشان كدة راح للبوابة دي، وفتحها عن طريق مفتاح ذهبي شبه القرص وأسم المفتاح (مفتاح آلهة الأشعة السبع)، ولما الباب اتفتح شاف من خلاله نفق مضيئ باللون الأزرق، ولما دخل الراهب النفق البوابة اتقفلت وراه لوحدها ورجعت لشكلها الصخري من ثاني.

مش دة المريب في الموضوع، بل المريب أكثر إن الباحثين وعلماء الآثار لقيوا بالفعل مكان لفتح البوابة ومحفور على شكل قرص بالطبط، ودة هو شكل (مفتاح آلهة الأشعة السبع) اللي اتحكى عنه والناس افتكرته أسطورة أو خرافة.

ودول كانوا مجرد شوية أماكن يقال إنها أماكن لبوابات نجمية، لكن هما أماكنهم كثير وموجودين في كل مكان، زي بوليفيا والولايات المتحدة الأمريكية وتقريباً في كل بقعة في الأرض يُقال إن فيها بوابة نجمية.

طيب هو الموضوع ليه مفيهوش قصص واقعية بتثبت صحة وجود البوابات النجمية؟

تعالى احكيلك قصة مثيرة وغامضة حصلت في إحدى فنادق واشنطن..

الساعة ٨ بالليل "ليزا" وصلت واشنطن، وقعدت في فندق من أقدم الأماكن الموجودة هناك، ودخلت الغرفة رقم ٣٥٩، وبعدها اختفت لمدة ٥ أيام، والشرطة والأمن كله فضل يدور عليها ومحدث كان عارف هي راحت فين، غالبًا حكاية ليزا هتبقى من أغرب الحكايات الموجودة.

ليزا بعد ما وصلت الفندق وخلصت كل الورق المطلوب من الفندق طلبت منهم إنها عايزة تتعشى، ودخلت الغرفة رقم ٣٥٩، وكان كل شيء عادي بعد ما دخلت، فقعدت أستريح شوية وانتظرت الأكل، لكنها لاحظت إن شباك الأوضة غريب شوية، بدأت تقرب من الشباك واحدة واحدة، وبعدين بدأت تركز في الزجاج لأنها لقت إن فيه ضوء شديد جاي من ورا الزجاج، والدنيا نار كإن الوقت عدى بسرعة جدًا من الليل للنهار، ليزا بدأت تقرب من شباك الأوضة أكثر وكل ما بتقرب الضوء بيزيد، لحد ما فتحت شباك الأوضة، في الوقت ده ضوء عنيف ضرب في وشها واختفت ليزا من الأوضة، ولما عامل الطلبات وصل لحد الأوضة وجاب الأكل معاه فضل يخبط على الباب لكن محدش رد، فقرّر إنه يسبب الأكل قدام الباب.

اليوم الأول عدى وجه اليوم الثاني ولقوا إن الأكل محطوط زي ما هو، ومن هنا قرر عامل الطلبات يستدعي الأمن.

ولما الأمن جه قعدوا يخبطوا على الباب ولكن محدش فتح، اضطروا إن هما يجيبوا المفتاح الإلكتروني وفتحوا الباب، لما فتحوا الباب لقوا إن الغرفة سليمة وكل حاجة موجودة مكانها ومتعلقات ليزا وشنطتها موجودة، ولكن ليزا مش موجودة، بلغوا الشرطة، ولما الشرطة وصلت بدأت تفتش الأوضة، بس الغريب إنهم ملقوش أي حاجة غريبة في الغرفة، فالشرطة طلبت من اللي شغالين في الفندق إنهم تشوف الكاميرات وتراجعها، وأكتشفوا إن محدش دخل الأوضة بعد ليزا ولا

حد دخل الدور أصلاً بعدها.

الموضوع غريب جداً، كأن ليزا اتبخرت، عدى يومين وليزا بردو مش موجودة، لذلك بدأت الشرطة في إنها توزع منشورات بصورها على الأهالي والمستشفيات والأقسام والمطارات يمكن حد شافها.

عدى اليوم الثالث واليوم الرابع ومفیش أي حاجة حصلت جديدة، والشرطة فضلت تدور عليها وتسأل المستشفيات والأقسام، ولكن اللي حصل في اليوم الخامس كان هو اللي مُريب، واللي حصل إن الساعة ٩ بالليل موظفة الإستقبال جالها تليفون من الغرفة رقم ٣٥٩، وكانت ليزا هي اللي على الخط وبتكلمها بعنف، بتقول لها "هو فين الأكل اللي أنا طلبته"!!.

موظفة الإستقبال مبقتش فاهمة أي حاجة واحتارت، فبلغت الأمن، ولما الأمن طلع وخبط على الباب، ليزا فتحت الباب، وأول ما فتحت وقعت على الأرض وخدوها للمستشفى، ولما فاقت لقت رجال الشرطة قاعدين مستنيينها عشان يستجوبوها، قالتلهم محصلش حاجة، أنا فاكرة إني نمت لمدة ٢٠ دقيقة!!

ردوا عليها قالوها ٢٠ دقيقة إيه يا زوزو اتني مختفية بقالك ٥ أيام!! ومن هنا رد ليزا عليهم كان غريب جداً حيث إنها حكّت قصة مريبة.

قالت إنها لما دخلت الأوضة وشافت النور الساطع من الشباك، فتحت الشباك والنور الشديد دة ضرب في عينيها، وبعدين لقت نفسها في عالم تاني خالص، ولا الناس هما الناس ولا البلد هي البلد ولا أي حاجة حوالها تشبه الواقع تماماً، لدرجة إنها قابلت ناس كتير جداً متعرفهمش وشكلهم كان غريب، وبدأت تلاقي إن ليها بيت وأولاد، ولكن كل دة هي فاكرة إنها كانت بتحلّم، وبعد نص ساعة ليزا نسيت كل حاجة حصلت أصلاً.

دة كان كلام ليزا، واللي حصل مع ليزا ملهوش غير تفسير واحد بس، هو إنها انتقلت لعالم ثاني ولحياة ثانية بطريقة ما، وعاشت في العالم الثاني لمدة ٥ أيام وكانت فاكرة إن دة كله كان مجرد حلم!!

"الإسقاط النجمي"

او بمُسمى آخر "الخروج من الجسد" وهنا عايزك تسرح بخيالك شوية، لأنني هحكيلك عن حاجة غريبة، عايز تتخيل نفسك طائر في السماء، ومفיש أي حاجة من القيود الفيزيائية قادرة توقفك، قادر تخترق حيطان، قادر تسافر لبلاد في لحظات، قادر تسافر حتى لكواكب أخرى ومجرات ثانية، لكن في نفس الوقت محدش هيشوفك وكأنك شبح لشخص ميت، دي حاجة اتقال عليها كلام كتير واسمها الإسقاط النجمي أو الخروج من الجسد.

التجربة دي حقيقية جداً بالنسبة للي مروا بيها، ومش جديدة لا دي موجودة من آلاف السنين، حيث أن المصريين القدماء كان عندهم إعتقاد إن الروح أو ما يسمى بالـ(با) قادرة تطفو من الجسم المادي من خلال جسم أثري يسمى بالـ(كا).

علمياً مفيش أي دليل على وجود الإسقاط النجمي، بل العلماء اعتبروه أنه عبارة عن أوهام أو هلاوس شديدة الوضوح، ودة الي بيخليها تبان قدام الشخص الي مر بالتجربة دي كأنها طبيعية تماماً، واللي بيأكد دة هو إن في ٢٠١٨ نشرت مجلة (Cortex) دراسة بتشير لوجود علاقة بين الإسقاط النجمي واضطرابات في الجهاز الدهليزي، والجهاز الدهليزي هو المسؤول عن التوازن والأحاساس بالمكان، وحركات العين والمعلومات الحسية، ويشمل النظام الدهليزي أجزاءً من الأذن الداخلية والدماغ.

والدراسة كانت كالآتي، إنهم جابوا مجموعة من المرضى المصابين باضطراب الجهاز الدهليزي، والمجموعة دي مكونة من ٢١٠ شخص، في المقابل جابوا مجموعة ثانية من الأصحاء اللي مش بيعانوا من أي مرض في الجهاز الدهليزي، وعددهم ٢١٠ بردو، ومن نفس الجنس ونفس العمر كمان، وكانت النتائج كالآتي، إن ١٤٪ من اللي بيعانوا من اضطرابات في الجهاز الدهليزي مروا بتجربة الإسقاط النجمي، مقابل ٥٪ فقط من مجموعة الأصحاء، دة غير إن معظم المصابين باضطرابات في الجهاز الدهليزي قالوا إنهم تعرضوا لتجربة الإسقاط النجمي أكثر من مرة في تجارب استمرت لثواني وبتصل لدقائق كمان، دة غير لما قالوا إنهم تعرضوا للتجربة دي مباشرة بعد احساسهم بالدوخة، وحكوا عن التجربة وقالوا إنهم حسوا بارتفاع جسمهم لفوق، دة غير خفة الجسد عن المعتاد والطبيعي.

وهنا سألوا العلماء، ليه الأشخاص اللي مكانوش بيعانوا من اضطرابات في الجهاز الدهليزي مروا بالتجربة دي؟ ودة اللي خلاهم يعملوا استطلاع للمشاركين في البحث من المرضى والأصحاء، واكتشفوا إن المصابين بالدوار، واللي بيعانوا من الإكتئاب والقلق واختلال في الهوية، هم الأكثر عرضة لتجربة الإسقاط النجمي، ومن هنا وصلوا إن الإسقاط النجمي دة عبارة عن أوهام بتنتج عن مزيج من الاضطرابات النفسية والجهاز الدهليزي.

ومش دي بس النظرية اللي اتقالت عن الإسقاط النجمي، لأن فيه نظرية ثانية بتقول إن الإسقاط النجمي ما هو إلا أحلام واعية شديدة الواقعية لدرجة إن العقل مش يقدر يفرق بينها وبين الواقع.

ورغم كل النظريات والدراسات دي، إلا إن مفيش أي تفسير علمي مؤكد عن سبب الإسقاط النجمي، ودة غير إن فيه ناس بتمارس الإسقاط النجمي بأرادتها الكاملة والحرّة، ويعرفوا يدخلوا في مرحلة الخروج من الجسد بكل بساطة، بل

وفيه خطوات ينصحوا بيها الناس دي لأي حد نفسه يجرب الإسقاط النجمي، ودلوقتي خليني أقولك على الخطوات.

الخطوة الأولى: نام على سريرك ومتخليش أي حاجة ثقيلة فوقك زي بطانية مثلاً، ويستحسن لو متغطتش.

الخطوة الثانية: إقفل عينك واتنفس ببطء، وحاول تركّز على التنفس وخلي جسمك يسترخي على الآخر، متفكرش في أي حاجة وخلي ذهنك يبقى صافي تماماً، بعد كدة هتبتدي تحس إنك متخدر وإنك مش حاسس بجسمك، متقلقش ومتفكرش في أي حاجة، استمر في التنفس والتركيز على صوت نفسك ومتخليش ذهنك يتشتت ولا يفكر في أي حاجة.

الخطوة الثالثة: بعد الخطوة الثانية هتحس إن فيه حاجة ثقيلة عدت عليك، وبعدها بلحظات هتفقد احساسك بجسمك، لأنك هتبتدي تحس إن جسمك بيهتز وهتسمع صوت زن وطنين، متقلقش، كمل في اللي أنت بتعمله واستسلم لأي شيء بيحصلك.

الخطوة الرابعة: بعد الفترة الثالثة بشوية هتلاقي الوضع استقر وهدي، وهي دي مرحلة الخروج من الجسد، كل اللي عليك إنك تتخيل إن فيه جبل نازل من السقف فوق، وإنك بتمد إيدك عشان تمسكه، وإبدأ فكر في الجملة دي وكررها في دماغك "دلوقتي أنا هخرج من جسمي".

اعمل كدة لغاية ما تحس إنك مسكت الجبل وطاير لفوق، وفي اللحظة دي اهنك إن روحك أو جسمك الأثري انفصل عن جسمك المادي، لو فتحت عينك هتلاقي نفسك بترفع لفوق للسقف، ولو بصيت لتحت هتلاقي نفسك نايم على السرير، اتحرك بقى براحتك في العالم وأنت طاير.

لكن واجب عليا إني احذرک، لأن الكثير من ممارسي الإسقاط النجمي قالوا أنهم لما ييخرجوا من جسدھم ويبتجولوا في أوضتھم ييلاقوا شخص غريب واقف ييراقبك وأنت بتخرج من جسمك، تتوقع مين الشخص صدة؟!.

"ميكانيكيا الكم"

تعرف إيه عن ميكانيكيا الكم؟

مصطلح الكم هو مصطلح فيزيائي يستخدم لوصف أصغر كمّية من الطاقة يمكن تبادلها بين الجسيمات، يعني لو سمعت كلمة كم بعد كدة إعرف إن المقصود بيها الطاقة، ومن هنا ظهر مفهوم جديد في الفيزياء اسمه ميكانيكيا الكم، وهي بتكون حجر الأساس في موضوعنا، وميكانيكيا الكم ببساطة هي النظريات الفيزيائية اللي بتفسر الظواهر اللي بتحصل بين الجسيمات الصغيرة جداً، زي الذرات أو الإلكترونات وكمان بين الجسيمات اللي حجمها صغير جداً، وبالرغم من أن ميكانيكيا الكم شيء معقد جداً إلا أنها حلت معضلات فيزيائية كبيرة، بس دي كانت شرارة البداية.

قبل ما أكلمك عن ميكانيكيا الكم عايز احكيلك حاجة، وهي إن في سنة من السنين جه العالم "ألبرت أينشتاين" وقام بتجربة غريبة، وهي تجربة الشق المزدوج، واللي بيتتم فيها السماح للضوء بالمرور من خلال ثقبين، وبعد كدة بيتتم استقبال الضوء دة على حائط، وكان التركيز في التجربة دي على الفوتونات، والفوتون ببساطة هو الجزء الصغير اللي يتكون من الضوء، يعني الفوتونات هي وحدة بناء الضوء، والمدھش في الموضوع أن نتائج التجربة كانت غريبة جداً وقلبت كل موازين الفيزياء، التجربة أثبتت ازدواجية الموجة والجسيم، وأثبتت كمان أن الفوتون أحياناً يتصرف على أنه موجه وأحياناً بيتصرف على أنه جسيم، ولو فاكّر

إن الموضوع عادي فخليني أقولك إن دة في حد ذاته يعتبر معضلة فيزيائية كبيرة جداً، لأن طبيعة خصائص الجسيمات مختلفة تماماً عن طبيعة خصائص الموجات، لذلك فضل يعمل على الضوء شوية اختبارات من اختبارات الجسيم وفعلاً نجحت، وكانت كل حاجة مطابقة للمعايير، ويبدأ من هنا حوار الطبيعة المزدوجة للموجة والجسيم.

بعدها بكام سنة جه عالم اسمه "لويس دي بروي" وقال إن مش الضوء بس اللي يتميز بالطبيعة الموجية، لادة الإلكترونات كمان !!

كل حاجة في الكون عبارة عن ذرات، والذرات جواها مجموعة من الجسيمات في النص فيه بروتونات ونيوترونات ويبدور حولها إلكترونات، واكتشف العالم إن زي ما الإلكترونات بتتصرف كأنها جسيمات فإنها برضو بتتصرف على إنها موجات وليها نفس خاصية الضوء.

والعلماء اكتشفوا كمان بعدها إن ذرات الصوديوم بتعمل كدة، ومن هنا استنتجوا إن أي حاجة بتتكوّن من ذرات عندها طبيعة موجية مزدوجة.

اكيد سألت نفسك ليه الضوء والذرات بتتصرفوا على أنهم موجات وجسيمات، كلنا عارفين إن الإلكترونات بتدور حول النواة، بس محدش عارف هي بتلف ناحية اليمين ولا بتلف ناحية اليسار.

العالم "إرفين شرودنجر" قال إن الإلكترون طول ما هو جوة الذرة ومحدش شايفه فهو بيلف ناحية اليمين وبيلف ناحية اليسار في نفس الوقت، ولكن لما بيبقى الإلكترون مرئي لينا بالأجهزة، فهو بيقدر إما إنه يدور ناحية اليمين أو يدور ناحية اليسار، وزى ما أنت مستغرب كدة، فالمجتمع العلمي سخر من الكلام دة برضو؟!

لذلك قرر العالم "إرفين شرودنجر" إنه يعمل تجربة يثبت بيها للمجتمع العلمي من صحة كلامه، وكانت عبارة عن إنهم جابوا ذرة ووصلوها بجهاز قياس دوران معلق على علبة مقفولة جواها قطعة وغاز سام، وقال إن لو الإلكترون لف يمين القطعة هتموت بسبب إن العلبة اللي جواها الغاز السام هتتفتح، أما لو الإلكترون لف ناحية اليسار القطعة هتفضل عايشة بسبب إن العلبة اللي جواها الغاز مش هتتفتح، بعدها حط صندوق أسود على الإلكترون والعلبة والقطعة، ولاحظ إن العلبة بتتفتح وتتقفل في نفس اللحظة، والقطعة اتأثرت بالغاز بنسبة قليلة يعني ولا ماتت ولا عاشت بشكل طبيعي.

قام بالتجربة دي تاني بس من غير الصندوق الأسود لقوا إن العلبة اللي جواها الغاز متفتحتش والقطعة فضلت عايشة، وجربوا التجربة للمرة الثالثة من غير الصندوق لقوا إن العلبة انفتحت والقطعة ماتت وبكدة قدر يثبت كلامه.

أكيد بتسأل نفسك إيه علاقة الكلام دة بالأكوان الموازية ؟

هقولك..

زي ما الإلكترونات بتتواجد في حالتين طول ما إحنا مش شايفينها، فجسم الإنسان بيحتوي على عدد ما لا نهائي من الذرات، وكل ذرة متواجدة بحالة او الاتنين مع بعض، ومش الإنسان بس، بالعكس الكون كله متكوّن من ذرات، وزى ما ممكن يكون الإنسان ليه احتماليين لكل ذرة موجودة فجسمه، فالكون بيحتوي على عدد لا نهائي من الذرات اللي كل ذرة ليه احتماليين.

وفي كل الاحتمالات دي فمؤكد إن فيه مجرات كتير جداً زي مجرتنا فيها كواكب كتيرة جداً صالحة للحياة زي كوكبنا.

ودة معناه أن كل حاجة في الكون ليهها كذا احتمال، وإن فيه أكثر من كوكب

أرض موازي لكوكبنا، وإن أنت فيه نُسخ كثير منك عايشين في عوالم موازية، محققين نتائج مذهلة وناجحين في حياتهم، أو فاشلين، أو ماتوا، أو ممكن يكون في عالم ثاني هتلر كسب الحرب العالمية الثانية، أو أيشيتاين ونيوتن يكونوا لسه عايشين، أو الشعوب اللي عايشة على الكوكب دة قدروا إنهم يوصلوا للنجاح تام في علم التكنولوجيا، أو ممكن تكون أنت حصلت على جائزة نوبل، احتمالات كثيرة غير متوقعة ولكن النظرية موجودة بالفعل.

خليني أقولك حاجة عن الموضوع دة يُقال إن ليها علاقة بالأكوان الموازية، وهي إنك لما تقعد في مكان مثلاً أول مرة تروحه في حياتك وتحس إنك كنت في المكان دة قبل كدة، أو إن يحصل موقف وتحس إنك اتعرضتله قبل كدة بكل تفصييلة فيه، الموضوع دة يُقال أنه بسبب الأكوان الموازية، وإن ممكن تكون نسخة منك في عالم موازي راحت المكان دة في عالمها، أو مرت بموقف شبيه باللي أنت مررت بيه، دة فيه كمان كلام يُقال إن الأحلام عبارة عن لحظات عاشوها النُسخ اللي منك في العوالم الموازية، كل شيء وارد، لكن دلوقتي هنسيب الأكوان الموازية شوية لأننا هنتكلم عن موضوع أكثر غرابة وغموض.

"السفر عبر الزمن"

فكرة السفر عبر الزمن هي فكرة فلسفية قبل ما تكون فكرة علمية، والموضوع فضل يطارد البشر عبر العصور، والفكرة اتعملت عليها روايات وأساطير وكمّان أفلام السينما، وهي زي أي نظرية كانت بتبدأ ببعض التخيلات وبعدها بتأخذ مجال علمي، فدة كمان كان حال السفر عبر الزمن.

تصادف ظهور مبادئ علمية في نظرية النسبية لميكانيكا الكم بتناقش موضوع نسبية الزمن وتغيّره من مكان للثاني، ويعتبر هي نفس الأفكار اللي كانت بتتقال في

الكتب والروايات.

ومع تقدم التكنولوجيا وتطور النظريات، تولد عندنا فكر واسع عن نظرتنا للكون، وأصبحت فكرة السفر عبر الزمن مقبولة بين المفكرين والعلماء وشغلت حيز من النقاش بين الفيزيائيين، ومباحش الموضوع مقتصر على الروائيين وأصحاب الخيال العلمي بس.

بعد إطلاق "ألبرت أينشتاين" لعلم النسبية أضاف بُعد رابع وهو الزمن، بعد الطول والعرض والارتفاع، وقال إن الزمن لا غنى عنه في إعطاء وصف كامل للأجسام، بمعنى إن زي طول الإنسان وعرضه، عوامل مهمة في وصف الإنسان، فالزمن هو عامل أساسي في وصف عمره وأصبح الزمن عامل أساسي من عوامل المكانية الثلاثة.

طيب إيه علاقة كل الكلام دة بالسفر عبر الزمن؟!

الفكرة ببساطة زي إننا ممكن نتحرك في الأبعاد المكانية الثلاثة بحرية زي حركتنا لليمين أو اليسار وهكذا، فمن نفس المنطلق ممكن نتحرك بنفس الكيفية عبر الزمن، وننتقل من زمن للتاني ومن عصر لعصر، بس الشرط اللازم عشان دة يحصل، هو تحرك الأجسام بسرعة كبيرة جداً تصل إلى سرعة الضوء، وساعتها فيه احتمالية كبيرة جداً إنك تسافر عبر الزمن.

بما إن الفرضيات بتفضل فرضيات لحد ما يتم إثباتها بالتجارب العلمية، فكانت فرضيات السفر عبر الزمن في حالة سكون لفترة طويلة، لحد ما جابوا ساعتين من أدق ساعات العالم وهي ساعة "السيزيوم الذرية"، وجابوا ٢ منها واحدة وضعوها على كوكب الأرض والتانية كانت في صاروخ متجه إلى الفضاء بسرعة شديدة جداً، ولما تم إرجاع الصاروخ مرة تانية على الأرض، لقوا إن الساعة الي كانت على الصاروخ حصل فيها تأخير وتباطؤ في قيمة الزمن، مقارنة بالساعة الي كانت

موجودة على الأرض، وبالرغم إن التأخير كان قليل جداً إلا إنه كان دليل على صحة معادلات "ألبرت أينشتاين"، والي هو إمكانية حدوث تغير في الزمن من مكان للثاني ومن حالة لحالة مختلفة، ودة الي أقصده، إن كل ما السرعة زادت كل ما الزمن بقي أبطء للجسم المتحرك بسرعة رهيبه، فأنت تخيل معايا لو تحركت بسرعة تساوي سرعة الضوء، الزمن بالنسبالك هيقف، وبعدين ترجع تتحرك بسرعة عادية وتلاقي مثلاً إن أخوك الصغير بقي أكبر منك في السن؟!

وهو ده استنتاج قوانين النسبية، إن كل ما سرعة الجسم بتزيد، الزمن بالنسباله بيقل.

رغم إن نظرية النسبية هي أكبر مساند لفكرة التنقل عبر الزمن، إلا إنها بتتني الرجوع بالزمن أو السفر عبر الزمن إلى الماضي، النسبية لأينشتاين هي إنك ممكن تسافر للمستقبل وحدث تباطؤ في الزمن للأجسام الي بتتحرك بسرعة عالية، أما الرجوع للزمن فهي فكرة مرفوضة تماماً من وجهة نظر النسبية لأن النسبية مش معترفة بأن هناك قيمة سالبة للزمن.

وطبقاً لمعادلات "أينشتاين" كل ما سرعة الجسم زادت وقربت لسرعة الضوء، كل ما الزمن الخاص للجسم ده هيققل مقارنة بالزمن الطبيعي الي على كوكب الأرض، أما لو الجسم وصل لسرعة الضوء فالزمن هيتوقف تماماً.

وأما لو الجسم تخطى سرعة الضوء فالزمن في الحالة دي هيرجع للماضي، ودة لو حطيت أمل إنك ممكن في المستقبل ترجع للماضي بالتكنولوجيا الحديثة فأحب أقولك إن طبقاً لمعادلات أينشتاين إنه يستحيل تخطي جسم لسرعة الضوء، يعني بالبلدي كدة حوار إن الزمن يرجع لورا هي فكره مستحيلة.

وفيه نظريات بعدت خالص عن تحرك الأجسام بسرعة الضوء واتجهت إلى الثقوب السوداء، لأن العلماء اكتشفوا إن الثقب الأسود يربط بين شبكتين

الزمكان، بمعنى إن هو عبارة عن نفق أو فجوة يربط بين كونين، وأي شخص هيقدر يعدي من الثقب الأسود من غير ما يخطط في مركز الثقب فهو هيقدر يخرج من الناحية الثانية وهيوصل لفترة زمنية مختلفة، ويمكن تبقى الفترة دي في نفس الكون بتاعنا أو في كون تاني.

نظرية الثقوب السوداء هي من أهم النظريات اللي ناقشت مواضيع السفر عبر الزمن، وانتشرت النظرية دي بين الناس أكثر لأن فيها ممكن تسافر للماضي والمستقبل، على عكس نظرية النسبية وهي للمستقبل فقط، وبالرغم من إن الفرضية حلت مشاكل وتساؤلات كثيرة، إلا إنها بتعاني من أحد المشاكل، وهي إن أي جسم هيدخل الثقب الأسود مش هيقدر يخرج منه، لأنه لازم يعدي على نقطة الانسحاق، وهي نقطة مركز الثقب الأسود واللي أي جسم بينصدم بيها بينسحق تمامًا ويتلاشى، يعني لو فكر إنسان يمر من جواه فهو مش هيكمل وهو عايش أصلاً، وبالرغم من دة إلا أن فيه بعض الردود العلمية على المشكلة دي.

في سنة ١٩٦٣ قدر العالم الفيزيائي "روي كير" إنه ينشر حلول للمعادلات المتعلقة بالثقوب السوداء وإمكانية تجنب الاصطدام في مركز الثقب، وعلل دة بأن الثقوب السوداء تعتبر من الثقوب الدودية، يعني هي بتتحرك من جواها على حركة مسارات دائرية شبيهة بحركة القارات أو حركة الكواكب حول الشمس.

فكرة السفر عبر الزمن للماضي تعتبر فكرة مرفوضة في المجتمع العلمي على عكس السفر للمستقبل اللي قدروا العلماء يثبتوا إنه يمكن حدوثه بالمركات والصواريخ الفضائية اللي بتتحرك بسرعة كبيرة جدًا، أما السفر إلى الماضي فهيفضل هو العائق الأكبر.

والعلماء قالوا إن هيحصل تناقضات كثير في حالة عودة شخص للماضي، لأنه هيبداً يغير في أحداث الماضي وبالتالي المستقبل هيتغير، زي إنه يمنع الحرب

العالمية الأولى والثانية وبالتالي الحروب دي مش هتكون حصلت في المستقبل ومش هتذكر في كتب التاريخ، أو إن الشخص الي سافر للماضي دة يتسبب في موت أهله وبالتالي هو أساساً مش هيكون موجود في المستقبل.

وبالرغم من كل دة، إلا إنه لا يزال بعض العلماء عندهم حل لكل التناقضات دي، وهو مفهوم المسارات المتوازية للتاريخ، بمعنى إن لو شخص مثلاً رجع بالزمن للماضي وغير أحداث فيه، ف هيتخلق مستقبل جديد في كون موازي، وعالمنا ومستقبلنا هيفضل ثابت زي ما هو من غير أي تغييرات، وكل دة كلام فاضي لأن محدش قدر يثبت حاجة من الي بيقلوها، وطبعاً دة مرتبط بفكرة تعدد الأكوان، ودلوقتي أنا عايز أسألك سؤال، تفكر المعادلات الي وضعتها "ألبرت أينشتاين" هتفضل ثابتة لو تخطينا سرعة الضوء؟!

خليني احكي لك قصة شخص سافر عبر الزمن يمكن تقدر تقتنع أكثر..

"توماس ميرفي" .. قصة توماس ميرفي واحدة من أخطر قصص السفر عبر الزمن، سنة ٢٠١٢ كاميرات المراقبة تكشف عن سيارة ظهرت من العدم، مكش ليها وجود على الطريق، ومرة واحدة ظهرت وكانت بتمشي بسرعة وبطريقة جنونية وغريبة جداً، وكانت ماشية في أكثر المناطق المحظورة في الولايات المتحدة الأمريكية وتحديداً كانت بجانب المنطقة ٥١ السرية، عريبات الشرطة اتحركت عشان توقف العربية دي وتعرف مين الي دخل الشخص دة المنطقة دي، لكن الشخص دة كان بيجري بطريقة غريبة وكان واضح عليه أنه خايف منهم جداً، لكن بعد مطاردة استمرت أكثر من نص ساعة تم القبض عليه وعرفوا إن اسمه "توماس ميرفي".

ولما نزل من العربية كان باين على وشه علامات الذهول والتعجب، والحقيقة إنه كان واضح عليه أنه مكانش فاهم هو إيه الي حصل ولا إيه الي جابه هنا؟

وبدأت عمليات التحقيق مع توماس ميرفي، لكن الغريب أن كل الأوراق الرسمية التي كانت مع توماس من رخصة قيادة أو باسبور أو إثبات هوية مكتوب فيها تاريخ قديم جداً، مكتوب فيها سنة ١٩٦٤، والورق الخاص به كان فيه معلومات كافية أنهم يعرفوا مين دة بالطبط، ومن خلال العنوان كان واضح أنه كان ساكن في مكان يبعد أكثر من ٣٠٠ كيلو من المنطقة التي انتقبض عليه فيها، وبدأت عمليات التحقيق والكشف عن كل المعلومات التي يقولها توماس علشان الشرطة الأمريكية تحاول تفهم هو مين الشخص دة وإيه التي جأه هنا؟

توماس قال في التحقيقات أنه حصل خلاف بينه وبين زوجته، وبسبب الخلاف دة نزل من البيت وأخذ العربية وكان بيتمشى بيها شوية، وكان مقرر أنه يرجع البيت بالليل يلم كل الحاجات الخاصة به ويسيب البيت ويمشي، لكن وهو ماشي في الطريق دخل نفق، وأول ما دخل النفق دة ومشى فيه شوية بدأ يحس أن هو فاقد السيطرة على العربية تماماً وفجأة اكتشف أن كل العربيات التي حواليه اختفت وظهر أمامه ضوء أبيض قوي، حاول يسيطر على العربية لكن للأسف معرفش، ومرة واحدة لقي نفسه في الطريق الي الشرطة قبضت عليه فيه.

الشرطة شككت في كلامه وبدأوا يراجعوا أوراق توماس الرسمية وبدأوا يروحوا للعناوين الموجودة في الأوراق الرسمية، المفاجأة أنهم لقوا أن فعلا العنوان دة مضبوط، ولما وصلوا لحد العنوان اكتشفوا أن عائلة توماس مش موجودة بقالها سنين، وأن هناك بلاغ رسمي سنة ١٩٦٤ باختفاء توماس، وإن زوجته في المحضر بتقول إنه بعد لما ساب البيت ونزل وخد العربية اختفى ومرجعش تاني، وبعد مدة من الزمن الشرطة الأمريكية في الوقت دة اعتبرت أن توماس متوفي أو غائب، وبعد سنة بالضبط من الحادث واختفاء توماس تماماً، الأسرة بالكامل عزّلت وسابت البيت، كل الأوراق الرسمية التي قدمها توماس في الشرطة أثبتت أنها سليمة وصحيحة مية في المية، ومفيهاش أي عمليات تزوير تمت عليها، وبالرغم

من إن تاريخها القديم إلا أن شكلها وجودتها تدل أنها حاجة حديثة يعني مش حاجة بقالها كثير أو العمر عدى عليها ولا تأثير الزمن باين عليها، الشرطة الأمريكية تأكدت أن كل كلمة قالها توماس مير في صحيحة وسليمة جداً، وطلبوا أنهم يكملوا التحقيق مع توماس من ثاني وراحوا للمكان اللي تم احتجاز توماس مير في فيه، ولما دخلوا الغرفة اللي توماس كان محبوس فيها اكتشفوا أنه اختفى تماماً، ملوش أي أثر نهائي في الغرفة، حتى كاميرات المراقبة ملقوش فيها حاجة.

لكن الغريب إن مفيش حد خرج من الغرفة ولا دخل الغرفة، ومفيش أي حركة غريبة حصلت في المبنى، حتى في الأوضة اللي تم احتجاز توماس مير في فيها مفيهاش أي شيء غريب، الأغرب كمان أنهم لما نزلوا علشان يشوفوا العربية اللي تم التحفظ عليها، لقوا حتى العربية ملهش أي أثر وكأنها اختفت تماماً من الوجود، والحاجة الوحيدة اللي فصلت موجودة هي الأوراق الرسمية الخاصة بتهمته، كانت موجودة في ملفات الشرطة، وكان بيتم الاستعانة بيها في كل الخطوات اللي كانوا بيدوروا فيها على حقيقة توماس، ولحد اللحظة دي مفيش أي أثر لتوماس ولا حد يعرف هو راح فين أو اختفى فين، والتفسير الوحيد إن توماس تعرض لحالة من حالات السفر عبر الزمن، لكن المشكلة الأكبر أن محدش يعرف توماس بعد الاختفاء ده راح على فين أو انتقل لسنة كام !!

تفكر لو إمكانية التنقل عبر الزمن كانت بتتم بكل سهولة كنت هتعوز تسافر لسنة كام؟

ولو أنت لسة مش مقتنع بالنظرية ولا كل الكلام والقصص دي، ف تعالى شوف معايا كدة "سيرجي بونومارينكو" بيقول إيه؟

اتولد سيرجي سنة ١٩٣٢ في "كييف" عاصمة أوكرانيا، وكان طفل طبيعي مفيهوش أي حاجة غريبة، ولما كبر وتحديداً في سنة ١٩٥٨ كان ماشي في الشارع،

ببصير حاجة في السما وأول ما نزل الكاميرا من على عينه لقي نفسه في عالم آخر، وسط ناس شكلهم غريب ولبسهم غريب والعربيات الي في الشارع غريبة والبيوت كلها كأنها اتغيرت، الرجل كان لابس لبس الخمسينات القديمة عادي جداً وعمال يبص على الناس الي مستغرب منظرهم، استغربت الشرطة منظره فبدأوا يسألوه هو منين، لأن شكله غريب وباين إنه مش من البلد، طلبوا منه يشوفوا البطاقة بتاعته فطلعها، وكانت بتاريخ قديم جداً بس كان باين عليها إنها جديدة والزمن مآثرش فيها، فالظابط سأله أنت عارف إحنا سنة كام، فكان الرد ١٩٥٨، فطبيعي الظابط رد عليه بإستغراب وقاله إحنا في ٢٠٠٦ يا حلاوة، راحوا قبضوا عليه وودوه على مستشفى الأمراض العقلية على اعتبار إنه شخص غير سوي نفسياً.

ولما تم عرضه على طبيب نفسي بدأ يستجوبه ويسأله عن تفاصيل زي اسمه وجه منين وإيه الي حصله وهكذا، قال إن هو كان بيتمشى هو وصحبته الي أسمها "فالتينا" في الشارع وشاف حاجة في السما شبه الطبق الطائر، وهو حب يصور الشيء الموجود في السماء دة، وأول ما طلع الكاميرا وبدأ يصور وشال إيدته من على زرار الكاميرا ورفع عينه لقي كل حاجة حواليه اتغيرت.

طبعا كل الكلام الي قاله دة بياكد إنه راجل مش مطبوط ومش متزن نفسياً، الدكتور سأله هو إحنا في سنة كام؟ فقال سيرجي ١٩٥٨، الدكتور النفسي رد عليه وقاله لا يا حلاوة إحنا في ٢٠٠٦، الدكتور في الأول تعامل معاه على أساس أنه راجل مريض نفسياً، فطبيعي الدكتور يشك إن هو راجل مجنون، فطلب إنه هو يفضل محجوز في المستشفى، سيرجي طلب منهم يحمضوا الصور الي في الكاميرا معاه عشان يصدقوه، لأنه قال إنه كان ببصير في الشارع، والشرطة مسكت الكاميرا لقوها إن هي لسة متصنعة جديدة يعني تأثير الزمن مش باين عليها، بمعنى أصبح مش مستهلكة، الشرطة فضلت تدور كثير على حد يعرف

يحمض الصور لأن الكاميرا بتاعة سيرجي كانت قديمة والوقت اللي هما فيه كانت الكاميرات فيه أحدث بكثير، وبعد ما حمضوا الصور لقوا إن فعلاً الراحل مصوّر شوارع في البلدة اللي فيها، ومصوّر نفسه وهو قدام بيته القديم ومصوّر صحبته فالتينا، حتى اللبس اللي سيرجي لابسه في الصور هو هو اللي لابسه قدامهم.

فساعتها صدّقه وعرفوا إن هو مبيكذّيش، بس تحفظوا عليه عشان يتابعوا صحته، وفضل سيرجي محجوز في المستشفى، لكنه خرج منها بشكل غريب جداً ومحدث لاقى تفسير لغاية دلوقتي، وهو أنه في يوم راح ممرض عشان يستدعي سيرجي، ولما دخل غرفته لقاها مختفي، كإنه مكانش موجود أصلاً، ولما راجعوا الكاميرات لقوا إن مفيش حد دخله الغرفة، وهو مخرجش منها، طيب هيكون راح فين؟!

ومكانش حد عنده تفسير بالي حصل، الشرطة رجعت تدور في البلاغات اللي كانت متقدمة زمان جداً في سنة ١٩٥٨ ولقوا فعلاً إن كان فيه محضر متقدم باختفاء سيرجي، وكان الشخص دة بنفس مواصفات سيرجي وكان متقيّد أنه مات بسبب أنه مظهرش خلال كام سنة، فضلوا يبحثوا كتير عن "فالتينا" لحد ما وصلوها، وكانت عجوزة جداً لكنها كانت على قيد الحياة، وأول ما عرضوا عليها الصور اتعرفت على سيرجي فوراً وحكتلهم اللي حصل بالظبط في سنة ١٩٥٨، وهنا الدكتور النفسي اتأكد من كل كلام سيرجي واتأكد إن سيرجي سافر عبر الزمن بطريقة ما.

"رأي الدين"

الإسلام يعتبر واحد من أكثر الشرائع المرنة في احتضان العلم والنظريات الحديثة، بل هو الأكثر مرونة على الإطلاق، وعدد كبير من النظريات العلمية

والحقائق الي تم إثباتها مؤخرًا بالرغم من غرابتها، إلا أنها مش بتعارض أبدًا مع مبادئ الدين، وجدير بالذكر أن في الآية رقم ١٢ من سورة الطلاق ربنا سبحانه وتعالى يقول (اللَّهُ الَّذِي خَلَقَ سَبْعَ سَمَاوَاتٍ وَمِنَ الْأَرْضِ مِثْلَهُنَّ يَتَنَزَّلُ الْأَمْرُ بَيْنَهُنَّ لِتَعْلَمُوا أَنَّ اللَّهَ عَلَىٰ كُلِّ شَيْءٍ قَدِيرٌ وَأَنَّ اللَّهَ قَدْ أَحَاطَ بِكُلِّ شَيْءٍ عِلْمًا).

ولما عبد الله ابن عباس ابن عم النبي "صلى الله عليه وسلم" اتكلم عن تفسير الآية دي، قال كلام غريب جدًا، قال إن فيه سبع أراضي، في كل أرض منهم النبي كنبى وأدم كآدم ونوح كإبراهيم، وإبراهيم كإبراهيم وعيسى كعيسى، وبعض الناس شايفين إن دة دليل قوي على وجود الأكوان المتعددة بالإضافة لبعض الكلمات الي يتم ذكرها، فيه آيات تانية زي مثلاً (الْحَمْدُ لِلَّهِ رَبِّ الْعَالَمِينَ) ، وإن العالمين هنا تدل على وجود عدد من العوالم مش بس عالم واحد، ودة برضو مجرد رأي.

أما الرأي الآخر فبعض الناس شايفين إنه لا يوجد علاقة بين دة وبين تفسير الآية أصلاً ومعارضين تمامًا للموضوع، لكن في النهاية حتى لو افترضنا جدلاً أنه في يوم من الأيام ثبت عدم صحة فرضية الأكوان المتعددة أو حتى أي موقف مشابه، فدة لا يعيب أبدًا في الدين، وإنما الخلل هيكون في عدم فهمنا الصحيح للآيات والتفسير.

وفي العموم كل الأقاويل والتساؤلات والقصص دي مناقشة بيني وبينك في موضوع غامض ومليان أسرار زي دة، يعني سواء كنت مؤيد أو معارض للكلام فأنا سايبلك حرية الرأي طبعاً، لكن يهمني وجهة نظرك ومناقشتك في موضوع زي دة، وتفكيرك عن نظريات ضخمة وتجارب صعبة في العالم الي عايشين فيه.

"مَن"

الفصل السابع

"تعددت الأساطير المرعبة حول العالم وأصبحت قصصًا يرويها البعض لذويهم، مثل ظهور "النداهة" على المسطحات المائية، بينما "أبو رجل مسلوخة" يبحث عن الأطفال ليأكلهم، ولكن يجب أن يستقر رأي الجميع على أن دكتور رعب هو الأسطورة الحقيقية التي لن تتكرر على مر الزمان إطلاقًا".

هذا الفصل للكاتبة/ منة السيد محمد.

صاحبة لقب "أصغر روائية في معرض القاهرة الدولي للكتاب سنة ٢٠٢٠" من أعمالها السابقة رواية "القرين" ورواية "بورتال" والمشاركة في كتاب "دكتور رعب ٢" بقصة قصيرة تحت عنوان "أرض الشقين".

وقامت بكتابة الفصل السابع في كتاب "دكتور رعب ٣" لها العديد من اللقاءات التلفزيونية وقامت منصة TEDx بإستضافتها كمتحدث للمنصة.

الإهداء

لمن أحبني ودعمني وجعلني أُحب نفسي عندما رأيته بعينه، لك كل الحب والتقدير.

"عالم الأساطير"

الإحساس بالخوف هو أكثر حاجة بتدي لعقلك مساحة أنه يتخيّل ويسرح
بخياله، وكل ما التفكير يزيد، الخوف يزيد أكثر، لدرجة إنك ممكن تشوف حاجات
مش موجودة من الأساس!!

ولكن مرة مع مرة الكلام بيزيد لغاية ما تتخلق أسطورة مقتنع بوجودها شعب
كامل، هل الأسطورة دي ليها أساس؟

الأكد أن فيه أساس، لكن الكلام دة حقيقة ولا مجرد حكاوي أساطير؟ هودة
السؤال الي ملهوش إجابة، بس خليني افهم وجهة نظرك من خلال الأساطير الي
هحكيها لك دي، وبعدين عرفني إذا كنت مصدقها ولا لا.

"الطنطل" - أسطوره عراقية .. كويتية-

من أوائل الأساطير الي اتوجدت على مرّ التاريخ هو الطنطل، بيرجع الطنطل
للأسطورة السومرية، في الزمن دة كان فيه ٣ ممالك، مكانهم جنوب وادي الرافدين،
العرب أطلقوا عليهم ٣ اسامي لـ ٣ أخوات.. (العكر، أبو شذر، احفيظ).

المالك دي كانت متقدمة جداً، وعندهم معابد ومُدن ودهب، ولكن اكتسبوا
صفة بتكون دايماً هي بداية خراب كل شيء، تكبروا وعصوا ربنا ف عاقبهم بـ
زلزال وطوفان، إلا المملكة الثالثة "احفيظ" كانت متطرفة، بعيدة ومعزولة يُقال
إنها على تل أو جزيرة، والجزيرة دي بتظهر وتختفي ويحرسها "الطنطل"، واخفوها
عن عيون الناس بالسحر لأنها تمتلك كنز كبير جداً وحارسها مش ممكن يسمح
بحد يقرب منها، طب ولو حد قرب؟ لو الطنطل ألتقى بالبشر، العواقب هتكون

وخيمة، عاهات وإصابة بالجنون، تشوهات بالجسم، ولكن متقلقش في بعض الأحيان الطنطل مش مؤذي للدرجة دي، ليه؟ في أقوايل كتير بتقول إن الطنطل بيكوّن صداقات مع البشر، بالأخص رعاة البقر والغنم.

طب ازاى؟ لأن الطنطل عنده القدرة إنه يتجسد في أي شكل حتى البشر، لدرجة أن الناس كانوا فاكرينه جن، ولما بيتجسد في شكل الإنسان بيكون طويل وضخم وبيتقرب من رعاة البقر والغنم لأنه بيكون محتاج منهم خبز عراقي اسمه "خبز التمن"، ولكن لما تيجي تقدمهوله قدمهوله بدون ملح.

طب الشيء المخيف ده، إيه هي نقطة ضعفه؟

يخاف ويهرب الطنطل لما تقع عينه على أي حاجة حادة، أو خيط وإبره.

يعني لو أنت بتقرأ الكتاب دة دلوقتي وأنت من أهل العراق أو الكويت متمشيش من غير الخيط والإبرة، أي حاجة اتقطعت معاك خير وبركة، قابلت الطنطل.. خير وبركة برضو.

وننتقل من الطنطل والأساطير العراقية، لأسطورة مغربية غنية عن التعريف.

"عائشة قنديشة" - أسطورة مغربية -

تعددت الأسامي للسيدة عيشة قنديشة، الجميلة ذات رجل الماعز.

في البداية نقول أي اسم؟ "لالة عيشة" ولا "سيدة المستنقعات" ولا "عيشة الكناوية"؟

في النهاية كلهم شخصية واحدة وهي "عائشة قنديشة"، أسطورة مغربية في الأصل، ولكن عندنا منها النسخة المصرية وهي "النداهة" لسة هتتكلم عنها في

الأسطورة اللي جاية، في الحكاية الأولى عيشة قنديشة ست في غاية الجمال، تسحر الرجال بجمال عيونها وشعرها وشكلها، تغويهم ومن شدة سحرها ليهم مفيش حد فيهم بيقدر ياخذ باله من رجليها اللي زي رجل الماعز!!



بتغوي الرجال لغاية ما تقدر تسيطر عليهم لمأواها، وبعد كدة بتاكلهم بكل شراسة!!

ولكن لو قدرت تفوق من السحرة واخذت بالك من رجليها عليك ب ضبط النفس وسرعة البديهة واجري ولع أي نار جنبها، نقطة ضعف عيشة قنديشة الوحيدة هي النار، أما لو وقعت في سحرها وملحقتش تجري فهي هتاكلك! ودي مش كذبة لأ هي هتاكلك فعلاً زي ما أكلت ناس كثير.

ولأن الأسطورة شيءٌ مُتعدد الأقاليم، فلكل أسطورة كذا قصة وكذا رواية.. ودلوقتي هقولك الحكاية الثانية عن عيشة السودانية، هي هي عيشة قنديشة بس دة اسم ثاني ليها.

في الحكاية دي عيشة قنديشة سِت عجوزة وساحرة شكلها مُرعب، بتكره إنها تشوف أي اتنين متجوزين متفاهمين، فبتبدأ تعمل الأعيب وخدع لمجرد إنها بس تفرق ما بينهم، وبعد ما بتنجح في إنها تعمل كدة بتاخذ الزوج لمأواها وبرضو بتاكله.

ومن حكاية لحكاية والحكايات مبتخلصش، فيه ناس بيقولوا إن عيشة قنديشة هي شخصية حقيقية عاشت في القرن الـ١٥، وهي سِت تنحدر من الأندلس، من عائلة موريسكية نبيلة وكانت تُلقب بالأميرة عيشة، لكن في يوم اطردت هي وعائلتها من بلادهم على إيد البرتغاليون، ودة الي خلى الغل وطاقة الانتقام يبقوا جزء أساسي من شخصيتها، وبفضل ذلك تعاونت مع الجيش المغربي عشان ترد حقها من البرتغاليون، فأنتفتت معاهم إنها هتغوي رجال البرتغال وبعد كدة تقتلهم، كانت بتغويهم لـ وديان ومستنقعات وتقتلهم بطرق بشعة لدرجة إن الاحتلال والبرتغاليون ساعتها ظنوا إنها جنيّة بسبب براعتها في القتل وشجاعتها، ومن هنا اتولد الرعب في قلوب الرجال البرتغاليين بسبب امرأة تُدعى بالبرتغالي عيشة كونديشة أو بالمعنى العربي الأميرة عيشة.

قبل ما احكيلكم الحكاية الرابعة لـ عيشة قنديشة، هي ليه بتسحر الرجالة بس؟ وبتكرهم قوي كدة؟

هما لا بشر ولا جن طايقينهم للدرجة دي؟ ولا الموضوع دة ليه سر؟ بما إن عيشة قنديشة أسطورة مغربية في الأصل، فدأهل المغرب عندهم قصة هما شايفين إنها سبب لكره عائشة قنديشة للرجال، بما إن العامل المشترك ما بين كل القصص

هو قتلها للرجالة يبقى أكيد الموضوع ده وراه قصة كبيرة.

قالوا إيه بقى أخواتنا المغاربة؟

إنها بنت من عائلة غنية جداً بتحب شاب من الطبقة الفقيرة، أهلها عارضوا علاقتهم بسبب إنهم شكوا في إنه طمعان في فلوسها، كانت البنت متمسكة بيه جداً لكن الأهل قرارهم كان واضح وصارم، فقررت البنت إنها تثبت لأهلها إنه مش طمعان في فلوسها وسابت الفلوس وكل حاجة وهربت معاه، ولكن هو فعلاً كان طمعان في فلوسها ولما لقاه هربانة من غير أي فلوس قرر إنه يسيبها ويمشي، رجعت البنت المسكينة وهي قلبها مكسور قعدت في المكان اللي كانوا بيتقابلوا فيه واللي كان على صخرة قريبة من نهر، وقعدت تعيط لغاية ما ماتت!!

ومن ساعتها وهي طلعت في مكان موتها جنية بتكره الرجالة، وهي عيشة قنديشة.

قصة عائشة قنديشة مليانة أقاويل بس دي آخر حاجة في قصة عيشة قنديشة.

"بول باسكون" هو عالم اجتماع مغربي كتب في كتابه "أساطير ومعتقدات من المغرب" عن استاذ فلسفة أوروبي في جامعة من جامعات المغرب إنه كان بيحضر لـ بحث عن عيشة قنديشة، وفجأة لقي نفسه مضطر يحرق كل اللي كتبه عنها ومشي من المغرب فوراً بعد ما اتعرض لـ حوادث غامضة كتير وكلهم ورا بعض!!؟

وبسبب حوافرها اطلق عليها اسمين كمان.. "بغلة المقبرة" و "بغلة الروضة" واختلاف الاسامي جه من اختلاف القبائل في المغرب.. ودي كانت معظم الروايات اللي اتقالت عن أشهر أسطورة في تاريخ المغرب "عيشة قنديشة".

نتنقل للأسطورة الثالثة في عالم الأساطير..

"النداهة" - أسطورة مصرية-

نظراً للأماكن التي الشعب المصري يقولون إن النداهة بتظهر فيهم، ف النداهة هي أسطورة مصرية ريفية، طب بتظهر فين؟

كان يُقال إنها بتظهر في أماكن الزرع والحقول الكبيرة، بالقرب من الترع، البحار، وهكذا، من الحكايات التي اتحكت عن النداهة هي حكاية راجل بيقول أنه كان في فرح مع زوجته، وفي وقت الرجوع كانت الضلمة بتعم المكان، وفي طريق رجوعهم كان في ست بتنده بأسمه والصوت من اتجاه التربة، ولما ألفت شاف حاجة غريبة جداً، وبالرغم من الضلمة التي كانت موجودة في المكان، إلا أنه قدر يشوف ملامحها الجميلة، بس ازاى ملاحظها كانت واضحة جداً بالرغم من الضلمة وعممة الليل!! ست جميلة في العقد الثاني من عمرها، وأنت بتسمع اسمك بصوتها كأنك بتنده لأول مرة، صوتها بيرن في الودن ويسحر، ولكن في الوقت المناسب زوجته انتبهت وصرخت، وفعلاً صوت صرختها فوقته من حالة التوهان والتوجه للنداهة، بيقول إن النداهة وهي بتختفي في التربة قالت: "في يوم من الأيام هتكون ليا" وضحكت ضحكة ساخرة وقالت لـ زوجته: "انقذتيه مني المرة دي، ولكن المرة الجاية هيكون ليا".



تقدر النداهة إنها تتشكّل في أي شكل وحجم، وفي أغلب الأوقات ييموتوا ضحايا النداهة في اليوم الثاني من ندهتها ليهم، وفي حالات تانية مش بتموت أصلاً!!

في حالات بُتصاب بالجنون، أو إنهم يكونوا دايمًا شاردين ويفضّلوا إنهم يكونوا لوحدهم، ويتكون أماكنهم المفضلة هي الأراضي الزراعية، وفي حالات بتختفي.. طب بتختفي بتروح فين؟؟

بتكون النداهة عشقته، وبتأخذه معاها العالم السفلي وبتتجوزه، وفي الحالة دي يا يكمل معاها، يا جثته بتظهر بعد فترة، ودة بيكون بسبب إنه قرر إنه يسببها ويرجع الأرض تاني، ولكن هي بتكون خايفة إنه يفصح أسرار عالمهم، فبتتعاذ معاه السيناريو اللي بتعيده كل الجنّيات اللي من الفصيلة دي، القتل.

وصف النداهة ووصف الطريقة اللي بتقتل بيها والهدف اللي بتحدده بيدل على إن النداهة موجودة في كل بلد، ولكن كل بلد أطلقت عليها اسم مختلف عن البلد التانية، ولكن أشهرهم (عيشة قنديشة ، النداهة).

الأسطورة الرابعة هي أسطورة يقول البعض إنها حقيقية، ومن مدة قريية اثبتوا وجودها بفيديو صوروه شباب، ولكن للأسف بعد تصويرهم ليها بدقائق توفوا، أسطورة أردنية تحديداً في مدينة "الرمثا" وهي "عروسة الرمثا".

"عروسة الرمثا" - أسطورة أردنية-

من أول الحكايات لأسباب وجود عروسة الرمثا هي حكاية معظم كبار السن في الأردن بيعكوها ومصدقينها لأقصى درجة، وهي إن قصة عروسة الرمثا بتعود لعصر الرومان (من ١٥٠٠ سنة تقريباً)، يُقال إن كان فيه واحد اسمه "ديكانوس

ماركو" كان مشعوذ وشاطر جداً في السحر، ويحب بنت لدرجة الجنون، يراقبها ويتبعها في أي مكان كانت تروحه ولكنها رفضته بسبب السحر والشعوذة اللي كان يمارسه، كان عايز يتجوزها ولكن بعد فترة اكتشف إنها تجوزت ابن عمها!! غضب وحلّت عليها لعنة الأرواح الموجودة معاه وقتلها بالسحر، ومن ساعتها وهي بتطلع في نفس المكان اللي هي اتقتلت فيه، وهو مدينة الرمثا، عشان كدة سموها بالاسم دة.

في الحكاية الثانية يقولوا أهل الرمثا إن سنة ١٩٦٠ كان فيه بنت وشاب بيحبوا بعض وعاشين في المنطقة دي، قرروا يتجوزوا وعرفوا أهلهم ولكن المشكلة كانت إن أخو العروسة كان ليه مشاكل كبيرة وكثيرة مع حبيبها، حاول أخو العروسة إنه ييؤّ الجواز بـ أي شكل من الأشكال، عمل كل ما يعمل ولكن كل محاولاته كانت فاشلة، العريس كان مصمم إنه يتجوزها.. أخذ أخو العروسة السلاح وراح يوم الفرح عشان يقتل العريس، ولكن الرصاصة كانت من نصيب أخته، وجت فيها وماتت فوراً، ومن ساعتها وروح البنت بتظهر في المكان .

الحكاية الثالثة هي إن في يونيو سنة ٢٠٠٥ كان في عريس وعروسة عاملين فرحهم في منطقة اسمها "إربد"، ولكن هما في الأساس من الرمثا، الوقت سرقهم والساعة بقت ١٢ بالليل ألعريس والعروسة ركبوا عربياتهم وراجعين مدينتهم اللي هي الرمثا، وبطريقة غريبة وغامضة أول ما عدوا طريق الرمثا العربية اتقلبت والعروسة ماتت، ومن ساعتها مفيش أي حد قلبه جامد بيعدي من الطريق دة بعد الساعة ١٢!!

طب ولو عدوا؟؟

بتقابل ست عجوزة بشعة لابسة فستان أبيض، صوتها كفيل أنه يموتك من الرعب!!

كانت عروسة الرمثا خرافة غير مثبتة بأي شيء ولكن الي حصل في سنة ٢٠٠٩ غير كل المقاييس، أي حد كان يبشوف عروسة الرمثا معندوش الجرأة أو مش يكون في وعيه الكامل إنه يطلع التليفون ويصور، ولكن في الوقت ده كان فيه ٣ شباب راكين عربية على طريق الرمثا بعد منتصف الليل، وواحد منهم شاف حاجة بيضة بتجري بسرعة مهولة على الجبل وشكلها مُرعب، واحد منهم جاتله الجرأة إنه يطلع التليفون ويصورها، ولكن للأسف الناس شافوا الفيديو ده بعد اكتشاف جثث الـ ٣ شباب!!

العربية اتقلبت بيهم بعد تصويرهم للفيديو بدقائق وراحوا ضحية عروسة الرمثا.

الصين واليابان بلاد كلها غرائب وعجائب وتطوّر رهيب، وبما إنهم بلاد مُختلفة دايماً في كل المجالات، فهما في الأساطير برضو بلاد غريبة، وعندهم من الأساطير المرعبة كتير جداً، ولكن إيه أبرزهم؟

"السيدة ذات الفم المشقوق" - أسطورة يابانية -

اسمها "كوشيساكي أون"، إيه قصتها بقى الأسطورة دي؟

من مئات السنين كان فيه بنت جميلة جداً، جمالها ساحر وجذابة، ولكنها كانت مغرورة بشكلها ده لأبعد حد، كانت متجوزة محارب ساموراي، غيور جداً ودائماً على خناق معاها بسبب شكلها الجميل، غرورها أخذها بأنها بقت بتخون زوجها!! ساعتها حس بالإهانة والغيرة القاتلة، وبالفعل قتلها عن طريق إنه جاب السيف بتاعه ومزق فيها تماماً وهو بيصرخ في وشها وبيقولها كلام بالياباني بس أنا أكيد مفهموش يعني..

المهم من بعد وفاتها انتشر حكايات عن إنها لسة موجودة وبتظهر لمعظم الناس .

إيه ضررها على الإنسان؟

من ساعة ما المسكينة دي جوزها جابلها بوقها من الودن للودن وهي متجسدة في صورة جنيّة، أو يُقال إنها شيطانة لابسة كمامة طبية مش بتقلعها نهائي، عشان الكمامة بتداري بوقها المشقوق، ولو قلعت الكمامة ببيان الشق في بوقها ويبقى شكلها مرعب جداً، ولما حظك يبقى مقفل معاك وتقابلها في أي طريق، بتسألك بكل براءة وخفة "هل أنا جميلة؟" لو كانت إجابتك لأ، فهي بتقتلك في الحال، في أغلب القصص اللي اتحكّت قالوا إن الآلة الحادة اللي بتقتل بيها هي مقص، مقص في إيدها اليمين وكذلك في الشمال، ولو قابلتك وكانت إجابتك نعم اتني جميلة، ف يؤسفني أقولك إنها كدة مش هتمشي، لأ دي هتقلع القناع وتسألك مرة تانية "هل أنا جميلة؟" ولو كانت إجابتك لأ بتدبحك على الفور، وكان يُقال إن إجابتك لو نعم جميلة فهي بتديلك قطعة من الياقوت سايحة في دمها وبتسيبك وتمشي.

طب لو عايز اهرب منها فوراً بدون أي جدال؟

لما تسألك "هل أنا جميلة"، اسألها نفس السؤال، قولها "هو أنا جميل؟" ساعتها هي هتسيبك وتمشي.

في فصل الربيع سنة ١٩٧٩ في اليابان، انتشرت الأقاويل والإشاعات من بعض الناس إنهم شافوها وهي بتجمع الأطفال عشان تقتلهم، وفي أكتوبر سنة ٢٠٠٧ دور محقق في ملفات قضايا من أواخر السبعينات، ولقى من أسباب قتل الضحايا في الجرائم دي إن كان فيه ست مخيفة بتجري وراهم!! ولكن المحقق بعد ما كان قرب يكشف الحقيقة مات بحادثة عربية!!.

وبما إننا بناخذ جولة سريعة ومبسطة عن أساطير العالم كله، فتعالوا نروح لـ دولة مستحيل تيجي على بالك أول ما تيجي سيرة الأساطير، هناخذ جولة سريعة عن أشهر أسطورة في اسكتلندا.

"رجال المينتش الزُرق" -أسطورة اسكتلندية-

والأسطورة دي عبارة عن مخلوقات أجسادهم مغطاة باللون الأزرق، يسكنوا في مياه ما بين شمال "هبرديس" الخارجية، والبر الرئيسي لـ دولة اسكتلندا -مضيق مينتش الصغير- ، بيرجعوا لـ أساطير قديمة جداً، وأهل اسكتلندا شبهوهم بـ خنازير البحر، لأنهم بيأذوا أي شخص معدي من البحر لدرجة إنهم ممكن يقلبوا سفينة!!

بيأذوا البحارة وحتى القوارب الصغيرة، نفس فكرة القراصنة في البشر ولكن دول مش بشر!!

ومفיש أي أسطورة مشابهة ليهم من أي مكان على وجه الأرض، لما السما بتكون صافية والجو هادي بيكونوا متسطحين على سطح البحر في وضعية نوم، ولو عدت عليهم سفينة يستقبلها قائد رجال المينتش وبيطلع يلقي على قبطان السفينة بيت شعر!

ولو القبطان فشل في إنه يرد عليه أو يقوله حاجة على نفس السياق ويكملُه بيت الشعر، رجال المينتش الزُرق بيحاولوا بكل قوتهم إنهم يقلبوا السفينة!!

يعني عشان تعدي منهم لازم تكون شاعر محترف.

ولو أول مرة تعرف الأسطورة دي متنساش تقولنا رأيك وتناقشنا في الموضوع دة.



من أشهر الأساطير المصرية الي كانت بتتقال للأطفال وهما صغيرين عشان يخوفوهم من شيء مُعين هي "اوعى تروح المكان دة لأحسن أبو رجل مسلوخة يطلع لك!"

طب هما اخترعوا الكلمة من الفراغ لأنها كلمة او اسم مُرعب؟ ولا الاسم دة ليه أساس؟ استمر في قراءة الكتاب وهنعرف دلوقتي الأساس مع بعض.

"أبو رجل مسلوخة" - أسطورة مصرية-

في التخيلات المصرية الشعبية إن أبو رجل مسلوخة دة راجل رجليه مسلوخة، شكله بشع بيتبع الأطفال الي مش بيناموا بدري، مش بيشربوا اللبن، مش بيسمعوا الكلام وهكذا، لكن كل دة قصة .. وحقيقة مين هو أبو رجل مسلوخة الحقيقي فعلاً دي قصة تانية خالص.

الحكايات المصرية كانت بتقول إن كان فيه راجل وشه مسلوخ وشكله مرعب، وإحدى رجليه كانت مسلوخة، والراجل دة كان بيعجي عشان يخوف الأطفال الصغار، وعشان ياخداهم معاه لغرفة العفاريث المظلمة، الناس بقى اقتنعت بالكلام دة وقالوا إن الكائن دة بيعجي بالليل فعلاً عشان الأطفال الي مش بتسمع الكلام، وكمان بيعجي للأطفال الي بتسهر والي مش بياكلوا كويس.

وقالوا حكايات مرعبة جداً عن الأسطورة دي، يعني زمان مثلاً مكش فيه كهرباء، كانوا الأطفال يقعدوا تحت أعمدة الكهرباء في الشارع ويذاكروا، وفي مرة سمعوا صوت بنت بتبكي بشكل هستيري نابع من مصدر مجهول، فالأطفال راحوا ناحية الصوت لقوا إن فيه بنت لابسة فستان أبيض وجميلة وقاعدة تبكي، ولما سألوها عن سبب بكاءها قالتلهم إنها هربانة من بيتها عشان أهلها عايزين يجوزوها لواحد هي مش عايزاه، واثنا ما كانوا بيتكلموا معاها لقوا أهل البنت جُـم بسرعة، والبنت جريت منهم بس وهي بتجري كان الفستان بتاعها بيترفع

ورجلها بتبان، وظهرت رجلها الي كانت على شكل رجل المعزة، الأطفال خافوا جداً ومشوا بعيد، قابلهم راجل شرطي قالمهم بتجروا من إيه؟ قالوله إن فيه بنت بتجري من أهلها ورجلها رجل معزة، راح الراجل ضحك وقالمهم إيه المشكلة؟ انتوا قصدكم رجلها زي دي؟ وراح رافع البنطلون وطلع لهم رجله الي كانت نفس رجل البنت بالظبط وكمان مسلوخة وشكلها مربع جداً، جريوا منه بسرعة وسابوه، بس قالوا إنه كان بيجري وراهم نفس جرية المعزة بالظبط!!

أما حكاية أبو رجل مسلوخة الأصلية فهي بتعود لتمثال قديم جداً، ولو تفتكر عادل إمام لما قال للسائحة الي كانت معاه في فيلم "عريس من جهة أمنية" إن إله "بس" إله -المسخرة- زي ما هو قال، أما في الأصل بقى إنه في الدولة المصرية القديمة كان فيه فعلاً إله أسمه "بس" وكان إله الفرحة والموسيقى والسرور عند القدماء المصريين، وإله الأطفال وكان بيرعاهم وبيحافظ عليهم، وقتها طلعت إشاعات عن إن هو دة التمثال الحقيقي لأبو رجل مسلوخة، وأصلاً شكله ملهوش أي علاقة بالأسم الي أطلق عليه "أبو رجل مسلوخة"، شكله غريب يضحك ويخض في نفس الوقت ولكن مش بشع.

ظهر إله "بس" على شكل قزم، رأسه تشبه رأس الأسد، طول إيده غير طبيعي وغير متناسق مع باقي جسمه، عنده بطن منتفخة، بمجرد ما تتخيل الشكل كله مع بعض كدة تحس إن فيه حاجة غلط!!

ولكن دكتور "زاهي حواس" وزير الآثار سابقاً كان ليه رأي تاني، صرح وقال إن كل ما يقال عن إله "بس" وأبو رجل مسلوخة ما هو إلا خرافات من الشعب المصري لا أكثر ولا أقل، وأنه كلام ملهوش أي أساس من الصحة وكلها أساطير شعبية لكن الحقيقة فين؟؟ ممكن نسأل "عساس الدار" وهو يقولنا.

طيب مين هو عساس الدار دة؟

في أثناء جولتنا في أساطير العالم كله هنعدي على الجزائر كدة على الماشي ونعرف من أهل الجزائر مين هو عساس الدار أو زي ما يقولوا عليه صلاح الدار.

"عساس الدار" - أسطورة جزائرية -

عساس الدار أو صلاح الدار هو حاجة زي عندنا كدة في مصر ما بنقول "عمّار البيت"، هو بالنسب لهم مصطلح بيطلقوه على نوع من أنواع الجن، ولكن هما في اعتقاداتهم إنه جن مسالم ويساعدهم، وكمّان شافين إنه بيحرس بيوتهم وعادي جداً لو ماشيين كدة في البيت لمحوه!!

يقولوا إنه ساعات بيظهر على شكل أطفال وساعات راجل كبير، وفئة كبيرة جداً من الجزائريين متأكدين من إنه موجود فعلاً ويشوفوه ويتكلموا معاه، ولما سألوا أهل الجزائر كل واحد حكي قصة ليه مع عساس الدار، ولكن الغريبة هما كانوا بيتكلموا عن موافقهم لما يشوفوه كأنهم شافوا شخص عادي جوة الشقة، دة لو فيه راجل غريب جوة الشقة كانوا هيتخضوا أكثر من كدة، الموضوع بالنسب لهم مش مُرعب إطلاقاً، هما بيسيولوا البيت لما ينزلوا ومتأكدين إنه هيحافظ عليه، ويقولوا إنه طيب ومُسالِم ومستحيل يأذيك غير لما تبدأ بالأذية أنت الأول.

"الدمية أوكيكو المسكونة" - أسطورة يابانية -

قصة الدمية الأسطورة دي تشبه قصة الدمية أنابيل، بس باختلاف بعض الأشياء.

كان فيه ولد عنده ١٧ سنة اشترى لأخته الصغيرة الى اسمها "أوكيكو" دمية لعبة صغيرة، وبسرعة البنت اتعلقت تعلق رهيب بالدمية دي وفضلت تلعب

معها وتحطها في أوضتها، بس بعد مرور فترة قصيرة دخلوا على أوضة البنت دي لقوها مدبوحة!!

والدمية مختفية، وبعد أيام ظهرت الدمية تاني والأهل قرروا يحتفظوا بيها كذكرى لبنتهم الوحيدة، وبمرور الوقت بدأوا يلاحظوا حاجات غريبة بتحصل، زي مثلاً شعر الدمية بيطول!

الدمية كان شعرها قصير، ازاي بقى طويل كدة؟ وفضل يطول ويطول أكثر، وهما قصوا شعرها وبرضو طول تاني بعد فترة، أهل البنت استشاروا بواحد من الكهنة عشان يشوف موضوع الدمية الغريبة دي، قالهم إن روح بنتهم كانت متعلقة قوي بالدمية دي، والظاهر إن الروح دخلت جوة الدمية بسبب تعلقها الشديد بيها ..

مش مصدقني صح؟؟ طب اتفضل روح اليابان وادخل المعبد اللي معروضة فيه الدمية دي وهتلاقها موجودة، وكم إن شعرها زمانه وصل لحد رجليها، لأن في عام ١٩٣٨ أهل البنت اتبرعوا بالدمية المسكونة دي كهدية لأحد المعابد، وهي معروضة هناك لحد الآن، حتى العمال كل ما يلاقوا شعرها طول بزيادة بيطلعوها يقصوا شعرها ويرجعوها تاني.

دايماً في الأساطير بيكون في صورة معينة ليهم في دماغنا ولكن لما بنيجي نعرف الحقيقة بنلاقي إن الحقيقة مختلفة تماماً عن الصورة اللي في دماغنا، زي إيه مثلاً ؟ زي إن دراكولا في الأصل مش مصاص دماء.

"دراكولا" -أسطورة مُعترف بيها من جميع شعوب العالم-

اسمه الحقيقي "فلاد الثالث المخوزق"، ولكن دراكولا هو اسم عيلته، من

مواليد مدينة سيغيوشوار، رومانيا اعتبرته بطل وطني لأنه قدر يسيطر على الاجتياح العثماني، حكم في فترة ١٤٥٦ و ١٤٦٢ ، ما الراجل جميل أهو أمال هما ليه رابطين اسمه بمصاصين الدماء؟

يرجع إطلاق لقب المخوزق على فلاد الثالث بسبب استخدامه الخازوق في التعذيب والتخلص من أعدائه وأسرى الحرب، ودة اللي أعطاه شهرة تاريخية واسعة، وذاع صيته متخطياً حدود إمارته ، لحد ما وصل للإمبراطورية الرومانية المقدسة غرباً ودوقية موسكو شرقاً، والأخبار بسرعة انتشرت في كل أرجاء القارة الأوروبية، ويُقدّر عدد ضحاياه بعشرات الآلاف، وكمأن مثّلت شخصية «فلاد الثالث دراكولا» النواة اللي نسج حولها الروائي الإنجليزي برام ستوكر شخصية "الكونت دراكولا"، مصاص الدماء الأشهر، في روايته الصادرة عام ١٨٩٧ تحت عنوان "دراكولا".

فلاد الثالث المخوزق كان مشهور ومعروف بطريقته الوحشية وأساليب قتله اللي مافيهش أي نوع من أنواع الرحمة، دة كمان كان بيرمي اللي بيقتلهم في الطريق لمكان إقامته، يعني تخيل حد رايح عنده وهو شايف الطريق كله جثث مقتولين بأبشع الطرق!!

ومن هنا اتوجدت أسطورة دراكولا، المتعلقه بالوحشية والقتل ومص الدماء.



أما اللي أخذ لقب دراكولا من بعده، هو شخصية خيالية من صُنع الأفلام، وكانت شخصية بتحب تقتل الناس وتشرب دمهم، وانتشرت بعدها الشخصية الوهمية دي وأصبحت موجودة في كل الأفلام العربية والأجنبية، لكن في الأصل.. دراكولا مش مصاص دماء.

أساطير العالم كثيرة ومش بتخلص، ولكن في عالم الأساطير حاولت ابسطلك وأسرد لك أهم أساطير العالم على مَرّ التاريخ، هل كل الأساطير دي حقيقية ولا خيال، العلم عند الله، أي أسطورة من الأساطير اللي اتكلمنا عنهم، مفيش عنهم أي حقيقة مثبتة وصحيحة ١٠٠٪.. وكل ما الخوف يزيد الأقاويل تزيد، إلى ما لا نهاية.

"تمت"

الفصل الثامن

" يقول دكتور رعب عندما تحاول إقناع شخص ما بأنك رأيت نفس الحدث عدة مرات من قبل بأدق التفاصيل، ولم يصدقك! فأعلم أن الموضوع يستدعي جهد وتفكير أكثر من القدر المستطاع، لأن هذه العادة تعتبر ضمن باقي العادات التي أثبتت بأن الروح البشرية كانت موجودة في جسد بشري آخر من قبل، وأنه رأى نفس الحدث الذي جعلك تتمعن فيه، وليست صدفة أبداً".

هذا الفصل للكاتبة/ أمنية سعيد الجبالي.

مواليد ٢٠٠٣ من محافظة سوهاج

قامت بالمشاركة في كتاب "دكتور رعب ٢" بقصة قصيرة تحت عنوان "بداية النهاية".

وقامت بكتابة الفصل الثامن في كتاب "دكتور رعب ٣".

الإهداء

إلى نفسي المستقبلية، أتمنى أن تكون في المكان الذي حلمنا به دومًا، أتمنى أن تكون
الآن أقوى وتخطيت كل شيء ولم تستسلمي، أراك في الوقت المحدد.

"عالم ناسخة الأرواح"

هي روح الإنسان بتروح فين بعد ما بيتوفى؟

يعني إيه لما الشخص يتوفى روحه بتخرج منه وتدخل في شخص جديد حديث الولادة؟ مستغربش لأن دة بالظبط اللي حصل لعائلة "بولوك" ..

"عائلة بولوك"

هُم عائلة من إنجلترا، تحديداً مدينة هيكسهام، العائلة مكوّنة من الأم "فلورانس بولوك"، والأب "جون بولوك"، وبتتين وهما "جوانا" عندها ١١ سنة، و"جاكلين" ٦ سنوات، البنتين رغم فرق السن بينهم إلا أنهم كانوا مُقربين جداً من بعض وكأنهم توأم، حتى إن "جاكلين" كانت دايمًا بتسمع كلام "جوانا" في أي حاجة وميفترقوش أبدًا عن بعضهم، لكن فيه حاجة محسّاهم بالحزن دايمًا، وهي إن "جوانا" كان عندها شعور دائم إنها مش هتكمل حياتها بسلام وأمان أبدًا، وكانت دايمًا تقول لأُمها إنها مش هتشوفها في يوم من الأيام وهي كبيرة وهتموت قريب، أمّا عن الأم فكانت زي أي أم، بتنفي الكلام دة وتطمئنها أعتقداً منها إنه بس مجرد كلام أطفال، وبالرغم من غرابة الأختين إلا إنهم كانوا عائلة بسيطة ومستقرة، وعاشين في سلام، لحد ما جه اليوم اللي غير كل حاجة بعده، يوم ٥ / ٥ / ١٩٥٧.

خرجت العائلة وكانت في طريقها لحضور قداس يوم الأحد في الكنيسة في مدينة "ويتلي باي"، والطفلتين كانوا يلعبوا في الطريق مع صديقهم "جاك" كعادتهم، وبيتسابقوا في الشارع، والأب والأم ماشيين وراهم في سعادة، ولكن

اتقلبت كل الموازين في لحظة، وتحولت سعادة الأب والأم لرعب وخوف، بحيث ظهرت عربية من العدم سريعة جداً ماشية في اتجاه البنتين، وبدون مقدمات فجأة العربية خبطتهم بكل قوة وللأسف جونا وجاكلين توقفوا فوراً والشارع كله بقى عبارة عن بركة دم، أهلهم مكنوش مصدقين الي شايفينه، مشاعرهم اتضاربت ما بين الخوف والصدمة والحزن، ودة لأن الي شافوه مفيش حد يستحمله، وفي وسط الشعور بكل ما هو متعلق بالحزن والخوف راودهم الأحساس بالندم، لأنهم للأسف ملحقوش يحذروهم من العربية الي جاية عليهم.

لكن العربية كانت ماشية في باقي الشوارع بسرعة هيسيرية لدرجة إنها خبطت كذا عامود نور والعربية تعطلت، ومن حُسن الحظ إن كان فيه عربيات شرطة في الشارع دة وتم القبض عليها فوراً واتضح إنها واحدة ست...!!

وثناء التحقيق معاها اكتشفوا إن الحادث عن عمد نتيجة لحقد مش أكثر، لأنها غيرت مسارها ناحية الأطفال، ولما اتسألت عن الهدف من دهسها للأطفال قالت إنها خسرت حضانة أطفالها في نفس اليوم، وكانوا بنتين وولد بنفس أعمار جاكلين وجونا وجاك، وإنها لما شافتهم مستحملتش تشوف أطفال وعائلة سعيدة، فقررت إنها تنهي لحظة السعادة الي كانت موجودة، وتبدل المشهد الي قدامها من أسرة سعيدة لأسرة بائسة.

الأب كانت حالته بائسة فعلاً وكان على حافة الجنون، ورافض فكرة إن أطفاله ماتوا إطلاقاً، دة غير الهلوسة الي بدأت تهاجمه، وطبعاً بدأ يحس بوجودهم حواليه في كل مكان، والموضوع موقفش لغاية هنا بس، لأ دة في يوم حكى لمراته إنه شاف رؤية وهو نايم بأن أطفاله عايشين وبي لعب معاهم بس ملاهمم مختلفة حبتين، وكان عنده يقين إن أطفاله هيرجعوا مرة تانية للحياة، كلام غير منطقي بالمرّة مش كدة؟ أما عن الناحية الثانية ف الأم كانت حزينة ولكن مؤمنة بالقضاء والقدر.

وبعد سنه من الحادثة حصلت حاجة غريبة، الأم أصبحت حامل !! والدكتور قال إن اللي في بطن الأم هي طفلة، ولكن المفاجأة لما الأم ولدت اتضح إنهم طفلتين توأم، رغم تأكيد الدكتور إنها طفلة واحدة بس، ولكن القدر كان ليه رأي ثاني، وبالفعل اتولدوا الطفلتين وسمّوهم "جينفير" و"جيليان"، سُكان المدينة كلها بقى عندهم سعادة غير طبيعية خصوصاً إن التوأم كانوا يشبهوا الطفلتين جونا وجاكلين اللي اتوفوا بنسبة كبيرة، والأغرب إن جاكلين المتوفية كان عندها وحة على خصرها من الجانب الأيسر، ووحة عند عيناها، و"جينفير" حديثة الولادة عندها نفس الوحيتين في نفس المكان، وزاد الأمر غرابة لما التوأم بدأوا يعملوا نفس تصرفات وكلام الأخنتين اللي توفوا، بدأوا يسمّوا الألعاب بتاعتهم بنفس اسماء ألعاب الأخنتين الأولائين، وكمان بقوا يسألوا عن ألعابهم القديمة اللي هي ألعاب جاكلين وجونا في الأساس.

"جونا" المتوفية كانت مهتمة بالمرح والتمثيل، العجيب إن برضو "جيليان" الطفلة عندها نفس الاهتمام بالمرح والتمثيل، والتوأم عموماً كان عندهم نفس اهتمامات ونفس ذاكرة الأخنتين اللي ماتوا، حتى أنهم فاكرين يوم الحادث بكل تفاصيله، لدرجة إن البنتين كان عندهم رعب غير مبرر من السيارات أو أنهم يعدوا الطريق، مش غريبة شوية دي؟ على الرغم من إن الأهل المذكروش أي شيء عن الأخنتين قدام التوأم ولا قالولهم إن كان عندهم أخوات توفوا أصلاً، الموضوع غريب ومُخيف، الأب كان مؤمن جداً إن البنتين رجعوا في جسد التوأم خصوصاً إنه كان رافض موتهم وإنه كمان حلم إنهم هيرجعوا، بس ازاى؟ هودة ممكن يحصل في الحقيقة؟! كل شيء جايـز.

العالمان "ايان ستيفينسن" و الدكتور "بانجيرى"، هم عالمان في علم النفس، وثّقوا قصة التوأمين "بولوك" وعملوا مقابلة معاهم بأستخدام جهاز كشف الكذب، والتوأم وقتها كانوا ٤ سنين فقط، العلماء سألوهم عن أشياء تخصّ

الأختين الي توفوا والعجيب ان التوأم جاوبوا على كل الأسئلة صح، والجهاز أثبت إنهم صادقين، بل وقالوا تفاصيل كثير عن الأختين وعن حياتهم وهواياتهم، والغريب أكثر إن في آخر التحقيق لما الدكتور يسألهم عن أساميهم قالوله إحنا "جوانا" و"جاكلين" !!!

والسؤال هنا، هما عرفوا التفاصيل دي ازاى وهما مشافوش الأختين أو حتى اتحكا لهم عنهم؟

قد يبدو الموضوع غريب لحد ما تعرف إن قصة التوأم بولوك اتوثقت تحت عنوان (تناسخ الأرواح)..

ممكن ماتكونش سمعت عنه قبل كدة، أو سمعته بس متعرفش هو إيه بالضبط، مُهمتي بقى إني هشر حلك كل حاجة بالتفصيل هنا..

خليني في الأول اشر حلك "الحدث" الي حصل للتوأم بولوك.

الي حصلهم دة نظرية اسمها تناسخ الأرواح، ودة مفهومه العام هو انتقال الروح من جسد لجسد آخر بعد الموت، يعني الروح بتفضل تعيد دورة الحياة من جسد لآخر وكأنها بتمشي في حلقة لا نهاية لها، باختصار كدة يعني خروج الروح من الجسد بعد الموت وانتقالها لجسد آخر لطفل حديث الولادة، عشان تبدأ حياة جديدة للروح، مفيش شروط لانتقال الروح، يعني مش لازم يكون نفس النوع أو العرق أو الدين أو حتى المكان أو الكون، فكرة تناسخ الأرواح الي بتقول إن أرواحنا أو أنفسنا تبعث بعد الموت في جسد جديد وتستمر إلى ٣٠٠٠ سنة على أقل تقدير وبعد كدة تموت الموتة الأخيرة، فيه أبحاث كثير اتعملت على نظرية التناسخ وأسباب حدوثها والظواهر بتاعتها، المفهوم المختصر للجزء دة إن الجسد ما هو إلا قميص للروح، وباستطاعة الروح تغيير الجسد بعد الموت.

نظرية تناسخ الأرواح موجودة منذ بداية الخلق، بدايتها ظهرت في الديانة الهندوسية، فمن لا يؤمن بالتناسخ يعتبر خارج عن الديانة، بس مش الديانة الهندوسية هي الديانة الوحيدة الي بتؤمن بالتناسخ لأ، دة مع تأسيس الديانة البوذية كمان في القرن الخامس قبل الميلاد في الهند اعتنقوا فكرة التناسخ بمفهوم ثاني، ومفهومهم للتناسخ قائم على انتقال النفس من جسد لآخر، لتصحيح الأخطاء والوصل إلى الكمال والتطهر من الرذائل الدنيوية حتى يصل لمرحلة "النيرفانا" وهي تعني "السلام الروحي التام والخلو من المعاناة" يعني الذوبان في الروح الكلية، وقتها النفس هتنتهي من دوامة تعاقب الأجيال وهتكون مؤهلة للوصول للعالم العلوي أو إلى عالم آخر، دة غير إن البوذيين لا يؤمنوا بالروح ككيان منفصل وإنما يؤمنون بالنفس، والموضوع مكش في الهند بس، بل إن فكرة التناسخ وصلت لبلاد اليونان في القرن السادس قبل الميلاد، ومن اعتنقها هو "فيثاغورس"، ولكن بمفهوم آخر، مفهوم "فيثاغورس" عن التناسخ هو إن الروح تقدر تنتقل مش بس في الإنسان لأ دة كمان في الحيوان والنبات، لكن في الجزء دة فيه جدل، لأن الهنود بيعتقدوا إن "فيثاغورس" أخذ فكرتهم، ولكن "فيثاغورس" في الحقيقة أخذها من المصريين القدماء، الي كانوا بيؤمنوا جدًا بالتناسخ، وفيه مقولة للشهير "ستاني" وهو عالم وفيلسوف مُسلم بتقول "ما من ملة إلا وللتناسخ فيها قد راسخ".

مش غريبه شوية لما عالم مُسلم يعتنق فكرة التناسخ؟ لسة أنت برضو مش مقتنع بفكرة تناسخ الأرواح؟ طيب خليني أقولك إن فيه جُزء كبير من المسلمين مؤمنين بوجود التناسخ، وهم طائفة الموحدين الدروز، ودول طائفة كبيرة مؤمنين بتوحيد الإله، واسمهم في الأصل "بنو معروف" ولكن أطلق عليهم اسم "الدروز" نسبةً إلى "نشتكين الدرزي" الي انشق عن الدعوة وهرب إلى لبنان ينشر دعوته هناك، على عكس أهل السُنّة الي بيرفضوا الفكرة ويعتبروها مُحَرّمة، وعشان كدة

في صدام كبير بين أهل السنة والموحدين الدروز على تفسير بعض آيات القرآن،
واللي كانت بتقول..

(كَيْفَ تَكْفُرُونَ بِاللَّهِ وَكُنتُمْ أَمْوَاتًا فَأَحْيَاكُمْ ثُمَّ يُمِيتُكُمْ ثُمَّ يُحْيِيكُمْ ثُمَّ إِلَيْهِ تُرْجَعُونَ) "البقرة: ٢٨"

ودة مش بس في الإسلام، لأ دة في المسيحية كمان في طائفة اسمها الأطهار
المسيحية مؤمنين جداً بالتناسخ وبرضو بيختلفوا في تفسير بعض آيات الإنجيل،
معنى كدة إن التناسخ موجود في كل ديانة على الأرض، بل في ديانات يعتبر هو
الشرط الأساسي لا عتناقها، وكل ديانة أو مذهب وليه تعريفه الخاص عن التناسخ،
زي مثلاً البوذية والهندوسية والمايا والإنكا والجاينية، وموجود كمان في اليهودية
والشيعة والصوفيين والطاوية.

الموضوع غامض وكبير كل ما هتدور في ديانة هتلاقي تناسخ الأرواح موجود
بصورة مختلفة بس بنفس القاعدة الأساسية، وهو إن الجسد مجرد قميص للروح،
والاختلاف على النظرية دي كبير ومحدث قادر يحسمه لكن مين عارف، ممكن
يكون الجدل على التناسخ محسوم في كون آخر أو زمن آخر.

طيب كل قصص تناسخ الأرواح بتحصل في بلاد الغرب ومناطق بعيدة عننا،
ليه مبتحصلش في مصر؟

آه أنت مسمعتش عن قصة "أم سיתי" بقى..

١٦ يناير سنة ١٩٠٤ أتولدت بنت في لندن اسمها (دوروثي إيدي) وعاشت
حياة طبيعية جداً مع أهلها لحد ما وصلت لسن ٣ سنين يعني في سنة ١٩٠٧ ،
حصل إيه بقى للبننت؟ البنت وقعت من على السلم على رأسها واتخبطت خبطة
شديدة لدرجة إن قلبها وقف وحاولوا يفوقوها أكثر من مرة وفشلت كل

المحاولات وبقت بشكل رسمي مينة.

بس الغريب إن بعد ساعتين تقريباً البنت فاقت وخرجت من الأوضة وبقت تتحرك وتجري بشكل طبيعي وكأن مفيش أي حاجة حصلت، ورجعت حياتها طبيعية تاني، لحد ما وصلت لسن ٤ سنين وبدأت البنت تنجذب للحضارة الفرعونية المصرية بشكل مش طبيعي لدرجة إن والدها خدها المتحف المصري البريطاني، وبمجرد ما دخلت البنت وشافت أشكال التماثيل والمعروضات المصرية فرحت لدرجة إنها وقفت قدام تمثال مصري وبدأت تبوس رجل التمثال دة وتقول إن دول أهلها، بس طبعاً أهلها قالوا إن دي لسة طفلة صغيرة وأكد مش فاهمة ومحطوش كلامها في دماغهم، والموضوع عدى ومحصلش حاجة، لحد ما البنت كبرت شوية وبدأت تحلم إنها بتتمشي بين حدائق حوالها أعمدة غريبة من الصخر وبقت تشوف حياة تانية مختلفة تماماً عن الحياة اللي في عالمنا دلوقتي، وفي البداية أهلها أقنوعها إن دة مجرد "اتصال روحاني" بينها وبين حياة الفراعنة مش أكثر، بس لما كبرت دوروثي ووصلت لـ ٢٠ سنة بدأت تدرس علم "المصريات" وقعدت تقريباً ٥ سنين بتدرس فيه مع نفسها من غير ما تعرف أي حد من أهلها، وفي سنة ١٩٣١ قررت إنها هتسافر وتزور مصر، وهنا عرفت واحد اسمه "إمام عبد المجيد" ودة كان أستاذ إنجليزي والتجوزته سنة ١٩٣٣ وعاشت معاه في القاهرة وخلفوا طفل، قررت دوروثي تسميه "سيتي" ودة اسم "فرعون مصري" في الأسرة الـ ١٩، المهم بعد فترة بدأت دوروثي تتصرف بشكل مُرعب يعني مثلاً تقوم فجأة من النوم تمسك ورقة وقلم وتبدأ تكتب كلام "هيراوغليفي" وكانت بتكتب أكثر من ٧٠ صفحة وهي نائمة ومش حاسة بنفسها، ولما سألتها جوزها في مرة عن الموضوع دة قالتله إنها بتستعيد الدليل الروحاني ليها عن طريق خادم اسمه "حور رع" بيسجي ليها بالليل ويساعدها في استرجاع ذكرياتها القديمة، وقالته إنها كانت عايشة أيام الفراعنة واسمها "ودعا بنتريشيت" وانتحرت، وطبعاً لما عرف

عبد المجيد حكاية مراته انفصل عنها وسافر العراق وفضلت هي في القاهرة، وقصتها أنتشرت جدًّا وبقت معروفة بأسم "أم سיתי" لدرجة إن الصحافة اهتمت بالموضوع وقدرت تعرف قصة دوروثي .

إيه هي قصتها بقى ؟! بتقول دوروثي إنها "ودعا بنتريشيت" وكانت عايشة سنة ١٢٧٩ قبل الميلاد في حكم "سيتي الأول" ولما بقى عندها ٣ سنين ماتت والدتها؛ أبوها مقدرش يتحمل مصاريها وعاشت في معبد اسمه "كوم السلطان" وبقت كاهنة، ولما تمت ١٢ سنة سألها الكاهن الأعلى وخيرها بين إنها تفضل كاهنة "عذراء" في المعبد أو تنفصل للعالم الخارجي، ووقتها قررت إنها تكمل ككاهنة، بس حصل بينها وبين الملك سيتي قصة حب وبقت حامل منه، ولما عرف الكاهن الأعلى بالموضوع حكم عليها بالإعدام، فقررت إنها تتحرر بس سابت وصية للملك "سيتي" وقالتله إنهم هيقدرُوا يتواصلوا تاني مع بعض في حياة تانية، والملك سيتي كان بيحبها وقرر هو كمان إنه هيعمل كدة، وبتقول إنها تجسدت تاني في جسد "دوروثي لويز إيدي"

طبعا أنت تفتكر إن الحكاية دي مش واقعية صح ؟!.

لو أنت فاكِر كدة أَحَبَّ أصدَمك وأقولك إن دوروثي قالت للعلماء على أكثر من مكان كانت بتعيش فيه، وبعد الحفر والتنقيب تحت الأرض كانوا بيلاقوا الأماكن دي موجودة فعلاً زي ما وصفتها بالظبط، وقدرت توصل العلماء لآثار ومعابد أثرية كثير جدًّا مكش حد يعرف عنها حاجة، وساعدت هيئة الآثار الإنجليزية في مصر على اكتشاف أكثر من جنينة وحديقة ومعابد، وكل الحاجات دي كانت بتعلم بيها دوروثي وبتروح تقولها للعلماء، وقدرت توصلهم لنفق تحت الحدائق كانوا بيتجمعوا فيه ووصلتهم مكتبة خاصة فيها كتب كثير جدًّا كانت للكهنة والفرعون، وحكتلهم حاجات عن أبو الهول مكش حد يعرفها، ودوروثي

حققت أكثر من شيء خرافي، لدرجة إن دوروثي أتعملها قرية سياحية جنب "معبد سيّتي" وبقي السياح تيجي من كل مكان في العالم تتصور معاها ويسمعوا حكايتها المرعبة وفضلت دوروثي عايشة هنا لحد ما ماتت ٢١ أبريل ١٩٨١ ، الغريب في الموضوع إن كل علماء الآثار والدكاترة النفسيين صدقوها ومحدث فكر إنه يكذبها ولو لمرة.

هااا لسة مقتنعتش؟ طيب ركّز في اللي جاي كدة وهجيبك الناهية..

أنت فكرت قبل كدة إيه سبب خوفك الغير مُبرر من بعض الأشياء أو ما يُسمّى بالفوبيا، خوفك الرهيب من شيء مُعين بدون سبب واضح، يعني مثلاً متعرضتش لحادثة عربية بس عندك فوبيا من العربيات، أو خوفك الرّهيب من البحر والمية والمصايف، أو حتى خوفك من المرتفعات.

طيب عمرك فكرت أنت ليه مثلاً مُنْجذب لثقافات حياة معينة؟ أو ستايل لبس مُعين، أو مثلاً حُبك لآلة موسيقية معينة من غير ما تجربها حتى، مفكرتش قبل كدة إيه سبب ارتياحك لمكان أو أشخاص أول مرة تشوفهم لكنك حاسس كأنك تعرفهم؟ كل الاسئلة دي دلالات على حدوث التناسخ، تعالى أفسر لك كل دليل لوحده..

"الوحمة"

في نظرية بتقول إن الوححات في جسم الإنسان دلالة على حدوث تناسخ، وإن ممكن يكون سبب الوحمة دي إن الجسد اللي كانت فيه الروح قبلك تعرّض لحادث في الجزء دة من جسمه فظهرتلك على هيئة وحمة، أو إن الجسد كان فيه الوحمة دي فانتقلت ليك أنت، بمعنى إن الروح بتاخذ من كل حياة سابقة علامة وتنقلها للحياة الجديدة ويمشي الحال بالطريقة دي، ودة مش كلام جرايد لأ دة فيه علماء كتير وباحثين اثبتوا إن الوحمة أو العلامة اللي في جسمك دي هي عبارة عن سبب

موتك في الحياة السابقة، بمعنى إن لو فيه وحة على شكل بقعة في بطنك فدة دليل إنك اتقتلت في الحياة السابقة بسكين أو طلقة.

"الكوابيس"

الكوابيس والأحلام المتكررة من دلالات التناسخ، متستغربش إحنا في الواقع بنسى ٩٠٪ من الأحلام اللي بنحلمها بس فيه أوقات بنصحى فاكرين الحلم أو الكابوس بشكل واضح وكأننا بنتفرج على مشهد في فيلم، زي مثلاً تحلم إنك بتزور مكان معين أنت عمرك ما روحته، بس بتحلم بكل تفصيلة فيه، بس في الواقع دة مش حلم، المؤمنين بالتناسخ بيشفوا إن الكوابيس هي صدمات في الحياة السابقة، والأحلام الواضحة أو المتكررة دي بتكون أجزاء من حياتك في الحياة السابقة.

"الديجافو"

هو أحساس إنك تتعرض لمواقف وتحس إنك اتعرضتلها قبل كدة، أو تروح مكان وتكون عارف كل تفصيلة فيه كأنك كنت في المكان دة قبل كدة رغم إنك متأكد إن دي أول مرة تزور المكان دة، طيب مفكرتش إنه ممكن يكون المواقف دي من حياتك السابقة، ولما اتكرر موقف مماثل ليها ذكريات الموقف رجعتك بطريقة مشوشة، ومش ممكن تكون الأماكن اللي أنت عرفت تفاصيلها من غير ما تشوفها قبل كدة هي مجرد أماكن كنت فيها في حياتك السابقة؟!

كل شيء وارد.

"الإنجذاب إلى ثقافة أخرى"

أكيد تعرف حد ييحب ثقافة بلد معينة أو حتى ممكن تكون أنت، زي مثلاً إنك عايش عمرك كله في مصر، بس منجذب لثقافة بلد تانية، رغم إنك عمرك

ما روحتها بس أنت بتحب ثقافتهم ولغتهم وشكلهم، حتى الأكل اللي بياكلوه رغم إنك مجربتش قبل كدة، مش غريبة دي؟ أحب أقولك إنك ممكن في حياتك السابقة كنت عايش في البلد دي عشان كدة منجذب ليهم بدون ما يكون فيه أي سبب.

"الذاكرة الوهمية"

دي معناها في الطب النفسي إنك فاكِر ذكريات كتير في حياتك بكل تفاصيلها، ومشاعرك وقتها وطريقة كلامك وفاكر كل الأشخاص اللي كانوا حواليك وملاحظهم وكل تفصيلة، بس في الواقع مفيش حاجة من اللي أنت فاكِرها دي حصلت بالفعل.

الطب النفسي بيفسرها على إنها ظاهرة تُسمى بـ "الذاكرة الوهمية" بيعملها المخ عشان يوهمك، بس في الواقع دة محصلش على الأقل في حياتك، مش ممكن تكون دي ذكريات من حياتك السابقة عقلك يفكرك بيها، بس ثواني!! هو ممكن الشخص اللي حصله تناسخ يفضل فاكِر حياته السابقة؟ معنى كدة أنه ممكن تفضل ذكريات حياته السابقة موجودة معاه لفترة طويلة..!

"آلام لا تفسر لها"

عمرِك اتصابِت في حاجة أو جالك مرض والعياذ بالله والدكاترة عجزوا عن معرفة سببها أو ألم لا يوجد له تفسير طبي؟ ممكن يعتبروك مصاب بوسواس أو يقولوك مرض أنت مش مصاب بيه، وممكن تكون دي انعكاسات عن أشكال المعاناة اللي تعرضت ليها في حياتك السابقة !

في سوريا (منطقة الجولان) كان فيه طفل عنده ٥ سنين تقريباً بيحكى لأمه

وأبوه عن حياته السابقة وكان دائماً يقولهم إنه مات قبل كدة وكمان يبقى عايزهم يروحوا للمكان اللي اتدفن فيه بعد وفاته، وطبعاً لأنه طفل صغير أهله كانوا يقولوا إن الموضوع طبيعي يعني، بس الطفل مسكتش وبقي يحكي الموضوع كل يوم لأهله وبقي يعيط ويقولهم على المكان اللي هو اتدفن فيه، لحد ما عيلته قررت إنها تهروح للمكان اللي هو بيوصفه دة وراح معاهم، وفعلاً وقف بيهم قدام أرض واسعة كدة وطلب منهم يحفروا هنا، ولما الأهل حفروا في الأرض اتصدموا لما لقوا جثة لشخص مجهول عبارة عن هيكل عظمي، وقتها الطفل فرح وضحك وقالهم إنه مات بضربة فأس على راسه ودة كان سبب الموت، ولما الشرطة جت واستخرجت باقي الجثة من الأرض أكتشفت شيء مرعب...!!

لقت فأس عليه آثار دم مدفون مع الجثة، والغريب أكثر إن الطفل دة عنده وحة كبيرة في راسه وبالتحديد في نفس المكان اللي اتضربت فيه الجثة، بعد ما الشرطة أخذت الجثة عرفت هي لين، وطلعت لشخص اسمه "إيلاي لاش" ولما الشرطة سألو أهل منطقته، قالوا إنه مختفي من ٥ سنين ومحدث يعرف هو فين ولا أي حاجة عنه، والطفل مسكتش على كدة كمان لأ دة بلغ الشرطة عن القاتل وراح معاهم عشان يواجهوه، وطبعاً القاتل أنكر في البداية لأن الموضوع من ٥ سنين وكان اتنسى أصلاً بس الطفل وقف قدامه، وبعد ما القاتل شاف الجثة والفأس اللي أثبت إن عليه بصماته بعد كدة أعترف .. طبعاً محدش متخيل إن الحكاية دي حقيقية وفعلاً حصلت في سوريا !

فيه أفكار بتقول "أننا مش بس بنعيش ١٠٠ عام أو أقل وبنموت بعدها، لأ دة ممكن يعدي في الحياة على زمن كامل بمعدل "١٠٠٠٠" سنة وخلال الزمن دة جسدك يتبدل وتروح لحياة جديدة مختلفة عن حياتك السابقة بجسد جديد بتفاصيل جديدة وعائلة جديدة ووقت وزمان جديد وكل حاجة جديدة في كل مرة ..

كان فيه بنت اسمها "باربرا كارلن" من السويد، البنت دي بمجرد ما بقى عندها ٣ سنين بدأت تقول إنها مش "باربرا" وإنها اسمها "آن فرانك"، وفضلت تحكي لأهلها أحداث من حياتها السابقة، أهلها كانوا بيتضايقوا جداً من القصص دي ويقولوا إنها أكيد قصص خيالية طفولية، ولما كبرت باربرا كانت موهوبة جداً في الكتابة لدرجة إنها نشرت ١١ كتاب وهي عندها ١٦ سنة بس في السويد، وعام ٢٠٠٠ أصدرت كتاب اسمه "وعوت الذئاب أجزاء من حياتين" ودة كتبت فيه قصة حياتها، وكمان قصة حياتها السابقة اللي هي قصة "آن فرانك".

طيب مين هي "آن فرانك" ؟

آن فرانك هي بنت يهودية ألمانية عانت من الاضطهاد في فترة حكم النازيين لألمانيا، ودة اللي خلاها هي وأهلها يهربوا على عاصمة هولندا "امستردام"، ولكن لسوء حظها ألمانيا احتلت امستردام بعدها بفترة قليلة، ودة اللي خلى آن فرانك وأهلها يستخبوا بداخل المبنى اللي كان والدها شغال فيه، ولكن للأسف تم اعتقال آن فرانك وأسررتها كلها، وماتت آن فرانك وهي عندها ١٦ سنة بداخل المعتقل، والوحيد اللي قدر ينجى من اللي حصل هو والدها.

ولما انتهت الحرب العالمية الثانية، رجع والد آن فرانك للشقة اللي كانوا عايشين فيها في امستردام، ولقى بالصدفة مذكرات بنته آن فرانك، راح نشر مذكراتها بعد معاناة كبيرة في كتاب اسمه (مذكرات فتاة صغيرة) ومن ساعتها وأصبحت آن فرانك هي أشهر ضحية من ضحايا ألمانيا النازية، وتم تحويل الشقة اللي كانت ساكنة فيها في امستردام مع عيلتها لمزار سياحي تكريمياً ليها.

دي قصة آن فرانك اللي حصلت قبل ميلاد باربرا بسنين، القصة اللي كانت عارفاها باربرا بالتفصيل من طفولتها، لدرجة إنها في يوم راحت مع أهلها امستردام وهي عندها ١٠ سنين بس، وقدرت تدل أهلها لشقة آن فرانك اللي

كانت مزار، وقد ردت تتعرف على غرفة آن فرانك، بل وبصّدت على الحيطان وقالت وهي بتضحك وكأنها بتفتكر ذكرياتها القديمة "هنا كان موجود صور للفنانين والممثلين".

وفعلًا كلامها كان صحيح، لأن المكان ده كانت آن فرانك معلقة عليه صور للفنانين والممثلين.

فيه دكتور نفسي اسمه "إيان ستيفنسون" درس قصة "باربرا" و ٢٥٠٠ حالة كمان وراح أكثر من بلد في العالم عشان يتكلم مع الأطفال اللي بيقولوا إن ليهم حياة سابقة ولحد دلوقتي البحث شغال في جامعة "فيرجينيا" على إيد دكتور اسمه "جيم تاكر" وكمّان ستيفنسون نشر كتاب اسمه "الحياة قبل الحياة - life before life" وده فيه دراسات وبحوث ٥٠ سنة، وقال أن الأطفال اللي ما بين الـ ٣ - ٥ يبداوا في الكلام عن حياتهم السابقة وطريقة وفاتهم، وقال أن القصص اللي بيقولها الأطفال دايماً بتكون صحيحة وحصلت مع ناس ماتوا فعلاً، ده غير إن فيه أطفال قدرت توصل لأفراد عائلاتهم في الحياة السابقة، وأخيراً الدكتور عمل بحث في ٦ من دول العالم وهما (لبنان والهند وسيريلانكا وتركيا وتاييلاند وميانمار) ولحد دلوقتي البحث شغال مع إن الدكتور مات ومحدث وصل للسر ..

وبعد ما طلع الدكتور "إيان ستيفنسون" وقال إنه درس أكثر من ٣ آلاف حالة ليها علاقة بتناسخ الأرواح من خلال أبحاثه في دراسة مشتركة مع المجتمع العلمي، ده جاب كمان ٢١٠ طفل واستخدم تقنية التعرف على الوجوه عشان يحلل الشبه بين الأطفال دول والأشخاص اللي ميتين، والمفروض متجسدين في جسد الأطفال، ولقى إن نسبة الشبه فوق الـ ٩٠٪ وكمّان لقي إن ٣٥٪ من الأطفال دول عندهم "عيوب وتشوهات" خلقية مرتبطة بجروح مع الأشخاص اللي هما بيفتكرها حياتهم في الحياة السابقة، وقال "ستيفنسون" إن العيوب دي بتظهر عند

الأطفال من لحظة الولادة وبتتطابق في مكانها مع جروح في جسد الشخص المتوفي، يعني لو فيه واحد مات مقتول بطعنة سكينه وعنده جرح في بطنه، الطفل اللي يتولد بيبقى عنده نفس علامة الجرح في شكل وحة، وجاب الدكتور "ستيفنسون" الأطفال دول وخلاهم يحكوا ذكريات عن حياتهم السابقة بس بشرط يتكلموا ما بين ٣٠ لـ ٤٠ كلمة بس، وبعدها أتحقق من كلامهم والنتائج كانت أن ٩٢٪ من البيانات كانت صح !! وبعدها قال "ستيفنسون" هو وعلماء آخرين أن تناسخ الأرواح ظاهرة حقيقية ومثبتة عملياً ..

في أغلب الحالات بتفضل الذكريات موجودة لحد عمر ١٥ أو ١٦ وبعد كدة الشخص بينسى كل ذكرياته القديمة، وفيه حالات تانية بتفضل الذكريات موجودة فيها لحد ما الجسدة يموت وبعد كدة تبدأ روحه حياة جديدة، الموضوع غريب جداً!! ازاى الروح بتنتقل وتنقل معاه مشاعر وطباع وعلامات وذكريات رغم إنه شيء معنوي، أو على الأقل ازاى تنقل الذكريات المتخزنة في عقولنا بدون ما تنقل العقل نفسه، غريبة صح؟ لسة محدش لاقى إجابات على الاسئلة دي، والموضوع بالنسبة للعلم غامض ومحدش فاهم ماهيته.

في يوم من الأيام في أحد الأحياء في سيريلانكا، بدأت الطفلة "بورنيا" اللي عمرها ثلاثة سنوات إنها تتكلم وتقول لأُمها حاجات غريبة، وتسأل عن ناس مش موجودين في البيت ولا من أهل البيت، لدرجة إن أهل البيت اعتقدوا إنها بتتكلم عن أشخاص خيالية في مخها وأن الموضوع كله عبارة عن خيال نابع من طفلة لأصدقاء وهميين، وبعدها الموضوع زاد ومقاش بس مجرد أسئلة، بل تطور لدرجة إن "بورنيا" بدأت تنادي وتدور على الأشخاص الخياليين دول في بيتها

وكأنهم تأييين وهي بتحاول تلاقيهم، أو كأنها هي اللي تأية وبتحاول توصلهم بأي طريقة ممكنة.

خمنت الأم إنها ممكن تكون بتدور على الألعاب بتاعتها وخصوصاً الدُمى، لأن من طبيعة الأطفال إنهم بيسموا الدُمى بتاعتهم بأسماء من خيالهم، ودورت الأم على الدُمى مع بنتها ولما وصلت لهم إدتهم لـ"بورنيا" وافتكرت إن كدة الموضوع خلص، لكنه كان مجرد البداية.

لأن بعد مرور الوقت بدأت "بورنيا" تتكلم على روائح معينة من البخور وتسأل عليها، وتسأل أمها دايماً، "انتوا ليه مش عندكوا النوع دة من البخور" !.

أصبح الموضوع غريب ومُريب، خصوصاً إنها طفلة صغيرة وكان طبيعي الاستعجاب على قدرتها في التمييز بين روائح البخور، والي زاد الأمر غرابة ودَبَّ الشك في قلوب أسرتها إنها بدأت تسألهم عن مكان خلطة البخور اللي هي دايماً بتستخدمها، وبدأت تكلم أمها عن أشياء في مجال الخياطة صعب يفهمها غير شخص خياط.

ظَلَّ الأمر على ما هو عليه لغاية ما كبرت "بورنيا" وراحت المدرسة، وكانت لسة بتدور على الأشخاص الخيالية اللي في عقلها، لغاية ما في يوم وهي راجعة من المدرسة شافت راجل، جريت عليه بلهفة وقالتله "أنت زوج أختي، أختي عاملة إيه هي كويسة؟ هي اتشفت من مرضها؟".

استغرب الراجل من كلام "بورنيا" وخصوصاً إن زوجة الراجل دة فعلاً كانت مريضة، فسألها انتي مين؟! قالتله بكل ثقة "أنا (جيناداسا) أنت مش عارفني".

طبيعي كان تصرف الراجل إنه يخاف ويمشي بعيد عنها.

ولما رجعت "بورنيا" البيت حَكَتْ لأمها على اللي حصل، في اللحظة دي أمها بدأت تتوقع وتحمن إيه اللي بيحصل مع بنتها، خصوصاً لما البنت قالتها إنها عايزة تعرف فين أبوها وأمها، فطبيعي تفهم الأم إن اللي بيحصل مع بنتها ده هو تناسخ الأرواح، وخصوصاً لأن العائلة كانت تعتنق الديانة البوذية.

ومن الوقت ده وبدأت أمها تدي الأهتمام لكلامها وتسألها عن حياتها السابقة، فبدأت "بورنيا" تتكلم وقالت، إنها في الأصل راجل واسمه (جيناداسا) وإنها بتشتغل في صناعة البخور وأحياناً الخياطة وإن عندها خلطة مميزة من البخور، زاد الشك في قلب الأم فسألته عن المكان اللي كانت عايشة فيه في حياتها السابقة وجاوبتها وقالت "كولونيا".

وكان وقتها فيه عائلة واحدة بتسكن في كولونيا معروفة بصناعة البخور.

ده غير إنها قالت هي فاكدة ماتت ازاي في حياتها السابقة، وإنها خبطتها عربية من الجانب الأيسر من جسمها وماتت، في الحالة دي كان لازم الأم تتدخل، وفعلت دورت على بيت (جيناداسا) ووصلته، وراحت هي وبنتها، وبالفعل "بورنيا" اتعرفت على كل أفراد عيلة (جيناداسا) بل وبدأت تسأل على أشخاص مكانوش موجودين في البيت، وبدأت تحكي عن حياتها السابقة وكان كل كلامها صح وحَكَتْ عن تفاصيل التفاصيل في حياة (جيناداسا) وبالفعل ذكرت كل شيء صح حتى قصة موته كانت صحيحة، ومن هنا افتكرت أم "بورنيا" إن بنتها فيه في نص جسمها الأيسر علامة، والعلامة دي في نفس المكان اللي اتصدم في جسم (جيناداسا) وقت وقوع الحادث وموته.

هي دي كل الحكاية، في كل الأحوال أنا مش بقنعك أو بوهملك بموضوع شاغل ديانات وعوالم كبيرة، بل بالعكس ممكن شخص واحد يكون عنده منظور مختلف للموضوع يصلح بيه نظرية مهمة جداً زي نظرية تناسخ الأرواح، وفي النهاية

أحبّ أفكرك إني لا اجزم أو انفي أي شيء مما ذكر، بل مجرد إني بنقل الأحداث وأنت ليك كامل الحرية في إنك تصدق أو متصدقش، ودلوقتي خليني اسألك سؤال، هل تناسخ الأرواح من وجهة نظرك فعلاً حقيقي ولا لا؟!

أنا من وجهي نظري هرد على السؤال بجملة واحدة بس..

(يَا أَيَّتُهَا النَّفْسُ الْمُطْمَئِنَّةُ ارْجِعِي إِلَىٰ رَبِّكِ رَاضِيَةً مَّرْضِيَّةً فَادْخُلِي فِي عِبَادِي
وَادْخُلِي جَنَّتِي)

صدق الله العظيم

"هَمَّ"

"إن جميع ما تم سردهُ في العوالم السابقة مأخوذ من مصادر موثوقة عبر علماء ومفسرين لهذه التجارب والإحداثيات، فإن سقط شيء منّا بغير قصد، فهذا يعني أن المصدر دونه كما هو عليه الآن، لذلك تم سرد أسرار العوالم الغامضة بهذا الشكل لإدراك الحياة بشكل سليم مما حولنا؛ ونحن في انتظار أي مناقشات أو تساؤلات تدور في ذهنك عن جميع العوالم السابقة".

أسرة دكتور رعب..

إذا أردت التواصل فيمكنك إرسال المناقشة والمتابعة عبر هذه المواقع..

عبر الفيسبوك: أحمد طارق التوني.

عبر الانستجرام: dr_horror

عبر اليوتيوب: دكتور رعب - أحمد طارق (Dr.horror).

عبر الصفحة الرسمية للكتاب على فيسبوك: دكتور رعب - Dr. Horror

"تمت بحمد الله".